

Namo tassa bhagavato arahato sammāsambuddhassa

## Vinayavinicchayo

### Ganthārambhakathā

1. Vanditvā sirasā seṭṭham, buddhamappaṭipuggalaṃ;  
Bhavābhāvakaṃ dhammaṃ, gaṇaṇceva niraṅgaṇaṃ.
2. Bhikkhūnaṃ bhikkhunīnaṃ, hitatthāya samāhito;  
Pavakkhāmi samāseṇa, vinayassavinicchayaṃ.
3. Anākulamasamkiṇṇaṃ, madhuratthapadakkamaṃ;  
Paṭubhāvakaṃ etaṃ, paramaṃ vinayakkame.
4. Apāraṃ otarantānaṃ, sāraṃ vinayasāgaram;  
Bhikkhūnaṃ bhikkhunīnaṃ, nāvābhūtaṃ manoramaṃ.
5. Tasmā vinayanūpāyaṃ, vinayassavinicchayaṃ;  
Avikkhittena cittaṃ, vadato me nibodhatha.

## Bhikkhuvibhaṅgo

### Pārājikakathā

#### Paṭhamapārājikakathā

6. Tividhe tilamattampi, magge sevanacetano;  
Aṅgajātaṃ pavesento, allokāse parājito.
7. Pavesanaṃ pavitṭhaṃ vā, ṭhitamuddharaṇampi vā;  
Sasikkho sādiyanto so, ṭhapetvā kiriyaṃ cuto.
8. Santhatenaṅgajātena, santhataṃ vā asanthataṃ;  
Maggam pana pavesento, tathevāsanthatena ca.
9. Upādinnenupādinne, anupādinnakena vā;  
Ghaṭṭite anupādinne, sace sādiyattetha so.
10. Hoti pārājikkakhetto, pavitṭhe tu parājito;  
Khetto thullaccayaṃ tassa, dukkaṭaṇca viniddise.
11. Mate akkhāyite cāpi, yebhuyyakkhāyitepi ca;  
Methunaṃ paṭisevanto, hoti pārājiko naro.
12. Yebhuyyakkhāyite cāpi, upaḍḍhakkhāyitepi ca;  
Hoti thullaccayāpatti, sese āpatti dukkaṭaṃ.
13. Nimittamattaṃ sesetvā, khāyitepi sarīrake;  
Nimitte methunaṃ tasmiṃ, sevatoṇca parājayo.

14. Uddhumātādisampatte, sabbatthāpi ca dukkaṭaṃ;  
Khāyitākkhāyitaṃ nāma, sabbhaṃ matasarīrake.
15. Chinditvā pana tacchetvā, nimittuppāṭite pana;  
Vaṇasaṅkhepato tasmim, sevaṃ thullaccayaṃ phuse.
16. Tato methunarāgena, patitāya nimittato;  
Tāyaṃ upakkamantassa, dukkaṭaṃ maṃsapesiyam.
17. Nakhapitṭhippamāṇepi, maṃse nhārumhi vā sati;  
Methunaṃ paṭisevanto, jīvamāne parājīto.
18. Kaṇṇacchiddakkhināsāsu, vatthikose vaṇesu vā;  
Aṅgajātaṃ pavesento, rāgā thullaccayaṃ phuse.
19. Avasesasarīrasmiṃ, upakacchūrukādisu;  
Vasā methunarāgassa, sevamānassa dukkaṭaṃ.
20. Assagomahisādīnaṃ, oṭṭhagadrabhadantinaṃ;  
Nāsāsu vatthikosesu, sevaṃ thullaccayaṃ phuse.
21. Tathā sabbatiracchānaṃ, akkhikaṇṇavaṇesupi;  
Avasesasarīresu, sevamānassa dukkaṭaṃ.
22. Tesam allasarīresu, matānaṃ sevato pana;  
Tividhāpi siyāpatti, khettasmim tividhe sati.
23. Bahi methunarāgena, nimittaṃ itthiyā pana;  
Nimittena chupantassa, tassa thullaccayaṃ siyā.
24. Kāyasaṃsaggarāgena, nimittena mukhena vā;  
Nimittaṃ itthiyā tassa, chupato garukaṃ siyā.
25. Tathevobhayarāgena, nimittaṃ purisassapi;  
Nimittena chupantassa, hoti āpatti dukkaṭaṃ.
26. Nimittena nimittaṃ tu, tiracchānagatitthiyā;  
Thullaccayaṃ chupantassa, hoti methunarāgato.
27. Kāyasaṃsaggarāgena, tiracchānagatitthiyā;  
Nimittena nimittassa, chupane dukkaṭaṃ matam.
28. Aṅgajātaṃ pavesetvā, tamāvaṭṭakate mukhe;  
Tatthākāsagataṃ katvā, nīharantassa dukkaṭaṃ.
29. Tathā catūhi passehi, itthiyā heṭṭhimattalam;  
Achupantaṃ pavesetvā, nīharantassa dukkaṭaṃ.
30. Uppāṭitoṭṭhamamsesu, bahi nikkhantakesu vā;  
Dantesu vāyamantassa, tassa thullaccayaṃ siyā.
31. Aṭṭhisāṅghaṭṭanaṃ katvā, magge duvidharāgato;

Sukke muttepi vāmutte, vāyamantassa dukkaṭaṃ.

32. Itthiṃ methunarāgena, āliṅgantassa dukkaṭaṃ;  
Hatthaggaḥaparāmāsa-cumbanādīsvayaṃ nayo.
33. Apade ahayo macchā, kapotā dvipadepi ca;  
Godhā catuppade heṭṭhā, vatthu pārājikassime.
34. Sevetukāmatācittaṃ, magge maggappavesanaṃ;  
Idamaṅgadvayaṃ vuttaṃ, paṭhamantimavatthuno.
35. Dukkaṭaṃ paṭhamasseva, sāmantaṃti vaṇṇitaṃ;  
Sesānaṃ pana tiṇṇampi, thullaccayamudīritaṃ.
36. “Anāpattī”ti ñātappaṃ, ajānantassa bhikkhuno;  
Tathevāsādiyantassa, jānantassādikammino.
37. Vinaye anayūparame parame;  
Sujanassa sukhānāyane nayane;  
Paṭu hoti padhānarato na rato;  
Idha yo pana sāramate ramate.
38. Imaṃ hitavibhāvanaṃ bhāvanaṃ;  
Avedi surasambhavaṃ sambhavaṃ;  
Sa māraḷisāsane sāsane;  
Samo bhavatupālinā pālinā.

Iti vinayavinicchaye paṭhamapārājikakathā niṭṭhitā.

### Dutiyapārājikakathā

39. Ādiyanto harantova-haranto iriyāpathaṃ;  
Vikopento tathā ṭhānā, cāventopi parājito.
40. Tattha nānekabhaṇḍānaṃ, pañcakānaṃ vasā pana;  
Avahārā dasevete, viññātabbā vibhāvinā.
41. Sāhatthāṇattiko ceva, nissaggo atthasādhako;  
Dhuranikkhepanaṅcāti, idaṃ sāhatthapañcakaṃ.
42. Pubbasahapayogo ca, saṃvidāharaṇampi ca;  
Saṅketakammaṃ nemittaṃ, pubbayogādipañcakaṃ.
43. Theyyapasayhaparikappa-paṭicchannakusādikā;  
Avahārā ime pañca, veditabbāva viññunā.
44. Vatthukālagghadesa ca, paribhogañca pañcapi;  
Ñatvā etāni kātabbo, paṇḍitena vinicchayo.
45. Dutiyaṃ vāpi kuddālaṃ, piṭakaṃ pariyesato;  
Gacchato theyyacittena, dukkaṭaṃ pubbayogato.

46. Tatthajātakakaṭṭhaṃ vā, lataṃ vā chindato pana;  
Dukkaṭaṃ ubhayatthāpi, vuttaṃ sahapayogato.
47. Pathaviṃ khaṇato vāpi, byūhato paṃsumeva vā;  
Āmasantassa vā kumbhiṃ, hoti āpatti dukkaṭaṃ.
48. Mukhe pāsaṃ pavesetvā, khāṇuke baddhakumbhiyā;  
Bandhanānaṃ vasā ñeyyo, ṭhānabhedo vijānatā.
49. Dve ṭhānāni panekasmiṃ, khāṇuke baddhakumbhiyā;  
Valayaṃ rukkhamūlasmīṃ, pavesetvā katāya vā.
50. Uddharantassa khāṇuṃ vā, chindato saṅkhalimpi vā;  
Thullaccayaṃ tato kumbhiṃ, ṭhānā cāveti ce cuto.
51. Paṭhamaṃ pana kumbhiṃ vā, uddharitvā tathā puna;  
Ṭhānā cāveti khāṇuṃ vā, saṅkhalim vāpi so nayo.
52. Ito cito ca ghaṃsanto, mūle sāreti rakkhati;  
Valayaṃ khegataṃ tattha, karontova parājito.
53. Jātaṃ chindati ce rukkhaṃ, dukkaṭaṃ kumbhimatthake;  
Samīpe chindato tassa, pācittiyamatatthajaṃ.
54. Antokumbhigataṃ bhaṇḍaṃ, phandāpeti sace pana;  
Apabyūheti tattheva, tassa thullaccayaṃ siyā.
55. Haranto kumbhiyā bhaṇḍaṃ, muṭṭhiṃ chindati attano;  
Bhājane vā gataṃ katvā, hoti bhikkhu parājito.
56. Hāraṃ vā pana pāmaṅgaṃ, suttāruḷhaṃ tu kumbhiyā;  
Phandāpeti yathāvatthuṃ, ṭhānā cāveti ce cuto.
57. Sappiādīsu yaṃ kiñci, pivato pādapūraṇaṃ;  
Ekeneva payogena, pītamatte parājayo.
58. Katvāva dhuranikkhepaṃ, pivantassa punappunaṃ;  
Sakalampi ca taṃ kumbhiṃ, pivato na parājayo.
59. Sace khipati yaṃ kiñci, bhaṇḍakaṃ telakumbhiyaṃ;  
Taṃ pādagghanakaṃ telaṃ, dhuvaṃ pivati tāvade.
60. Hatthato muttamatteva, theyyacitto vinassati;  
Āviñjetvāpi vā kumbhiṃ, telaṃ gāleti ce tathā.
61. Telassākiraṇaṃ ñatvā, khittaṃ rittāya kumbhiyā;  
Pītaṃ telañca taṃ bhaṇḍaṃ, uddharantova dhaṃsito.
62. Tattheva bhindato telaṃ, chaḍḍentassa tattheva ca;  
Jhāpentassa abhogaṃ vā, karontassa ca dukkaṭaṃ.

Bhūmaṭṭhakathā.

63. Ṭhapitaṃ pattharivā ca, sāṭakattharaṇādikaṃ;  
Veṭhetvā uddharantassa, mutte ṭhānā parābhavo.
64. Orimantena vā phuṭṭha-mokāsaṃ pārimantato;  
Pārājikamatikkante, kaḍḍhato ujukampi vā.

Thalaṭṭhakathā.

65. Purato mukhatuṇḍaṇca, kalāpaggaṇca pacchato;  
Dvīsu passesu pakkhanto, heṭṭhā pādanakhā tathā.
66. Uddhañcāpi sikhagganti, gagane gacchato pana;  
Morassa cha paricchedā, veditabbā vibhāvinā.
67. Bhikkhu “sassāmikaṃ moram, gahessāmī”ti khegataṃ;  
Hatthaṃ vāpi pasāreti, purato vāssa tiṭṭhati.
68. Moropi gagane pakkhe, cāreti na ca gacchati;  
Dukkaṭaṃ gamanacchede, āmasantassa ceva taṃ.
69. Ṭhānā moramamoto, phandāpeti sace pana;  
Evaṃ phandāpane tassa, thullaccayamudīritaṃ.
70. Aggahetvā gahetvā vā, hatthena pana attano;  
Ṭhānā cāveti ce moram, sayam ṭhānā cuto siyā.
71. Phuṭṭhokāsaṃ mukhaggena, kalāpaggena vā pana;  
Kalāpaggena vā phuṭṭham, mukhatuṇḍena bhikkhu ce.
72. Atikkāmeyya yo moram, ṭhānā cāveti nāma so;  
Eseva ca nayo pāda-sikhāpakkhesu dīpito.
73. Gagane pana gacchanto, kare moro nilīyati;  
Taṃ kareneva cārento, phandāpetīti vuccati.
74. Sace gaṇhāti taṃ moram, itarena karena so;  
Cāvitattā pana ṭhānā, bhikkhu ṭhānā cuto siyā.
75. Itaram pana morassa, upaneti sace karam;  
Na doso tattha uḍḍetvā, sayameva nilīyati.
76. Disvā aṅge nilīnaṃ taṃ, theyyacittena gacchato;  
Pāde thullaccayaṃ hoti, dutiye ca parājayo.
77. Bhūmiyaṃ ṭhitamorassa, tīṇi ṭhānāni paṇḍito;  
Pādānaṇca kalāpassa, vasena paridīpaye.
78. Tato kesaggamattampi, moram pathavito pana;  
Hoti pārājikaṃ tassa, ukkhipantassa bhikkhuno.
79. Chijjamānaṃ suvaṇṇādiṃ, patte patati ce pana;  
Hatthena uddharantassa, tassa pārājikaṃ siyā.

80. Sace anuddharitvāva, theyyacittena gacchati;  
Dutiye padavārasmiṃ, pārājikamudīraye.
81. Eseva ca nayo ñeyyo, hatthe vattheva matthake;  
Taṃ taṃ tassa bhava ṭhānaṃ, yattha yattha patiṭṭhitam.

Ākāsaṭṭhakathā.

82. Theyyacittena yaṃ kiñci, mañcapīṭhādisuṭṭhitam;  
Āmāsampi anāmāsaṃ, āmasantassa dukkaṭam.
83. Saṃharitvā sace vaṃse, ṭhapitam hoti cīvaram;  
Katvā punorato bhogaṃ, tathā antañca pārato.
84. Cīvarena phuṭṭhokāso, ṭhānaṃ tassa pavuccati;  
Na tu cīvaravaṃso so, hotīti sakalo mato.
85. Orimantena okāsaṃ, phuṭṭham tamitarena vā;  
Itarenapi vā phuṭṭham, orimantena vā puna.
86. Dakkhiṇantena phuṭṭham vā, vāmantenitarena vā;  
Vāmantena phuṭṭhaṭṭhānaṃ, atikkāmayato cuti.
87. Uddham vā ukkhipantassa, cīvaram pana vaṃsato;  
Kesaggamatte ukkhitte, tassa pārājikaṃ bhava.
88. Rajjukena ca bandhitvā, ṭhapitam pana cīvaram;  
Thullaccayaṃ vimocento, mutte pārājikaṃ phuse.
89. Veṭhetvā ṭhapitam vaṃse, nibbeṭhentassa bhikkhuno;  
Valayaṃ chindato vāpi, mocentassapyayaṃ nayo.
90. Cīvarassa pasāretvā, ṭhapitassa hi vaṃsake;  
Saṃharitvā tu nikkhitte, cīvare viya nicchayo.
91. Sikkāya pakkhipitvā yaṃ, laggitam hoti bhaṇḍakaṃ;  
Sikkāto taṃ haranto vā, saha sikkāya vā cuto.
92. Kuntādiṃ nāgadantesu, ṭhitesu paṭipāṭiyā;  
Agge vā pana bunde vā, gahetvā parikaḍḍhato.
93. Pārājikaṃ phuṭṭhokāsaṃ, atikkāmayato siyā;  
Ujukaṃ ukkhipantassa, kesaggena parājayo.
94. Pākārābhimukho ṭhatvā, ākaḍḍhati sace pana;  
Orimantaphuṭṭhokāsa-mitarantaccaye cuto.
95. Tattheva parato tassa, pellentassāpi bhikkhuno;  
Bhittim pana ca nissāya, ṭhapitepi ayaṃ nayo.
96. Cālentassa ca tālassa, phalaṃ vatthu hi pūrati;  
Yenassa bandhanā mutte, tasmim pārājikaṃ bhava.

97. Piṇḍiṃ chindati tālassa, sace pārājikaṃ siyā;  
Eseva ca nayo sesa-rukkhapupphaphalesupi.

Vehāsaṭṭhakathā.

98. Gacchato hi nidhiṭṭhānaṃ, padavārena dukkaṭaṃ;  
Udake pana gambhīre, tathā nimujjanādisu.

99. Tatthajātakapupphesu, yena pupphena pūrati;  
Vatthu taṃ chindato pupphaṃ, tassa pārājikaṃ vade.

100. Ekanāḷassa vā passe, vāko uppalajātiyā;  
Na chijjati tato yāva, tāva naṃ parirakkhati.

101. Sāmikeheva pupphesu, chinditvā ṭhapitesupi;  
Pubbe vuttanayeneva, veditabbo vinicchayo.

102. Bhārabaddhāni pupphāni, chasvākāresu kenaci;  
Ākārena sace tāni, ṭhānā cāveti nassati.

103. Ṭhapitaṃ pana pupphānaṃ, kalāpaṃ jalapiṭṭhiyaṃ;  
Cāletvā udakaṃ puppha-ṭṭhānā cāveti ce cuto.

104. Parikkappeti ce “ettha, gahessāmī”ti rakkhati;  
Uddharanto gataṭṭhānā, bhaṭṭho nāma pavuccati.

105. Accuggatassa taṃ ṭhānaṃ, jalato sakalaṃ jalaṃ;  
Uppāṭetvā tato pupphaṃ, ujumuddharato pana.

106. Nāḷante jalato mutta-matte pārājikaṃ bhava;  
Amutte jalato tasmim, thullaccayamudīritaṃ.

107. Pupphe gahetvā nāmetvā, uppāṭeti sace pana;  
Na tassa udakaṃ ṭhānaṃ, naṭṭho uppāṭitakkhaṇe.

108. Yo hi sassāmike macche, theyyacittena gaṇhati;  
Baḷisenapi jālena, hatthena kuminena vā.

109. Tassevaṃ gaṇhato vatthu, yena macchena pūrati;  
Tasmim uddhaṭamattasmim, jalā hoti parājayo.

110. Ṭhānaṃ salilajānañhi, kevalaṃ sakalaṃ jalaṃ;  
Salilaṭṭhaṃ vimocento, jalā pārājiko bhava.

111. Nīrato uppatitvā yo, tīre patati vārijo;  
Gaṇhato taṃ panāpattim, bhaṇḍagghena viniddise.

112. Māraṇatthāya macchānaṃ, taḷāke nadiyāpi vā;  
Ninne macchavisam nāma, pakkhipitvā gate pana.

113. Pacchā macchavisam macchā, khādītva pilavanti ce;  
Pārājikaṃ mate macche, theyyacittena gaṇhato.

114. Paṃsukūlikasaññāya, na doso koci gaṇhato;  
Sāmikesvāharantesu, bhaṇḍadeyyamudīritam.
115. Gahetvā sāmikā macche, sace yanti nirālayā;  
Gaṇhato pana te sese, theyyacittena dukkaṭam.
116. Amatesu anāpattim, vadanti vinayaññuno;  
Eseva ca nayo sese, kacchapādimhi vārije.

Udakaṭṭhakathā.

117. ‘‘Nāvaṃ nāvaṭṭhaṃ vā bhaṇḍam, thenetvā gaṇhissāmī’’ti;  
Pāduddhāre dosā vuttā, bhikkhussevaṃ gacchantassa.
118. Baddhāya nāvāya hi caṇḍasote;  
Ṭhānaṃ mataṃ bandhanamekameva;  
Bhikkhussa tasmiṃ muttamatte;  
Pārājikaṃ tassa vadanti dhīrā.
119. Niccale udake nāva-mabandhanamavaṭṭhitam;  
Purato pacchato vāpi, passato vāpi kaḍḍhato.
120. Ekenantena samphuṭṭha-mokāsamitarena taṃ;  
Atikkāmayato nāvaṃ, tassa pārājikaṃ siyā.
121. Tathā –  
  
Uddham kesaggamattampi, udakamhā vimocite;  
Adhonāvātaṃ tena, phuṭṭhañca mukhavaṭṭiyā.
122. Bandhitvā pana yā tīre, ṭhapitā niccale jale;  
Bandhanañca ṭhitokāso, ṭhānaṃ tassā dvidhā mataṃ.
123. Hoti thullaccayaṃ pubbaṃ, bandhanassa vimocane;  
Pacchā kenacupāyena, ṭhānā cāveti ce cuto.
124. Cāvetvā paṭhamaṃ ṭhānā, pacchā bandhanamocane;  
Eseva ca nayo vutto, theyyacittassa bhikkhuno.
125. Ussāretvā nikujjitvā, ṭhapitāya thale pana;  
Phuṭṭhokāsova hi ṭhānaṃ, nāvāya mukhavaṭṭiyā.
126. Ñeyyo ṭhānaparicchedo;  
Ākāreheva pañcahi;  
Yato kutoci cāvento;  
Hoti pārājiko naro.
127. Eseva ca nayo ñeyyo, nāvāyukkujjitāyapi;  
Ṭhapitāyapi nāvāya, ghaṭikānaṃ tathūpari.
128. Theyyā titthe ṭhitam nāvaṃ, āruhitvā sace pana;  
Arittēna phiyenāpi, pājentassa parājayo.



129. Sace chattam paṇāmetvā, ussāpetvāva cīvaram;  
Laṅkārasadisam katvā, gaṇhāpeti samīraṇam.
130. Āgamma balavā vāto, nāvaṃ harati ce pana;  
Vāteneva haṭṭhā nāvā, na doso koci vijjati.
131. Sayameva ca yaṃ kiñci, gāmatitthamupāgataṃ;  
Acāventova taṃ ṭhānā, kiṇitvā ce palāyati.
132. Avahāro na bhikkhussa, bhaṇḍadeyyamudīritaṃ;  
Sayameva ca gacchantiṃ, ṭhānā cāveti ce cuto.

Nāvaṭṭhakathā.

133. Yānaṃ nāma ratho vayhaṃ, sakaṭaṃ sandamānikā;  
Yānaṃ avaharissāmi, yānaṭṭhamiti vā pana.
134. Gacchato dukkaṭaṃ vuttaṃ, dutiyaṃ pariyesato;  
Ṭhānā cāvanayogasmim, vijjamāne parājayo.
135. Yānassa dukayuttassa, dasa ṭhānāni dīpaye;  
Yānaṃ pājayato tassa, nisīditvā dhure pana.
136. Thullaccayaṃ tu goṇānaṃ, pāduddhāre viniddise;  
Cakkānañhi ṭhitokāsa-matikkante parābhavo.
137. Ayuttakassāpi ca yānakassa, dhurenupatthambhaniyaṃ ṭhitassa;  
Vasenupatthambhanicakkakānaṃ, ṭhānāni tīṇeva bhavanti tassa.
138. Tathā dhurena dārūnaṃ, upariṭṭhapitassa ca;  
Bhūmiyampi dhureneva, tatheva ṭhapitassa ca.
139. Purato pacchato vāpi, ṭhānā cāveti ce pana;  
Thullaccayaṃ tu tiṇṇampi, ṭhānā cāve parājayo.
140. Apanetvāna cakkāni, akkhānaṃ sīsakehi tu;  
Ṭhitassūpari dārūnaṃ, ṭhānāni dve viniddise.
141. Kaḍḍhanto ukkhipanto vā, phuṭṭhokāsaccaye cuto;  
Ṭhapitassa panaññassa, bhūmiyaṃ yassa kassaci.
142. Akkhuddhīnaṃ dhurassāti, pañca ṭhānāni dīpaye;  
Uddhīsu vā gahetvā taṃ, ṭhānā cāveti ce cuto.
143. Ṭhapitassa hi cakkassa, nābhīyā pana bhūmiyaṃ;  
Ekameva siyā ṭhānaṃ, paricchedopi pañcadhā.
144. Phusitvā yaṃ ṭhitaṃ bhūmiṃ, nemipassena nābhīyā;  
Ṭhānāni dve bhavantassa, naṭṭho tesamatikkame.
145. Disvā yānamanārakkhaṃ, paṭipannaṃ mahāpathe;  
Āruhitvā acodetvā, kiṇitvā yāti vaṭṭati.

## Yānaṭṭhakathā.

146. Sīsakkhandhakaṭolamba-vasā bhāro catubbidho;  
Tattha sīsagataṃ bhāraṃ, āmasantassa dukkaṭaṃ.
147. Ito cito ca ghaṃsanto, theyyacittena yo pana;  
Sirasmimyeva sāreti, tassa thullaccayaṃ siyā.
148. Khandhaṃ oropite bhāre, tassa pārājikaṃ mataṃ;  
Sīsato kesamattampi, mocentopi parājito.
149. Bhāraṃ pathaviyaṃ kiñci, ṭhapetvā suddhamānaso;  
Pacchā taṃ theyyacittena, uddharanto parājito.522
150. Ettha vuttanayeneva, sesesupi asesato;  
Bhāresu matisārena, veditabbo vinicchayo.

## Bhāraṭṭhakathā.

151. Dukkaṭaṃ muninā vuttaṃ, ārāmaṃ abhiyuñjato;  
Parājeti paraṃ dhammaṃ, caranto ce parājito.522
152. Vimatiṃ janayantassa, tassa thullaccayaṃ siyā;  
Parajjati sayāṃ dhammaṃ, caranto yopi tassa ca.
153. Sāmīno dhuranikkhepe, “na dassāmī”ti cattano;  
Pārājikaṃ bhava tassa, sabbesaṃ kūṭasakkhinaṃ.

## Ārāmaṭṭhakathā.

154. Vihāraṃ saṅghikaṃ kiñci, acchinditvāna gaṇhituṃ;  
Sabbesaṃ dhuranikkhepā-bhāvato va na sijjhati.

## Vihāraṭṭhakathā.

155. Sīsāni sāliādīnaṃ, nirumbhitvāna gaṇhato;  
Asitena ca lāyitvā, chinditvā vā karena ca.
156. Yasmiṃ bījepi vā vatthu, sīse pūreti muṭṭhiyaṃ;  
Bandhanā mocite tasmīṃ, tassa pārājikaṃ bhava.
157. Acchinno pana daṇḍo vā, taco vā appamattako;  
Vihīnāḷampi vā dīghaṃ, anikkhantova rakkhati.
158. Sace so parikappeti, “madditvā panidaṃ ahaṃ;  
Papphoṭetvā ito sāraṃ, gaṇhissāmī”ti rakkhati.
159. Maddanuddharaṇe natthi, doso papphoṭanepi vā;  
Attano bhājanagataṃ, karontassa parājayo.
160. Jānaṃ kesaggamattampi, pathaviṃ parasantakaṃ;

Theyyacittena ce khīlaṃ, saṅkāmeti parājayo.

161. Tañca kho sāmikānaṃ tu, dhuranikkhepane sati;  
Anagghā bhūmi nāmesā, tasmā evamudīritaṃ.
162. Gahetabbā sace hoti, dvīhi khīlehi yā pana;  
Ādo thullaccayaṃ tesu, dutiyeva parājayo.
163. Ñāpetukāmo yo bhikkhu, “mamedamaṃ santaka”nti ca;  
Rajjumaṃ vāpi pasāreti, yaṭṭhiṃ pātetī dukkaṭaṃ.
164. Yehi dvīhi payogehi, attano santakaṃ siyā;  
Ādo thullaccayaṃ tesu, dutiye ca parājayo.

Khettaṭṭhakathā.

165. Khetto vuttanayeneva, vatthuṭṭhassa vinicchayo;  
Gāmaṭṭhepi ca vattabbaṃ, apubbaṃ natthi kiñcīpi.

Vatthuṭṭhagāmaṭṭhakathā.

166. Tiṇaṃ vā pana paṇṇaṃ vā, lataṃ vā kaṭṭhameva vā;  
Bhaṇḍaggheneva kātabbo, gaṇhanto tatthajātaṃ.
167. Mahagghe pana rukkhamaṃ, chinnaṃmattepi nassati;  
Tacchetaṃ vā ṭhapito rukkho, gahetabbo na kocipi.
168. Chinditvā ṭhapitaṃ mūle, rukkhamaṃdadhagataṃ pana;  
“Chaḍḍito sāmikehī”ti, gahetaṃ pana vaṭṭati.
169. Lakkhaṇe challyonaddhe, na doso koci gaṇhato;  
Ajjhāvutthaṃ kataṃ vāpi, vinassantañca gaṇhato.
170. Yo cārakkhaṭṭhānaṃ patvā, katvā kammaṭṭhānādīni;  
Citte cintento vā aññaṃ, bhaṇḍadeyyaṃ hotevassa.
171. Varāhabyagghacchataracchakādito;  
Upaddavā muccitukāmatāya yo;  
Tattheva taṃ ṭhānamatikkameti ce;  
Na koci doso pana bhaṇḍadeyyakaṃ.
172. Idamārakkhaṇaṭṭhānaṃ, garukaṃ suṅkaghātato;  
Tasmā dukkaṭamaṃuddiṭṭhaṃ, tamanokkamma gacchato.
173. Etaṃ pariharantassa, theyyacittena satthunā;  
Pārājikamaṃuddiṭṭhaṃ, ākāsenāpi gacchato.
174. Tasmā ettha visesena, satisampannacetasā;  
Appamattena hotabbaṃ, piyasīlena bhikkhunā.

Araññaṭṭhakathā.

175. Toyadullabhakālasmiṃ, bhājane gopitaṃ jalaṃ;  
Āviñjītvā pavesetvā, chiddaṃ katvāpi vā tathā.
176. Vāpiyaṃ vā taḷāke vā, bhājanaṃ attano pana;  
Gaṇhantassa pavesetvā, bhaṇḍagghena viniddise.
177. Chindato mariyādaṃ tu, adinnādānapubbato;  
Bhūtagāmena saddhimpi, dukkaṭaṃ paridīpitaṃ.
178. Anto ṭhatvā bahi ṭhatvā, chindanto ubhayatthapi;  
Bahiantena kātabbo, antoantena majjhato.

Udakakathā.

179. Vārena sāmaṇerā yaṃ, dantakaṭṭhamaraññato;  
Ānetvācariyānampi, āharanti sace pana.
180. Chinditvā yāva saṅghassa, na niyyādenti te pana;  
Ābhataṃ tāva taṃ sabbaṃ, tesameva ca santakaṃ.
181. Tasmā taṃ theyyacittena, gaṇhantassa ca bhikkhuno;  
Garubhaṇḍaṅca saṅghassa, bhaṇḍagghena parābhavo.
182. Yadā niyyāditā tehi, tato paṭṭhāya saṅghikaṃ;  
Gaṇhantassāpi theyyāya, avahāro na vijjati.
183. Arakkhattā yathāvuḍḍha-mabhājetabbatopi ca;  
Sabbasādhāraṇattā ca, aññaṃ viya na hotidaṃ.

Dantakaṭṭhakathā.

184. Aggim vā deti satthena, ākoṭeti samantato;  
Ākoṭeti viṣaṃ vāpi, maṇḍukaṇṭakanāmakāṃ.
185. Yena vā tena vā rukkho, vinassati ca ḍayhati;  
Sabbattha bhikkhuno tassa, bhaṇḍadeyyaṃ pakāsitaṃ.

Vanappatikathā.

186. Sīsato kaṇṇato vāpi, gīvato hatthatopi vā;  
Chinditvā vāpi mocetvā, gaṇhato theyyacetasā.
187. Hoti mocitamattasmiṃ, sīsādīhi parājayo;  
Thullaccayaṃ karontassa, ākaḍḍhanavikaḍḍhanaṃ.
188. Hatthā anīharitvāva, valayaṃ kaṭakampi vā;  
Aggabāhuṅca ghaṃsanto, cāreti aparāparaṃ.
189. Tamākāsagataṃ coro, karoti yadi rakkhati;  
Saviññāṇakato mūle, valayaṃva na hotidaṃ.

190. Nivattamaṃ pana vatthamaṃ yo, acchindati parassa ce;  
Paropi pana lajjāya, sahasā taṃ na muñcati.
191. Ākaḍḍhati ca coropi, so paro tāva rakkhati;  
Parassa hatthato vatthe, muttamatte parājayo.
192. Sabhaṇḍahāraḥamaṃ bhaṇḍamaṃ, nentassa paṭhame pade;  
Thullaccayamatikkante, dutiyeva cuto siyā.
193. Pātāpeti sace bhaṇḍamaṃ, tajjetvā theyyacetano;  
Parassa hatthato bhaṇḍe, muttamatte parājayo.
194. Athāpi parikappetvā, pātāpeti va yo pana;  
Tassa pātāpane vuttaṃ, dukkaṭāmasanepi ca.
195. Phandāpeti yathāvatthumaṃ, ṭhānā cāveti ce cuto;  
“Tiṭṭha tiṭṭhā”ti vadato, na doso chaḍḍitepi ca.
196. Āgantvā theyyacittena, pacchā taṃ gaṇhato siyā;  
Pārājikaṃ taduddhāre, sālāye sāmike gate.
197. Gaṇhato sakasaññāya, gahaṇe pana rakkhati;  
Bhaṇḍadeyyamaṃ tathā paṃsu-kūlasaññāya gaṇhato.
198. “Tiṭṭha tiṭṭhā”ti vutto ca, chaḍḍetvā pana bhaṇḍakamaṃ;  
Katvāva dhuranikkhepaṃ, bhīto corā palāyati.
199. Gaṇhato theyyacittena, uddhāre dukkaṭamaṃ puna;  
Dātabbamāharāpente, adentassa parājayo.
200. “Kasmā? Tassa payogena, chaḍḍitattā”ti sādaram;  
**Mahāaṭṭhakathāyaṃ** tu, vuttamaññāsu nāgataṃ.

Haraṇakathā.

201. Sampajānamusāvādaṃ, “na gaṇhāmī”ti bhāsato;  
Adinnādānapubbattā, dukkaṭamaṃ hoti bhikkhuno.
202. “Raho mayā panetassa, ṭhapitaṃ kiṃ nu dassati”;  
Icevaṃ vimatuppāde, tassa thullaccayaṃ siyā.
203. Tasmaṃ dāne nirussāhe, paro ce nikkhipe dhuraṃ;  
Ubhinnaṃ dhuranikkhepe, bhikkhu hoti parājito.
204. Cittenādātukāmovā, “dassāmī”ti mukhena ce;  
Vadato dhuranikkhepe, sāmīno hi parājayo.

Upanidhikathā.

205. Sunkaghātassa antova, ṭhatvā pāteti ce bahi;  
Dhuvamaṃ patati ce hatthā, muttamatte parājayo.

206. Taṃ rukkhe khāṇuke vāpi, hutvā paṭihatam puna;  
Vātukkhattampi vā anto, sace patati rakkhati.
207. Pativā bhūmiyaṃ pacchā, vaṭṭantaṃ pana bhaṇḍakaṃ;  
Sace pavisatyantova, tassa pārājikaṃ siyā.
208. Ṭhatvā ṭhatvā pavatṭantaṃ, pavitṭhaṃ ce parājayo;  
Atitṭhamānaṃ vaṭṭitvā, pavitṭhaṃ pana rakkhati.
209. Iti vuttaṃ dalhaṃ katvā, **kurundaṭṭhakathā**disu;  
Sārato taṃ gahettabbaṃ, yuttaṃ viya ca dissati.
210. Sayam vā yadi vaṭṭeti, vaṭṭāpeti parena vā;  
Aṭṭhatvā vaṭṭamānaṃ taṃ, gataṃ nāsakaraṃ siyā.
211. Ṭhatvā ṭhatvā sace anto, bahi gacchati rakkhati;  
Ṭhapite suddhacittena, sayam vaṭṭati vaṭṭati.
212. Gacchante pana yāne vā, gaje vā taṃ ṭhapeti ce;  
Bahi nīharaṇatthāya, nāvahāropi nīhaṭe.
213. Ṭhapite ṭhitayāne vā, payogena vinā gate;  
Satipi theyyacittasmiṃ, avahāro na vijjati.
214. Sace pājeti taṃ yānaṃ, ṭhapetvā yānake maṇiṃ;  
Siyā pārājikaṃ tassa, sīmātikkaṃ pana.
215. Suṅkaṭṭhāne mataṃ suṅkaṃ, gantaṃ datvāva vaṭṭati;  
Seso idha kathāmaggo, araṇṇaṭṭhakathāsamo.

Suṅkaghātakathā.

216. **Antojātaṃ dhanakkītaṃ**, dinnaṃ vā pana kenaci;  
Dāsaṃ **karamarānītaṃ**, harantassa parājayo.
217. Bhujissaṃ vā harantassa, mānusaṃ mātarāpi vā;  
Pitarāṭṭhapaṭaṃ vāpi, avahāro na vijjati.
218. Taṃ palāpetukāmoṃ, ukkhipitvā bhujehi vā;  
Taṃ ṭhitaṭṭhānato kiñci, saṅkāmeti parājayo.
219. Tajjetvā padasā dāsaṃ, nentassa padavārato;  
Honti āpattiyo vuttā, tassa thullaccayādayo.
220. Hatthādīsū gahetvā taṃ, kaḍḍhatopi parājayo;  
“Gaccha yāhi palāyā”ti, vadatopi ayaṃ nayo.
221. Vegasāva palāyantaṃ, “palāyā”ti ca bhāsato;  
Hoti pārājikenassa, anāpatti hi bhikkhuno.
222. Saṅikaṃ pana gacchantaṃ, sace vadati sopi ca;  
Sīghaṃ gacchati ce tassa, vacanena parājayo.

223. Palāyitvā sace aññaṃ, gāmaṃ vā nigamampi vā;  
Gataṃ disvā tato tañce, palāpeti parājayo.

Pāṇakathā.

224. Theyyā sappakaraṇḍaṃ ce, parāmasati dukkaṭaṃ;  
Phandāpeti yathāvatthum, ṭhānato cāvane cuto.

225. Ugghāṭetvā karaṇḍaṃ tu, sappamuddharato pana;  
Karaṇḍatalato mutte, naṅguṭṭhe tu parājayo.

226. Ghaṃsitvā kaḍḍhato sappam, naṅguṭṭhe mukhavaṭṭito;  
Tassa sappakaraṇḍassa, muttamatte parājayo.

227. Karaṇḍaṃ vivarivā ce, pakkosantassa nāmato;  
So nikkhamati ce sappo, tassa pārājikaṃ siyā.

228. Tathā katvā tu maṇḍūka-mūsikānaṃ ravampi vā;  
Pakkosantassa nāmena, nikkhantepi parājayo.

229. Mukhaṃ avivaritvāva, karontassevameva ca;  
Yena kenaci nikkhante, sappe pārājikaṃ siyā.

230. Mukhe vivarite sappo, sayameva palāyati;  
Na pakkosati ce tassa, bhaṇḍadeyyamudīritaṃ.

Apadakathā.

231. Theyyacittena yo hatthiṃ, karotāmasanādayo;  
Honti āpattiyo tassa, tividhā dukkaṭādayo.

232. Sālāyaṃ ṭhitahatthissa, antovatthaṅgaṇesupi;  
Ṭhānaṃ sālā ca vatthu ca, aṅgaṇaṃ sakalaṃ siyā.

233. Abaddhassa hi baddhassa, ṭhitaṭṭhānañca bandhanaṃ;  
Tasmā tesam vasā hatthiṃ, harato kāraye budho.

234. Nagarassa bahiddhā tu, ṭhitassa pana hatthino;  
Ṭhitaṭṭhānaṃ bhava ṭhānaṃ, padavārena kāraye.

235. Nipannassa gajassekaṃ, ṭhānaṃ taṃ uṭṭhapeti ce;  
Tasmim uṭṭhitamatte tu, tassa pārājikaṃ siyā.

236. Eseva ca nayo ñeyyo, turaṅgamahisādisu;  
Natthi kiñcipi vattabbaṃ, dvipadepi bahuppade.

Catuppadakathā.

237. Paresanti vijānitvā, paresaṃ santakaṃ dhanam;  
Garukaṃ theyyacittena, ṭhānā cāveti ce cuto.

238. Anāpatti sasaññissa, tiracchānapariggāhe;  
Tāvakālikavissāsa-ggāhe petapariggāhe.
239. Yo panettha ca vattabbo, **pālimuttavinicchayo**;  
Taṃ mayamaṃ paratoyeva, bhaṇissāma pakiṇṇake.
240. Parājitānekamalena vuttaṃ;  
Pārājikaṃ yaṃ dutiyaṃ jinena;  
Vutto samāsenā mayassa cattho;  
Vattaṃ asesena hi ko samattho.

Iti vinayavinicchaye dutiyapārājikakathā niṭṭhitā.

### Tatīyapārājikakathā

241. Manussajātiṃ jānanto, jīvitā yo viyojaye;  
Nikkhipeyyassa satthaṃ vā, vadeyya maraṇe guṇaṃ.
242. Deseyya maraṇūpāyaṃ, hotāyampi parājito;  
Asandheyyova so ñeeyo, dvedhā bhinnasilā viya.
243. Vuttā paṇātipātassa, payogā cha mahesinā;  
Sāhatthiko tathāṇatti-nissaggiṭhāvarādayo.
244. Tattha kāyena vā kāya-paṭibaddhena vā sayamaṃ;  
Mārentassa paraṃ ghāto, ayamaṃ **sāhatthiko** mato.
245. “Evaṃ tvaṃ paharivā taṃ, mārehi”ti ca bhikkhuno;  
Parassāṇāpanamaṃ nāma, ayamaṃ **āṇattiko** nayo.
246. Dūramaṃ māretukāmassa, usuādinipātanaṃ;  
Kāyena paṭibaddhena, ayamaṃ **nissaggiyo** vidhi.
247. Asañcārimupāyena, māraṇatthaṃ parassa ca;  
Opātādividhānaṃ tu, payogo **thāvaro** ayamaṃ.
248. Paraṃ māretukāmassa, vijjāya jappanaṃ pana;  
Ayamaṃ **vijjāmayo** nāma, payogo pañcamo mato.
249. Samatthā māraṇe yā ca, iddhi kammavipākajā;  
Ayamaṃ **iddhimayo** nāma, payogo samudhīto.
250. Ekeko duvidho tattha, hotīti paridīpito;  
Uddesopi anuddeso, bhedo tesamayaṃ pana.
251. Bahusvapi yamuddissa, pahāraṃ deti ce pana;  
Maraṇena ca tasseva, kammaṇā tena bajjhati.
252. Anuddissa pahārepi, yassa kassaci dehino;  
Pahārapaccayā tassa, maraṇaṃ ce parājayo.



253. Mate pahaṭamatte vā, pacchā mubhayathāpi ca;  
Hantā pahaṭamattasmiṃ, kammunā tena bajjhati.
254. Evaṃ sāhatthiko ñeyyo, tathā āṇattikopi ca;  
Ettāvatā samāsenā, dve payogā hi dassitā.
255. Vatthu kālo ca deso ca, satthañca iriyāpatho;  
Karaṇassa visesoti, cha āṇattiniyāmakā.
256. Māretabbo hi yo tattha, so “**vatthū**”ti pavuccati;  
Pubbaṇhādi siyā **kālo**, sattānaṃ yobbanādi ca.
257. **Deso** gāmādi viññeyyo, **satthaṃ** taṃ sattamāraṇaṃ;  
Māretabbassa sattassa, nisajjādiriyāpatho.
258. Vijjanaṃ bhedanañcāpi, chedanaṃ tāḷanampi vā;  
Evamādividhoneko, **viseso karaṇassa** tu.
259. “Yaṃ mārehī”ti āṇatto, aññaṃ māreti ce tato;  
“Purato paharivāna, mārehī”ti ca bhāsito.
260. Pacchato passato vāpi, paharivāna mārite;  
Vatthāṇatti visaṅketā, mūlaṭṭho pana muccati.
261. **Vatthum** taṃ avirajjhivā, yathāṇattiñca mārite;  
Ubhayesaṃ yathākālaṃ, kammabaddho udīrito.
262. Āṇatto “ajja pubbaṇhe, mārehī”ti ca yo pana;  
So ce māreti sāyanhe, mūlaṭṭho parimuccati.
263. Āṇattasseva so vutto;  
Kammabaddho mahesinā;  
Kālassa hi visaṅketā;  
Doso nāṇāpakassa so.
264. “Ajja mārehi pubbaṇhe, svevā”ti aniyāmite;  
Yadā kadāci pubbaṇhe, visaṅketo na mārite.
265. Eteneva upāyena, **kālabhedesu** sabbaso;  
Sāṅketo ca visaṅketo, veditabbo vibhāvinā.
266. “Imaṃ gāme ṭhitaṃ verim, mārehī”ti ca bhāsito;  
Sace so pana māreti, ṭhitaṃ taṃ yattha kathaci.
267. Natthi tassa visaṅketo, ubho bajjhanti kammunā;  
“Gāmeyevā”ti āṇatto, vane vā sāvadhāraṇaṃ.
268. “Vaneyevā”ti vā vutto, gāme māreti cepi vā;  
Visaṅketo viññātabbo, mūlaṭṭho parimuccati.
269. Eteneva upāyena, **sabbadesesu** bhedato;  
Sāṅketo ca visaṅketo, veditabbo viññunā.

270. “Satthena pana mārehi, āṇatto”ti ca kenaci;  
Yena kenaci satthena, visaṅketo na mārite.
271. “Iminā vāsinā hī”ti, vutto aññena vāsinā;  
“Imassāsissa vāpi tvaṃ, dhārāyetāya māraya”.
272. Iti vutto sace verim, dhārāya itarāya vā;  
Tharunā vāpi tuṇḍena, visaṅketova mārite.
273. Eteneva upāyena, **sabbāvudhakajātisu**;  
Saṅketo ca visaṅketo, veditabbo visesato.
274. “Gacchantamenam mārehi”, iti vutto parena so;  
Māreti nam nisinnam ce, visaṅketo na vijjati.
275. “Nisinnamyeva mārehi”, “gacchantamyeva vā”ti ca;  
Vutto māreti gacchantam, nisinnam vā yathākkamaṃ.
276. Visaṅketanti ñātabbam, bhikkhunā vinayaññunā;  
Eseva ca nayo ñeyyo, **sabbiriyāpathesu** ca.
277. “Mārehī”ti ca vijjhitvā, āṇatto hi parena so;  
Vijjhitvāva tamāreti, visaṅketo na vijjati.
278. “Mārehī”ti ca vijjhitvā, āṇatto hi parena so;  
Chinditvā yadi māreti, visaṅketova hoti so.
279. Eteneva upāyena, sabbesu **karāṇesupi**;  
Saṅkete ca visaṅkete, veditabbo vinicchayo.
280. Dīgham rassam kisaṃ thūlam, kālam odātameva vā;  
Āṇatto aniyāmetvā, mārehīti ca kenaci.
281. Sopi yaṃ kiñci āṇatto, sace māreti tādisaṃ;  
Natthi tattha visaṅketo, ubhinnampi parājayo.
282. Manussaṃ kiñci uddissa, sace khaṇativāṭakaṃ;  
Khaṇantassa ca opātam, hoti āpatti dukkaṭam.
283. Dukkhasuppattiyā tattha, tassa thullaccayaṃ siyā;  
Patitvā ca mate tasmim, tassa pārājikaṃ bhava.
284. Nipatitvā panaññasmim, mate doso na vijjati;  
Anuddissakamopāto, khato hoti sace pana.
285. “Patitvā ettha yo koci, maratū”ti hi yattakā;  
Maranti nipatitvā ce, dosā hontissa tattakā.
286. Ānantariyavatthusmim, ānantariyakaṃ vade;  
Tathā thullaccayādīnaṃ, honti thullaccayādayo.
287. Patitvā gabbhinī tasmim, sagabbhā ce marissati;

Honti pāṇātipātā dve, ekovekekadhamsane.

- 288.** Anubandhettha corehi, pativā ce marissati;  
Opātakhaṇakasseva, hoti pārājikaṃ kira.
- 289.** Verino tattha pātetvā, sace mārenti verino;  
Patitaṃ tattha mārenti, nīharitvā sace bahi.
- 290.** Nibbattivā hi opāte, matā ce opapātikā;  
Asakkontā ca nikkhantūṃ, sabbattha ca parājayo.
- 291.** Yakkhādayo panuddissa, khaṇane dukkhasambhavae;  
Dukkaṭṭaṃ maraṇe vatthu-vasā thullaccayādayo.
- 292.** Manusseyeva uddissa, khate opātake pana;  
Anāpatti pativā hi, yakkhādīsu matesupī.
- 293.** Tathā yakkhādayo pāṇe, khate uddissa bhikkhunā;  
Nipatitvā marantesu, manussesupyayaṃ nayo.
- 294.** ‘‘Pāṇino ettha bajjhivā, marantū’’ti anuddisaṃ;  
Pāsaṃ oḍḍeti yo tattha, sace bajjhanti pāṇino.
- 295.** Hatthato muttamattasmim, tassa pārājikaṃ siyā;  
Ānantariyavatthusmim, ānantariyameva ca.
- 296.** Uddissa hi kate pāse, yaṃ panuddissa oḍḍito;  
Bandhanesu tadaññesaṃ, anāpatti pakāsītā.
- 297.** Mūlena vā mudhā vāpi, dinne pāse parassa hi;  
Mūlaṭṭhasseva hotīti, kammabaddho niyāmito.
- 298.** Yena laddho sace lopi, pāsamuggaḷitampi vā;  
Thiraṃ vāpi karotevaṃ, ubhinnaṃ kammabandhanaṃ.
- 299.** Yo pāsaṃ uggaḷāpetvā, yāti pāpabhayā sace;  
Taṃ disvā puna aññopi, saṅghapeti hi tattha ca.
- 300.** Baddhā baddhā maranti ce, mūlaṭṭho na ca muccati;  
Ṭhapetvā gahitaṭṭhāne, pāsayaṭṭhiṃ vimuccati.
- 301.** Gopetvāpi na makkho hi, pāsayaṭṭhiṃ sayamkataṃ;  
Tamañño puna gaṇhitvā, saṅghapeti sace pana.
- 302.** Tappaccayā marantesu, mūlaṭṭho na ca muccati;  
Nāsetvā sabbaso vā taṃ, jhāpetvā vā vimuccati.
- 303.** Ropentassa ca sūlaṃ vā, sajjentassa adūhalaṃ;  
Opātena ca pāsena, sadisova vinicchayo.
- 304.** Anāpatti asaṅcicca, ajānantassa bhikkhuno;  
Tathāmaraṇacittassa, matepyummattakādino.

305. Manussapāṇimhi ca pāṇasaññitā;  
 Sacassa cittaṃ maraṇūpasamhitam;  
 Upakkamo tena ca tassa nāso;  
 Pañcettha aṅgāni manussaghāte.

Iti vinayavinicchaye tatiyapārājikakathā niṭṭhitā.

### Catutthapārājikakathā

306. Asantamattassitameva katvā;  
 Bhavaṃ adhiṭṭhāya ca vattamānam;  
 Aññāpadesaṅca vinādhimānam;  
 Jhānādibhedam samudācareyya.
307. Kāyena vācāyapī vā tadatthe;  
 Ñāteva viññattipathe abhabbo;  
 Yatheva tālo pana matthakasmim;  
 Chinno abhabbo puna ruḷhibhāve.
308. Asantamevattani yo parassa;  
 Dīpeti jhānādimanantaram so;  
 Jānāti ce hoti cuto hi no ce;  
 Jānāti thullaccayamassa hoti.
309. “Yo te vihāre vasatīdha bhikkhu;  
 So jhānalābhī”ti ca dīpīte ce;  
 Jānāti thullaccayamassa no ce;  
 Jānāti tam dukkaṭameva hoti.
310. Asantamevattani dhammametaṃ;  
 Atthīti katvā vadatodhimānā;  
 Vutto anāpattinayo panevam;  
 Avattukāmassa tathādikassa.
311. Pāpicchatā tassa asantabhāvo;  
 Ārocanañceva manussakassa;  
 Naññāpadesena tadeva ñāṇam;  
 Pañcettha aṅgāni vadanti dhīrā.
312. Paṭhame dutiye cante, pariyāyo na vijjati;  
 Dutīye tatiyeyeva, āṇatti na panetare.
313. Ādi mekasamuṭṭhānam, duvaṅgam kāyacittato;  
 Sesā ca tisamuṭṭhānā, tesamaṅgāni satta tu.
314. Sukhopekkhāyutaṃ ādi, tatiyaṃ dukkhavedanaṃ;  
 Dutīyaṅca catutthaṅca, tivedanamudīritaṃ.
315. Paṭhamassaṭṭha cittāni, tatiyassa duve pana;  
 Dutīyassa catutthassa, dasa cittāni labbhare.
316. Tasmā sacittakaṃ vuttaṃ, sabbametaṃ catubbidham;

Kriyā saññāvimokkhañca, lokavajjanti dīpitaṃ.

317. Idamāpattiyāmyeva, vidhānaṃ pana yujjati;  
Tasmā āpattiyāmyeva, gahetabbaṃ vibhāvīnā.
318. Mudupiṭṭhi ca lambī ca, mukhaggāhī nisīdako;  
Pārājikā ime tesam, cattāro anulomikā.
319. Bhikkhunīnañca cattāri, vibbhantā bhikkhunī sayam;  
Tathā ekādasābhabbā, sabbete catuvīsati.
320. Ime pārājikā vuttā, catuvīsati puggalā;  
Abhabbā bhikkhubhāvāya, sīsacchinnova jīvitum.
321. Paṇḍako ca tiracchāno, ubhatobyañjanopi ca;  
Tayo vatthuvipannā hi, ahetupaṭisandhikā.
322. Pañcānantarikā theyya-saṃvāsopi ca dūsako;  
Titthipakkantako ceti, kriyānaṭṭhā panaṭṭha te.
323. Vinicchayo yo pana sārabhūto;  
Pārājikānaṃ kathito mayāyaṃ;  
Tassānusārena budhena ñātum;  
Sakkā hi sesopi asesatova.
324. Piṭake paṭubhāvakare parame;  
Vinaye vividhehi nayehi yute;  
Paramatthanayaṃ abhipatthayatā;  
Pariyāpuṇitabbamayaṃ satataṃ.

Iti vinayavinicchaye catutthapārājikakathā niṭṭhitā.

### Saṅghādisesakathā

325. Mocetukāmatācittaṃ, vāyāmo sukkamocanaṃ;  
Aññātra supinātena, hoti saṅghādisesatā.
326. Parenupakkamāpetvā, aṅgajātaṃ panattano;  
Sukkaṃ yadi vimoceti, garukaṃ tassa niddise.
327. Sañciccupakkamantassa, aṅgajātaṃ panattano;  
Thullaccayaṃ samuddiṭṭhaṃ, sace sukkaṃ na muccati.
328. Sañciccupakkamantassa, ākāse kampanenapi;  
Hoti thullaccayaṃ tassa, yadi sukkaṃ na muccati.
329. Vatthiṃ kīlāya pūretvā, passāvetum na vaṭṭati;  
Nimittaṃ pana hatthena, kīlāpentassa dukkaṭaṃ.
330. Tissannaṃ pana itthīnaṃ, nimittaṃ rattacetāsā;  
Purato pacchato vāpi, oloketassa dukkaṭaṃ.

331. Ekenekaṃ payogena, divasampi ca passato;  
Nāpattiyā bhava aṅgaṃ, ummīlananimīlaṇaṃ.

332. Amocanādhippāyassa, anupakkamatopi ca;  
Supinantena muttasmiṃ, anāpatti pakāsītā.

Sukkavisaṭṭhikathā.

333. Āmasanto manussitthiṃ, kāyasaṃsaggarāgato;  
“Manussitthī”ti saññāya, hoti saṅghādisesiko.

334. Lomenantamaso lomaṃ, phusantassāpi itthiyā;  
Kāyasaṃsaggarāgena, hoti āpatti bhikkhuno.

335. Itthiyā yadi samphuṭṭho, phassaṃ sevanacetano;  
Vāyavitvādhivāseti, hoti saṅghādisesatā.

336. Ekena pana hatthena, gahetvā dutiyena vā;  
Tattha tattha phusantassa, ekāvāpatti dīpitā.

337. Aggahetvā phusantassa, yāva pādañca sīsato;  
Kāyā hatthamamocetvā, ekāva divasampi ca.

338. Aṅgulīnaṃ tu pañcannaṃ, gahaṇe ekato pana;  
Ekāyeva siyāpatti, na hi koṭṭhāsato siyā.

339. Nānitthīnaṃ sace pañca, gaṇhātyaṅguliyo pana;  
Ekato pañca saṅghādi-sesā hontissa bhikkhuno.

340. Itthiyā vimatissāpi, paṇḍakādikasaññīno;  
Kāyena itthiyā kāya-sambaddhaṃ phusatopi vā.

341. Paṇḍake yakkhipetīsu, tassa thullaccayaṃ siyā;  
Dukkaṭaṃ kāyasaṃsagge, tiracchānagatitthiyā.

342. Bhikkhuno paṭibaddhena, kāyena pana itthiyā;  
Kāyena paṭibaddhañca, phusantassapi dukkaṭaṃ.

343. Itthīnaṃ itthirūpañca, dārulohamayādikaṃ;  
Tāsaṃ vatthamalankāraṃ, āmasantassa dukkaṭaṃ.

344. Tatthajātaphalaṃ khajjaṃ, muggādiṃ tatthajātaṃ;  
Dhaññāni pana sabbāni, āmasantassa dukkaṭaṃ.

345. Sabbhaṃ dhamanasāṅkhādiṃ, pañcaṅgaturiyampi ca;  
Ratanāni ca sabbāni, āmasantassa dukkaṭaṃ.

346. Sabbamāvudhabhaṇḍaṇca, jiyā ca dhanudaṇḍako;  
Anāmāsamidaṃ sabbhaṃ, jālañca saravāraṇaṃ.

347. Suvaṇṇapaṭibimbādi, cetiyaṃ ārakūṭakaṃ;  
Anāmāsanti niddiṭṭhaṃ, **kurundaṭṭhakathāya** hi.

348. Sabbaṃ onahituṃ vāpi, onahāpetumeva vā;  
Vādāpetuñca vādetuṃ, vāditaṃ na ca vaṭṭati.
349. “Karissāmapahāra”nti, vuttena pana bhikkhunā;  
Pūjā buddhassa kātabbā, vattabbāti ca viññunā.
350. Sayam phusiyamānassa, itthiyā pana dhuttiyā;  
Avāyāmitvā kāyena, phassaṃ paṭivijānato.
351. Anāpatti asaṅcicca, ajānantassa bhikkhuno;  
Mokkhāhippāyino ceva, tathā ummattakādino.
352. Paṭhamena samānāva, samuṭṭhānādayo pana;  
Kāyasamsaggarāgassa, tathā sukkavisatṭhiyā.

Kāyasamsaggakathā.

353. Duṭṭhullavācassādena, itthiyā itthisaññino;  
Dvinnañca pana maggānaṃ, vaṇṇāvaṇṇavasena ca.
354. Methunayācanādīhi, obhāsantassa bhikkhuno;  
Viññuṃ antamaso hattha-muddāyapi garuṃ siyā.
355. “Sikharāṇisi, sambhinnā, ubhatobyañjanā”ti ca;  
Akkosavacanenāpi, garukaṃ tu suṇantiyā.
356. Punappunobhāsantassa, ekavācāya vā bahū;  
Gaṇanāya ca vācānaṃ, itthīnaṃ garukā siyuṃ.
357. Sā ce nappaṭijānāti, tassa thullaccayaṃ siyā;  
Ādissa bhaṇane cāpi, ubbhajāṇumadhakkhakaṃ.
358. Ubbhakkhakamadhojāṇu-maṇḍalaṃ pana uddisaṃ;  
Vaṇṇādibhaṇane kāya-paṭibaddhe ca dukkaṭaṃ.
359. Thullaccayaṃ bhava tassa, paṇḍake yakkipetisu;  
Adhakkhakobbhajāṇumhi, dukkaṭaṃ paṇḍakādisu.
360. Ubbhakkhakamadhojāṇu-maṇḍalepi ayaṃ nayo;  
Sabbattha dukkaṭaṃ vuttaṃ, tiracchānagatitthiyā.
361. Atthadhammapurekkhāraṃ, katvā obhāsatopi ca;  
Vadatopi anāpatti, purakkhatvānusāsaniṃ.
362. Tathā ummattakādīnaṃ, samuṭṭhānādayo nayā;  
Adinnādānatulyāva, vedanettha dvidhā matā.

Duṭṭhullavācākathā.

363. Vaṇṇaṃ panattano kāma-pāricariyāya bhāsato;  
Tasmiṃyeva khaṇe sā ce, jānāti garukaṃ siyā.

364. No ce jānāti sā yakkhi-petidevīsu paṇḍake;  
Hoti thullaccayaṃ tassa, sese āpatti dukkaṭaṃ.
365. Cīvarādīhi aññehi, vatthukāmehi attano;  
Natthi doso bhaṇantassa, pāricariyāya vaṇṇanaṃ.
366. Itthisaññā manussitthī, pāricariyāya rāgitā;  
Obhāso tena rāgena, khaṇe tasmiṃ vijānanaṃ.
367. Pañcaṅgāni imānettha, vedītabbāni viññunā;  
Samuṭṭhānādayopyassa, anantarasamā matā.

Attakāmapāricariyakathā.

368. Paṭiggaṇhāti sandesaṃ, purisassitthiyāpi vā;  
Vīmaṃsati garu hoti, paccāharati ce pana.
369. “Yassā hi santikaṃ gantvā, ārocehī”ti pesito;  
Tamadisvā tadaññassa, avassārocakassa so.
370. “Ārocehī”ti vatvā taṃ, paccāharati ce pana;  
Bhikkhu saṅghādisesamhā, sañcarittā na muccati.
371. “Mātarā rakkhitam itthiṃ, gaccha brūhī”ti pesito;  
Piturakkhitamaññaṃ vā, visaṅketova bhāsato.
372. Paṭiggaṇhanatādīhi, tīhi aṅgehi saṃyute;  
Sañcaritte samāpanne, garukāpattimādise.
373. Dvīhi thullaccayaṃ vuttam, paṇḍakādīsu tīhipi;  
Ekeneva ca sabbattha, hoti āpatti dukkaṭaṃ.
374. Cetiyaṃ ca saṅghassa, gilānassa ca bhikkhuno;  
Gacchato pana kiccena, anāpatti pakāsītā.
375. Manussattam tathā tassā, nanālamvacanīyatā;  
Paṭiggaṇhanatādīnaṃ, vasā pañcaṅgikaṃ mataṃ.
376. Idañhi chasamuṭṭhānaṃ, acittakamudīritaṃ;  
Alamvacanīyattaṃ vā, paṇṇattiṃ vā ajānato.
377. Gahetvā sāsanaṃ kāya-vikārenūpagamma taṃ;  
Vīmaṃsitvā harantassa, garukaṃ kāyato siyā.
378. Sutvā yathānisinnova, vacanaṃ itthiyā puna;  
Taṃ tatthevāgatasseva, ārocentassa vācato.
379. Ajānantassa paṇṇattiṃ, kāyavācāhi taṃ vidhiṃ;  
Karoto harato vāpi, garukaṃ kāyavācato.
380. Jānitvāpi karontassa, garukāpattiyo tathā;  
Sacittakehi tīheva, samuṭṭhānehi jāyare.



## Sañcarittakathā.

381. Sayaṃyācitateheva, kuṭikaṃ appamāṇikaṃ;  
Attuddesaṃ karontassa, tathādesitavattthukaṃ.
382. Honti saṅghādisesā dve, sārambhādīsu dukkaṭaṃ;  
Sace ekavipannā sā, garukaṃ ekakaṃ siyā.
383. Purisaṃ yācituṃ kamma-sahāyatthāya vaṭṭati;  
Mūlacchejjaseneva, yācamānassa dukkaṭaṃ.
384. Avajjaṃ hatthakammampi, yācituṃ pana vaṭṭati;  
Hatthakammampi nāmetaṃ, kiñci vatthu na hoti hi.
385. Goṇamāyācamānassa, ṭhapetvā ñātakādike;  
Dukkaṭaṃ tassa niddiṭṭhaṃ, mūlacchejjena tesupī.
386. “Goṇaṃ demā”ti vuttepi, gahetuṃ na ca vaṭṭati;  
Sakaṭaṃ dārubhaṇḍattā, gahetuṃ pana vaṭṭati.
387. Vāsipharasukuddāla-kuṭhārādīsvayaṃ nayo;  
Anajjhāvutthakaṃ sabbhaṃ, harāpetumpi vaṭṭati.
388. Valliādimhi sabbasmim, garubhaṇḍappahonake;  
Paresaṃ santakeyeva, hoti āpatti dukkaṭaṃ.
389. Paccayesu hi tīsveva, viññatti na ca vaṭṭati;  
Tatiye parikathobhāsa-nimittāni ca labbhare.
390. “Adesite ca vatthusmim, pamāṇenādhikaṃ kuṭim;  
Karissāmī”ti cintetvā, araññaṃ gacchatopi ca.
391. Pharaṣuṃ vāpi vāsim vā, nisentassāpi dukkaṭaṃ;  
Chindato dukkaṭaṃ rukkhaṃ, tassa pācittiyā saha.
392. Evaṃ pubbapayogasmim, kuṭikārahikkhuno;  
Yathāpayogamāpattim, vinayaññū viniddise.
393. Yā pana dvīhi piṇḍehi, niṭṭhānaṃ tu gamissati;  
Hoti thullaccayaṃ tesu, paṭhame dutiye garu.
394. Anāpatti sacaññaṃ, deti vippakataṃ kuṭim;  
Tathā bhūmim samaṃ katvā, bhindatopi ca taṃ kuṭim.
395. Guhaṃ leṇaṃ karontassa, tiṇapaṇṇacchadampi vā;  
Vāsāgāraṃ ṭhapetvāna, aññaṣatthāya vā tathā.
396. Desāpetvāva bhikkhūhi, vatthuṃ pana ca bhikkhuno;  
Kriyatova samuṭṭhāti, karoto appamāṇikaṃ.
397. Adesetvā karontassa, taṃ kriyākriyato siyā;  
Samuṭṭhānādayo sesā, sañcarittasamā matā.

## Kuṭikārasikkhāpadakathā.

398. Adesetvā sace vatthum, yo kareyya mahallakam;  
Vihāram attavāsattam, garukam tassa niddise.
399. Pamānātikkenāpi, doso natthi mahallake;  
Tasmā kriyasamuṭṭhānā-bhāvaṃ samupalakkhaye.
400. Pamānaniyamābhāvā, ekasaṅghādisesatā;  
Samuṭṭhānādikaṃ sesaṃ, anantarasamaṃ mataṃ.

## Mahallakakathā.

401. Pārājikāni vuttāni, catuvīsati satthunā;  
Bhikkhuno anurūpāni, tesu ekūnavīsati.
402. Amūlakena codeti, hutvā cāvanacetano;  
Suddham vā yadi vāsuddham, tesu aññatarena yo.
403. Garukam tassa āpattiṃ, katokāsamhi niddise;  
Tattheva akatokāse, dukkaṭāpattiyā saha.
404. ‘‘Koṇṭhosi ca nigaṇṭhosi;  
Sāmaṇerosi tāpaso;  
Gahaṭṭhosi tathā jeṭṭha-;  
Bbatikosi upāsako.
405. Dussīlo pāpadhammosi, antopūti avassuto’’;  
Icevampi vadantassa, garukam tassa niddise.
406. Sammukhā hatthamuddāya, codentassapi taṅkhaṇe;  
Taṃ ce paro vijānāti, hoti āpatti bhikkhuno.
407. Garukam sammukhe ṭhatvā, codāpentassa kenaci;  
Tassa vācāya vācāya, codāpentassa niddise.
408. Atha sopi ‘‘mayā diṭṭham, sutam vā’’ti ca bhāsati;  
Tesaṃ dvinnampi saṅghādi-seso hoti na saṃsayo.
409. Dūtam vā pana pesetvā, paṇṇam vā pana sāsanam;  
Codāpentassa āpatti, na hotīti pakāsītā.
410. Tathā saṅghādisesehi, vutte cāvanasaññino;  
Hoti pācittiyāpatti, sesāpattīhi dukkaṭam.
411. Akkosanādhippāyassa, akatokāsamattanā;  
Saha pācittiyenassa, vadantassa ca dukkaṭam.
412. Asammukhā vadantassa, āpattīhipi sattahi;  
Tathā kammaṃ karontassa, hoti āpatti dukkaṭam.
413. Na dosummattakādīnam, hoti pañcaṅgasamyutam;

Upasampannatā tasmim, puggale suddhasaññitā.

414. Pārājikena codeti, yena tassa amūlatā;  
Sammukhā codanā ceva, tassa cāvanasaññino.
415. Taṅkhaṇe jānanañceva, pañcaṅgāni bhavanti hi;  
Idaṃ tu tisamuṭṭhānaṃ, sacittaṃ dukkhavedanaṃ.

Duṭṭhadosaṅgathā.

416. Lesamattamupādāya, bhikkhumantimavatthunā;  
Codeyya garukāpatti, sace cāvanacetano.
417. Codeti vā tathāsaññī, codāpeti parena vā;  
Anāpatti siyā seso, anantarasamo mato.

Dutiyaduṭṭhadosaṅgathā.

418. Samaggassa ca saṅghassa, bhedatthaṃ vāyameyya yo;  
Bhedahetuṃ gahetvā vā, tiṭṭheyya paridīpayāṃ.
419. So hi bhikkhūhi vattabbo, “bhedatthaṃ mā parakkama”;  
Iti “saṅghassa mā tiṭṭha, gahetvā bhedakāraṇaṃ”.
420. Vuccamāno hi teheva, nissajjeyya na ceva yaṃ;  
Samanubhāsitaṃ taṃ, accajaṃ garukaṃ phuse.
421. Parakkamantaṃ saṅghassa, bhikkhuṃ bhedāya bhikkhuno;  
Disvā sutvā hi ñatvā vā, avadantassa dukkaṭaṃ.
422. Gantvā ca pana vattabbo, addhajojanatādikaṃ;  
Dūrampi pana gantabbaṃ, sace sakkoti tāvade.
423. Tikkhattūṃ pana vuttassa, apariccajatopi taṃ;  
Dūtaṃ vā pana paṇṇaṃ vā, pesatopi ca dukkaṭaṃ.
424. Ñattiyā pariyosāne, dukkaṭaṃ paridīpitaṃ;  
Kammavācāhi ca dvīhi, hoti thullaccayaṃ dvayaṃ.
425. Yya-kāre pana sampatte, garukeyeva tiṭṭhati;  
Passambhanti hi tissopi, bhikkhuno dukkaṭādayo.
426. Akate pana kammaṃ, apariccajatopi ca;  
Tassa saṅghādisesena, anāpatti pakāsītā.
427. Ñattito pana pubbe vā, pacchā vā taṅkhaṇepi vā;  
Asampatte yya-kārasmiṃ, paṭinissajjatopi ca.
428. Paṭinissajjato vāpi, taṃ vā samanubhāsato;  
Tathevummattakādīnaṃ, anāpatti pakāsītā.

429. Yañhi bhikkhumanuddissa, macchamaṃsaṃ kataṃ bhava;  
Yasmiñca nibbematiko, taṃ sabbam tassa vaṭṭati.
430. Samuddissa kataṃ ñatvā, bhuñjantasseva dukkaṭaṃ;  
Tathā akappiyaṃ maṃsaṃ, ajānitvāpi khādato.
431. Hatthussacchamanussānaṃ, ahikukkuradīpinaṃ;  
Sīhabyagghataracchānaṃ, maṃsaṃ hoti akappiyaṃ.
432. Thullaccayaṃ manussānaṃ, maṃse sesesu dukkaṭaṃ;  
Sacittakaṃ samuddissa-kataṃ sesamacittakaṃ.
433. Pucchitvāyeva maṃsānaṃ, bhikkhūnaṃ gahaṇaṃ pana;  
Etaṃ vattanti vattaṭṭhā, vadanti vinayañño.
434. Idamekasamuṭṭhānaṃ, vuttaṃ samanubhāsaṃ;  
Kāyakammaṃ vacīkammaṃ, akriyaṃ dukkhavedanaṃ.

Saṅghabhedakathā.

435. Dutiye saṅghabhedasmiṃ, vattabbaṃ natthi kiñcipi;  
Samuṭṭhānādayopissa, paṭhamena samā matā.

Dutiyasaṅghabhedakathā.

436. Uddesapariyāpanne, bhikkhu dubbacajātiko;  
Avacanīyamattānaṃ, karoti garukaṃ siyā.
437. Dubbacepi panetasmim, saṅghabhedakavaṇṇane;  
Sabbo vuttanayeneva, veditabbo vinicchayo.

Dubbacakathā.

438. Yo chandagāmitādīhi, pāpento kuladūsako.  
Kamme kariyamāne taṃ, accajaṃ garukaṃ phuse.
439. Cuṇṇaṃ paṇṇaṃ phalaṃ pupphaṃ, veḷuṃ kaṭṭhañca mattikaṃ;  
Kulasaṅghaṇatthāya, attano vā parassa vā.
440. Santakaṃ dadato hoti, kuladūsanadukkaṭaṃ;  
Bhaṇḍagghena ca kātabbo, theyyā saṅghaññasantake.
441. Saṅghikaṃ garubhaṇḍaṃ vā, senāsananiyāmitaṃ;  
Yopissaravatāyeva, dento thullaccayaṃ phuse.
442. Haritvā vā harāpetvā, pakkositvāgatassa vā;  
Kulasaṅghaṇatthāya, pupphaṃ dentassa dukkaṭaṃ.
443. Haritvā vā harāpetvā, pitūnaṃ pana vaṭṭati;  
Dātuṃ pupphaṃ panaññaṃ, āgatasseva ñātino.

444. Tañca kho vatthupūjatthaṃ, dātabbaṃ na panaññathā;  
Sivādīpūjanatthaṃ vā, maṇḍanatthaṃ na vaṭṭati.
445. Phalādīsipi sesesu, bhikkhunā vinayaññunā;  
Pupphe vuttanayeneva, veditabbo vinicchayo.
446. Pupphādibhājane koci, āgacchati sace pana;  
Sammatenassa dātabbaṃ, ñāpetvā itarena tu.
447. Upaḍḍhabhāgaṃ dātabbaṃ, iti vuttaṃ **kurundiyam**;  
“Thokaṃ thoka”nti niddiṭṭhaṃ, **mahāpaccariyam** pana.
448. Gilānānaṃ manussānaṃ, dātabbaṃ tu sakaṃ phalaṃ;  
Paribbayavihīnassa, sampattissariyassapi.
449. Saṅghārāme yathā yatra, saṅghena katikā katā;  
Phalarukkhaparicchedaṃ, katvā tatrāgatassapi.
450. Phalaṃ yathāparicchedaṃ, dadato pana vaṭṭati;  
“Dassetabbāpi vā rukkhā”, “ito gaṇha phala”nti ca.
451. Sayam khaṇitvā pathaviṃ, mālāgacchādiropane;  
Hoti pācittiyenassa, dukkaṭaṃ kuladūsane.
452. Akappiyena vākyena, tathā ropāpanepi ca;  
Sabbattha dukkaṭaṃ vuttaṃ, bhikkhuno kuladūsane.
453. Ropane dukkaṭameva, hoti kappiyabhūmiyam;  
Tathā ropāpane vuttaṃ, ubhayattha ca bhikkhuno.
454. Sakim āṇattiyā tassa, bahūnaṃ ropane pana;  
Sadukkaṭā tu pācitti, suddhaṃ vā dukkaṭaṃ siyā.
455. Kappiyeneva vākyena, ubhayattha ca bhūmiyā;  
Ropane paribhogatthaṃ, na doso koci vijjati.
456. Kappiyabhūmi ce hoti, sayam ropetumeva ca;  
Vaṭṭatīti ca niddiṭṭhaṃ, **mahāpaccariyam** pana.
457. Ārāmādīnamatthāya, sayam saṃropitassa vā;  
Vaṭṭateva ca bhikkhūnaṃ, taṃ phalaṃ paribhuñjitum.
458. Siñcane pana sabbattha, sayam siñcāpanepi ca;  
Akappiyodakeneva, hoti pācitti bhikkhuno.
459. Kulasaṅgahaṇatthañca, paribhogatthameva vā;  
Saddhiṃ pācittiyenassa, siñcato hoti dukkaṭaṃ.
460. Tesameva panatthāya, dvinnaṃ kappiyavārinā;  
Siñcane dukkaṭaṃ vuttaṃ, tathā siñcāpanepi ca.
461. Kulasaṅgahaṇatthāya, pupphānaṃ ocināpane;

Sayamocinane cāpi, sapācittiyadukkaṭaṃ.

462. Pupphānaṃ gaṇanāyassa, pupphamocinato pana;  
Hoti pācittiyāpatti, kulatthaṃ ce sadukkaṭā.
463. Ganthimaṃ gopphimaṃ nāma, vedhimaṃ veṭhimampi ca;  
Pūrimaṃ vāyimaṃ ceti, chabbidho pupphasāṅgaho.
464. Tatha daṇḍena daṇḍaṃ vā, vaṇṇenapi ca vaṇṇakaṃ;  
Ganthitvā karaṇaṃ sabbamaṃ, “**ganthima**”nti pavuccati.
465. **Gopphimaṃ** nāma gopphetvā, suttādīhi karīyati;  
Ekatovaṇṭikā mālā, ubhatovaṇṭikā ca taṃ.
466. **Vedhimaṃ** nāma vijjhivā, bundesu makulādikaṃ;  
Āvutā sūciādīhi, mālāvikati vuccati.
467. **Veṭhimaṃ** nāma veṭhetvā, kataṃ mālāguṇehi vā;  
Vākādīhi ca baddhaṃ vā, “**veṭhima**”nti pavuccati.
468. **Pūrimaṃ** pana daṭṭhabbaṃ, pupphamālāhi pūraṇe;  
Bodhiṃ pupphapaṭādīnaṃ, parikkhepesu labbhati.
469. **Vāyimaṃ** nāma daṭṭhabbaṃ, puppharūpapaṭādisu;  
Pupphamālāguṇehi, vāyitvā karaṇe pana.
470. Sabbametaṃ sayamaṃ kātuṃ, kārāpetuṃ parehi vā;  
Bhikkhūnaṃ bhikkhunīnaṃca, buddhassapi na vaṭṭati.
471. Tathā kalambakaṃ kātuṃ, aḍḍhacandakameva vā;  
Aññehi pūritaṃ puppha-paṭaṃ vā vāyitumpi ca.
472. Piṭṭhakācamayaṃ dāmaṃ, geṇḍupupphamayampi ca;  
Kharapattamayamaṃ mālāṃ, sabbamaṃ kātuṃ na vaṭṭati.
473. Kaṇikārādipupphāni, vitāne baddhakaṇṭake;  
Hīrādīhi paṭākathamaṃ, vijjhantassapi dukkaṭaṃ.
474. Kaṇṭakādīhi bhikkhussa, ekapupphampi vijjhituṃ;  
Pupphesuyeva vā pupphamaṃ, pavesetuṃ na vaṭṭati.
475. Asokapiṇḍīādīnaṃ, antare dhammarajjuyā;  
Pavesentassa pupphāni, na doso koci vijjati.
476. Ṭhapitesu pavesetvā, kadalicchattabhittisu;  
Kaṇṭakesupi pupphāni, vijjhantassapi dukkaṭaṃ.
477. Kappiyaṃ pana vattabbaṃ, vacanaṃ vatthupūjane;  
Nimittobhāsapariyā, vaṭṭantūti pakāsītā.
478. Na kevalamakattabbaṃ, kuladūsanameva ca;  
Atha kho vejjakammādi, na kattabbaṃ kudācanaṃ.

479. Kātabbaṃ pana bhesajjaṃ, pañcannaṃ sahadhamminnaṃ;  
Katvāpyakataviññattiṃ, kā kathā attano dhane.
480. Tathā mātipitūnampi, tadupaṭṭhākajantuno;  
Bhaṇḍukassattano ceva, veyyāvaccakarassapi.
481. Jeṭṭhabhātā kaniṭṭho ca, tathā bhaginiyo duve;  
Cūlamātā cūlapitā, mahāmātā mahāpitā.
482. Pitucchā mātulo cāti, dasime ñātayo matā;  
Imesampi dasannañca, kātuṃ vaṭṭati bhikkhuno.
483. Sace bhesajjametesam, nappahoti na hoti vā;  
Yācantipi ca taṃ bhikkhuṃ, dātabbaṃ tāvakālikam.
484. Sace te na ca yācanti, dātabbaṃ tāvakālikam;  
Ābhogaṃ pana katvā vā, “dassanti puna me ime”.
485. Etesam tu kulā yāva, sattamā kuladūsanam;  
Bhesajjakaraṇāpatti, viññatti vā na rūhati.
486. Bhātujāyāpi vā hoti, sace bhaginisāmiko;  
Sace te ñātakā honti, kātuṃ tesampi vaṭṭati.
487. Aññātakā sace honti, bhātuno anujāya vā;  
“Tumhākaṃ jaggaṇaṭṭhāne, dethā”ti ca vade budho.
488. Atha tesampi puttānaṃ, katvā dātabbameva vā;  
“Mātipitūnaṃ tumhākaṃ, dethā”ti vinayaññunā.
489. Aññopi yo koci panissaro vā;  
Coropi vā yuddhaparājito vā;  
Āgantuko khīṇaparibbayo vā;  
Akallako ñātijanujjhito vā.
490. Etesam pana sabbesaṃ, apaccāsīsātā satā;  
Kātabbo paṭisanthāro, bhikkhunā sādhanādhunā.
491. Parittodakasuttāni, vutte dethāti kenaci;  
Jalaṃ hatthena cāletvā, maddivā pana suttakaṃ.
492. Dātabbaṃ bhikkhunā katvā, tesameva ca santakaṃ;  
Attano udakaṃ tesam, suttam vā deti dukkaṃ.
493. Anāmaṭṭhopi dātabbo, piṇḍapāto vijānatā;  
Dvinnam mātipitūnampi, tadupaṭṭhāyakassa ca.
494. Issarassāpi dātabbo, coradāmarikassa ca;  
Bhaṇḍukassattano ceva, veyyāvaccakarassapi.
495. Dātuṃ paṇḍupalāsassa, thālakepi ca vaṭṭati;  
Ṭhapetvā taṃ panaññassa, pitunopi na vaṭṭati.

496. Gihīnaṃ pana dūteyyaṃ, jaṅghapesaniyampi ca;  
Satthunā dukkaṭaṃ vuttaṃ, karontassa pade pade.
497. Bhaṇḍumātāpitūnampi, veyyāvaccakarassa ca;  
Sāsaṇaṃ sahadhammīnaṃ, harituṃ pana vaṭṭati.
498. Kuladūsanakammena, laddhaṃ aṭṭhavidhenapi;  
Pañcannaṃ sahadhammīnaṃ, na ca vaṭṭati bhūñjituṃ.
499. Ajjhohāresu sabbattha, dukkaṭaṃ paridīpitaṃ;  
Paribhogavaseneva, sesesupi ayaṃ nayo.
500. Katvā rūpiyavohāraṃ, abhūtārocanena ca;  
Uppanapaccayā sabbe, samānāti pakāsītā.
501. Viññattinuppadānañca, vejjakammamanesanaṃ;  
Pāribhaṭukataṃ mugga-sūpataṃ vatthuvijjakaṃ.
502. Jaṅghapesaniyaṃ dūta-kammañca kuladūsaṇaṃ;  
Abhūtārocanāṃ buddha-paṭikuṭṭhaṃ vivajjaye.
503. Na dosummattakādīnaṃ, paṭinissajjatopi taṃ;  
Samuṭṭhānādikaṃ sabbaṃ, saṅghabhedasamaṃ matamaṃ.

Kuladūsanakathā.

504. Jānaṃ yāvatihama yena, chādītāpatti bhikkhunā;  
Akāmā parivatthabbaṃ, tena tāvatihama pana.
505. Āpatti ca anukkhitto, pahu cānantarāyiko;  
Catusvapi ca taṃsaññī, tassa chādetukāmatā.
506. Chādananti panetehi, dasahaṅgehi bhikkhunā;  
Channā nāma siyāpatti, aruṇuggamanena sā.

Dve bhāṇavārā niṭṭhitā.

507. Tividho parivāso hi, tividhāpetacetasā;  
Paṭicchanno ca suddhanto, samodhānoti dīpito.
508. Tatrāyaṃ tu **paṭicchanna-parivāso** pakāsito;  
Paṭicchannāya dātabbo, vassenāpattiyāti ca.
509. Vatthugottavasenāpi, nāmāpattivasena vā;  
Kammavācā hi kātabbā, dātabbo tassa tena ca.
510. ‘‘Vattaṃ samādiyāmī’’ti, ‘‘parivāsa’’nti vā puna;  
Samādiyitvā saṅghassa, ārocetabbamādito.
511. Punappunāgatānampi, ārocentova rattiyā;  
Chedaṃ vā vattabhedama vā, akatvāva sadā vase.



512. Parivāso visodhetuṃ, na sakkā tattha ce pana;  
Nikkhipitvāna taṃ vattaṃ, vatthabbaṃ tena bhikkhunā.
513. Tattheva saṅghamajjhe vā, puggale vāpi nikkhipe;  
Nikkhipāmīti vattaṃ vā, parivāsanti vā tathā.
514. Evamekapadenāpi, padehi dvīhi vā pana;  
Vattaṃ nikkhipitabbaṃ taṃ, samādānepyayaṃ nayo.
515. Nikkhittakālato uddhaṃ, pakatattoti vuccati;  
Puna paccūsakālasmiṃ, saddhimekena bhikkhunā.
516. Parikkhittavihārassa, dve parikkhepato bahi;  
Parikkhepārahaṭṭhānā, aparikkhittato bahi.
517. Leḍḍupāte atikkamma, okkamitvā ca maggato;  
Gumbena vatiyā vāpi, channaṭṭhāne ṭhitena tu.
518. Tena antoruṇeyeva, vattamādāya viññunā;  
Ārocetvāruṇe tasmim, vuṭṭhite tassa santike.
519. Nikkhipitvā tato vattaṃ, gantabbaṃ tu yathāsukhaṃ;  
Antoyevāruṇe bhikkhu, gato ce yassa kassaci.
520. Ārocetvāva taṃ vattaṃ, nikkhipe puna paṇḍito;  
Sesaṃ **samuccayassaṭṭha-kathāya** ca vibhāvaye.
521. Āpattīnañca rattīnaṃ, paricchedaṃ na jānati;  
Yo tassa pana dātabbo, “**suddhanto**”ti pavuccati.
522. Eseva parisuddhehi, suddhanto duvidho mato;  
**Cūlasuddhantanāmo** ca, **mahāsuddhantanāmako**.
523. Duvidhopi ayaṃ ratti-paricchedaṃ ajānato;  
Ekaccaṃ sakalaṃ vāpi, dātabbo vimatissa vā.
524. Itaropi **samodhāna-parivāso** tidhā mato;  
So **odhānasamodhāno, agghamissakapubbako**.
525. Āpajjitvāntarāpattiṃ, chādentassa hi bhikkhuno;  
Divase parivutthe tu, odhunitvā padīyate.
526. Purimāpattiyā mūla-divase tu vinicchite;  
Pacchā āpannamāpattiṃ, samodhāya vidhānato.
527. Yācamānassa saṅghena, dātabbo pana bhikkhuno;  
Esodhānasamodhāna-parivāso pakāsito.
528. Tathā sambahulāsvekā, dve vā sambahulāpi vā;  
Yā yā cirapaṭicchannā, tāsāṃ agghavasena hi.
529. Āpattīnaṃ tato ūna-paṭicchannānameva yo;

Samodhāya padātabbo, parivāsoti vuccati.

530. Nānāvattukasaññāyo, sabbā āpattiyo pana;  
Sabbātā ekato katvā, dātabbo missako mato.
531. Parivutthaparivāsassa, mānattaṃ deyyamuttari;  
Cha rattiyo paṭicchannā-paṭicchannavasā duve.
532. Tattha yā apaṭicchannā, hoti āpatti yassa tu;  
Tassa dātabbamānattaṃ, **apaṭicchannanāmakaṃ**.
533. Yassāpatti paṭicchannā, parivāsāvasānake;  
Tassa dātabbamānattaṃ, **“paṭicchanna”**nti vuccati.
534. Gantvā catūhi bhikkhūhi, paccūsasamaye saha;  
Parivāse viniddiṭṭha-ppakāraṃ desameva ca.
535. “Vattaṃ samādiyāmī”ti, “mānatta”miti vā pana;  
Ādiyitvāna taṃ tesam, ārocetvā visārado.
536. Nikkhipe santike tesam, vattaṃ tesu gatesu vā;  
Bhikkhussa pubbadiṭṭhassa, ārocetvāna nikkhipe.
537. Tassa dānavidhānañca, ratticchedādiko nayo;  
Ñeyyo **samuccayassaṭṭha-kathāpāḷi**vasena tu.
538. Puna taṃ ciṅṅamānattaṃ, saṅgho vīsativaggiko;  
Abbheyya vidhinā bhikkhu, pakatatto punabbhito.
539. Chādentiyāpi āpattiṃ, parivāso na vijjati;  
Na ca bhikkhunīyāpatti, attano chādayantiyā.
540. Chādetvā vāpi āpattiṃ, acchādetvāpi vā pana;  
Kevalaṃ caritabbanti, pakkhamānattameva tu.
541. Vinayanayamatibuddhidīpanaṃ;  
Vinayavinicchayametamuttamaṃ;  
Vividhanayanayutaṃ upenti ye;  
Vinayanaye paṭutaṃ upenti te.

Iti vinayavinicchaye saṅghādisesakathā niṭṭhitā.

### **Aniyatakathā**

542. Raho nisajjassādena, mātugāmassa santikaṃ;  
Gantukāmo nivāseti, akkhiṃ añjeti bhujjati.
543. Payoge ca payoge ca, hoti sabbattha dukkaṭaṃ;  
Gacchato padavārena, gantvā cassa nisīdato.
544. Nisajjāya ubhinnampi, payogagaṇanāya ca;

Hoti pācittiyaṃ tassa, bahukāni bahūsvapi.

545. Samīpepi ʘhito andho, antodvādasahatthake;  
Na karoti anāpattiṃ, itthīnaṃ tu satampi ca.
546. Cakkhumāpi nipajjitvā, niddāyantopi kevalaṃ;  
Dvāre pihitagabbhassa, nisinnopi na rakkhati.
547. Anandhe sati viññusmiṃ, ʘhitassārahasaññino;  
Nisajjapaccayā doso, natthi vikkhittacetaso.
548. Na dosummattakādīnaṃ, āpattīhipi tīhipi;  
Samuʘṭṭhānādayo tulyā, paʘhamantimavatthunā.

Paʘhamāniyatakathā.

549. Anandhābadhiro viññū, itthī vā purisopi vā;  
Antodvādasahatthaʘṭṭho, anāpattikaro siyā.
550. Andho abadhiro vāpi, badhiro vāpi cakkhumā;  
Na karoti anāpattiṃ, tisamuʘṭṭhānamevidaṃ.

Dutiyāniyatakathā.

Iti vinayavinicchaye aniyatakathā niʘṭṭhitā.

**Nissaggiyakathā**

551. Khomaṃ kappāsakoseyyaṃ, sāṇaṃ bhaṅgañca kambalaṃ;  
Cīvaraṃ chabbidhaṃ vuttaṃ, jātito pana kappiyaṃ.
552. Dukūlañceva pattuṇṇaṃ, cinaṃ somārapaʘṭṭakaṃ;  
Iddhijaṃ devadinnañca, tassetāṃ anulomikaṃ.
553. Ticīvaraṃ parikkhāra-coḷañca mukhapuñchanāṃ;  
Nisīdanamadhiʘṭṭheyya, paccattharaṇameva ca.
554. Ekāhampi vinā bhikkhu, na vaseyya ticīvaraṃ;  
Na vaseyya tathādhiʘṭṭhā, cātumāsaṃ nisīdanaṃ.
555. Rajitvā kappiyaṃ binduṃ, datvā tattha ticīvaraṃ;  
Upapannaṃ pamāṇena, adhiʘṭṭhātabbameva taṃ.
556. Pacchimantena saṅghāṭi, dīghaso muʘṭṭhipañcakā;  
Muʘṭṭhittikā ca tiriyaṃ, uttamantena sā pana.
557. Satthuno cīvarūnāpi, vaʘṭṭatīti pakāsītā;  
Idamevuttarāsaṅge, pamāṇaṃ paridīpitaṃ.
558. Muʘṭṭhipañcakaṃ dīghantaṃ, pamāṇaṃ tiriyantato;  
Aḍḍhateyyaṃ dvihatthaṃ vā, sese antaravāsake.

559. Ahatāhatakappānaṃ, saṅghāṭi diguṇā matā;  
Ekapaññuttarāsaṅgo, evamantaravāsako.
560. Utuddhaṭānaṃ pana cīvarānaṃ;  
Saṅghāṭi bhikkhussa catugguṇā vā;  
Duvepi sesā diguṇāva vuttā;  
Yathāsukhaṃ vaṭṭati paṃsukūlaṃ.
561. Tīṇipi dvepi cekkaṃ vā, chinditabbaṃ pahoti ce;  
Sabbesu appahontesu, deyyamanvādhikampi vā.
562. Acchinnaṃ vā anādinnaṃ, dhārentassa ticīvaraṃ;  
Bhikkhuno dukkaṭaṃ vuttaṃ, dubbhogena ca sevato.
563. Kusim aḍḍhakusiñcāpi, maṇḍalaṃ aḍḍhamaṇḍalaṃ;  
Vivaṭṭaṃ anuvivaṭṭaṃ, bāhantampi ca bhikkhuno.
564. Dassetvāva vidhiṃ sabbaṃ, pañcakādippabhedakaṃ;  
Chinnaṃ samaṇasārappaṃ, kātabbaṃ tu ticīvaraṃ.
565. Dānenacchijjagāhena, vissāsaggahaṇena ca;  
Hīnāyāvattanenāpi, sikkhāya ca pahānato.
566. Paccuddhāravinaṣehi, liṅgassa parivattanā;  
Sabbhaṃ bhijjati dhiṭṭhānaṃ, chiddabhāve ticīvaraṃ.
567. Kaniṭṭhassaṅgulasseva, nakhapiṭṭhippamāṇakaṃ;  
Vinividdhaṃ panacchidda-madhiṭṭhānavināsaṇaṃ.
568. Eko tantupi acchinno, adhiṭṭhānaṃ na bhindati;  
Setabhāvaṃ karontena, dhotampi rajakena vā.
569. Paṭhamaṃ aggaḷaṃ datvā, pacchā chindati rakkhati;  
Ghaṭetvā koṭiyo dve vā, pacchā chindati rakkhati.
570. Caturatṭhaṅgulā oraṃ, ekadvinnaṃ tirīyato;  
Tiṇṇampi dīghato chiddaṃ, bhindateva vidatthiyā.
571. Nisīdanassa dīghena, bhavanti dve vidatthiyo;  
Vitthārena diyaḍḍhā ca, sugatassa vidatthiyā.
572. Honti kaṇḍuppaṭicchādī, tiriyaṃ dve vidatthiyo;  
Dīghatopi catassova, sugatassa vidatthiyā.
573. Dīghato sugatasseva, bhavanti cha vidatthiyo;  
Vitthārenaḍḍhateyyāva, siyā vassikasāṭikā.
574. Muninā tīsu etesu, karontassa taduttariṃ;  
Adhikacchedanaṃ tassa, pācittiyamudīritaṃ.
575. Mukhapuñchanacoḷassa, paccattharaṇakassa vā;  
Pamāṇaṃ appamāṇena, na ceva paridīpitaṃ.

576. Sadasaṃ adasaṃ sabbasaṃ, paccattharaṇacīvaraṃ;  
Mahantaṃ khuddakaṃ eka-manekampi ca vaṭṭati.
577. Mukhapuñchanacoḷekaṃ, dvepi vaṭṭanti sabbathā;  
Sadasaṃ adasaṃ vāpi, sadasaṃva nisīdanaṃ.
578. Adasā rajitāyeva, vaṭṭatādinnakappakā;  
Vuttā kaṇḍuppaṭicchādi, tathā vassikasāṭikā.
579. Gaṇanaṃ vā pamāṇaṃ vā, na parikkhāra-coḷake;  
Pamāṇagaṇanātīti, bhaṇanti pakatañño.
580. Sugataṭṭhaṅgulāyāmaṃ, caturaṅgulavitthataṃ;  
Vikappanupagaṃ hoti, pacchimaṃ nāma cīvaraṃ.
581. Parissāvapaṭaṃ patta-potthakatthavikādikaṃ;  
Adhiṭṭheyya parikkhāra-coḷaṃ pacchimaṇacīvaraṃ.
582. Bahūni ekato katvā, adhiṭṭhātumpi vaṭṭati;  
Mātuādīnamatthāya, ṭhapite natthi dosatā.
583. Vassamāse adhiṭṭheyya, caturo vassasāṭikaṃ;  
Puna paccuddharitvā taṃ, vikappeyya tato paraṃ.
584. Tāva kaṇḍuppaṭicchādiṃ, yāva rogo na sammati;  
Adhiṭṭhahitvā tato uddhaṃ, uddharitvā vikappaye.
585. “Imaṃ kaṇḍuppaṭicchādiṃ, imamantaravāsakaṃ;  
Adhiṭṭhāmī”’tidhiṭṭheyya, sesesupi ayaṃ nayo.
586. “Imaṃ kaṇḍuppaṭicchādiṃ, eta”’nti ca asammukhe;  
Vatvā paccuddhareyyevaṃ, sesesupi vicakkhaṇo.
587. Ābhogaṃ manasā katvā, kāyena phusanākatam;  
Vacasādhiṭṭhitañcāti, adhiṭṭhānaṃ dvidhā matam.
588. Iti sabbamidaṃ vuttaṃ, tecīvarikabhikkhuno;  
Tathā vatvāvadhiṭṭheyya, taṃ parikkhāra-coḷiko.
589. Ticīvaraṃ parikkhāra-coḷaṃ kātumpi vaṭṭati;  
Evaṃ cudosite vutto, parihāro niratthako.
590. Na, tecīvarikasseva, vuttattā tattha satthunā;  
Taṃ parikkhāra-coḷassa, tasmā sabbampi vaṭṭati.
591. “Adhiṭṭheti vikappeti, anāpattī”’ti ettha ca;  
Adhiṭṭhātabbasseva, vikappanavidhānato.
592. Bhikkhussevaṃ karontassa, na doso upalabbhati;  
Evañca na siyā kasmā, mukhapuñchanakādikaṃ.
593. Mukhapuñchanakādīnaṃ, tesam kiccavidhānato;

Akiccassāmikassassa, adhiṭṭhānaṃ tu yujjati.

594. Nidhānamukhametanti, **mahāpaccariyaṃ** pana;  
Vuttattā ca nisedhetuṃ, na sakkā vinayaññunā.
595. Cīvaraṃ paripuṇṇanti, nidānuppattitopi ca;  
Nidhānamukhametanti, veditabbaṃ vibhāvinā.
596. Kusavākādicīrāni, kambalaṃ kesavālaṃ;  
Thullaccayaṃ dhārayato-lūkapakkhājīnakkhipe.
597. Kadalerakadussesu, akkadusse ca potthake;  
Dukkaṭaṃ tiriṭe vāpi, veṭhane kañcukepi ca.
598. Sabbanīlakamañjetṭha-kaṇhalohitapītake;  
Mahānāmamahāraṅga-rattesupi ca dukkaṭaṃ.
599. Acchinnadasake dīgha-phalapupphadasesu ca;  
Acchinnacīvarassettha, natthi kiñci akappiyaṃ.
600. Adhiṭṭheti vikappeti, vissajjeti vinassati;  
Antodasāhaṃ vissāse, anāpatti pakāsītā.
601. Kathinaṃ nāma nāmena, samuṭṭhānamidaṃ pana;  
Acittamakriyaṃ vuttaṃ, ticittañca tivedanaṃ.

Paṭhamakathinakathā.

602. Gāmādīsu padessesu, tipaṅcasu ticīvaraṃ;  
Ṭhapetvā ekarattampi, saṅghasammutiyaṃ vinā.
603. Bhikkhuno pana tenassa, vip̐pavatthuṃ na vaṭṭati;  
Hoti nissaggiyaṃ vip̐pa-vasato aruṇuggame.
604. Cīvaraṃ nikkhipitvāna, nhāyantasseva rattiyaṃ;  
Aruṇe uṭṭhite kiṃ nu, kātabbaṃ tena bhikkhunā.
605. Dukkaṭaṃ muninā vuttaṃ, nissaggiyanivāsane;  
Tabbhayā pana so bhikkhu, naggo gacchati dukkaṭaṃ.
606. Acchinnacīvaraṭṭhāne, ṭhitattā pana bhikkhuno;  
Na tassākappiyaṃ nāma, cīvaraṃ atthi kiñcipi.
607. Nigāsetvā gahetvā ca, gantvā bhikkhussa santikaṃ;  
Nissajjitvā panāpatti, desetabbāva viññunā.
608. Parassa nissajjitvā taṃ, dukkaṭaṃ paribhuñjato;  
Payoge ca payoge ca, hoti pārupanādisu.
609. Anāpatti tamaññassa, bhikkhuno paribhuñjato;  
Adentassa ca nissaṭṭhaṃ, dukkaṭaṃ pariyāputaṃ.

610. There ca dahare maggaṃ, gacchantesu ubhosupi;  
Pattacīvaramādāya, ohīne dahare pana.
611. Asampatte garuṃ tasmim, uggacchatyaruṇo yadi;  
Hoti nissaggiyaṃ vatthaṃ, na passambhati nissayo.
612. Muhuttaṃ vissamitvāna, gacchante dahare pana;  
Hoti nissaggiyaṃ vatthaṃ, passambhati ca nissayo.
613. Sutā dhammakathā yasmim, uggacchatyaruṇo yadi;  
Hoti nissaggiyaṃ vatthaṃ, passambhati ca nissayo.
614. Paccuddhāre anāpatti, laddhasammutikassapi;  
Antoyevāruṇe taṃ vā, vissajjeti vinassati.
615. Paṭhamena samānāva, samuṭṭhānādayo nayā;  
Apaccuddharaṇaṃ ettha, akriyāti visesitaṃ.

Dutiyakathinakathā.

616. Akālacīvaraṃ māsa-paramaṃ nikkhipe sati;  
Paccāsāya tato uddhaṃ, ṭhapetuṃ na ca vaṭṭati.
617. Dasāhātikkamoyeva;  
Paṭhame kathine idha;  
Māsassātikkamo vutto;  
Seso tena samo mato.

Tatīyakathinakathā.

618. Bhikkhu bhikkhuniyā bhuttaṃ, vatthaṃ aññātikāya yo;  
Dhovāpeti rajāpeti, ākoṭāpeti ce tato.
619. Tassa nissaggiyāpatti, paṭhamena pakāsītā;  
Tathā sesehi ca dvīhi, dīpitaṃ dukkaṭadvayaṃ.
620. Sikkhamānāya vā hatthe, dhovanatthāya deti ce;  
Sā hutvā upasampannā, pacchā dhovati so nayo.
621. Sāmaṇeraniddesepe, liṅgaṃ ce parivattati;  
Bhikkhunīsupasampajja, dhote nissaggiyaṃ siyā.
622. Daharānañca bhikkhūnaṃ, hatthe vatthe niyyādite;  
Parivattitaliṅgesu, tesupesa nayo mato.
623. Tathā bhikkhuniyā hatthe, dinne “dhovā”ti cīvare;  
Parivatte tu liṅgasmim, sace dhovati vaṭṭati.
624. “Dhovā”ti bhikkhunī vuttā, sace sabbaṃ karoti sā;  
Dhovanappaccayāyeva, tassa nissaggiyaṃ siyā.
625. “Imasmim cīvare sabbaṃ, kattabbaṃ tvam karohi”ti;

Hoti nissaggiyañceva, vadato dukkaṭadvayaṃ.

626. Ñātikāñātisaññissa, paccattharanisīdanam;  
Aññassa santakaṃ vāpi, dhovāpentassa dukkaṭam.
627. Ekatoupasampannā, bhikkhunīnaṃ vasena yā;  
Tāya dhovāpane vāpi, hoti āpatti dukkaṭam.
628. Avuttā paribhuttaṃ vā, aññaṃ vā yadi dhovati;  
Na doso, sañcarittena, samuṭṭhānādayo samā.

Purāṇacīvaradhovāpanakathā.

629. Vikappanupagaṃ kiñci, pacchimaṃ pana cīvaraṃ;  
Gaṇhato hoti āpatti, ṭhapetvā pārivattakaṃ.
630. Payoge gahaṇatthāya, dukkaṭaṃ pariyāputaṃ;  
Tassa nissaggiyāpatti, gahaṇena pakāsītā.
631. Sace anupasampanna-hatthe peseti cīvaraṃ;  
Aññaṭṭa pārivattāpi, gahetuṃ pana vaṭṭati.
632. Ñātikāyapi aññāti-saññissa vimatissa vā;  
Ekatoupasampanna-hatthā gaṇhāti dukkaṭaṃ.
633. ‘‘Dassāmī’’ti ca ābhogaṃ, katvā vā pārivattakaṃ;  
Tāvakālikavissāsa-ggāhe doso na vijjati.
634. Aññaṃ pana parikkhāraṃ, na doso hoti gaṇhato;  
Sañcarittasamuṭṭhānaṃ, idaṃ vuttaṃ kriyākriyaṃ.

Cīvaraṭṭiggahaṇakathā.

635. Cīvaraṃ viññāpentassa, aññātakāppavāritaṃ;  
Hoti nissaggiyāpatti, aññaṭṭa samayā pana.
636. Tikapācittiyaṃ vuttaṃ, tatheva dvikadukkaṭaṃ;  
Ñātakeñātisaññissa, tattha vematikassa ca.
637. Samaye viññāpentassa, ñātake vā pavārite;  
Aññassatthāya vā tassa, ñātake vā pavārite.
638. Anāpattīti ñātabbaṃ, tathā ummattakādino;  
Samuṭṭhānādayo sabbe, sañcarittasamā matā.

Aññātakaviññāttikathā.

639. Appavāritamaññātiṃ, cīvaraṃ tu taduttariṃ;  
Hoti nissaggiyāpatti, viññāpentassa bhikkhuno.
640. Yassa tīṇipi naṭṭhāni, dve vā ekampi vā pana;



Dve vā ekampi vā tena, sādītappaṃ na kiñcīpi.

641. Sesakaṃ āharantassa, dinne nacchinnakāraṇā;  
Santake ñātakādīnaṃ, attanopi dhanena vā.
642. Anāpattīti ñātabbaṃ, tathā ummattakādino;  
Samuṭṭhānādayo sabbe, sañcarittasamā matā.

Tatuttarikathā.

643. Kalyāṇakamyatāhetu, āpajjati vikappanaṃ;  
Cīvare pana yo tassa, lābhā nissaggiyaṃ bhava.
644. Mahaggaṃ dātukāmaṃhi, appaggaṃ viññāpeti yo;  
Santake ñātakādīnaṃ, anāpatti pakāsītā.
645. Ñātakeññātisaññissa, dukkaṭaṃ vimatissa ca;  
Sañcarittasamā vuttā, samuṭṭhānādayo nayā.

Paṭhamopakkhaṭakathā.

646. Dutiyopakkhaṭe yasmā, vattappaṃ natthi kiñcīpi;  
Tasmā anantarenassa, sadiso va vinicchayo.

Dutiyopakkhaṭakathā.

647. Raññā vā rājabhoggena, bhikkhumuddissamābhaṭaṃ;  
Akappiyaṃ suvaṇṇādīṃ, gahetuṃ na ca vaṭṭati.
648. Rajataṃ jātārūpaṃ vā, attano vā parassa vā;  
Atthāya gaṇhituṃ kiñci, dīyamānaṃ na vaṭṭati.
649. Aññassatthāya niddiṭṭhaṃ, bhikkhuno paṭiggaṇhato;  
Dukkaṭaṃ tassa hotīti, **mahāpaccariyaṃ** pana.
650. Netvā akappiyaṃ bhaṇḍaṃ, itthaṃ koci sace vade;  
“Idaṃ saṅghassa dammīti, puggalassa gaṇassa vā.
651. Ārāmaṃ vā vihāraṃ vā, cetiyaṃ vā karohi”’ti;  
Na ca vaṭṭati taṃ vatthuṃ, sabbesaṃ sampaṭicchituṃ.
652. Anāmasitvā saṅghaṃ vā, gaṇaṃ vā puggalampi vā;  
“Cetiyaṃ viharassa, demā”’tipi vadanti ce.
653. Taṃ hiraññaṃ suvaṇṇaṃ vā, nisedhetuṃ na vaṭṭati;  
Ārāmikānaṃ vattappaṃ, “vadantevamime”’ti ca.
654. Rajataṃ jātārūpaṃ vā, saṅghassa paṭiggaṇhato;  
Hoti nissaggiyāpatti, paribhoge ca dukkaṭaṃ.
655. Taḷākassa ca khettattā, sassuppattinidānato;

Gahaṇaṃ paribhogo vā, na ca vaṭṭati bhikkhuno.

656. “Cattāro paccaye saṅgho, gaṇo vā paribhuñjatu”;  
Iccevāṃ pana vatvā ce, deti sabbampi vaṭṭati.
657. Kārāpeti ca kedāre, chindāpetvā vanaṃ pana;  
Kedāresu purāṇesu, atirekampi gaṇhati.
658. Aparicchinnabhāgasmim, navasassepi “ettakaṃ;  
Bhāgaṃ dethā”ti vatvā ce, uṭṭhāpeti kahāpaṇe.
659. Vatvā akappiyaṃ vācaṃ, “kasatha vapathā”ti ca;  
Uppāditañca sabbesaṃ, hoti sabbamakappiyaṃ.
660. “Ettako nāma bhāgoti, ettikāya ca bhūmiyā”;  
Patiṭṭhāpeti yo bhūmiṃ, avatvā kasathādikaṃ.
661. Sayameva pamāṇassa, jānanatthaṃ tu bhūmiyā;  
Rajjuyā vāpi daṇḍena, khettaṃ mināti yo pana.
662. Khale vā rakkhati ṭhatvā, khalatopi tato puna;  
Nīharāpeti vā vīhī, tassevetamakappiyaṃ.
663. “Ettakehi ca vīhīhi, idama āharathā”ti ca;  
Āharanti sace vuttā, tassevetamakappiyaṃ.
664. “Ettakena hiraññaena, idamāharathā”ti ca;  
Āharanti ca yaṃ vuttā, sabbesaṃ tamakappiyaṃ.
665. Pesakāradāsaṃ vā, aññaṃ vā rajakādīsu;  
Ārāmikānaṃ nāmena, dente vaṭṭati gaṇhituṃ.
666. “Gāvo demā”ti vuttepi, gahetuṃ na ca vaṭṭati;  
Pañcagorasabhogattaṃ, vutte demāti vaṭṭati.
667. Ajikādīsu eseva, nayo ñeyyo vibhāvinā;  
Kappiyena ca vākyena, sabbama vaṭṭati gaṇhituṃ.
668. Hatthiṃ vā mahisaṃ assaṃ, goṇaṃ kukkuṭasūkaraṃ;  
Dentesu ca manussesu, na ca vaṭṭati gaṇhituṃ.
669. Paṭisiddhepi saṅghassa, datvā gacchati ce pana;  
Mūlaṃ datvā ca saṅghassa, keci gaṇhanti vaṭṭati.
670. “Khettaṃ vatthuṃ taḷākaṃ vā, dema goajikādikaṃ;  
Vihārassā”ti vuttepi, nisedhetuṃ na vaṭṭati.
671. Tikkhattuṃ codanā vuttā, chakkhattuṃ ṭhānamabravi;  
Yadi codetiyeva cha, codanā diguṇā ṭhiti.
672. Anāpatti acodetvā, laddhe ummattakādino;  
Samuṭṭhānādayo sabbe, sañcarittasamā matā.

## Rājasikkhāpadakathā.

## Cīvaravaggo paṭhamo.

673. Ekenāpi ca missetvā, santhataṃ kosiyamsunā;  
Hoti nissaggiyāpatti, kārāpentassa bhikkhuno.
674. Paratthāya karontassa, kārāpentassa santhataṃ;  
Aññaena ca kataṃ laddhā, sevamānassa dukkaṭaṃ.
675. Anāpatti vitānaṃ vā, bhūmattharaṇameva vā;  
Bhisi bibbohanaṃ vāpi, karontassādikammino.

## Kosiyakathā.

676. Kāḷakeḷakalomānaṃ, suddhānaṃ santhataṃ sace;  
Kareyyāpatti hotissa, sesaṃ tu paṭhamūpamaṃ.

## Suddhakāḷakakathā.

677. Anāpatti tulaṃ vāpi, bahuṃ vā sabbameva vā;  
Karontassa gahetvāna, odātaṃ kapilampi vā.
678. Anukkamena etāni, santhatāni ca tīṇipi;  
Nissajjivāpi laddhāni, sevamānassa dukkaṭaṃ.
679. Samuṭṭhānādayo sabbe, sañcarittasamā matā;  
Imesaṃ pana tīṇampi, tatiyaṃ tu kriyākriyaṃ.

## Dvebhāgakathā.

680. Channaṃ orena vassānaṃ, karontassa ca santhataṃ;  
Hoti nissaggiyāpatti, ṭhapetvā bhikkhusammutiṃ.
681. Anāpatti paratthāya, kārāpeti karoti vā;  
Kataṃ vā pana aññaena, labhitvā paribhuñjato.
682. Chabbassāni karontassa, taduddhampi ca santhataṃ;  
Vitāne sāṇipākāre, nissajjivā katepi ca.

## Chabbassakathā.

683. Anāpatti anādāya, asante santhate pana;  
Aññassatthāya kāretuṃ, katañca paribhuñjituṃ.
684. Anādānavasenassa, sugatassa vidatthiyā;  
Karaṇena ca satthārā, vuttametaṃ kriyākriyaṃ.
685. Samuṭṭhānādayo sabbe, sañcarittasamā matā;  
Anantarassimassāpi, viseso nupalabbhati.

## Nisīdanasanthatakathā.

686. Gacchante pana yāne vā, hatthiassādikesu vā;  
Ṭhabeti yadi lomāni, sāmikassa aḷānato.
687. Tiyojanamatītesu, tesu āpatti bhikkhuno;  
Agacchantesu tesveva, ṭhapitesupyayaṃ nayo.
688. Yāne pana agacchante, asse vā hatthipiṭṭhiyaṃ;  
Ṭhapetvā abhirūhitvā, sace sāreti vaṭṭati.
689. Na vaṭṭatīti niddiṭṭhaṃ, **kurundaṭṭhakathāya** hi;  
Taṃ panaññaṃ harāpeti, vacanena virujjhati.
690. Kaṇṇacchiddesu lomāni, pakkhipitvāpi gacchato;  
Hotiyeva kirāpatti, lomānaṃ gaṇanāvasā.
691. Suttakena ca bandhitvā, ṭhapitaṃ pana vaṭṭati;  
Veṇiṃ katvā harantassa, āpatti paridīpitā.
692. Suṅkaghātaṃ anuppatvā, corādīhi upadduto;  
Yo caññavihito vāpi, āpatti yadi gacchati.
693. Tiyojanaṃ harantassa, ūnakaṃ vā tiyojanaṃ;  
Tathā paccāharantassa, tāniyeva tiyojanaṃ.
694. Nivāsathāya vā gantvā, harantassa tato paraṃ;  
Acchinnaṃ vāpi nissaṭṭhaṃ, labhitvā haratopi ca.
695. Harāpentassa aññena, harato katabhaṇḍakaṃ;  
Tathā ummattakādīnaṃ, anāpatti pakāsītā.
696. Idaṃ pana samuṭṭhānaṃ, kāyato kāyacittato;  
Acittaṃ kāyakammañca, ticittañca tivedanaṃ.

## Eḷakalomakathā.

697. Samuṭṭhānādinā saddhiṃ, lomadhovāpanampi ca;  
Cīvarassa purāṇassa, dhovāpanasamaṃ mataṃ.

## Eḷakalomadhovāpanakathā.

698. Gaṇheyya vā gaṇhāpeyya, rajataṃ jātarūpakaṃ;  
Nissajjitvā panāpatti, desetabbāva bhikkhunā.
699. Rajataṃ jātarūpañca, ubhinnaṃ māsakopi ca;  
Etaṃ catubbidhaṃ vatthu, hoti nissaggiyāvahaṃ.
700. Muttā maṇi silā saṅkho, pavāḷaṃ lohitaṅkako;  
Masāragallaṃ dhaññāni, satta gomahisādikaṃ.

701. Khettaṃ vatthum taḷakañca, dāsīdāsādikaṃ pana;  
Dukkaṭasseva vatthūni, dīpitāni mahesinā.
702. Muggamāsādikaṃ sabbaṃ, sappiādīni taṇḍulā;  
Suttaṃ vatthaṃ halaṃ phālaṃ, kappiyaṃ evamādikaṃ.
703. Tatthattano panatthāya, vatthum nissaggiyassa hi;  
Sampaṭicchati yo bhikkhu, tassa nissaggiyaṃ siyā.
704. Saṅghādīnaṃ tamatthāya, gaṇhato dukkaṭaṃ tathā;  
Dukkaṭassa ca vatthumpi, sabbatthāya ca dukkaṭaṃ.
705. Sace kahāpaṇādīnaṃ, sahaṃ paṭigaṇhati;  
Vatthūnaṃ gaṇanāyassa, āpattigaṇanā siyā.
706. Tathā sithilabaddhesu, thavikādīsu rūpato;  
Āpattigaṇanā vuttā, **mahāpaccariyaṃ** pana.
707. “Idaṃ ayyassa hotū”ti, vutte vā pana kenaci;  
Sace gaṇhitukāmopi, nisedhetabbameva ca.
708. Paṭikkhittepi taṃ vatthum, ṭhapetvā yadi gacchati;  
Tathā gopāyitabbaṃ taṃ, yathā taṃ na vinassati.
709. “Āharedamidaṃ gaṇha, idaṃ dehīdha nikkhipa”;  
Icevaṃ bhikkhuno vattum, na vaṭṭati akappiyaṃ.
710. Ṭhapetvā rūpiyaggāhaṃ, nissatṭhaparivattitaṃ;  
Sabbehi paribhottabbaṃ, bhājetvā sappiādikaṃ.
711. Attano pattaḥgāmpī, paṭiggāhakabhikkhuno;  
Gahetuṃ aññato laddhaṃ, bhūñjituṃ vā na vaṭṭati.
712. Yaṃ kiñci pana sambhūtaṃ, paccayaṃ vatthuto tato;  
Bhikkhuno sevamānassa, hoti āpatti dukkaṭaṃ.
713. Ajjhārāme anāpatti, tamajjhāvasathepi vā;  
Gahetvā vā gahāpetvā, nikkhipantassa bhikkhuno.
714. Tikapācittiyaṃ vuttaṃ, rūpiyanti arūpiye;  
Saññino vimatissāpi, hoti āpatti dukkaṭaṃ.
715. Samuṭṭhānādayo sabbe, sañcarittasamā matā;  
Kriyākriyamidaṃ vuttaṃ, ayameva visesatā.

Rūpiyapaṭiggahaṇakathā.

716. Vatthum nissaggiyassāpi, vatthum vā dukkaṭassa ca;  
Kappiyassa ca vatthum vā, yo nissaggiyavatthunā.
717. Vatthunā dukkaṭassāpi, vatthum nissaggiyassa vā;  
Parivatteti āpatti, kappiyena ca vatthunā.

718. Dukkaṭṭassa ca vatthum vā, vatthum vā kappiyassa ca;  
Vatthunā dukkaṭṭasseva, parivatteti dukkaṭṭam.
719. Vatthunā kappiyassāpi, tathā dukkaṭṭavattthukam;  
Parivatteti yo tassa, hoti āpatti dukkaṭṭam.
720. Vatthuno dukkaṭṭassāpi, tathā nissaggiyassa ca;  
Gahaṇam vāritam pubbe, iminā parivattanam.
721. Rūpiyanti ca saññissa, vimatissa arūpiye;  
Tena dve dukkaṭṭā honti, cetāpentassa rūpiyam.
722. Arūpiyanti saññissa, anāpatti arūpiye;  
“Idam gahetvā dehi”’ti, vadatopi ca pañcahi.
723. Sesam anantareneva, samuṭṭhānādikam samam;  
Idam kriyasamuṭṭhānam, ayameva visesatā.

Rūpiyasamvohārakathā.

724. Kappiyam kappiyeneva, parivattayato pana;  
Hoti nissaggiyāpatti, ṭhapetvā sahadhammike.
725. Akappiyassa vatthussa, teneva parivattanam;  
Na gacchatīti niddiṭṭham, kayavikkayasāṅgham.
726. Tasmā mātāpitūnampi, vatthum yaṃ kiñci kappiyam;  
“Imam dehiminā hi”’ti, vadato pana dukkaṭṭam.
727. Sakam vā deti ce bhaṇḍam, evam vatvāna mātuyā;  
Mātuyā vā tathā bhaṇḍam, sayam gaṇhāti dukkaṭṭam.
728. Sahattham parabhaṇḍasmim, parahatthañca attano;  
Bhaṇḍake pana sampatte, nissaggiyamudīritam.
729. “Gahetvā vā idam nāma, bhuñjitvā odanam imam;  
Idam nāma karohi”’ti, vattum pana na vaṭṭati.
730. Vighāsādamathaññam vā, “bhuñjitvā odanam imam;  
Challim vā pana vallim vā, kaṭṭham vā dārumeva vā.
731. Āharā”’ti vadantassa, vatthūnam gaṇanāvasā;  
Honti āpattiyo tassa, bhikkhuno kayavikkaye.
732. “Imañca yāguṃ piva bhuñja bhattam;  
Bhuttosī bhuñjissasi bhuñjasīdam;  
Bhattam, imam nāma karohi kammam”’;  
Iceva vattum pana vaṭṭateva.
733. Bhūmiyā sodhane vāpi, limpāne vatthadhovane;  
Ettha kiñcāpi natthaññam, bhaṇḍam nissajjitabbakam.

734. Nissaggiye ca vatthumhi, naṭṭhe bhuttepi vā yathā;  
Desetabbāva āpatti, desetabbā tathā ayam.

735. “Imināva imaṃ nāma, gahetvā dehi me”’iti;  
Ācikkhati anāpatti, ṭhapetvā bhaṇḍasāmikaṃ.

736. “Idaṃ mamatthi attho me, iminā”’ti ca bhāsato;  
Sesaṃ anantareneva, samuṭṭhānādikaṃ samaṃ.

Kayavikkayakathā.

Kosiyavaggo dutiyo.

737. Mattikāyomayā pattā, kappiyā jātito duve;  
Tayo pattassa vaṇṇā tu, ukkaṭṭho majjhimomako.

738. Dvinnaṃ taṇḍulanālīnaṃ, bhattaṃ magadhanāḷiyā;  
Khādanañca catubbhāgaṃ, byañjanañca tadūpiyaṃ.

739. **Ukkaṭṭho** nāma so patto, yo taṃ sabbam tu gaṇhati;  
**Majjhimo** tassupaḍḍho ca, tadupaḍḍho ca **omako**.

740. Ukkaṭṭhassa ca ukkaṭṭho, tassevomakamajjhimā;  
Evaṃ majjhimaomesu, nava pattā bhavanti hi.

741. Ukkaṭṭhukkaṭṭhako tesu, apatto omakomako;  
Tasmā nāpi adhiṭṭhānaṃ, na gacchanti vikappanaṃ.

742. Sesaṃ sattavidhaṃ pattam, pattalakkhaṇasaṃyutaṃ;  
Adhiṭṭhāya vikappetvā, paribhuñjeyya paṇḍito.

743. Dasāhaparamaṃ kālaṃ, dhāreyya atirekato;  
Atikkamayato pattam, tañhi nissaggiyaṃ siyā.

744. Yaṃ pattam na vikappeti, yaṃ nādhiṭṭheti vā pana;  
Vinayaññūhi so patto, atirekoti vaṇṇito.

745. Vattabbaṃ tu “imaṃ pattam, adhiṭṭhāmī”’ti sammukhe;  
“Etaṃ patta”’nti dūrasmiṃ, paccuddhārepyayaṃ nayo.

746. Ābhogaṃ manasā katvā, katvā kāyavikāraṃ;  
Kāyenapi ca pattassa, adhiṭṭhānaṃ pakāsitaṃ.

747. Patto jahatidhiṭṭhānaṃ, dānabhedakanāsato;  
Vibhamuddhārapaccakkha-parivattanagāhato.

748. Kaṅgusitthappamāṇena, khenādhiṭṭhānamujjhati;  
Pidahitvā adhiṭṭheyya, ayocunṇena vāṇiyā.

749. Yo hi nissaggiyaṃ pattam, anissajjeva bhuñjati;  
Dukkaṭam tassa niddiṭṭham, bhutvā dhovanadhovane.

750. Suvanṇamaṇipatto ca, veḷuriyaphalikubbhavo;  
Kaṃsakācamayo patto, tipusīsamayopi ca.
751. Tathā dārumayo patto, tambasajjhumayopi ca;  
Ekādasavidho patto, vutto dukkaṭavatthuko.
752. Ghaṭasīsakaṭāho ca, tumbaṃ cassānulomikaṃ;  
Tambalohamayaṃ tattha, thālakaṃ pana vaṭṭati.
753. Phalikaṅkacakaṃsānaṃ, taṭṭikādīni kānici;  
Puggalassa na vaṭṭanti, vaṭṭanti gihisaṅghikā.
754. Yaṃ kiñci sodakaṃ pattamaṃ, paṭisāmeyya dukkaṭamaṃ;  
Sādhukaṃ vodakaṃ katvā, paṭisāmeyya paṇḍito.
755. Bhikkhuno sodakaṃ pattamaṃ, otāpetumaṃ na vaṭṭati;  
Uṇhe na nidahetabbo, nidahantassa dukkaṭamaṃ.
756. Miḍḍhante paribhaṇḍante, ṭhapetumaṃ na ca vaṭṭati;  
Miḍḍhiyā paribhaṇḍe vā, vitthiṇṇe pana vaṭṭati.
757. Dāruādhārake patte, dve ṭhapetumpi vaṭṭati;  
Ayaṃeva nayo daṇḍa-bhūmiādhārakesupi.
758. Taṭṭikāyapi coḷe vā, potthake kaṭasārake;  
Paribhaṇḍakatāyāpi, bhūmiyaṃ vālukāsu vā.
759. Tathārūpāsu suddhāsu, ṭhapetumaṃ pana vaṭṭati;  
Sarajāya ṭhapentassa, dukkaṭamaṃ kharabhūmiyā.
760. Daṇḍe vā nāgadante vā, laggetumpi na vaṭṭati;  
Chattaṅgamañcapīṭhesu, ṭhapentassa ca dukkaṭamaṃ.
761. Aṭṭanīsu hi bandhitvā, olambetumpi vaṭṭati;  
Bandhitvā pana mañcassa, ṭhapetumpari vaṭṭati.
762. Mañcapīṭṭhaṭṭake pattamaṃ, ṭhapetumaṃ pana vaṭṭati;  
Bhattapūropi vā chatte, ṭhapetumaṃ na ca vaṭṭati.

Tayo bhāṇavārā niṭṭhitā.

763. Kavāṭamaṃ na paṇāmeyya, pattahattho sace pana;  
Yena kenaci aṅgena, paṇāmeyyassa dukkaṭamaṃ.
764. Na nīhareyya pattena, calakānaṭṭhikāni vā;  
Ucchiṭṭhamudakaṃ vāpi, nīharantassa dukkaṭamaṃ.
765. Pattamaṃ paṭiggahaṃ katvā, dhovitumaṃ hatthameva vā;  
Mukhato nīhaṭṭamaṃ patte, ṭhapetumaṃ na ca vaṭṭati.
766. Anāpatti dasāhassa, antoyeva ca yo pana;  
Adhiṭṭheti vikappeti, vissajjeti vinassati.



767. Paṭhamassa hi pattassa, paṭhamena mahesinā;  
Samuṭṭhānādayo sabbe, kathinena samā matā.

Paṭhamapattakathā.

768. Pañcabandhanaūnasmiṃ, patte sati ca yo pana;  
Viññāpeyya navaṃ pattaṃ, tassa nissaggiyaṃ siyā.

769. Bandhanaṃ ekamuḍḍiṭṭhaṃ, dvaṅgulāya ca rājiyā;  
Bandhanāni ca cattāri, tathāṭṭhaṅgularājiyā.

770. Pañca vā rājiyo yassa, ekā vāpi dasaṅgulā;  
Apatto nāmayāṃ patto, viññāpeyya tato paraṃ.

771. Ayopatto anekehi, lohamaṇḍalakehi vā;  
Baddho vaṭṭati maṭṭho ce, ayocuṇṇena vāṇiyā.

772. Pattaṃ saṅghassa nissaṭṭhaṃ, tassa nissaggiyaṃ pana;  
Anukampāya taṃ tasmim, agaṇhantassa dukkaṭaṃ.

773. Dīyamāne tu pattasmim, yassa so na ca rucati;  
Appicchatāya vā pattaṃ, taṃ na gaṇhāti vaṭṭati.

774. Apattassa tu bhikkhussa;  
Na dātabboti dīpito;  
Tattha yo pattapariyanto;  
So deyyo tassa bhikkhuno.

775. Sace so taṃ jigucchanto, appadese ṭhapeti vā;  
Vissajjeti abhogena, paribhuñjati dukkaṭaṃ.

776. Naṭṭhe bhinnepi vā patte, anāpatti pakāsītā;  
Attano ñātakādīnaṃ, gaṇhato vā dhanena vā.

777. Sañcarittasamuṭṭhānaṃ, kriyaṃ paṇṇattivajjakam;  
Kāyakammaṃ vacīkammaṃ, ticittaṅca tivedanaṃ.

Dutiyapattakathā.

778. Sappiādiṃ purebhattaṃ, bhesajjaṃ paṭigayha hi;  
Sāmisampi purebhattaṃ, paribhuñjati vaṭṭati.

779. Tato paṭṭhāya sattāhaṃ, taṃ vaṭṭati nirāmisam;  
Sattāhātikkame tassa, nissaggiyamudrītaṃ.

780. Pacchābhattampi gaṇhitvā, katvā sannidhikāraṃ;  
Sāyato pana sattāhaṃ, vaṭṭateva nirāmisam.

781. Purebhattampi pacchā vā, sayamuggahitaṃ pana;  
Sarīrabhoge netabbaṃ, sāyituṃ na ca vaṭṭati.

782. Navanītaṃ purebhattaṃ, bhikkhunā gahitaṃ sace;

- Tāpetvānupasampanno, deti vaṭṭati sāmisaṃ.
783. Sayaṃ tāpeti ce bhikkhu, sattāhampi nirāmisam;  
Tāpanaṃ navanītaṃ, sāmāpāko na hoti so.
784. Pacchābhattaṃ gahetvā ce, yena kenaci tāpitaṃ;  
Vaṭṭateva ca taṃ sappi, sattāhampi nirāmisam.
785. Khīraṃ dadhiṃ cāpi paṭiggahetvā;  
Sayam purebhattamatho karoti;  
Sappiṃ purebhattakameva tassa;  
Nirāmisam vaṭṭati bhikkhuno taṃ.
786. Pacchābhattakato uddham, taṃ na vaṭṭati sāyitaṃ;  
Savatthukassa sappissa, gahitattāva bhikkhuno.
787. Sattāhātikkamepissa, na doso koci vijjati;  
‘‘Paṭiggahetvā tānī’’ti, vuttattā hi mahesinā.
788. Yathā kappiyasappimhi, nissaggiyamudīritaṃ;  
Tathākappiyasappimhi, dukkaṭaṃ paridīpitaṃ.
789. Sabbākappiyamaṃsānaṃ, vajjetvā maṃsameva ca;  
Khīraṃ dadhi ca sappi ca, navanītaṃ vaṭṭati.
790. ‘‘Yesam kappati maṃsañhi, tesam sappī’’ti kiṃ idaṃ?  
Paṇītabhojanassāpi, tathā sattāhakālike.
791. Nissaggiyassa vatthūnaṃ, paricchenedaniyāmanaṃ;  
Na cākappiyamaṃsānaṃ, sappiādi nivāritaṃ.
792. Navanītepi sappimhi, gahituggahitādike;  
Sabbo vuttanayeneva, veditabbo vinicchayo.
793. Telabhikkhāya bhikkhūnaṃ, pavittānaṃ upāsakā;  
Telaṃ vā navanītaṃ vā, sappiṃ vā ākiranti hi.
794. Bhattasitthāni vā tattha, taṇḍulā vā bhavanti ce;  
Ādiccapakkasaṃsaṭṭhaṃ, hoti sattāhakālikaṃ.
795. Tilasāpatelaṃ vā, madhukeraṇḍatelakaṃ;  
Gahitaṃ tu purebhattaṃ, sāmisaṃpi nirāmisam.
796. Pacchābhattakato uddham, sāyitabbaṃ nirāmisam;  
Sattāhātikkame tesam, vasā nissaggiyaṃ siyā.
797. Eraṇḍamadhukaṭṭhīni, sāsapādīni cattanā;  
Gahetvā katatelampi, hoti sattāhakālikaṃ.
798. Yāvajīvikavatthuttā, tesam tiṇṇampi bhikkhuno;  
Savatthugahaṇe tassa, kācāpatti na vijjati.

799. Attanā yaṃ kataṃ telaṃ, taṃ vaṭṭati nirāmiṣaṃ;  
Sattāhātikkamenassa, hoti nissaggiyaṃ pana.
800. Dukkaṭaṃ sāsapādīnaṃ, telatthāyeva bhikkhunā;  
Gahetvā ṭhapitānaṃ tu, sattāhātikkame siyā.
801. Nāḷikerakarañjānaṃ, telaṃ kuruvakassa ca;  
Nimbakosambakānañca, telaṃ bhallātakassa ca.
802. Icevamādikaṃ sabbaṃ, avuttaṃ pāḷiyaṃ pana;  
Gahetvā nikkhipantassa, dukkaṭaṃ samayaccaye.
803. Yāvakālikabhedañca, yāvajīvakameva ca;  
Viditvā sesamethāpi, sappinā sadiso nayo.
804. Acchamacchavarāhānaṃ, susukāgadrabhassa ca;  
Vasānaṃ pana pañcanaṃ, telaṃ pañcavidhaṃ bhava.
805. Sabbameva vasātelāṃ, kappiyākappiyassa ca;  
Manussānaṃ vasātelāṃ, ṭhapetvā pana vaṭṭati.
806. Vasāṃ paṭiggahetvāna, purebhattaṃ panattanā;  
Pakkaṃ vaṭṭati saṃsaṭṭhaṃ, sattāhampi nirāmiṣaṃ.
807. Sace anupasampanno, katvā taṃ deti vaṭṭati;  
Sāmisampi purebhattaṃ, tato uddhaṃ nirāmiṣaṃ.
808. Paṭiggahetuṃ kātuṃ vā, pacchābhattaṃ na vaṭṭati;  
Seso vuttanayeneva, veditabbo vibhāvinā.
809. Gahitañhi purebhattaṃ, madhuṃ madhukarīkataṃ;  
Vaṭṭateva purebhattaṃ, sāmisampi nirāmiṣaṃ.
810. Pacchābhattakato uddhaṃ, sattāhampi nirāmiṣaṃ;  
Sattāhātikkame doso, vatthūnaṃ gaṇanāvasā.
811. Ucchumhā pana nibbattaṃ, pakkāpakkāṃ ghanāghanaṃ;  
Rasādi pana taṃ sabbaṃ, “phāṇita”nti pavuccati.
812. Phāṇitaṃ tu purebhattaṃ, gahitaṃ pana vaṭṭati;  
Sāmisampi purebhattaṃ, tato uddhaṃ nirāmiṣaṃ.
813. Asaṃsaṭṭhena ucchussa, rasena kataphāṇitaṃ;  
Gahitena purebhattaṃ, tadaheva nirāmiṣaṃ.
814. Ucchuṃ paṭiggahetvāna, katepesa nayo mato;  
Pacchābhattakato uddhaṃ, taṃ na vaṭṭati sāyituṃ.
815. Gahitattā savatthussa, sattāhātikkamepi ca;  
Hoti tassa anāpatti, pacchābhattaṃ katepi ca.
816. Saṃsaṭṭhañca purebhattaṃ, gahitaṃ tamupāsako;

Tadahe deti ce katvā, sāmisaṃpi ca vaṭṭati.

817. Saṃsaṭṭhena purebhattaṃ, gahitena sayamkataṃ;  
Pacchābhattaṃ katañcāpi, sattāhampi nirāmiṣaṃ.
818. Kataṃ madhukapupphānaṃ, phāṇitaṃ sītavārinā;  
Sāmisaṃpi purebhattaṃ, tato uddhaṃ nirāmiṣaṃ.
819. Sattāhātikamepissa, dukkaṭaṃ paridīpitaṃ;  
Pakkhipitvā kataṃ khīraṃ, hoti taṃ yāvakālikaṃ.
820. Phalānaṃ pana sabbesaṃ, yāvakālikasaññinaṃ;  
Yāvakālikamicceva, phāṇitaṃ paridīpitaṃ.
821. Pacchābhattampi bhikkhussa, paccaye sati kevalaṃ;  
Kālikā pana vaṭṭanti, purebhattaṃ yathāsukhaṃ.
822. Labhitvā pana nissaṭṭhaṃ, taṃ tu sattāhakālikaṃ;  
Aruādīni makkhetuṃ, sāyituṃ vā na vaṭṭati.
823. Aññaṣsa pana bhikkhussa, kāyabhoge ca vaṭṭati;  
Cajitvā nirapekkhova, labhitvā puna sāyituṃ.
824. Anāpatti adhiṭṭheti, vissajjeti vinassati;  
Acchinditvā ca vissāsaṃ, gaṇhatummattakādino.
825. Samuṭṭhānādayo sabbe, kathinena samā matā;  
Sadākathinacittena, paṭhameneva satthunā.

Bhesajjasikkhāpadakathā.

826. Māso sesoti gimhānaṃ, pariyeseyya sāṭikaṃ;  
Addhamāsova sesoti, katvā paridahe budho.
827. Katvā pana satuppādaṃ, vassasāṭikacīvaraṃ;  
Nipphādentassa bhikkhussa, samaye piṭṭhisammaṭṭe.
828. Hoti nissaggiyāpatti, ñātakāññātakādino;  
Tesuyeva ca viññattim, katvā nipphādane tathā.
829. Katvā pana satuppādaṃ, samaye kucchisaññite;  
Nipphādentassa bhikkhussa, vatthamaññātakādino.
830. Tassādinnaṃpubbesu, vattabhedena dukkaṭaṃ;  
Karoto tatra viññattim, nissaggiyamudīritaṃ.
831. Ovassāpeti ce kāyaṃ, naggo satipi cīvare;  
Nhānassa pariyoṣāne, dukkaṭaṃ vivaṭaṅgaṇe.
832. Ūnake pana māsasmim, atirekoti saññino;  
Tattha vematikassāpi, hoti āpatti dukkaṭaṃ.

833. Acchinnacīvarassāpi, anāpattāpadāsupi;  
Nhānakoṭṭhakavāpīsu, nhāyantassa ca bhikkhuno.

834. Sañcarittasamuṭṭhānaṃ, kriyaṃ paṇṇattivajjakam;  
Kāyakammaṃ vacīkammaṃ, ticittañca tivedanaṃ.

Vassikasāṭṭhikakathā.

835. Sāmaṃ tu cīvaraṃ datvā, acchindantassa taṃ puna;  
Sakasaññāya bhikkhussa, tassa nissaggiyaṃ siyā.

836. Ekāyeva panāpatti, ekamacchindato siyā;  
Bahūni ekabaddhāni, acchindantassa vā tathā.

837. Viṣuṃ ṭhitāni ekeka-māharāpayato pana;  
Vatthānaṃ gaṇanāyassa, āpattigaṇanā siyā.

838. “Mayā dinnāni sabbāni, āharā”ti ca bhāsato;  
Ekena vacaneneva, honti āpattiyo bahū.

839. Āṇāpeti sace aññaṃ, bhikkhuṃ gaṇhāti cīvaraṃ;  
Bahūni gaṇhatāṇatto, ekaṃ pācittiyaṃ siyā.

840. “Mayā dinnāni sabbāni, gaṇhā”ti vadato pana;  
Ekāyassa ca vācāya, honti āpattiyo bahū.

841. “Saṅghāṭimuttarāsaṅgaṃ, gaṇha gaṇhā”ti bhāsato;  
Hoti vācāya vācāya, āṇāpentassa dukkaṭaṃ.

842. Vikappanupagaṃ kiñci, ṭhapetvā pacchimaṃ paraṃ;  
Aññaṃ pana parikkhāraṃ, chindāpentassa dukkaṭaṃ.

843. Ṭhapetvā upasampannaṃ, aññesaṃ cīvarādikaṃ;  
Acchindatopi bhikkhussa, hoti āpatti dukkaṭaṃ.

844. Evaṃ anupasampanne, upasampannasaññīno;  
Tattha vematikassāpi, acchindantassa dukkaṭaṃ.

845. So vā deti sace tuṭṭho, duṭṭho vissāsameva vā;  
Gaṇhatopi anāpatti, tathā ummattakādino.

846. Adinnādānatulyāva, samuṭṭhānādayo nayā;  
Aññaṭra vedanāyettha, hoti sā dukkhavedanā.

Cīvaracchindanakathā.

847. Viññāpetvā sace suttaṃ, chabbidhaṃ sānulomikaṃ;  
Cīvaraṃ tantavāyehi, vāyāpeti na vaṭṭati.

848. Sāmaṃ viññāpitaṃ suttaṃ, akappiyamudīritaṃ;  
Tantavāyopi viññatto, tathā aññātakādiko.

849. Viññattatantavāyena, suttenākappiyena ca;  
Cīvaram vāyāpentassa, nissaggiyamudīritam.
850. Vidatthimatte dīghena, hatthamatte tirīyato;  
Vīte nissaggiyam vuttam, phalake phalakepi ca.
851. Teneva kappiyam suttam, vāyāpentassa dukkaṭam;  
Tattheva tantavāyena, kappiyena akappiyam.
852. Ekantarikato vāpi, dīghato vā tirīyato;  
Kappiyākappiyeheva, vīte suttehi dukkaṭam.
853. Kappiyākappiyeheva, tantavāyehi ve kate;  
Kappiyākappiyam suttam, missetvā tassa dukkaṭam.
854. Sace akappiyam suttam, vārenea vinanti te;  
Dassetvāva paricchedam, akappiyavite pana.
855. Pācittiyam pamāṇasmim, tadūne dukkaṭam siyā;  
Itarena vite vatthe, ubhayattheva dukkaṭam.
856. Dvepi vemaṃ gahetvā vā, ekato vā vinanti ce;  
Phalake phalake tassa, dukkaṭam paridīpitam.
857. Eteneva upāyena, bhede sabbattha sādhuṃ;  
Āpattibhedo viññeyyo, viññunā vinayaññunā.
858. Kappiyo tantavāyopi, sace suttampi kappiyam;  
Cīvaram vāyāpentassa, anāpatti pakāsītā.
859. Anāpatti parissāve, āyoge aṃsabaddhake;  
Samuṭṭhānādayo sabbe, sañcarittasamā matā.

Suttaviññattikathā.

860. Appavāritañātīnam, tantavāye samecca ce;  
Vikappam cīvare bhikkhu, āpajjati na vaṭṭati.
861. Dīghāyatappitathāya, suttavaḍḍhanake kate;  
Bhikkhu nissaggiyāpattiṃ, āpajjati na saṃsayo.
862. Bhikkhuno ñātakādīnam, tantavāyesu attano;  
Dhanenaññassa catthāya, anāpattiṃ viniddise.
863. Vāyāpentassa appaggham, mahaggham kattukāmino;  
Tathā ummattakādīnam, sesam vuttamanantare.

Pesakārakathā.

864. Vassamvuṭṭhe yamuddissa, bhikkhū dīyati cīvaram;  
Pavāraṇāya pubbeva, tam hotaccekkacīvaram.

865. Pure pavāraṇāyeva, bhājetvā yadi gayhati;  
Vassacchedo na kātabbo, saṅghikaṃ taṃ karoti ce.
866. Anāpatti adhiṭṭheti, antosamayameva taṃ;  
Vissajjeti vikappeti, vinassati ca ḍayhati.
867. Tassaccāyikavatthassa, kathine tu anattathe;  
Parihārekamāsova, dasāhaparamo mato.
868. Attathe kathine tassa, pañca māsā pakāsitā;  
Parihāro munindena, dasāhaparamā pana.
869. Samuṭṭhānādayo sabbe, kathinena samā matā;  
Paṭhamenākriyācittaṃ, ticittañca tivedanaṃ.

Accekacīvarakathā.

870. Vasitvā pana ce bhikkhu, pubbakattikapuṇṇamaṃ;  
Ṭhapetvā cīvaraṃ gāme, paccaye sati tādise.
871. Chārattaparamaṃ tena, vasitabbaṃ vinā tato;  
Uttariṃ vasato doso, vinā saṅghassa sammutiṃ.
872. Kattikeyeva māsasmiṃ, paṭhamāya pavārito;  
Pacchimena pamāṇena, yutte sāsāṅkasammate.
873. Senāsane vasantova, ṭhapetuṃ ekacīvaraṃ;  
Caturaṅgasamāyoge, labhatīti pakāsito.
874. Yaṃ gāmaṃ gocaraṃ katvā, bhikkhu āraññake vase;  
Tasmiṃ gāme ṭhapetuṃ taṃ, māsamekaṃ tu vaṭṭati.
875. Aññattheva vasantassa, chārattaparamaṃ matam;  
Ayamassa adhippāyo, paṭicchanno pakāsito.
876. Senāsanamathāgantvā, sattamaṃ aruṇaṃ pana;  
Uṭṭhāpetuṃ vidūrattā, asakkontassa bhikkhuno.
877. Gāmasīmampi vā gantvā, vasitvā yattha katthaci;  
Cīvarassa pavattiṃ so, ñatvā gacchati vaṭṭati.
878. Evañcāpi asakkonto, ñatvā tattheva paṇḍito;  
Khippaṃ paccuddhare ṭhāne, atireke hi tiṭṭhati.
879. Vissajjeti anāpatti, vinassati ca ḍayhati;  
Acchindane ca vissāse, bhikkhusammutiyāpi vā.
880. Samuṭṭhānādayo sabbe, kathinena samā matā;  
Dutiyena, munindena, tena sāsāṅkasammate.

Sāsāṅkakathā.

881. Jānaṃ pariṇataṃ lābhaṃ, bhikkhusaṅghassa yo pana;  
Attano pariṇāmeyya, tassa nissaggiyaṃ siyā.
882. Sace “aññaassa dehī”ti, pariṇāmeti bhikkhuno;  
Suddhikaṃ suddhacittena, pācittiyamudīritaṃ.
883. Cīvaraṃ vā parasseka-mekaṃ vā pana attano;  
Pariṇāmeyya ce saddhiṃ, dve pācittiyo siyuṃ.
884. Saṅghassa pana yaṃ dinnāṃ, taṃ gahetuṃ na vaṭṭati;  
Saṅghasseva padātabbo, adentassa parājayo.
885. Cetiyaṃ ca saṅghassa, puggalassapi vā pana;  
Aññaassa poṇamaññaassa, pariṇāmeyya dukkaṭaṃ.
886. Yo panantamaso bhikkhu, sunakhassapi oṇataṃ;  
Sunakhassa panaññaassa, pariṇāmeyya dukkaṭaṃ.
887. Idañhi tisamuṭṭhānaṃ, kriyaṃ saññāvimokkhakaṃ;  
Kāyakammaṃ vacīkammaṃ, ticittañca tivedanaṃ.

Pariṇatakathā.

Pattavaggo tatiyo.

888. Tenekavatthuggataraṅgamālaṃ;  
Sīlantamāpattivipattigāhaṃ;  
Taranti paññattimahāsamuddaṃ;  
Vinicchayaṃ ye panimaṃ taranti.

Iti vinayavinicchaye nissaggiyakathā niṭṭhitā.

### Pācittiyakathā

889. Sampajānamusāvāde, pācittiyamudīritaṃ;  
Davā ravā bhaṇantassa, na dosummattakādīno.
890. Aññatthāpattiyo pañca, musāvādassa kāraṇā;  
Samuṭṭhānādayo sabbe, adinnādānatulyakā.

Sampajānamusāvādakathā.

891. Jātiādīsu vuttesu, dasavakkosavatthusu;  
Bhūtena vā abhūtena, yena kenaci vatthunā.
892. Yāya kāyaci bhāsāya, hatthamuddāya vā pana;  
Pārājikamanāpannaṃ, bhikkhumāpannameva vā.
893. Aññatraññāpadesena, omasantassa bhikkhuno;  
Tattha pācittiyāpatti, sambuddhena pakāsītā.



894. Tehevaññāpadesena, pāḷimuttapadehipi;  
Sabbatthānupasampannaṃ, akkosantassa dukkaṭaṃ.
895. Anakkositukāmassa, kevalaṃ davakamyatā;  
Vadato pana sabbattha, dubbhāsitamudīritaṃ.
896. Paviṭṭhānupasampanna-ṭṭhāne idha ca bhikkhunī;  
Anāpatti purakkhatvā, atthadhammānusāsaniṃ.
897. Vadato pana bhikkhussa, samuṭṭhānādayo nayā;  
Anantarasaṃ vuttā, dukkhā hotettha vedanā.

Omasavādakathā.

898. Āpatti bhikkhupesuññe, duvidhākārato siyā;  
Attano piyakāmassa, parabhedatthinopi vā.
899. Akkosantassa pariyāya-pāḷimuttanayehi ca;  
Vacanassupasaṃhāre, hoti āpatti dukkaṭaṃ.
900. Tathā anupasampanna-akkosaṃ haratopi ca;  
Ṭhitā anupasampanna-ṭṭhāne idha ca bhikkhunī.
901. Na ceva piyakāmassa, na ca bhedatthinopi vā;  
Pāpānaṃ garahatthāya, vadantassa ca bhikkhuno.
902. Tathā ummattakādīnaṃ, anāpattīti dīpitā;  
Samuṭṭhānādayo sabbe, adinnādānasādisā.

Pesuññakathā.

903. Ṭhapetvā bhikkhuniṃ bhikkhuṃ, aññena piṭakattayaṃ;  
Dhammaṃ saha bhaṇantassa, tassa pācittiyaṃ siyā.
904. Rājavādādayo vuttā, **mahāpaccariyā**disu;  
Anāruḷhesu saṅgītiṃ, āpattijanakāti hi.
905. Dukkaṭaṃ hoti bhikkhusmiṃ, tathā bhikkhuniyāpi ca;  
Bhikkhussānupasampanna-saññino vimatissa vā.
906. Ekato uddisāpeti, sajjhāyaṃ vā karoti yo;  
Bhaṇantaṃ paguṇaṃ ganthaṃ, opātetī ca yo pana.
907. Tassa cānupasampanna-santike gaṇhatopi ca;  
Uddesaṃ tu anāpatti, bhaṇane tena ekato.
908. Vācato ca samuṭṭhāti, vācācittadvayāpi ca;  
Samuṭṭhānamidaṃ vuttaṃ, padasodhammasaññitaṃ.

Padasodhammakathā.

909. Sabbacchannaparicchanne, nipajjeyya sace pana;  
Yebhuyyena paricchanne, channe senāsanepi vā.
910. Tissannaṃ pana rattīnaṃ, uddhaṃ yo pana rattiyaṃ;  
Ṭhapatvā bhikkhuṃ aññaena, tassa pācittiyaṃ siyā.
911. Vatthuṃ yaṃ pana niddiṭṭhaṃ, methunassa pahonakaṃ;  
Āpatyantamaso tena, tiracchānagatenapi.
912. Nipanne upasampanne, itaro ce nipajjati;  
Itarasmimṃ nipanne vā, sace bhikkhu nipajjati.
913. Ubhinnaṃ utṭhahitvā vā, nipajjanapayogato;  
Āpattānupasampanna-gaṇanāyapi vā siyā.
914. Sace pidhāya vā gabbhaṃ, nipajjatipidhāya vā;  
Āpattatthaṅgate sūriye, catutthadivase siyā.
915. Diyaḍḍhahatthubbedhena, pākāracayanādinā;  
Parikkhittampi taṃ sabbhaṃ, parikkhittanti vuccati.
916. Bhikkhussantamaso dussa-kuṭiyaṃ vasatopi ca;  
Sahaseyyāya āpatti, hotīti paridīpito.
917. Sabbacchannaparicchanna-yebhuyyādippabhedato;  
Satta pācittiyānettha, daṭṭhabbāni subuddhinā.
918. Aḍḍhacchannaparicchanne, dukkaṭaṃ paridīpitaṃ;  
Sabbacūḷaparicchanna-channādīhipi pañcadhā.
919. Anāpatti dirattaṃ vā, tirattaṃ vasato saha;  
Aruṇassa pureyeva, tatiyāya ca rattiyā.
920. Nikkhamitvā vasantassa, puna saddhiṅca bhikkhuno;  
Tathā sabbaparicchanna-sabbacchannādikepi ca.
921. Evaṃ anupasampanne, nipannepi nisīdato;  
Sesā eḷakalomena, samuṭṭhānādayo samā.

Sahaseyyakathā.

922. Sace tadahujātāya, api yo mānusiṭṭhiyā;  
Sahaseyyaṃ pakappeyya, tassa pācittiyaṃ siyā.
923. Dissamānakarūpāya, yakkhiyā petiyā saha;  
Rattiyaṃ yo nipajjeyya, deviyā paṇḍakena vā.
924. Methunavatthubhūtāya, tiracchānagatitthiyā;  
Vatthūnaṃ gaṇanāyassa, hoti āpatti dukkaṭaṃ.
925. Idhekadivaseneva, āpatti paridīpitā;  
Seso anantare vutta-sadisova vinicchayo.

## Dutiyasahaseyyakathā.

926. Uddhaṃ chappañcavācāhi, viññuṃ purisaviggahaṃ;  
Vinā dhammaṃ bhaṇantassa, hoti pācitti itthiyā.
927. Gāthāpādo panekova, ekavācāti saññito;  
Padasodhammaṃ niddiṭṭhaṃ, dhammamattṭhakathampi vā.
928. Channaṃ upari vācānaṃ, padādīnaṃ vasā pana;  
Desentassa siyāpatti, padādigaṇanāya ca.
929. Nimminivā ṭhitenāpi, saddhiṃ purisaviggahaṃ;  
Yakkhenapi ca petena, tiracchānagatenapi.
930. Ṭhitassa mātugāmassa, dhammaṃ yo pana bhāsati;  
Channaṃ upari vācānaṃ, tassa pācittiyaṃ siyā.
931. Purise itthisaññissa, vimatissa ca paṇḍake;  
Uttari chahi vācāhi, vadato hoti dukkaṭaṃ.
932. Itthirūpaṃ gahetvāna, ṭhitānaṃ bhāsatopi ca;  
Dukkaṭaṃ yakkhipetīnaṃ, tiracchānagatitthiyā.
933. Purise sati viññusmiṃ, sayāṃ uṭṭhāya vā puna;  
Desentassa nisīditvā, mātugāmassa vā tathā.
934. Aññissā puna aññissā, itthiyā bhaṇatopi ca;  
Chahi pañcahi vācāhi, anāpatti pakāsītā.
935. Padasodhammatulyāva, samuṭṭhānādayo matā;  
Ayameva visesoti, kriyākriyamidaṃ pana.

## Dhammadesanākathā.

936. Mahaggataṃ paṇītaṃ vā, ārocentassa bhikkhuno;  
Ṭhapetvā bhikkhuniṃ bhikkhuṃ, bhūte pācittiyaṃ siyā.
937. No ce jānāti so vuttaṃ, ārocentassa bhikkhuno;  
Pariyāyavacane cassa, hoti āpatti dukkaṭaṃ.
938. Anāpatti tathārūpe, kāraṇe sati bhāsato;  
Sabbassapi ca sīlādīṃ, vadato ādikammino.
939. Ummattakapadaṃ ettha, na vuttaṃ tadasambhavā;  
Bhūtārocanakaṃ nāma, samuṭṭhānamidaṃ matāṃ.
940. Kāyato vācato kāya-vācato ca tidhā siyā;  
Kusalābyākateheva, dvicittañca dvivedanaṃ.

## Bhūtārocanakathā.

941. Āpattiṃ pana duṭṭhullaṃ, ārocentassa bhikkhuno;  
Āpattānupasampanne, ṭhapetvā bhikkhusammutiṃ.
942. Saṅghādisesamāpanno, mocetvā asuciṃ ayaṃ;  
Ghaṭetvā vatthunāpattiṃ, vadantasseva vajjatā.
943. Idha saṅghādisesāva, duṭṭhullāpattiyo matā;  
Tasmā suddhassa duṭṭhullaṃ, vadaṃ pācittiyaṃ phuse.
944. Aduṭṭhullāya duṭṭhulla-saññino vimatissa vā;  
Āpattiyopi vā sesā, ārocentassa dukkaṭaṃ.
945. Tathā anupasampanne, duṭṭhullaṃ pañcadhā matam;  
Ājjhācāramaduṭṭhullaṃ, ārocentuṃ na vaṭṭati.
946. Vatthuṃ vā pana āpattiṃ, ārocentassa kevalam;  
Anāpattīti nātabbaṃ, bhikkhusammutiyā tathā.
947. Evamummattakādīnaṃ, samuṭṭhānādayo nayā;  
Adinnādānatulyāva, vedanā dukkhavedanā.

Duṭṭhullārocanakathā.

948. Khaṇeyya vā khaṇāpeyya, pathaviṃ yo akappiyam;  
Bhedāpeyya ca bhindeyya, tassa pācittiyaṃ siyā.
949. Sayameva khaṇantassa, pathaviṃ pana bhikkhuno;  
Pahārasmiṃ pahārasmiṃ, pācittiyamudīritaṃ.
950. Āṇāpentassa ekāva, divasaṃ khaṇatopi ca;  
Punappunāṇāpentassa, vācato vācato siyā.
951. “Khaṇa pokkharāṇiṃ vāpiṃ, āvāṭaṃ khaṇa kūpakam”;  
Iccevaṃ tu vadantassa, koci doso na vijjati.
952. “Imaṃ khaṇa ca okāsaṃ, idha pokkharāṇiṃ khaṇa;  
Imasmim khaṇa okāse”, vattumevaṃ na vaṭṭati.
953. “Kandaṃ khaṇa kurundaṃ vā, thūṇaṃ khaṇa ca khāṇukaṃ;  
Mūlaṃ khaṇa ca tālaṃ vā”, evaṃ vadati vaṭṭati.
954. “Imaṃ mūlaṃ imaṃ vallim, imaṃ tālaṃ imaṃ naḷam;  
Khaṇā”ti niyametvāna, vattum pana na vaṭṭati.
955. Ussiñcituṃ sace sakkā, ghaṭehi tanukaddamo;  
Bhikkhunā apanetabbo, bahalaṃ na ca vaṭṭati.
956. Bhijjivā nadiyādīnaṃ, patitaṃ toyasantike;  
Taṭaṃ vaṭṭhaṃ vikopetuṃ, cātumāsampi vaṭṭati.
957. Sace patati toyasmim, deve vuṭṭhepi vaṭṭati;  
Cātumāsamatikkante, toyē devo hī vassati.

958. Pāsānapiṭṭhiyaṃ soṇḍiṃ, khaṇanti yadi tattha tu;  
Rajaṃ patati ce pubbaṃ, pacchā devobhivassati.
959. Sodhetuṃ bhindituṃ anto-cātumāsāṃ tu vaṭṭati;  
Cātumāsakato uddhaṃ, vikopetuṃ na vaṭṭati.
960. Vārinā paṭhamaṃ puṇṇe, pacchā patati ce rajaṃ;  
Taṃ vaṭṭati vikopetuṃ, toye devo hi vassati.
961. Allīyati phusāyante, piṭṭhipāsāṇake rajaṃ;  
Cātumāsaccaye tampi, vikopetuṃ na vaṭṭati.
962. Sace akatapabbhāre, vammiko pana uṭṭhito;  
Yathāsukhaṃ vikopeyya, cātumāsaccayepi ca.
963. Abbhokāse sace vaṭṭho, cātumāsāṃ tu vaṭṭati;  
Rukkhe upacikādīnaṃ, mattikāyapi so nayo.
964. Mūsikukkara gokaṇṭa-gaṇḍuppadamalesupi;  
Ayameva nayo vutto, asambaddhesu bhūmiyā.
965. Teheva sadisā honti, kasinaṅgalamattikā;  
Acchinnā bhūmisambandhā, sā jātapathavī siyā.
966. Senāsanampi acchannaṃ, vinaṭṭhachadanampi vā;  
Cātumāsakato uddhaṃ, ovaṭṭhaṃ na vikopaye.
967. Tato “gopānasim bhittiṃ, thambhaṃ vā padarattharaṃ;  
Gaṇhissāmi”’ti saññāya, gaṇetuṃ pana vaṭṭati.
968. Gaṇhantassitṭhakādīni, sace patati mattikā;  
Anāpatti siyāpatti, mattikaṃ yadi gaṇhati.
969. Atinto mattikāpuṇḍo, antogehe sace siyā;  
Anovaṭṭho ca bhikkhūnaṃ, sabbadā hoti kappiyo.
970. Vuṭṭhe puna ca gehasmim, gehaṃ chādenti taṃ sace;  
Cātumāsaccaye sabbo, tinto hoti akappiyo.
971. Yattakaṃ tattha tintaṃ tu, tattakaṃ hotyakappiyaṃ;  
Atintaṃ tattha yaṃ yaṃ tu, taṃ taṃ hoti hi kappiyaṃ.
972. Temito vārinā so ce, ekābaddhova bhūmiyā;  
Pathavī ceva sā jātā, na vaṭṭati tato paraṃ.
973. Abbhokāse ca pākāro, ovaṭṭho mattikāmayo;  
Cātumāsaccaye “jātā, pathavī”’ti pavuccati.
974. Tattha laggāṃ rajaṃ saṇhaṃ, aghaṃsantova mattaso;  
Chupitvā allahatthena, sace gaṇhāti vaṭṭati.
975. Sace iṭṭhakaṃpākāro, yebhuyyakathale pana;

Ṭhāne tiṭṭhati so tasmā, vikoṭṭeṭṭa yathāsukhaṃ.

976. Abbhokāse ṭhitam thambham, cāletvā panito cito;  
Pathaviṃ tu vikopetvā, gahetum na ca vaṭṭati.
977. Aññampi sukkharukkham vā, khāṇukaṃ vāpi gaṇhato;  
Ayameva nayo doso, ujumuddharato na ca.
978. Pāsāṇam yadi vā rukkham, uccāletvā pavaṭṭati;  
Na doso suddhacittassa, sace pathavi bhijjati.
979. Phālentānampi dārūni, sākḥādīni ca kaḍḍhato;  
Ayameva nayo vutto, bhūmiyam suddhacetaso.
980. Kaṇṭakaṃ sūcimatṭhiṃ vā, khilaṃ vā bhūmiyam pana;  
Ākoṭetum pavesetum, bhikkhuno na ca vaṭṭati.
981. “Aham passāvadhārāya, bhindissāmī”ti mediniṃ;  
Bhikkhussa pana passāva-mevaṃ kātum na vaṭṭati.
982. Anāpatti karontassa, sace bhijjati medinī;  
Samajjato samaṃ kātum, ghaṃsitum na ca vaṭṭati.
983. Pādaṅguṭṭhena vā bhūmiṃ, likhitumpi na vaṭṭati;  
Bhindantena ca pādehi, tathā caṅkamtumpi vā.
984. Pathaviṃ allahatthena, chupitvā sukhumam rajam;  
Aghamsanto gahetvā ce, hattham dhovati vaṭṭati.
985. Sayam dahati ce bhūmiṃ, dahāpeti parehi vā;  
Āpattantamaso pattam, dahantassāpi bhikkhuno.
986. Ṭhānesu yattakesvaggiṃ, deti dāpeti vā pana;  
Tattakāneva bhikkhussa, honti pācittiyānipi.
987. Ṭhapetum bhikkhuno aggim, bhūmiyam na ca vaṭṭati;  
Kapāle pattapacane, ṭhapetum pana vaṭṭati.
988. Aggim upari dārūnam, ṭhapetum na ca vaṭṭati;  
Dahanto tāni gantvā so, bhūmiṃ dahati ce pana.
989. Eseva ca nayo vutto, iṭṭhakāvāsakādisu;  
Ṭhapetum iṭṭhakādīnam, matthakesveva vaṭṭati.
990. Kasmā panāti ce? Tesa-manupādānabhāvato;  
Khāṇuke sukkharukkhe vā, aggim dātum na vaṭṭati.
991. Anāpatti tiṇukkaṃ tu, gahetvā pana gacchato;  
Dayhamāne tu hatthasmim, sace pāpeti bhūmiyam.
992. Puna tam patitaṭṭhāne, datvā tassa panindhanam;  
Aggim vaṭṭati kātunti, **mahāpaccariyam** rutam.

993. Tassāpathaviyaṃyeva, pathavīti ca saññino;  
Vimatissubhayatthāpi, dukkaṭaṃ pariyāputaṃ.

994. Anāpatti “imaṃ jāna, imamāhara dehi”ti;  
Vadantassa, sacittaṅca, tisamuṭṭhānameva ca.

Pathavīkhaṇanakathā.

Musāvādavaggo paṭhamo.

995. Bhavantassa ca bhūtassa, bhūtagāmassa bhikkhuno;  
Pātabyatānimittaṃ tu, pācittiyamudīritaṃ.

996. Udaḷḷho thalaṭṭhoti, duvidho hoti so pana;  
Tilabījādiko tattha, sapaṇṇopi apaṇṇako.

997. Udaḷḷhoti viññeyyo, sabbo sevālaḷḷatiko;  
Vikopentassa taṃ sabbaṃ, tassa pācittiyam siyā.

998. Viyūhitvā tu hatthena, nhāyituṃ pana vaṭṭati;  
Hoti tassa ca sabbampi, ṭhānañhi sakalaṃ jalaṃ.

999. Udakena vinā cecca, taṃ panuddharituṃ jalā;  
Na ca vaṭṭati bhikkhussa, ṭhānaṅkamaṅñhi taṃ.

1000. Udaḷḷhipitvā taṃ, pakḷḷhipantassa vārisu;  
Vaṭṭatīti ca niddiṭṭhaṃ, sabbaaṭṭhakathāsupi.

1001. Jale vallitīṇādīni, uddharantassa toyato;  
Vikopentassa vā tattha, hoti pācitti bhikkhuno.

1002. Paṇḍappāṭitānettha, vikopentassa dukkaṭaṃ;  
Gacchanti hi yato tāni, bījagāmena saṅgahaṃ.

1003. Thalaṭṭhe chinnarukkhānaṃ, ṭhito haritakhāṇuko;  
Uddhaṃ vaḍḍhanako tassa, bhūtagāmena saṅgaho.

1004. Nāḷikerādikānampi, khāṇu uddhaṃ na vaḍḍhati;  
Tasmā tassa kato hoti, bījagāmena saṅgaho.

1005. Tathā kadaliyā khāṇu, phalitāya pakāsito;  
Aphalitāya yo khāṇu, bhūtagāmena so mato.

1006. Phalitā kadalī yāva, nīlapaṇṇā ca tāva sā;  
Naḷaveḷutiṇādīna-mayameva vinicchayo.

1007. Aggato pana paṭṭhāya, yadāyaṃ veḷu sussati;  
Tadā saṅgahito hoti, bījagāmena nāmaso.

1008. Indasālādirukkhānaṃ, bījagāmena saṅgaho;  
Chinditvā ṭhapitānaṃ tu, viññeyyo vinayaññunā.

**1009**Maṇḍapādīnamatthāya, nikkhaṇanti ca te sace;  
Niggate mūlapaṇṇasmim, bhūtagāmena saṅgaho.

**1010**Mūlamattepi vā yesaṃ, paṇṇamatepi vā pana;  
Niggatepi kato tesam, bījagāmena saṅgaho.

**1011**Sakandā pana tālaṭṭhi, bījagāmoti vuccati;  
Pattavaṭṭi yadā nīlā, niggacchati tadā na ca.

**1012**Nāḷikeratacaṃ bhivā, dantasūcīva aṅkuro;  
Niggacchati tadā sopi, bījagāmoti vuccati.

**1013**Migasiṅgasamānāya, satiyā pattavaṭṭiyā;  
Aniggatepi mūlasmim, bhūtagāmoti vuccati.

**1014**Na honti haritā yāva, vīhiādīnamaṅkurā;  
Niggatesupi paṇṇesu, bījagāmena saṅgaho.

Cattāro bhāṇavārā niṭṭhitā.

**1015**Ambajambuṭṭhikādīna-meseva ca vinicchayo;  
Vandākā vāpi aññaṃ vā, rukkhe jāyati yaṃ pana.

**1016**Rukkhovassa siyā ṭhānaṃ, vikopetuṃ na vaṭṭati;  
Amūlavallīādīna-mayameva vinicchayo.

**1017**Pākārādīsu sevālo, aggabījanti vuccati;  
Yāva dve tīṇi pattāni, na sañjāyanti tāva so.

**1018**Pattesu pana jātesu, vatthu pācittiyassa so;  
Ghaṃsitvā pana taṃ tasmā, apanetuṃ na vaṭṭati.

**1019**Sevāle bahi pānīya-ghaṭādīnaṃ tu dukkaṭaṃ;  
Abbohārova so anto, pūvādīsupi kaṇṇakaṃ.

**1020**Pāsāṇadaddusevāla-seleyyappabhutīni ca;  
Honti dukkaṭavathūni, apattānīti niddise.

**1021**Pupphitaṃ tu ahicchattaṃ, abbohārikataṃ gataṃ;  
Sace taṃ maḷaṃ hoti, hoti dukkaṭavathukaṃ.

**1022**Rukkhe tacaṃ vikopetvā, tathā pappatikampi ca;  
Nīyāsampi panallasmim, gahetuṃ na ca vaṭṭati.

**1023**Nuhiādīsu rukkhesu, tālapaṇṇādikesu vā;  
Likhato tatthajātesu, pācittiyamudīraye.

**1024**Pupphaṃ paṇḍupalāsaṃ vā, phalaṃ vā pakkameva vā;  
Pātentassa ca cāletvā, pācittiyamudīritaṃ.

**1025**Nāmetvā phalinim sākhaṃ, dātuṃ vaṭṭati gaṇhato;  
Sayam khādītukāmo ce, dātumevaṃ na vaṭṭati.



- 1026**Ukkhipitvā paraṃ kañci, gāhāpetumpi vaṭṭati;  
Pupphāni ocinantesu, ayameva vinicchayo.
- 1027**Yesaṃ ruhati rukkhānaṃ, sākhā tesampi sākhinaṃ;  
Kappiyaṃ tamakāretvā, vikopentassa dukkaṭaṃ.
- 1028**Ayameva nayo alla-siṅgiverādikesupi;  
Dukkaṭaṃ bījagāmesu, niddiṭṭhattā mahesinā.
- 1029**‘Rukkhāṃ chinda lataṃ chinda, kandaṃ mūlampi uddhara;  
Uppāṭehī’ ti vattumpi, vaṭṭatevāniyāmato.
- 1030**‘Ambaṃ jambumpi nimbaṃ vā, chinda bhinduddharā’ ti vā;  
Gahetvā pana nāmampi, vaṭṭatevāniyāmato.
- 1031**‘Imaṃ rukkhāṃ imaṃ vallīṃ, imaṃ challīṃ imaṃ lataṃ;  
Chinda bhindā’ ti vā vattum, niyametvā na vaṭṭati.
- 1032**Pūretvā ucchukhaṇḍānaṃ, pacchiyo āharanti ce;  
Sabbameva kataṃ hoti, ekasmiṃ kappiye kate.
- 1033**Ekato pana baddhāni, ucchudārūni honti ce;  
Kappiyaṃ karonto pana, dāruṃ vijjhati vaṭṭati.
- 1034**Valliyā rajjuyā vāpi, yāya baddhāni tāni hi;  
Bhājanena samānattā, taṃ vijjhati na vaṭṭati.
- 1035**Bhattaṃ maricapakkehi, missetvā āharanti ce;  
Ekasitthepe bhattassa, sace vijjhati vaṭṭati.
- 1036**Ayameva nayo vutto, tilataṇḍulakādisu;  
Ekābaddhe kapitthepe, kaṭāhe kappiyaṃ kare.
- 1037**Kaṭāhaṃ yadi muñcitvā, anto carati miñjakam;  
Bhindāpetvā kapitthaṃ taṃ, kāretabbaṃ tu kappiyaṃ.
- 1038**Abhūtagāmaḃjesu, bhūtagāmādisaññino;  
Tattha vematikassāpi, hoti āpatti dukkaṭaṃ.
- 1039**Atathāsaññino tattha, asaṅciccāsatisa ca;  
Ummattakādikānañca, anāpatti pakāsitā.
- 1040**Idaṅca tisamuṭṭhānaṃ, kriyaṃ saññāvimokkhakaṃ;  
Kāyakammaṃ vacīkammaṃ, ticittaṅca tivedanaṃ.
- Bhūtagāmakathā.
- 1041**Kate saṅghena kammaṃ, aññāvādavihesake;  
Tathā puna karontassa, hoti pācittiyadvayaṃ.
- 1042**Tikapācittiyaṃ dhamme, adhamme tikadukkaṭaṃ;  
Kamme aropite cevaṃ, vadantassa ca dukkaṭaṃ.

1043Āpattiṃ vāpi āpannaṃ, ajānantassa, ‘‘bhaṇḍanaṃ;  
Bhavissatī’’ti saññissa, gilānassa na dosatā.

1044Ādinnādānatulyāva, samuṭṭhānādayo nayā;  
Kriyākriyamidaṃ vuttaṃ, vedanā dukkhavedanā.

Aññavādakathā.

1045Āyasaṃ kattukāmoḃa, sammatassa hi bhikkhuno;  
Vadanto upasampanne, ujjhāpeti ca khīyati.

1046Tasmiṃ vatthudvaye tassa, hoti pācittiyadvayaṃ;  
Tikapācittiyaṃ dhamme, adhamme tikadukkaṭaṃ.

1047Āvaṇṇaṃnupasampanna-santike pana bhikkhuno;  
Asammatassa bhikkhussa, bhāsaṃto yassa kassaci.

1048Sāmaṇerassa vā vaṇṇaṃ, sammatāsammatassapi;  
Vadato dukkaṭaṃ hoti, yassa kassaci santike.

1049Chandādīnaṃ vaseneva, karontaṃ bhaṇato pana;  
Anāpatti kriyāsesa-manantarasaṃmaṃ mataṃ.

Ujjhāpanakathā.

1050Ājjhokāse tu mañcādiṃ, attano vā parassa vā;  
Atthāya santharāpetvā, santharivāpi vā pana.

1051Nevuddhareyya saṅghassa, uddharāpeyya vā na taṃ;  
Pakkamanto sace tassa, hoti pācitti bhikkhuno.

1052Vassike caturo māse, sace devo na vassati;  
Ājjhokāse tathā cāpi, ṭhapetuṃ na ca vaṭṭati.

1053Yattha vassati hemante, cattāro aparepi ca;  
Ṭhapetuṃ tattha mañcādiṃ, aṭṭha māse na vaṭṭati.

1054Kākādīnaṃ nivāsasmiṃ, rukkhamaṃle kadācipi;  
Mañcādiṃ pana saṅghassa, ṭhapetuṃ na ca vaṭṭati.

1055Āññassatthāya yaṃ kiñci, santhataṃ yaḃi saṅghikaṃ;  
Yattha katthaci vā ṭhāne, yena kenaci bhikkhunā.

1056Yāva so na nisīdeyya, ‘‘gacchā’’ti na vadeyya vā;  
Tāva santhārakasseva, bhāro tanti pavuccati.

1057Sace taṃ sāmaṇerena, santharāpeti santhataṃ;  
Santharāpitabhikkhussa, palibodhoti dīpito.

1058Santhataṃ bhikkhunā taṃ ce, bhāro tasseva tāva taṃ;  
Yāva āṇāpako tattha, āgantvā na nisīdati.

- 1059** Bhikkhuṃ vā sāmaṇeraṃ vā, ārāmikamupāsakaṃ;  
Anāpucchā niyyātetvā, saṅghikaṃ sayanāsaṇaṃ.
- 1060** Ledḍuppātamatikkamma, gacchato paṭhame paḍe;  
Dukkaṭaṃ, dutiye vāre, pācittiyamudrītaṃ.
- 1061** Tātvā bhojanasālāyaṃ, vatvā yo sāmaṇeraṃ;  
Asukasmiṃ divāṭṭhāne, paññāpehīti mañcakaṃ.
- 1062** Nikkhamitvā sace tasmā, ṭhānā aññattha gacchati;  
Pāduddhārena so bhikkhu, kāretabboti dīpito.
- 1063** Tikapācittiyaṃ vuttaṃ, tikātītena satthunā;  
Tathā puggalike tena, dīpitaṃ tikadukkaṭaṃ.
- 1064** Cimiliṃ taṭṭikaṃ cammaṃ, phalakaṃ pādapuñchaṇiṃ;  
Bhūmattharaṇakaṃ vāpī, uttarattharaṇampi vā.
- 1065** Dārumattikabhaṇḍāni, pattādhāraṇameva vā;  
Abbhokāse ṭhapetvā taṃ, gacchato hoti dukkaṭaṃ.
- 1066** Sace āraññakenāpī, anovasse ca no sati;  
Laggetvā pana rukkhasmiṃ, gantabbaṃ tu yathāsukhaṃ.
- 1067** Yathā upacikādīhi, na khajjati na lujjati;  
Tathā katvāpī taṃ sabbhaṃ, gantuṃ pana ca vaṭṭati.
- 1068** Anāpattuddharāpetvā, āpucchitvāpī gacchato;  
Attano santake ruddhe, āpadāsupi bhikkhuno.
- 1069** Samuṭṭhānādayo sabbe, kathinena samā matā;  
Kriyākriyamiḍaṃ vutta-mayameva visesatā.
- Paṭhamasenāsanakathā.
- 1070** Bhisicimilikā bhūma-ttharaṇaṃ uttarattharaṃ;  
Taṭṭikā cammakhaṇḍo ca, paccattharaṇisīdanaṃ.
- 1071** Santhāro tiṇapaṇṇānaṃ, seyyā dasavidhā siyā;  
Sabbacchannaparicchanne, vihāre bhikkhu yo pana.
- 1072** Etaṃ dasavidhaṃ seyyaṃ, santharivāpī vā sayāṃ;  
Anuddharitvānāpucchā, atikkamati taṃ sace.
- 1073** Ārāmassūpacāraṃ vā, parikkhepaṃ panassa vā;  
Paṭhame dukkaṭaṃ paḍe, pācitti dutiye siyā.
- 1074** Senāsanassa seyyāya, ubhayesaṃ vināsato;  
Gacchato santharivanto-gabbhe pācitti vaṇṇitā.
- 1075** Upacāre vihārassa, dukkaṭaṃ maṇḍapādike;  
Gacchato santharivā vā, seyyāmatṭaṃ vināsato.

- 1076** Tikapācittiyaṃ vuttaṃ, saṅghike dasavatthuke;  
Tathā puggalike tassa, dīpitaṃ tikadukkaṭaṃ.
- 1077** Anāpattuddharitvā vā, āpucchāṃ vāpi gacchato;  
Palibuddhepi vāñña, attano santakepi vā.
- 1078** Sāpekkhova ca gantvā taṃ, tattha t̥hatvāpi pucchati;  
Samuṭṭhānādayo sabbe, anantarasamā matā.

Dutiyasenāsanakathā.

- 1079** Yo pubbupagataṃ bhikkhuṃ, jānaṃ anupakhajja ca;  
Kappeyya saṅghikāvāse, seyyaṃ pācittiyassa ce.
- 1080** Pādadhovanapāsāṇā, pavisantassa bhikkhuno;  
Yāva taṃ mañcapīṭhaṃ vā, nikkhamantassa vā pana.
- 1081** Mañcapīṭhakato yāva, passāvaṭṭhānameva tu;  
Etthantare idaṃ t̥hānaṃ, upacāroti vuccati.
- 1082** Tattha bādhetukāmassa, upacāre tu bhikkhuno;  
Dasavaññataraṃ seyyaṃ, santharantassa dukkaṭaṃ.
- 1083** Nisīdantassa vā tattha, nipajjantassa vā pana;  
Tathā dvepi karontassa, hotī pācittiyadvayaṃ.
- 1084** Punappunaṃ karontassa, payogagaṇanāvasā;  
Tikapācittiyaṃ vuttaṃ, puggale tikadukkaṭaṃ.
- 1085** Vuttūpacāraṃ muñcivā, seyyaṃ santharatopi vā;  
Vihārassūpacāre vā, ajjhokāsepi vā pana.
- 1086** Santharāpayato vāpi, tattha tassa nisīdato;  
Sabbattha dukkaṭaṃ vuttaṃ, nivāso ca nivārito.
- 1087** Anāpatti gilānassa, sītāduppīṭitassa vā;  
Āpadāsupi bhikkhussa, tathā ummattakādino.
- 1088** Samuṭṭhānādayo sabbe, paṭhamantimavatthunā;  
Sadisāti ca viññeyyā, hotīdaṃ dukkhavedanaṃ.

Anupakhajjakathā.

- 1089** Vihārā saṅghikā bhikkhuṃ, nikkadḍheyya sace pana;  
Nikkadḍhāpeyya vā kuddho, tassa pācittiyaṃ siyā.
- 1090** Bahubhūmāpi pāsādā, payogenekakena yo;  
Nikkadḍheti sace tassa, ekā pācitti dīpitā.
- 1091** T̥hapetvā ca t̥hapetvā ca, nikkadḍhantassa antarā;  
Dvārānaṃ gaṇanāyassa, honti pācittiyo pana.

1092. ‘Nikkhamā’ ti vadantassa, vācāyapi ayaṃ nayo;  
Āṇattiyā khaṇeyeva, āṇāpentassa dukkaṭaṃ.
1093. Sace so sakimāṇatto, dvārepi bahuke pana;  
Atikkāmeti ekāva, bahukāni bahūni ce.
1094. Tassūpaṭṭhānasālādi-vihārassūpacārato;  
Kāyenapi ca vācāya, tathā nikkadḍhanepi ca.
1095. Vihārassūpacārā vā, viharā vāpi cetaraṃ;  
Nikkadḍhantassa sabbesaṃ, parikkhāraṃpi dukkaṭaṃ.
1096. Asambaddhesu bhikkhussa, parikkhāresu paṇḍito;  
Vatthūnaṃ gaṇanāyassa, dukkaṭaṃ paridīpaye.
1097. Antevāsimalajjīṃ vā, tathā saddhivihārikaṃ;  
Nikkadḍhantassa ummattaṃ, sayāṃ ummattakassa ca.
1098. Attano vasanaṭṭhānā, tathā vissāsikassa vā;  
Parikkhāraṇca vā tesāṃ, anāpatti pakāsītā.
1099. Saṅghārāmāpi sabbasmā, tathā kalahakāraṃ;  
Idaṃ tu tisamuṭṭhānaṃ, vedanā dukkhavedanā.

Nikkadḍhanakathā.

1100. Majjhimāsīsaghaṭṭāya, vehāsakuṭiyūpari;  
Āhaccapādake mañce, pīṭhe vā pana bhikkhuno.
1101. Nisīdantassa vā tasmīṃ, nipajjantassa vā pana;  
Payogagaṇanāyeva, tassa pācittiyo siyūṃ.
1102. Tikapācittiyaṃ vuttaṃ, puggale tikadukkaṭaṃ;  
Heṭṭhā aparibhoge vā, sīsaghaṭṭāya vā pana.
1103. Avehāsavihāre vā, attano santakepi vā;  
Vissāsikavihāre vā, na dosummattakādino.
1104. Yattha paṭāṇi vā dinnā, tattha ṭhatvā lageti vā;  
Idameḷakalomena, samuṭṭhānaṃ samaṃ matāṃ.

Vehāsakuṭīkathā.

1105. Yāva dvārassa kosamhā, aggaḷaṭṭhapanāya tu;  
Bhikkhunā limpitabbaṃ vā, lepāpetabbameva vā.
1106. Ñeyyo ālokasandhīnaṃ, parikkammepyayaṃ nayo;  
Chadanassa dvattipariyāyaṃ, ṭhitena harite pana.
1107. Adhiṭṭheyyaṃ tato uddhaṃ, adhiṭṭheti sace pana;  
Tassa pācittiyaṃ hoti, dukkaṭaṃ tattha tiṭṭhato.

1108 Piṭṭhivaṃse ṭhito koci, chadanassa mukhavaṭṭiyā;  
Yasmim̐ ṭhāne ṭhitaṃ bhikkhuṃ, olokeno na passati.

1109 Tasmiṃ ṭhāne pana ṭhātuṃ, neva bhikkhussa vaṭṭati;  
Vihārassa patantassa, patanokāsato hi taṃ.

1110 Ūnakadvattipariyāye, atirekoti saññino;  
Tattha vematikassāpi, hoti āpatti dukkaṭaṃ.

1111 Na doso dvattipariyāye, leṇe tiṇakuṭṭisu vā;  
Samuṭṭhānādayo sabbe, sañcarittasamā matā.

#### Dvattipariyāyakathā.

1112 Jānaṃ sappāṇakaṃ toyaṃ, tiṇaṃ vā mattikampi vā;  
Yadi siñceyya pācitti, siñcāpeyya parehi vā.

1113 Acchinditvā sace dhāraṃ, mattikaṃ siñcato pana;  
Ekasmimpi ghaṭe ekā, pācitti paridīpitā.

1114 Vicchindati sace dhāraṃ, payogagaṇanāvasā;  
Sammukhampi karontassa, mātikaṃ sandamānakaṃ.

1115 Ekāva ce siyāpatti, divasampi ca sandatu;  
Bandhato tattha tathassa, payogagaṇanā siyā.

1116 Sace sakaṭapuṇṇampi, mattikaṃ tiṇameva vā;  
Udake pakkhipantassa, ekā pācitti ekato.

1117 Ekekaṃ pakkhipantassa, payogagaṇanāya ce;  
Khayaṃ vā āvilattaṃ vā, jalaṃ gacchati tādise.

1118 ‘Siñcāhī’ ti vadantassa, hoti āpatti dukkaṭaṃ;  
Ekāyāṇattiyā ekā, divasampi ca siñcato.

1119 Appāṇe udake suddhe, sappāṇamiti saññino;  
Sabbattha vimatissāpi, hoti āpatti dukkaṭaṃ.

1120 Sabbatthāpāṇasaññissa, asañciccāsātissa vā;  
Ajānato anāpatti, tathā ummattakādino.

1121 Sappāṇakattaṃ toyassa, sappāṇanti vijānanaṃ;  
Vinā vadhakacittena, tiṇādīnaṃ nisecanaṃ.

1122 Cattārevassa aṅgāni, niddiṭṭhāni mahesinā;  
Adinnādānatulyāva, samuṭṭhānādayo nayā.

1123 Iḍaṃ paṇṇattivajjaṅca, ticittañcāti dīpitaṃ;  
Idamevettha niddiṭṭhaṃ, tassa cassa visesanaṃ.

#### Sappāṇakakathā.

## Senāsanavaggo dutiyo.

- 1124 Bhikkhussāṭṭhaṅgayuttassa, bhikkhunovādasammuti;  
Idha ñatticatutthena, anuññātā mahesinā.
- 1125 Yo tāyāsammato bhikkhu, garudhammehi aṭṭhahi;  
Ekaṃ sambahulā vāpi, bhikkhunisaṅghameva vā.
- 1126 Osārentova te dhamme, ovadeyya sace pana;  
Ovādapariyosāne, tassa pācittiyaṃ siyā.
- 1127 Aññena pana dhammena, ovađantassa dukkaṭaṃ;  
Ekatoupasampannaṃ, garudhammehi vā tathā.
- 1128 Bhikkhūnaṃ santikeyeva, upasampannabhikkhuniṃ;  
Tathā, liṅgavipallāse, pācittiva pakāsītā.
- 1129 Sammatassāpi bhikkhussa, dukkaṭaṃ samudīritaṃ;  
Ovādaṃ aniyādetvā, dhammenaññena bhāsato.
- 1130 ‘‘Samaggamhā’’ti vuttepi, aññenovadato tathā;  
‘‘Vaggamhā’’ti ca vuttepi, garudhammehi dukkaṭaṃ.
- 1131 Aḡaṅhantassa ovādaṃ, apaccāharatopi taṃ;  
Ṭhapetvā dukkaṭaṃ bālaṃ, gilānaṃ gamikaṃ siyā.
- 1132 Adhamme pana kammaṣmiṃ, adhammanti ca saññino;  
Vagge bhikkhunisaṅghaṣmiṃ, tikapācittiyaṃ siyā.
- 1133 Tathā vematikassāpi, dhammakammanti saññino;  
Nava pācittiyo vuttā, samaggepi ca tattakā.
- 1134 Navakānaṃ vasā dvinnaṃ, aṭṭhārasa bhavanti tā;  
Dukkaṭaṃ dhammakammeṃ, sattarasavidhaṃ siyā.
- 1135 ‘‘Osārehi’’ti vutto vā, pañhaṃ puṭṭho katheti vā;  
Sikkhamānāya vā neva, doso ummattakādino.
- 1136 Vācuggatāva kātabbā, paguṇā dveṃ mātikā;  
Suttantato ca cattāro, bhāṇavārā pakāsītā.
- 1137 Eko parikathatthāya, kathāmaggo pakāsito;  
Maṅgalāmaṅgalatthāya, tissoyevānumodanā.
- 1138 Uposathādiatthāya, kammākammavinicchayo;  
Kammaṭṭhānaṃ tathā ekaṃ, uttamatthassa pāpakaṃ.
- 1139 Ettakaṃ uggahetvāna, pañcavasso bahussuto;  
Muñcitvā nissayaṃ kāmaṃ, vasituṃ labhatissaro.
- 1140 Vācuggatā vibhaṅgā dve, paguṇā byañjanādito;  
Catūsvapi nikāyesu, eko vā potthakopi ca.

1141 Kammākammañca vattāni, uggahetabbamettakam;  
Sabbantimaparicchedo, dasavasso sace pana.

1142 Bahussuto disāmokkho, yena kāmamaṅgamo siyā;  
Parisam labhate kāmam, upaṭṭhāpetumissaro.

1143 Yassa sātṭhakatham sabbam, vācuggam piṭakattayam;  
Soyam bahussuto nāma, bhikkhunovādako siyā.

1144 Assāsammatatādīni, tīṇi aṅgāni dīpaye;  
Padasodhammatulyāva, samuṭṭhānādayo nayā.

Ovādakathā.

1145 Pācitti garudhammehi, dhammenaññena vā pana;  
Hotyatthaṅgate sūriye, ovaḍantassa bhikkhunim.

1146 Tikapācittiyam vuttam, sammatassāpi bhikkhuno;  
Ekatoupasampannam, ovaḍantassa dukkaṭam.

1147 Tathānatthaṅgate sūriye, gate atthanti saññino;  
Tattha vematikassāpi, hoti āpatti dukkaṭam.

1148 Uddesādinayenassa, anāpatti pakāsītā;  
Anantarasamā sesā, samuṭṭhānādayo nayā.

Atthaṅgatasūriyakathā.

1149 Bhikkhunim ovaḍantassa, gantvā bhikkhunupassayam;  
Garudhammehi aññatra, kālā pācittiyam siyā.

1150 Sace asammatō hoti, hoti pācittiyadvayam;  
Atthaṅgate ca sūriye, sace vadati tīṇipi.

1151 Aññena pana dhammena, vadato dukkaṭadvayam;  
Ekam pācittiyam hoti, bhikkhuno rattihetukam.

1152 Sammatassāpi bhikkhussa, hoti pācittiyadvayam;  
Garudhammanidānassa, sammatattā abhāvato.

1153 Tassevaññena dhammena, ovaḍantassa dukkaṭam;  
Sammatattā anāpatti, ekā pācitti rattiyam.

1154 Tikapācittiyam vuttam, dukkaṭam itaradvaye;  
Ekatoupasampannam, ovaḍantassa dukkaṭam.

1155 Tathā aññena dhammena, gantvā bhikkhunupassayam;  
Samuṭṭhānādayo sabbe, kathinena samā matā.

Bhikkhunupassayakathā.



1156 Cīvarādīnamatthāya, ovaḍantīti bhikkhuniṃ;  
Vadato sammate bhikkhu, tassa pācittiyaṃ siyā.

1157 Tikapācittiyaṃ vuttaṃ, tatheva tikadukkaṭaṃ;  
Saṅghenāsammataṃ bhikkhuṃ, vadantassa ca dukkaṭaṃ.

1158 Tathevānupasampannaṃ, sammataṃ vā asammataṃ;  
Na doso āmisatthāya, ovaḍantassa bhāsato.

1159 Tathā ummattakādīnaṃ, anāpatti pakāsītā;  
Idaṅhi tisamuṭṭhānaṃ, vedanā dukkhavedanā.

Āmisakathā.

1160 Sace bhikkhuniyā bhikkhu, dadeyya pana cīvaraṃ;  
Aññātikāya pācitti, ṭhapetvā pārivattakaṃ.

1161 Cīvarassa paṭiggāha-sikkhāpadasamo nayo;  
Avaseso mato saddhiṃ, samuṭṭhānādīnā pana.

1162 Tattha bhikkhuniyā dinnāṃ, cīvaraṃ idha bhikkhunā;  
Tattha nissaggiyaṃ suddha-pācitti idha sūcitā.

Cīvaradānakathā.

1163 Cīvaraṃ yo hi sabbeyya, sabbāpeyya parena vā;  
Aññātikāya pācitti, hoti bhikkhuniyā pana.

1164 Yaṃ vā nivāsituṃ sakkā, yaṃ vā pārupanūpagāṃ;  
Cīvaranti adhippeto, idamettha mahesinā.

1165 Sayāṃ sūciṃ pavesetvā, sabbantassa ca bhikkhuno;  
Sūcinīharaṇe tassa, pācittiyamudīritaṃ.

1166 Satakkhattumpi vijjhivā, sakiṃ nīharato pana;  
Ekaṃ pācittiyaṃ vuttaṃ, payogassa vasā bahū.

1167 ‘Sibbā’ ti pana āṇatto, avisesena bhikkhunā;  
Niṭṭhāpeti sace sabbāṃ, ekaṃ pācittiyaṃ siyā.

1168 ‘Yamettha cīvare kammaṃ, bhāro sabbāṃ tavā’ ti hi;  
Āṇatto bhikkhunā sabbāṃ, niṭṭhāpeti sace pana.

1169 Bhikkhussāṇāpakasseva, ekāyāṇattiyā pana;  
Honti pācittiyāpatti, anekārāpathe pathe.

1170 Punappunāṇāpentassa, anekāṇattiyaṃ pana;  
Kā hi nāma kathā atthi? Tikapācittiyaṃ siyā.

1171 Ñātikāya ca aññāti-saññissa vimatissa vā;  
Ekatoupasampanna-cīvare dukkaṭaṃ siyā.

1172Ṭhapetvā cīvaraṃ aññaṃ, parikkhārañca sabbato;  
Anāpatti viniddiṭṭhā, sikkhamānādikāyapi.

1173Sañcarittasamuṭṭhānaṃ, kriyaṃ paṇṇattivajjakam;  
Kāyakammaṃ vacīkammaṃ, ticittañca tivedanaṃ.

Cīvarasibbanakathā.

1174Bhikkhu bhikkhuniyā saddhiṃ, saṃvidhāya panekato;  
Paṭipajjeyya maggaṃ ce, aññaatra samayā idha.

1175Gāmantarokkame vāpi, addhayojanatikkame;  
Agāmake araññe vā, hoti āpatti bhikkhuno.

1176Etthākkappiyabhūmaṭṭho, saṃvidhānaṃ karoti yo;  
Saṃvidhānanimittaṃ tu, dukkaṭaṃ tassa dīpitaṃ.

1177Saṃvidhānaṃ karontassa, ṭhatvā kappiyabhūmiyaṃ;  
Saṃvidhānanimittaṃ tu, na vadantassa dukkaṭaṃ.

1178Ubhayatthāpi pācitti, gacchantasseva bhikkhuno;  
Anantarassa gāmassa, upacārokkame siyā.

1179Tatrāpi paṭhame pāde, dukkaṭaṃ samudīritaṃ;  
Dutiye padavārasmiṃ, pācittiyamudīritaṃ.

1180Antarā saṃvidhānepi, bhikkhuno dukkaṭaṃ siyā;  
Dvāramaggavisaṅkete, sati cāpatti vuccati.

1181Asaṃvidahite kāle, vidahitoti saññino;  
Bhikkhusseva vidhānasmim, hoti āpatti dukkaṭaṃ.

1182Samaye vidahitvā vā, visaṅketena gacchato;  
Āpadāsu anāpatti, tathā ummattakādino.

1183Īdaṃ catusamuṭṭhānaṃ, kāyato kāyavācato;  
Kāyacittā samuṭṭhāti, kāyavācādikattayā.

Saṃvidhānakathā.

1184Ekamujjavanaṃ nāvaṃ, tathā ojavanimpī vā;  
Abhirūheyya pācitti, saddhiṃ bhikkhuniyā sace.

1185Sagāmatīrapassena, gāmantaravasena vā;  
Agāmatīrapassena, gamane addhayojane.

1186Tathā yojanavittihīṇa-nadīmajjhena gacchato;  
Addhayojanasāṅkhāya, honti pācittiyo pana.

1187Yathāsukhaṃ samuddasmim, sabbaaṭṭhakathāsu hi;  
Nadiyaṃyeva āpatti, na samudde vicāritā.

**1188**Titthasampādanatthāya, uddham vā nadiyā adho;  
Sace haranti taṃyuttā, anāpatti pakāsītā.

**1189**Tathā saṃvidahitvā vā, tiriyaṃ taraṇāya vā;  
Āpadāsu vireso hi, anantarasamo mato.

Nāvābhiruhanakathā.

**1190**Ñatvā bhikkhuniyā bhattaṃ, bhuñjato paripācitaṃ;  
Hitvā gihisamārambhaṃ, hoti pācitti bhikkhuno.

**1191**Bhojanaṃ pañcadhā vuttaṃ, gahaṇe tassa dukkaṭaṃ;  
Ajjhohāresu sabbesu, tassa pācittiyo siyuṃ.

**1192**Santakaṃ nātakādīnaṃ, gihisampāditampi vā;  
Vinā bhikkhuniyā doso, bhuñjato paripācitaṃ.

**1193**Paripācitasaññissa, bhikkhussāparipācite;  
Ubhosu vimatissāpi, hoti sabbattha dukkaṭaṃ.

**1194**Ekatoupasampanna-paripācitaḥojanaṃ;  
Ajjhohāravaseneva, dukkaṭaṃ paribhuñjato.

**1195**Aññaṃ vā pana yaṃ kiñci, tḥapetvā pañcabhojanaṃ;  
Bhuñjantassa anāpatti, yāgukhajjaphalādikaṃ.

**1196**Samuṭṭhānādayo tulyā, paṭhamantimavatthunā;  
Idaṃ paṇṇattivajjaṃ tu, ticittañca tivedanaṃ.

Paripācitatathā.

**1197**Dutiyaṇiyateneva, dasamaṃ sadisaṃ matam;  
Idaṃ sikkhāpadaṃ sabbaṃ, samuṭṭhānanayādinā.

Rahonisajjakathā.

Bhikkhunivaggo tatiyo.

**1198**Eko āvasatho piṇḍo, agilānena bhikkhunā;  
Bhuñjitabbo tato uddham, pācitti paribhuñjato.

**1199**Anodisseva paññatte, yāvadattheva bhikkhunā;  
Bhuñjitabbaṃ sakiṃ tattha, tato uddham na vaṭṭati.

**1200**Dutiye divase tattha, gahaṇe dukkaṭaṃ matam;  
Ajjhohāresu sabbesu, tassa pācittiyo matā.

**1201**Kulenekena paññatte, saha nānākulehi vā;  
Nānekaṭṭhānabhedesu, ekabhāgova vaṭṭati.

**1202**Nānāṭṭhānesu paññatto, yo ca, nānākulehi vā;

Bhuñjato pana sabbattha, na doso paṭipāṭiyā.

**1203**Paṭipāṭimasesena, khepetvā puna bhuñjato;  
Ādīto pana paṭṭhāya, na ca kappati bhikkhuno.

**1204**Anāpatti gilānassa, āgacchantassa gacchato;  
Odissapi ca paññatte, paritte bhuñjato sakiṃ.

**1205**Yāguādīni niccampi, bhuñjituṃ pana vaṭṭati;  
Sesameḷakalomena, samuṭṭhānādikaṃ samam.

Āvasathakathā.

**1206**Aññatra samayā vuttā, pācitti gaṇabhojane;  
Gaṇoti pana niddiṭṭhā, cattāro vā tatuttariṃ.

**1207**Yaṃ nimantanato vāpi, laddhaṃ viññattitopi vā;  
Bhojanaṃ pana pañcannaṃ, hoti aññataraṃ idha.

**1208**Bhojanānampi pañcannaṃ, gahetvā nāmameva tu;  
Nimanteti sace bhikkhū, cattāro bahukepi vā.

**1209**‘‘Odanaṃ bhojanaṃ bhattaṃ, sampaṭicchatha gaṇhatha’’;  
Iti vevacaneheva, atha bhāsantarena vā.

**1210**Tato tassa ca te bhikkhū, sādiyitvā nimantaṇaṃ;  
Ekato nānato vā ce, gantvā gaṇhanti ekato.

**1211**Ṣabbesaṃ hoti pācitti, gaṇabhojanakāraṇā;  
Ekato gahaṇaṃ ettha, gaṇabhojanakāraṇaṃ.

**1212**Ekato nānato vāpi, gamanaṃ bhojanampi vā;  
Kāraṇanti na taṃ viññū, bhaṇanti gaṇabhojane.

**1213**Ṣacepi odanādīnaṃ, gahetvā nāmameva vā;  
Ekato nānato vāpi, viññāpetvā manussake.

**1214**Nānato vekato gantvā, sace gaṇhanti ekato;  
Evampi pana hotīti, vaṇṇitaṃ gaṇabhojanaṃ.

**1215**Duvidhassāpi etassa, paṭiggahaṇakāraṇā;  
Dukkaṭaṃ hoti pācitti, ajjhohāresu dīpitā.

**1216**Samayesu anāpatti, sattaṣvapi pakāsītā;  
Gahetvā ekato dvinnaṃ, tiṇṇaṃ vā bhuñjataṃ tathā.

**1217**Muninānupasampanna-cāripattānimantitā;  
Catutthe ekato katvāpi, gaṇabhedo pakāsito.

**1218**Neva samayaladdhānaṃ, vasenapi hi sabbaso;  
Gaṇabhedo panāpatti, veditabbā vibhāvinā.

1219 Bhojanānañca pañcannaṃ, vasena gaṇabhojane;  
Nattheva ca visaṅketam, yāguādīsu taṃ siyā.

1220 Gaṇabhojanasaññissa, bhikkhussāgaṇabhojane;  
Tattha vematikassāpi, hoti āpatti dukkaṭam.

1221 Bhojanāni ca pañceva, ṭhapetvā yāguādīsu;  
Anāpattīti ñātabbā, niccabhattādikesupi.

1222 Tathā ummattakādīnaṃ, samuṭṭhānādinā pana;  
Idaṃ eḷakalomena, sadisanti pakāsitaṃ.

Gaṇabhojanakathā.

1223 Bahūhi yo bhikkhu manussakehi;  
Nimantito pañcahi bhojanehi;  
Hitvā sace pubbanimantanāya;  
Vikappanaṃ pañcasu yassa kassa.

1224 Pacchā nimantitaṃ bhattaṃ, tathā uppaṭipāṭiyā;  
Bhuñjato ekasitthampi, tassa pācittiyaṃ siyā.

1225 Bhojanānaṃ tu pañcannaṃ, yena kena nimantito;  
Taṃ ṭhapetvā sace aññaṃ, bhojanaṃ paribhuñjati.

1226 Tesameva ca pañcannaṃ, bhojanānaṃ mahesinā;  
Etaṃ paramparaṃ nāma, bhojanaṃ paridīpitaṃ.

1227 Yattha khīraṃ rasaṃ vāpi, ākiranti sace pana;  
Yena ajjhotthaṭam bhattaṃ, sabbamekaraṣaṃ siyā.

1228 Koṭito pana paṭṭhāya, saṃsaṭṭhaṃ paribhuñjato;  
Anāpattīti niddiṭṭhaṃ, **mahāpaccariyaṃ** pana.

1229 Paramparanti saññāya, aparamparabhojane;  
Tattha vematikassāpi, dukkaṭam paribhuñjato.

1230 Sakalenapi gāmena, pūgena nigamena vā;  
Nimantitassa vā nicca-bhatte doso na vijjati.

1231 Samuṭṭhānādayo sabbe, kathinenādinā samā;  
Kriyākriyamidaṃ vuttaṃ, bhojanañcāvikkappaṃ.

Paramparabhojanakathā.

1232 Pūvā paheṇakatthāya, paṭiyattā sace pana;  
Pātheyyathāya manthā vā, ye hi tattha ca bhikkhunā.

1233 Dvattipattā gahetabbā, pūrā pūvehi sattuhi;  
Tato ce uttarim tassa, hoti pācitti gaṇhato.

1234 Gahetvā nikkhamantena, “dvattipattā mayā idha;

Gahitā pana pūvā’’ti, bhikkhuṃ disvā vade budho.

**1235**‘‘Mā kho tvaṃ paṭiganhā’’ti, avadantassa dukkaṭaṃ;  
Gaṇhatopi ca taṃ sutvā, hoti āpatti dukkaṭaṃ.

**1236**Ūnakadvattipattesu, atirekoti saññino;  
Tattha vematikassāpi, hoti āpatti dukkaṭaṃ.

**1237**Yena tattha tayo laddhā, pattapūrā tato pana;  
Dve saṅghassa padātabbā, dve ce eko, na ekato.

**1238**Apahēṇakapātheyyaṃ, avasesampi vā tato;  
Santakaṃ ñātakādīnaṃ, dentānampi tadūnakaṃ.

**1239**Gaṇhatopi anāpatti, tathā ummattakādino;  
Samuṭṭhānādayo sabbe, sañcarittasamā matā.

Kāṇamātukathā.

**1240**Ñāñena pana pañcannaṃ, bhojanānaṃ pavārito;  
Pācittinatirittaṃ ce, puna bhuñjati bhojanaṃ.

**1241**Asanaṃ bhojanañceva, hatthapāsābhihārātā;  
Kāyavācāpaṭikkhepo, pañcaṅgehi pavāraṇā.

**1242**Odano sattu kummāso, maccho maṃsanti sabbaso;  
Nippapañcena niddiṭṭhaṃ, bhojanaṃ pañcadhā matāṃ.

**1243****Odano** tattha sattannaṃ, dhaññānaṃ odano mato;  
Bhajjitānaṃ tu dhaññānaṃ, cuṇṇaṃ ‘‘**sattū**’’ti vuccati.

**1244****Kummāso** yavakummāso, **maccho** vuccati odako;  
**Maṃsampi** kappiyamaṃsaṃ, ayamettha vinicchayo.

**1245**Sāli vīhi yavo kaṅgu, varako godhumo tathā;  
Kudrūsakoti sattete, dhaññā dhaññena desitā.

**1246**Sāmākāditiṇaṃ sabbāṃ, kudrūseneva dīpitaṃ;  
Nīvāro sāliyaṃ vutto, varake varakacorako.

**1247**Sattannaṃ pana dhaññānaṃ, odano yāgu vā pana;  
Aṅgasampattiyā yuttā, sañjaneti pavāraṇaṃ.

**1248**Hatthena gahitokāse, odhiṃ dasseti yā pana;  
Yāgusā idha sabbāpi, odanoti pavuccati.

**1249**Abbhunhā pana yā yāgu, uddhanoropitā tanu;  
Sace odhiṃ na dasseti, na janeti pavāraṇaṃ.

**1250**Puna sā sītalībhūtā, ghanabhāvaṃ gatā sace;  
Odhiṃ dasseti so pubbe, tanubhāvo na rakkhati.

- 1251 Takkadhaññarasādīni, āropetvā bahūnīpi;  
Phalapaṇṇakaḷīrāni, pakkipitvāna tattha ca.
- 1252 Taṇḍule muṭṭhimattepi, pakkipitvā pacanti ce;  
Odhim̐ pana ca dasseti, sañjaneti pavāraṇaṃ.
- 1253 Rase dhaññarase khīre, vākiritvāna odanaṃ;  
“Yāguṃ gaṇhatha, yāgu”nti, vatvā denti sace pana.
- 1254 Kiñcāpi tanukā hoti, sañjaneti pavāraṇaṃ;  
Taṃ pacitvā sace denti, yāgusaṅgahitā pana.
- 1255 Chupanti macchamaṃsaṃ vā, tanukāyapi yāguyā;  
Sace sāsapamattampi, paññāyati pavāraṇaṃ.
- 1256 Macchamaṃsaraso suddho, saṃsatto rasayāgu vā;  
Na cākappiyamaṃsaṃ vā, sañjaneti pavāraṇaṃ.
- 1257 Thapetvā vuttadhaññānaṃ, odanaṃ pana sabbaso;  
Veḷutaṇḍulakādīnaṃ, na pavāreti odano.
- 1258 Puthukā vā tato tāhi, katabhattampi sattupi;  
Suddhā na pana pūvā vā, pavārenti kadācīpi.
- 1259 Kharapākena bhaṭṭhānaṃ, vīhīnaṃ taṇḍule pana;  
Koṭṭetvā denti taṃ cuṇṇaṃ, sattusaṅgahitaṃ mataṃ.
- 1260 Bhajjitānaṃ tu vīhīnaṃ, na pavārenti taṇḍulā;  
Tesaṃ pana ca yaṃ cuṇṇaṃ, taṃ janeti pavāraṇaṃ.
- 1261 Kharapākena bhaṭṭhānaṃ, vīhīnaṃ kuṇḍakampi ca;  
Sattunaṃ modako vāpi, sañjaneti pavāraṇaṃ.
- 1262 Samapākena bhaṭṭhānaṃ, sukkhānaṃ ātapena ca;  
Kuṇḍakaṃ pana vīhīnaṃ, na janeti pavāraṇaṃ.
- 1263 Lājā vā pana teheva, katabhattampi sattu vā;  
Khajjakaṃ pana suddhaṃ vā, na janeti pavāraṇaṃ.
- 1264 Pūritaṃ macchamaṃsehi, taṃ janeti pavāraṇaṃ;  
Yaṃ kiñci bhajjitaṃ piṭṭhaṃ, na pavāreti suddhakaṃ.
- 1265 Yavehi katakummāso, pavāreti, na cāparo;  
Macchamaṃsesu vattabbaṃ, pākaṭattā na vijjati.
- 1266 Khādanto kappiyaṃ maṃsaṃ, nisedheti akappiyaṃ;  
Na so tena pavāreti, avatthuttāti dīpitaṃ.
- 1267 Tathevākappiyaṃ maṃsaṃ, khādanto kappiyaṃ sace;  
Nisedheti pavāreti, vatthukattāti vaṇṇitaṃ.
- 1268 Maṃsaṃ pana ca khādanto, kappiyaṃ vā akappiyaṃ;

Pavāreti nisedheti, kiñci kappiyabhojanam.

1269Ṣace akappiyam maṃsam, khādantova akappiyam;  
Nisedham na pavāreti, tathā aññaṃ akappiyam.

1270Ṣace ajjhohaṭam hoti, sitthamekampi bhikkhunā;  
Patte hatthe mukhe vāpi, bhojanam pana vijjati.

1271Pavāraṇapahonam ce, paṭikkhipati bhojanam;  
Pavāreti sace natthi, na pavāreti katthaci.

1272Gilitvā ca mukhe bhattam, sesamādāya gacchati;  
Antarā ca nisedhento, na pavāreti bhojanam.

1273Mukhe ca bhattam gilitañca hatthe;  
Bhattam tu aññaṃ ca dātukāmo;  
Patte ca bhattam puna dātukāmo;  
Paṭikkhipanto na pavārito so.

1274Aśanassa upacchedā, na pavāreti soti hi;  
Kathayanti mahāpañña, kāraṇākāraṇaññaṃ.

1275Gaṇhato pacchimaṃ aṅgam, dadato purimaṃ pana;  
Ubhinnaṃ aḍḍhateyyam ce, vinā hattham pasāritaṃ.

1276Tasmim abhihaṭam ṭhāne, pavāraṇapahonakam;  
Tādisam bhuñjamānova, nisedheti pavārito.

1277Hatthe ādhārake vāpi, pattaṃ ūrūsu vā ṭhitaṃ;  
Āharitvā sace bhikkhu, “bhattam gaṇhā” ti bhāsati.

1278Anantare nisinnova, tam paṭikkhipato pana;  
Abhihārassa cābhāvā, natthi tassa pavāraṇā.

1279Bhattapacchim paṇāmetvā, ṭhapetvā purato “idaṃ;  
Gaṇhāhi” ti ca vuttepi, ayameva vinicchayo.

1280Anantarassa bhikkhussa, dīyamāne panetaro;  
Pidahanto sakam pattaṃ, hatthehi na pavārito.

1281Kāyenābhihaṭam bhattam, paṭikkhipati yo pana;  
Kāyena vāpi vācāya, hoti kassa pavāraṇā.

1282Eko abhihaṭe bhatte, pavāraṇabhayā pana;  
“Ākirākira koṭṭetvā, koṭṭetvā pūrayā” ti ca.

1283Ṣace vadati tassāpi, na panatthi pavāraṇā;  
Iccevāha mahāthero, **mahāpadumanā**mako.

1284Ṣamaṃsañhi rasam netvā, gaṇhathāti rasam vade;  
Tam sutvā ca nisedhento, neva hoti pavārito.



- 1285** ‘Gaṇha maccharasaṃ sāraṃ, gaṇha maṃsarasa’nti vā;  
‘Idaṃ gaṇhā’nti vā vutte, paṭikkhepe pavāraṇā.
- 1286** Sace maṃsaṃ visuṃ katvā, ‘gaṇha maṃsarasa’nti vā;  
Vadeyyatthi ca maṃsaṃ ce, paṭikkhepe pavāraṇā.
- 1287** Odanaena ca pucchantaṃ, ‘muhuttaṃ āgamehi’nti;  
Gahaṇatthaṃ ṭhapentassa, neva tassa pavāraṇā.
- 1288** Kaḷīrapanasādīhi, missakaṃ macchamaṃsakam;  
‘Kaḷīrasūpakaṃ gaṇha, panasabyañjana’nti vā.
- 1289** Vadanti ce paṭikkhepe, neva hoti pavāraṇā;  
Apavāraṇahetūnaṃ, nāmena pana vuttato.
- 1290** ‘Macchasūpa’nti vā vutte, ‘maṃsasūpa’nti vā pana;  
‘Idaṃ gaṇhā’nti vā vutte, hotiyeva pavāraṇā.
- 1291** Eseva ca nayo vutto, ñeyyo maṃsakarambake;  
Sabbesu macchamaṃsehi, missakesu ayaṃ nayo.
- 1292** Bhattasammissitaṃ yāguṃ, āharitvā sace pana;  
‘Yāguṃ gaṇhā’nti vuttasmim, na pavāreti vārayaṃ.
- 1293** ‘Bhattaṃ gaṇhā’nti vutte tu, pavāreti paṭikkhipaṃ;  
Yena vāpucchito tassa, atthitāyāti kāraṇaṃ.
- 1294** ‘Yāgumissakaṃ gaṇhā’nti, vutte tattha ca yāgu ce;  
Samā bahutarā vā sā, na pavāreti so kira.
- 1295** Mandā yāgu, bahuṃ bhattaṃ, sace hoti pavāraṇā;  
Idaṃ sabbattha niddiṭṭhaṃ, kāraṇaṃ pana duddasaṃ.
- 1296** Rasaṃ bahurase bhatte, khīraṃ vā bahukhīrake;  
Gaṇhathāti visuṃ katvā, deti natthi pavāraṇā.
- 1297** Gacchanteneva bhottabbaṃ, gacchanta ce pavārito;  
Bhuñjitabbaṃ ṭhiteneva, ṭhatvā yadi pavārito.
- 1298** Udakaṃ vāpi patvā so, sace tiṭṭhati kaddamaṃ;  
Atirittaṃ tu kāretvā, bhuñjitabbaṃ tato puna.
- 1299** Pīṭhake yo nisīditvā, pavāreti sace pana;  
Āsanaṃ avicāletvā, bhuñjitabbaṃ yathāsukhaṃ.
- 1300** Sace mañce nisīditvā, pavāreti tato pana;  
Ito saṃsaritum etto, īsakampi na labbhati.
- 1301** Tena mañcena naṃ saddhiṃ, vaṭṭataññātra nenti ce;  
Evaṃ sabbattha ñātābbaṃ, viññunā vinayaññunā.
- 1302** Nipajjitvāva bhottabbaṃ, nipanna ce pavārito;

Vāretukkuṭiko hutvā, bhuñjitabbaṃ tatheva ca.

**1303** Athālametaṃ sabbanti, vattabbaṃ tena bhikkhunā;  
Atirittaṃ karontena, onamtvāna bhājanaṃ.

**1304** Kappiyaṃ pana kātabbaṃ, na patteyeva kevalaṃ;  
Pacchiyaṃ yadi vā kuṇḍe, kātuṃ vaṭṭati bhājane.

**1305** Pavāritānaṃ apavāritānaṃ;  
Aññesametaṃ pana vaṭṭateva;  
Yenātirittaṃ tu kataṃ ṭhapetvā;  
Tameva cekaṃ paribhuñjitabbaṃ.

**1306** Kappiyaṃ pana kāretvā, bhuñjantasseva bhikkhuno;  
Byañjanaṃ vāpi yaṃ kiñci, patte tassākiranti ce.

**1307** Atirittaṃ tu kāretvā, bhuñjitabbaṃ tathā puna;  
Yena taṃ akataṃ yaṃ vā, kātabbaṃ tena taṃ visuṃ.

**1308** Kataṃ akappiyādīhi, atirittaṃ tu sattahi;  
Na gilānātirittañca, taṃ hotinatirittakaṃ.

**1309** Yopi pātova ekampi, sitthaṃ bhutvā nisīdati;  
Upakaṭṭhūpanītampi, kātuṃ labhati kappiyaṃ.

**1310** Āhāratthāya yāmādi-kālikaṃ paṭigaṇhato;  
Anāmisam tamevassa, dukkaṭaṃ paribhuñjato.

**1311** Tathā anatirittanti, saññino atirittake;  
Tattha vematikassāpi, dukkaṭaṃ paridīpitaṃ.

**1312** Anāpattātirittaṃ tu, kārapetvāna bhuñjato;  
Gilānassātirittaṃ vā, tathā ummattakādino.

**1313** Samuṭṭhānādayo sabbe, kathinena samā matā;  
Kappiyākaraṇaṇceva, bhojanañca kriyākriyaṃ.

Paṭhamapavāraṇakathā.

**1314** Yo panānatirittena, pavāreyya pavāritaṃ;  
Jānaṃ āsādanāpekkho, bhutte pācitti tassa tu.

**1315** Dukkaṭaṃ abhihāre ca, gahaṇe itarassa hi;  
Ajjhohārapayogesū, sabbesupī ca dukkaṭaṃ.

**1316** Bhojanassāvasānasmim, pācitti paridīpitā;  
Abhihārakabhikkhusa, sabbam tasseva dassitaṃ.

**1317** Pavāritoti saññissa, bhikkhusmim apavārite;  
Vimatissubhayatthāpi, dukkaṭaṃ paridīpitaṃ.

**1318** Anāpattātirittaṃ vā, kārapetvāva deti ce;

Gilānassāvasesaṃ vā, aññassatthāya deti vā.

1319 Śesaṃ sabbamasesena, anantarasamaṃ mataṃ;  
Omasavādatulyāva, samuṭṭhānādayo nayā.

Dutiyapavāraṇakathā.

1320 Khādanīyaṃ vā bhojanīyaṃ vā;  
Kiñci vikāle yo pana bhikkhu;  
Khādati bhujjati vāpi ca taṃ;  
So jinavuttaṃ dosamupeti.

1321 Yamāmisagatañcetha, vanamūlaphalādikaṃ;  
Kālikesvasammohatthaṃ, vedītabbamidaṃ pana.

1322 Mūlaṃ kandaṃ muḷālañca, matthakaṃ khandhakaṃ tacamaṃ;  
Pattaṃ pupphaṃ phalaṃ aṭṭhi, piṭṭhaṃ niyyāsameva ca.

1323 Mūlakhādanīyādīnaṃ, mukhamattanidassanaṃ;  
Bhikkhūnaṃ pāṭavatthāya, nāmatthesu nibodhatha.

1324 Mūlakaṃ khārakañceva, vatthulaṃ taṇḍuleyyakaṃ;  
Tambakaṃ jajjharikañca, caccu vajakalīpi ca.

1325 Mūlāni evamādīnaṃ, sākānaṃ āmise pana;  
Saṅghaṃ idha gacchanti, āhāratthaṃ pharanti hi.

1326 Chaḍḍenti jaraṭṭhaṃ chetvā, yaṃ taṃ vajakalissa tu;  
Taṃ yāvajīvikaṃ vuttaṃ, sesānaṃ yāvakālīkaṃ.

1327 Haliddi siṅgiveraṇca, vacattaṃ ativisaṃ vacamaṃ;  
Usīraṃ bhaddamuttañca, tathā kaṭukarohiṇī.

1328 Īccevamādikaṃ aññaṃ, pañcamūlādikaṃ bahu;  
Nānappakāraṇaṃ mūlaṃ, viññeyyaṃ yāvajīvikaṃ.

1329 Masālupiṇḍalādīnaṃ, vallīnaṃ āluvassa ca;  
**Kando** uppalaḷāṭīnaṃ, tathā padumajāṭiyā.

1330 Kadalīsiggutālānaṃ, māluvassa ca veḷuyā;  
Satāvāri kaserūnaṃ, kando ambāṭakassa ca.

1331 Īccevamādayo kandā;  
Dassitā yāvakālīkā;  
Dhoto so āmise vutto;  
Kando yo khīravalliyā.

1332 Adhoto lasuṇaṇceva, khīrakākoliādayo;  
Kandā vākyapathātītā, viññeyyā yāvajīvikā.

1333 Puṇḍarīkamuḷālañca, muḷālaṃ padumassa ca;  
Evamādīmanekampi, **muḷālaṃ** yāvakālīkaṃ.

- 1334 Tālahintālakuntāla-nāḷikerādisambhavaṃ;  
Haliddisiṅgiverānaṃ, muḷālaṃ yāvajīvikāṃ.
- 1335 Tālahintālakuntāla-kaḷīro ketakassa ca;  
Kadalīnāḷikerānaṃ, **matthakaṃ** mūlakassa ca.
- 1336 Khajjurera kavettānaṃ, ucchuveḷunaḷādīnaṃ;  
Sattannaṃ pana dhaññānaṃ, kaḷīro sāsapassa ca.
- 1337 Iccevamaḍayoneke, matthakā yāvakālikā;  
Aññe haliddiādīnaṃ, matthakā yāvajīvikā.
- 1338 Tālakuntālakādīnaṃ, chinditvā pātito pana;  
Gato jaraṭṭhabundo so, saṅghaṃ yāvajīvike.
- 1339 **Khandh**akhādānīyaṃ nāma, ucchukhandho pakāsito;  
Sālakalyāṇiyā khandho, tathā pathaviyaṃ gato.
- 1340 Evamuppala jātīnaṃ, daṇḍako yāvakāliko;  
Paṇṇadaṇḍuppalādīnaṃ, sabbo padumajātīyā.
- 1341 Yāvajīvikasaṅkhātā, karamaddādidāṇḍakā;  
**Tacesu**cchutacoveko, saraso yāvakāliko.
- 1342 Mūlakāṃ khārako caccu, tambako taṇḍuleyyako;  
Vatthulo cīnamuggo ca, ummā vajakalī tathā.
- 1343 Jajjharī kāsamaddo ca, sellu siggu ca nāḷikā;  
Varuṇo aggimantho ca, jīvantī sunisannako.
- 1344 Rājamāso ca māso ca, nipphāvo migapupphikā;  
Vaṇṭako bhūmiloṇīti, evamādimanekakaṃ.
- 1345 **Patta**khādānīyaṃ nāma, kathitaṃ yāvakālikāṃ;  
Itarā ca mahāloṇi, dīpitā yāvajīvikā.
- 1346 Yāvakālikamicceva, kathitaṃ ambapallavaṃ;  
Nimbassa kuṭajassāpi, paṇṇaṃ sulasiyāpi ca.
- 1347 Kappāsikapāṭolānaṃ, tesāṃ pupphaphalāni ca;  
Phaṇijjakajjukānañca, paṇṇaṃ taṃ yāvajīvikāṃ.
- 1348 Aṭṭhannaṃ mūlakādīnaṃ, **pupphaṃ** nipphāvakassa ca;  
Tathā pupphaṃ karīrassa, pupphaṃ varuṇakassa ca.
- 1349 Pupphaṃ kaserukassāpi, jīvantī siggupupphakaṃ;  
Padumuppala jātīnaṃ, pupphānaṃ kaṇṇikāpi ca.
- 1350 Nāḷikerassa tālassa, taruṇaṃ ketakassa ca;  
Iccevamaḍikaṃ puppha-manekaṃ yāvakālikāṃ.
- 1351 Yāvakālikapupphāni, ṭhapetvā pana sesakaṃ;

Yāvajīvikapupphanti, dīpaye sabbameva ca.

- 1352**Tilakamakulasālamallikānaṃ;  
Kakudhakapitthakakundakaḷīnaṃ;  
Kuravakakaravīrapāṭalīnaṃ;  
Kusumamidaṃ pana yāvajīvikaṃ.
- 1353**Ambambāṭakajambūnaṃ, **phalañca** panasassa ca;  
Mātuluṅgakapitthānaṃ, phalaṃ tintiṇikassa ca.
- 1354**Tālassa nāḷikerassa, phalaṃ khajjūriyāpi ca;  
Labujassa ca cocassa, mocassa madhukassa ca.
- 1355**Badarassa karamaddassa, phalaṃ vātiṅgaṇassa ca;  
Kumbhaṇḍatipusānañca, phalaṃ eḷālukassa ca.
- 1356**Rājāyatanaphalaṃ pussa-phalaṃ timbarukassa ca;  
Evamādimanekampi, phalaṃ taṃ yāvakālikaṃ.
- 1357**Tiphalaṃ pipphalī jāti-phalañca kaṭukapphalaṃ;  
Goṭṭhaphalaṃ bilaṅgañca, takkolamaricāni ca.
- 1358**Evamādīni vuttāni, avuttāni ca pāḷiyaṃ;  
Phalāni pana gacchanti, yāvajīvikasaṅgahaṃ.
- 1359**Panasambāṭakaṭṭhīni, sālatti labujatti ca;  
Ciñcābimbaphalaṭṭhīni, pokkharatti ca sabbaso.
- 1360**Khajjūriketakādīnaṃ, tathā tālaphalaṭṭhi ca;  
Evamādīni gacchanti, yāvakālikasaṅgahaṃ.
- 1361**Punnāgamadhukaṭṭhīni, sellaṭṭhi tiphalaṭṭhi ca;  
Evamādīni **aṭṭhīni**, niddiṭṭhāni anāmise.
- 1362**Sattannaṃ pana dhaññānaṃ, aparāṇṇānameva ca;  
**Piṭṭhaṃ** panasasālānaṃ, labujambāṭakassa ca.
- 1363**Tālapiṭṭhaṃ tathā dhotam, piṭṭhaṃ yaṃ khīravalliyā;  
Evamādimanekampi, kathitaṃ yāvakālikaṃ.
- 1364**Adhotam tālapiṭṭhañca, piṭṭhaṃ yaṃ khīravalliyā;  
Assagandhādipiṭṭhañca, hoti taṃ yāvajīvikaṃ.
- 1365**Niyyāso ucchunibbatto, eko sattāhakāliko;  
Avaseso ca hīngādi, niyyāso yāvajīviko.
- 1366**Mūlādīsu mayā kiñci, mukhamattaṃ nidassitaṃ;  
Etassevānusārena, seso ñeyyo vibhāvinā.
- 1367**‘Bhuñjissāmi vikāle’ ti, āmisam paṭigaṇhato;  
Kāle vikālasaññissa, kāle vematikassa ca.

1368 Dukkaṭaṃ, kālasaññaṃ, anāpatti pakāsitaṃ;  
Idaṃ eḷakalomena, samuṭṭhānādinā samaṃ.

Vikālabhojanakathā.

1369 Bhojanaṃ sannidhiṃ katvā, khādanaṃ vāpi yo pana;  
Bhuñjeyya vāpi khādeyya, tassa pācittiyaṃ siyā.

1370 Bhikkhu yaṃ sāmaṇeṇaṃ, pariccajatyānālayo;  
Nidahitvā sace tassa, denti taṃ puna vaṭṭati.

1371 Sayāṃ paṭiggahetvāna, apariccattameva yaṃ;  
Dutiye divase tassa, nihitaṃ taṃ na vaṭṭati.

1372 Tato ajjhoharantassa, ekasitthampi bhikkhuno;  
Pācitti kathitā suddhā, suddhacittena tādinā.

1373 Akappiyesu maṃsesu, manussasseva maṃsake;  
Thullaccayena pācitti, dukkaṭena sahetare.

1374 Yāmakālikasaṅkhātaṃ, pācitti paribhuñjato;  
Dukkaṭāpattiyā saddhiṃ, āhāratthāya bhuñjato.

1375 Sace pavārito hutvā, annaṃ anatirittakaṃ;  
Bhuñjato pakataṃ tassa, hoti pācittiyadvayaṃ.

1376 Thullaccayena saddhiṃ dve, maṃse mānusake siyuṃ;  
Sese akappiye maṃse, dukkaṭena saha dvayaṃ.

1377 Yāmakālikasaṅkhātaṃ, bhuñjato sati paccaye;  
Sāmisena mukhena dve, ekameva nirāmiṣaṃ.

1378 Tamevajjhoharantassa, āhāratthāya kevalaṃ;  
Dvīsu tesu vikappesu, dukkaṭaṃ pana vaḍḍhati.

1379 Vikāle bhuñjato suddhaṃ, sannidhipaccayāpi ca;  
Vikālabhojanā ceva, hoti pācittiyadvayaṃ.

1380 Maṃse thullaccayañceva, dukkaṭampi ca vaḍḍhati;  
Manussamaṃse sese ca, yathānukkamato dvayaṃ.

1381 Nathevānatirittampi, vikāle paribhuñjato;  
Doso sabbavikappesu, bhikkhuno tannimittako.

1382 Vikālapaccayā vāpi, na doso yāmakālike;  
Sattāhakālikaṃ yāva-jīvikaṃ paṭigaṇhato.

1383 Āhārasseva atthāya, gahaṇe duvidhassa tu;  
Ajjhohārapayogesu, dukkaṭaṃ tu nirāmise.

1384 Atha āmisasamattamaṃ, gahetvā ṭhapitaṃ sace;  
Puna ajjhoharantassa, pācittiva pakāsitaṃ.

- 1385 Kālo yāmo ca sattāhaṃ, iti kālattayaṃ idaṃ;  
Atikkamayato doso, kālaṃ taṃ taṃ tu kālikaṃ.
- 1386 Attanā tīṇi sambhinna-rasāni itarāni hi;  
Sabhāvamupaneteva, yāvakālikamattano.
- 1387 Evameva ca sesesu, kālikesu viniddise;  
Imesu pana sabbesu, kālikesu catūsvapi.
- 1388 Kālikadvayamādīmi, antovutthañca sannidhi;  
Ubhayampi na hoteva, pacchimaṃ kālikadvayaṃ.
- 1389 Akappiyāya kuṭiyā, vutthenantadvayena taṃ;  
Gahitaṃ tadahe vāpi, dvayaṃ pubbaṃ na vaṭṭati.
- 1390 Mukhasannidhi nāmāyaṃ, antovutthaṃ na kappati;  
Iti vuttaṃ daḷhaṃ katvā, **mahāpaccariyaṃ** pana.
- 1391 Na doso nidahitvāpi, paṭhamaṃ kālikattayaṃ;  
Taṃ taṃ sakaṃ sakaṃ kāla-manatikkamma bhuñjato.
- 1392 Tathā ummattakādīnaṃ, anāpatti pakāsītā;  
Samameḷakalomena, samuṭṭhānādīnā idaṃ.
- Sannidhikārakathā.
- 1393 Bhojanāni paṇītāni, agilāno panattano;  
Athhāya viññāpetvāna, pācitti paribhuñjato.
- 1394 ‘Sappinā dehi bhattaṃ me, sasappiṃ sappimissakaṃ;  
Sappibhattaṃ dehi’ ti, viññāpentassa dukkaṭaṃ.
- 1395 Viññāpetvā tathā taṃ ce, dukkaṭaṃ paṭigaṇhato;  
Puna ajjhoharantassa, pācitti pariyāputā.
- 1396 Suddhāni sappiādīni, viññāpetvāna bhuñjato;  
Sekhiyesupī viññatti, dukkaṭaṃ paridīpaye.
- 1397 Tasmā paṇītasamsaṭṭhaṃ, viññāpetvāva bhuñjato;  
Sattadhaññamayāṃ bhattaṃ, pācittiyamudīraye.
- 1398 Sace ‘gosappinā mayhaṃ, dehi bhatta’ nti yācito;  
Ajiyā sappiādīhi, visaṅketaṃ dadāti ce.
- 1399 ‘Sappinā dehi’ vutto ce, navanītādikesupī;  
Deti aññatarenassa, visaṅketaṃ dīpitaṃ.
- 1400 Yena yena hi viññattaṃ, tasmīṃ mūlepi tassa vā;  
Laddhepi pana taṃ laddhaṃ, hotiyeva na aññathā.
- 1401 Thapetvā sappiādīni, āgatāni hi pāliyaṃ;  
Aññehi viññāpentassa, hoti āpatti dukkaṭaṃ.

1402 Sabbehi sappiādīhi, viññāpetvāva ekato;  
Bhuñjatekarasaṃ katvā, nava pācittiyo matā.

1403 Akappiyena vuttepi, sappinā deti tena ce;  
Gahaṇe paribhogepi, dukkaṭaṃ paridīpitaṃ.

1404 Gilānassa gilānoti, saññino vimatissa vā;  
Dukkaṭaṃ muninā vuttaṃ, anāpatti pakāsītā.

1405 Gilānakāle viññatta-magilānassa bhuñjato;  
Gilānassāvasesaṃ vā, ñātakādīnameva vā.

1406 Idaṃ catusamuṭṭhānaṃ, kāyato kāyavācato;  
Kāyacittā tathā kāya-vācācittattayāpi ca.

Paṇītabhojanakathā.

1407 Adinnañhi mukhadvāraṃ, āhāraṃ āhareyya yo;  
Dantaponodakaṃ hitvā, tassa pācittiyaṃ siyā.

1408 Hatthapāsobhinīhāro, majjhimuccāraṇakkhamo;  
Manusso vāmanusso vā, deti kāyādinā tidhā.

1409 Paṭiggaṇhāti taṃ bhikkhu, dīyamānaṃ sace dvidhā;  
Evaṃ pañcaṅgasamyoge, gahaṇaṃ tassa rūhati.

1410 Dāyako ganaṭṭho ce, bhūmaṭṭho cetaro siyā;  
Bhūmaṭṭhassa ca sīsenā, ganaṭṭhassa dehino.

1411 Yamāsannataraṃ aṅgaṃ, orimantena tassa tu;  
Dātuṃ vāpi gahetuṃ vā, vinā hatthaṃ pasāritaṃ.

1412 Hatthapāso minetabbo, nagaṭṭhādīsvayaṃ nayo;  
Evarūpe pana ṭhāne, ṭhatvā ce deti vaṭṭati.

1413 Pakkhī vā mukhatuṇḍena, hatthī soṇḍāya vā pana;  
Sace yaṃ kiñci pupphaṃ vā, phalaṃ vā deti vaṭṭati.

1414 Bhattabyañjanapuṇṇāni, bhājanāni bahūnipi;  
Sīsenādāya bhikkhussa, gantvā kassaci santikaṃ.

1415 Īsakaṃ pana onatvā, “gaṇhā” ti yadi bhāsati;  
Tena hatthaṃ pasāretvā, heṭṭhimaṃ pana bhājanaṃ.

1416 Paṭicchitabbaṃ taṃ eka- desenāpi ca bhikkhunā;  
Honti ettāvātā tāni, gahitāneva sabbaso.

1417 Tato paṭṭhāya taṃ sabbam, oropetvā yathāsukhaṃ;  
Ugghāṭetvā tato iṭṭhaṃ, gahetuṃ pana vaṭṭati.

1418 Pacchiādīmhi vattabba-matthi kiṃ ekabhājane;  
Kājabhattaṃ haranto ce, onatvā deti vaṭṭati.



- 1419Tiṃsahattho siyā veḷu, antesu ca duve ghaṭā;  
Sappino, gahitekasmim, sabbam gahitameva tam.
- 1420Bahupattā ca mañce vā, pīṭhe vā kaṭasārake;  
Ṭhapitā dāyako hattha-pāse ṭhatvāna deti ce.
- 1421Paṭiggahaṇasaññāya, mañcādīni sace pana;  
Nisīdati phusitvā yo, yañca pattesu dīyati.
- 1422Gahitam tena tam sabbam, hotiyeva na saṃsayo;  
Paṭiggahessāmicceva, mañcādīni sace pana.
- 1423Gahitam hoti tam sabbam, āruhitvā nisīdati;  
Āhacca kucchiyā kucchim, ṭhitā pattā hi bhūmiyam.
- 1424Yaṃ yaṃ aṅgulyā vāpi, phusitvā sūciyāpi vā;  
Nisīno tattha tattheva, dīyamānaṃ tu vaṭṭati.
- 1425Kaṭasāre mahantasmim, tathā hatthattharādisu;  
Gaṇhato hatthapāsasmim, vijjamāne tu vaṭṭati.
- 1426Tatthajātakapaṇṇesu, gahetuṃ na ca vaṭṭati;  
Na panetāni kāyena, paṭibaddhāni honti hi.
- 1427Asaṃhārimapāsāṇe, phalake vāpi tādise;  
Khāṇubaddhepi vā mañce, gahaṇaṃ neva rūhati.
- 1428Tintiṇikādipaṇṇesu, bhūmiyam patthaṭesu vā;  
Dhāretumasamatthattā, gahaṇaṃ na ca rūhati.
- 1429Hatthapāsamatikkamma, dīghadaṇḍena deti ce;  
Vattabbo bhikkhunāgantvā, dehīti parivesako.
- 1430Sace patte rajo hoti, dhovitabbo jale sati;  
Tasmim asati puñchitvā, gahetabbo asesato.
- 1431Piṇḍāya vicarantassa, rajaṃ patati ce pana;  
Bhikkhā paṭiggahetvāva, gahetabbā vijānatā.
- 1432Appaṭiggahite bhikkhum, gaṇhato pana dukkaṭam;  
Paṭiggahetvānāpatti, pacchā tam paribhuñjato.
- 1433.‘Paṭiggahetvā dethā’ ti, vutte tam vacanaṃ pana;  
Asutvānādiyitvā vā, denti ce natthi dukkaṭam.
- 1434Pacchā paṭiggahetvāva, gahetabbam vijānatā;  
Sace rajaṃ nipātetī, mahāvāto tato tato.
- 1435Na sakkā ca siyā bhikkham, gahetuṃ yadi bhikkhunā;  
Aññassa dātukāmena, gahetuṃ pana vaṭṭati.
- 1436Sāmaṇerassa tam datvā, dinnam vā tena tam puna;

Tassa vissāsato vāpi, bhuñjitum pana vaṭṭati.

**1437** Bhikkhācāre sace bhattaṃ, sarajaṃ deti bhikkhuno;  
“Paṭiggahetvā bhikkhaṃ tvam, gaṇha vā bhuñja vā” ti ca.

**1438** Vattabbo so tathā tena, kattabbañceva bhikkhunā;  
Rajaṃ upari bhattassa, tassuplavati ce pana.

**1439** Kañjikaṃ tu pavāhetvā, bhuñjitabbaṃ yathāsukhaṃ;  
Anto paṭiggahetabbaṃ, pavittḥaṃ tu sace pana.

**1440** Patitaṃ sukhabhatte ce, apanīyāva taṃ rajaṃ;  
Sukhumaṃ ce sabhattampi, bhuñjitabbaṃ yathāsukhaṃ.

**1441** Uluṅkenāharitvāpi, dentassa paṭhamam pana;  
Thevo uluṅkato patte, sace patati vaṭṭati.

**1442** Bhatte ākiramāne tu, carukena tato pana;  
Masi vā chārikā vāpi, sace patati bhājane.

**1443** Tassa cābhihaṭṭāpi, na doso upalabbhati;  
Anantarassa bhikkhussa, dīyamānaṃ tu pattato.

**1444** Uppabhitvā sace patte, itarassa ca bhikkhuno;  
Patati vaṭṭatevāyaṃ, paṭiggahitameva taṃ.

**1445** Pāyāsassa ca pūretvā, pattaṃ ce denti bhikkhuno;  
Uṇhattā pana taṃ heṭṭhā, gahetum na ca sakkati.

**1446** Vaṭṭatīti ca niddiṭṭhaṃ, gahetum mukhavaṭṭiyaṃ;  
Na sakkā ce gahetabbo, tathā ādhārakenapi.

**1447** Sace āsanāsālāyaṃ, gahetvā pattamattano;  
Niddāyati nisinnova, dīyamānaṃ na jānati.

**1448** Nevāhariyamānaṃ vā, appaṭiggahitameva taṃ;  
Abhogaṃ pana katvā ce, nisinno hoti vaṭṭati.

**1449** Sace hatthena muñcitvā, pattaṃ ādhārakampi vā;  
Pelletvā pana pādena, niddāyati hi vaṭṭati.

**1450** Pādenādhāraṃ akka-mitvāpi paṭigaṇhato;  
Jāgarassāpi hoteva, gahaṇasmim anādaro.

**1451** Tasmā taṃ na ca kātabbaṃ, bhikkhunā vinayaññunā;  
Yaṃ dīyamānaṃ patati, gahetum taṃ tu vaṭṭati.

**1452** Bhuñjantānañca dantā vā, khīyantipi nakhāpi vā;  
Tathā pattassa vaṇṇo vā, abbohāranayo ayaṃ.

**1453** Sattakenuccuādīni, phālentānaṃ sace malaṃ;  
Paññāyati hi taṃ tesu, siyā navasamuṭṭhitaṃ.

- 1454 Paṭiggahetvā taṃ pacchā, khāditabbaṃ tu bhikkhunā;  
Na paññāyati ce tasmim, malaṃ vaṭṭati khādituṃ.
- 1455 Pisantānampi bhesajjaṃ, koṭṭentānampi vā tathā;  
Nisadodukhalādīnaṃ, khīyanepi ayaṃ nayo.
- 1456 Bhesajjatthāya tāpetvā, vāsiṃ khīre khipanti ce;  
Uṭṭheti nīlikā tattha, satthake viya nicchayo.
- 1457 Sace āmakatakke vā, khīre vā pakkhipanti taṃ;  
Sāmapākanimittamhā, na tu muccati dukkaṭā.
- 1458 Piṇḍāya vicarantassa, vassakālesu bhikkhuno;  
Patte patati ce toyam, kiliṭṭhaṃ kāyavatthato.
- 1459 Pacchā paṭiggahetvā taṃ, bhuñjitabbaṃ yathāsukhaṃ;  
Eseva ca nayo vutto, rukkhamūlepi bhuñjato.
- 1460 Sattāhaṃ pana vassante, deve suddhaṃ jalaṃ sace;  
Abbhokāsepi vā patte, toyam patati vaṭṭati.
- 1461 Odanaṃ pana dentena, sāmaṇerassa bhikkhunā;  
Dātabbo acchupantena, tassa pattagatodanaṃ.
- 1462 Paṭiggahetvā vā pattam, dātabbo tassa odano;  
Chupitvā deti ce bhattaṃ, taṃ panuggahitaṃ siyā.
- 1463 Aññaassa dātukāmena, pariccattaṃ sace pana;  
Yāva hatthagataṃ tāva, paṭiggahitameva taṃ.
- 1464 ‘Gaṇhā’ ti nirapekkhova, pattamādhārake ṭhitaṃ;  
Sace vadati pacchā taṃ, paṭiggaṇheyya paṇḍito.
- 1465 Sāpekkhoyeva yo pattam, ṭhapetvādhārake pana;  
‘‘Etto pūvampi bhattaṃ vā, kiñci gaṇhā’’ ti bhāsati.
- 1466 Sāmaṇeropi taṃ bhattaṃ, dhovitvā hatthamattano;  
Attapattagataṃ bhattaṃ, aphisitvā sace pana.
- 1467 Pakkhipanto satakkhattuṃ, uddharitvāpi gaṇhatu;  
Tampaṭiggahaṇe kiccaṃ, puna tassa na vijjati.
- 1468 Attapattagataṃ bhattaṃ, phusitvā yadi gaṇhati;  
Pacchā paṭiggahetabbaṃ, saṃsaṭṭhattā parena taṃ.
- 1469 Bhikkhūnaṃ yāguādīnaṃ, pacane bhājane pana;  
Pakkhipitvā ṭhapentena, aññaassatthāya odanaṃ.
- 1470 Bhājanupari hatthesu, sāmaṇerassa pakkhipe;  
Patitaṃ hatthato tasmim, na karoti akappiyaṃ.
- 1471 Pariccattañhi taṃ evaṃ, akatvākirateva ce;

Bhuñjitabbaṃ tu taṃ katvā, pattaṃ viya nirāmisam.

- 1472 Sace yāgukutaṃ puṇṇaṃ, sāmaṇero hi dubbalo;  
Bhikkhuṃ paṭiggahāpetuṃ, na sakkoti hi taṃ puna.
- 1473 Kuṭassa gīvaṃ pattassa, ṭhapetvā mukhavaṭṭiyam;  
Bhikkhunā upanītassa, āvajjeti hi vaṭṭati.
- 1474 Atha vā bhūmiyaṃyeva, hatthe bhikkhu ṭhabeti ce;  
Āropeti pavaṭṭetvā, tattha ce pana vaṭṭati.
- 1475 Bhattapacchucchubhāresu, ayameva vinicchayo;  
Dve tayo sāmaṇerā vā, denti ce gahaṇūpagaṃ.
- 1476 Bhāramekassa bhikkhussa, gahetuṃ pana vaṭṭati;  
Ekena vā tathā dinnam, gaṇhanti dve tayopi vā.
- 1477 Mañcassa pāde pīṭhassa, pāde telaghaṭādikam;  
Laggenti tattha bhikkhussa, vaṭṭateva nisīdituṃ.
- 1478 Appaṭiggahitaṃ heṭṭhā-mañce ce telathālakaṃ;  
Sammujjanto ca ghaṭṭeti, na panuggahitaṃ siyā.
- 1479 Paṭiggahitasaññāya, appaṭiggahitaṃ pana;  
Gaṇhitvā puna taṃ ñatvā, ṭhabetuṃ tattha vaṭṭati.
- 1480 Vivarivā sace pubbe, ṭhapitaṃ pihitampi ca;  
Tatheva taṃ ṭhabetabbaṃ, kattabbaṃ na panaññathā.
- 1481 Bahi ṭhabeti ce tena, chupitabbaṃ na taṃ puna;  
Yadi chupati ce ñatvā, taṃ panuggahitaṃ siyā.
- 1482 Paṭiggahitatelasmim, uṭṭheti yadi kaṇṇakā;  
Siṅgīverādike mūle, ghanacuṇṇampi vā tathā.
- 1483 Taṃsamuṭṭhānato sabbam, taññevāti pavuccati;  
Paṭiggahaṇakiccaṃ tu, tasmim puna na vijjati.
- 1484 Tālam vā nāḷikeraṃ vā, āruḷho koci puggalo;  
Tatraṭṭho tālapiṇḍim so, otāretvāna rajjuyā.
- 1485 Sace vadati “gaṇhā”ti, na gahetabbameva ca;  
Tamañño pana bhūmaṭṭho, gahetvā deti vaṭṭati.
- 1486 Chinditvā ce vatim ucchuṃ, phalam vā deti gaṇhituṃ;  
Daṇḍake aṃhusitvāva, niggataṃ pana vaṭṭati.
- 1487 Sace na puthulo hoti, pākāro atiuccako;  
Antoṭṭhitabahiṭṭhānam, hatthapāso pahoti ce.
- 1488 Uddham hatthasataṃ gantvā, sampattaṃ puna taṃ pana;  
Gaṇhato bhikkhuno doso, koci nevūpalabbhati.

- 1489 Bhikkhuno sāmaṇeraṃ tu, khandhena vahato sace;  
Phalaṃ gahetvā tattheva, nisinno deti vaṭṭati.
- 1490 Aparopi vahantova, bhikkhuṃ yo koci puggalo;  
Phalaṃ khandhe nisinnassa, bhikkhuno deti vaṭṭati.
- 1491 Gahetvā phaliniṃ sākhaṃ, chāyatthaṃ yadi gacchati;  
Puna citte samuppanne, khādituṃ pana bhikkhuno.
- 1492 Sākhaṃ paṭiggahāpetvā, phalaṃ khādati vaṭṭati;  
Makkhikānaṃ nivāratthaṃ, gahitāpyayaṃ nayo.
- 1493 Kappiyaṃ pana kāretvā, paṭiggaṇhāti taṃ puna;  
Bhottukāmo sace mūla-gahaṇaṃyeva vaṭṭati.
- 1494 Mātāpitūnamatthāya, gahetvā sappiādikaṃ;  
Gacchanto antarāmagge, yaṃ icchati tato pana.
- 1495 Taṃ so paṭiggahāpetvā, paribhuñjati vaṭṭati;  
Taṃ paṭiggahitaṃ mūla-gahaṇaṃyeva vaṭṭati.
- 1496 Sāmaṇerassa pātheyya-taṇḍule bhikkhu gaṇhati;  
Bhikkhussa sāmaṇeropi, gahetvā pana gacchati.
- 1497 Taṇḍulesu hi khīṇesu, attanā gahitesu so;  
Sace yāguṃ pacitvāna, taṇḍulehitarehipi.
- 1498 Ubhinnaṃ dvīsu pottesu, ākiritvā panattano;  
Yāguṃ bhikkhussa taṃ datvā, sayāṃ pivati tassa ce.
- 1499 Sannidhipaccayā neva, na uggahitakāraṇā;  
Sāmaṇerassa pītattā, doso bhikkhussa vijjati.
- 1500 Mātāpitūnamatthāya, telādiṃ haratopi ca;  
Sākhaṃ chāyādiatthāya, imassa na visesatā.
- 1501 Tasmā hissa visesassa, cintetabbaṃ tu kāraṇaṃ;  
Tassa sālayabhāvaṃ tu, visesaṃ takkayāmaṃ.
- 1502 Taṇḍule pana dhovivā, niccāletuñhi celako;  
Na sakkoti sace te ca, taṇḍule bhājanampi ca.
- 1503 Paṭiggahetvā dhovivā, āropetvā panuddhanaṃ;  
Bhikkhunāggi na kātabbo, vivarivāpi pakkatā.
- 1504 Nātabbā pakkakālasmiṃ, oropetvā yathāsukhaṃ;  
Bhuñjitabbaṃ, na pacchassa, paṭiggahaṇakāraṇaṃ.
- 1505 Āropetvā sace bhikkhu, uddhanaṃ suddhabhājanaṃ;  
Udakaṃ yāguatthāya, tāpeti yadi vaṭṭati.
- 1506 Tatte panudake koci, ce pakkhipati taṇḍule;

Tato paṭṭhāya tenaggi, na kātabbova bhikkhunā.

**1507**Paṭiggahetvā taṃ yāguṃ, pātuṃ vaṭṭati bhikkhuno;  
Sace pacati pacchā taṃ, sāmapākā na muccati.

**1508**Tatthajātaphalam kiñci, saha cāleti vallyiā;  
Tasseva ca tato laddham, phalam kiñci na vaṭṭati.

**1509**Phalarukkham parāmaṭṭhum, tamapassayitumpi vā;  
Kaṇṭake bandhītuṃ vāpi, bhikkhuno kira vaṭṭati.

**1510**Ṣaṇḍāsena ca dīghena, gahetvā thālakam pana;  
Pacato bhikkhuno telam, bhasmam patati tattha ce.

**1511**Amuñcanta hatthena, pacivā telathālakam;  
Otāretvāva taṃ pacchā, paṭiggaṇheyya vaṭṭati.

**1512**Paṭiggahetvā aṅgāre, tāni dārūni vā pana;  
Ṭhapitāni sace honti, pubbagāhova vaṭṭati.

**1513**Ucchuṃ khādati ce bhikkhu, sāmaṇeropi icchati;  
“Chinditvā tvamito gaṇha”, iti vutto ca gaṇhati.

**1514**Nattheva avasesassa, paṭiggahaṇakāraṇam;  
Khādato gulapiṇḍampi, ayameva vinicchayo.

**1515**Kātuṃ sāgaratoyena, loṇakiccam tu vaṭṭati;  
Yāvajīvikasaṅkhātam, toyattā na tu gacchati.

**1516**Idam kālavinimuttam, udakam paridīpitam;  
Nibbānam viya nibbāna-kusalena mahesinā.

**1517**Udakena samā vuttā, himassa karakāpi ca;  
Kūpādīsu jalam pātuṃ, bahalampi ca vaṭṭati.

**1518**Khettesu kasitaṭṭhāne, bahalam taṃ na vaṭṭati;  
Sanditvā yadi taṃ gantvā, nadim pūreti vaṭṭati.

**1519**Sobbhesu kakudhādīnam, jale pupphasamākule;  
Na nīyati raso tesam, na paṭiggahaṇakāraṇam.

**1520**Ṣaṇṇukāni pupphāni, pānīyassa ghaṭe pana;  
Pakkhittāni sace honti, paṭiggaṇheyya taṃ pana.

**1521**Paṭiggahetvā deyyāni, vāsapupphāni tattha vā;  
Kamallikāsu dinnāsu, abbohāroti vaṭṭati.

**1522**Appaṭiggahitasseva, dantakaṭṭhassa yo raso;  
Ajānantassa pācitti, so ce visati khādato.

**1523**Ṣarīraṭṭhesu bhūtesu, kiṃ vaṭṭati? Na vaṭṭati?  
Kappākappiyamaṃsānam, khīram sabbampi vaṭṭati.

1524Kaṇṇakkhigūthako danta- malaṃ muttaṃ karīsakaṃ;  
Semhaṃ siṅghāṇikā kheḷo, assu loṇanti vaṭṭati.

1525Yaṃ panettha sakaṭṭhānā, cavitvā patitaṃ siyā;  
Patte vā pana hatthe vā, paṭiggaṇheyya taṃ puna.

1526Aṅgalaggamavicchannaṃ, paṭiggahitameva taṃ;  
Uṇhayāguṃ pivantassa, sedo hatthesu jāyati.

1527Piṇḍāya vicarantassa, sedo hatthānusārato;  
Orohati sace pattaṃ, na paṭiggahaṇakāraṇaṃ.

1528Sāmaṃ gahetvā cattāri, vikaṭāni nadāyake;  
Sappadaṭṭhakkhaṇeyeva, na doso paribhuñjato.

1529Pathaviṃ mattikatthāya, khaṇitaṃ chinditumpi vā;  
Tarumpi chārikatthāya, bhikkhuno pana vaṭṭati.

1530Acchedagāhanirapekkhanisajjato ca;  
Sikkhappahānamaraṇehi ca liṅgabhedā;  
Dānena tassa ca parassa abhikkhukassa;  
Sabbhaṃ paṭiggahaṇameti vināsamevaṃ.

1531Durūpaciṇṇe niddiṭṭhaṃ, gahaṇuggahitassapi;  
Antovutthe sayampakke, antopakke ca dukkaṭaṃ.

1532Paṭiggahitake tasmim, appaṭiggahitasaññino;  
Tattha vematikassāpi, hoti āpatti dukkaṭaṃ.

1533Paṭiggahitasaññissa, dantaponodakesupi;  
Na doseḷakalomena, samuṭṭhānādayo samā.

1534Navamajjhimatherabhikkhunīnaṃ;  
Avisesena yaticchitabbako;  
Sakalo asamāsatova mayā;  
Kathito ettha vinicchayo tato.

Dantaponakathā.

Bhojanavaggo catuttho.

1535Yaṃ kiñcicelakādīnaṃ, titthiyānaṃ panāmisam;  
Dentassekapayogena, ekaṃ pācittiyam siyā.

1536Vicchinditvāna dentassa, payogagaṇanāvasā;  
Honti pācittiyo tassa, tikaṇṇācittiyam siyā.

1537Udakaṃ dantaponam vā, dentassa ca atitthiye;  
Titthiyoti ca saññissa, dukkaṭaṃ vimatissa ca.

1538Dāpentassa panaññena, sāmaṇerādikena vā;  
Nikkhittabhājane tesam, dentassa bahilepanam.

1539Ṭhapetvā bhojanam tesam, santike “gaṇhathā”ti ca;  
Vadantassa anāpatti, samuṭṭhāneḷakūpamaṃ.

Acelakakathā.

1540Dāpetvā vā adāpetvā, bhikkhu yaṃ kiñci āmisam;  
Kattukāmo sace saddhiṃ, hasanādīni itthiyā.

1541Uyyojeti hi “gacchā”ti, vatvā tappaccayā pana;  
Tassuyyojanamattasmim, dukkaṭam paṭhamena ca.

1542Pādenassupacārasmiṃ, atikkante ca dukkaṭam;  
Dutiyenassa pācitti, sīmātikkamane pana.

1543Dassane upacārassa, hatthā dvādasa desitā;  
Pamāṇam savane cevaṃ, ajjhokāse na cetare.

1544Bhikkhusmiṃ tikapācitti, itare tikadukkaṭam;  
Ubhinnaṃ dukkaṭam vuttaṃ, kalisāsanaropane.

1545Uyyojentassa kiccena, na dosummattakādino;  
Adinnādānatulyāva, samuṭṭhānādayo nayā.

Uyyojanakathā.

1546Khuddake piṭṭhivaṃsam yo, atikkamma nisīdati;  
Sabhojane kule tassa, hoti pācitti bhikkhuno.

1547Hatthapāsam atikkamma, piṭṭhisānghāṭakassa ca;  
Sayanassa panāsanne, ṭhāne doso mahallake.

1548Asayanighare tassa, sayanigharasaññino;  
Tattha vematikassāpi, dukkaṭam paridīpitaṃ.

1549Nisīdantassanāpatti, bhikkhussa dutiye sati;  
Vītarāgesu vā tesu, nikkhantesu ubhosu vā.

1550Nisinnassānatikkamma, padesaṃ vuttalakkhaṇam;  
Samuṭṭhānādayo tulyā, paṭhamantimavatthunā.

Sabhojanakathā.

1551Catutthe pañcame ceva, vattabbaṃ natthi kiñcipi;  
Vattabbaṃ yañca taṃ sabbam, vuttaṃ aniyatadvaye.

1552Samuṭṭhānam panetesam, anantarasamaṃ mataṃ;  
Ayameva visesoti, tesamesañca dīpito.

Rahopaticchannarahonisajjakathā.

1553Bhojanānam tu pañcannaṃ, vutto aññatarena yo;



Santaṃ bhikkhumanāpucchā, āpajjeyya kulesu ce.

1554 Cārittaṃ tassa pācitti, aññatra samayā siyā;  
Ṭhapetvā samayaṃ bhikkhu, duvidhaṃ vuttalakkhaṇaṃ.

1555 Avītivatte majjhaṇhe, gharamaññassa gacchati;  
Gharūpacārokkamane, paṭhamena hi dukkaṭaṃ.

1556 Atikkante gharummāre, aparampi ca dukkaṭaṃ;  
Dutiyena ca pādena, pācitti samatikkame.

1557 Ṭhitatṭhāne sace bhikkhuṃ, oloketvā na passati;  
‘‘Asanta’’nti anāpucchā, pavitṭho nāma vuccati.

1558 Sace dūre ṭhito hoti, asanto nāma bhikkhu so;  
Natthi ārocane kiccaṃ, gavesitvā ito cito.

1559 Na doso samaye santaṃ, āpucchitvā ca gacchato;  
Bhikkhuṃ gharena maggo ce, ārāmaṃ gacchatopi ca.

1560 Ṭitthiyānampi seyyaṃ vā, tathā bhikkhunupassayaṃ;  
Āpadāsanasālaṃ vā, bhattiyassa gharampi vā.

1561 Idaṃ pana samuṭṭhānaṃ, kathinena samaṃ mataṃ;  
Kriyākriyamacittaṅca, ticittaṅca tivedanaṃ.

Cārittakathā.

1562 Sabbāpi sādītābbāva, catumāsapavāraṇā;  
Bhikkhunā agilānena, puna nīccapavāraṇā.

1563 ‘‘Viññāpessāmi rogasmiṃ, sati me paccaye’’ti ca;  
Na paṭikkhipitābbā sā, ‘‘rogo dāni na me’’ti ca.

1564 Ṭikapācittiyaṃ vuttaṃ, dukkaṭaṃ natatuttariṃ;  
Tatuttarinti saññissa, tattha vematikassa ca.

1565 Natatuttarisaññissa, yehi yena pavārito;  
Tato aññehi vā bhiyyo, ācikkhitvā yathātathaṃ.

1566 Viññāpentassa bhikkhussa, aññassatthāya vā pana;  
Ñātakānāmanāpatti, attano vā dhanenapi.

1567 Ṭathā ummattakādīnaṃ, anāpatti pakāsītā;  
Samuṭṭhānādayo sabbe, sañcarittasamā matā.

Bhesajjakathā.

1568 Uyyuttaṃ bhikkhuno senaṃ, dassanatthāya gacchato;  
Aññatra paccayā tassa, dukkaṭaṃ tu pade pade.

1569Dassanassupacārasmiṃ, thatvā pācitti passato;  
Upacāraṃ vimuñcivā, passantassa payogato.

1570Ārohā pana cattāro, dve dve taṃpādarakkhā;  
Evaṃ dvādasaposo ca, eko **hatthī** vuccati.

1571Dvepādarakkhā āroho, eko tipurisohayo;  
Eko sārathi yodheko, āṇirakkhā duve janā.

1572Catuposo **ratho** vutto, catusaccavibhāvinā;  
Cattāro padahatthā ca, purisā **pattī** vuccati.

1573Vuttalakkhaṇasampannā, ayaṃ pacchimakotiṃyā;  
Caturāṅgasamāyuttā, senā nāma pavuccati.

1574Hatthiādīsu ekekaṃ, dassanathāya gacchato;  
Anuyyuttepi uyyutta-saññissāpi ca dukkaṭaṃ.

1575Attano ca ṭhitokāsaṃ, sampattaṃ pana passati;  
Āpadāsu anāpatti, tathārūpe ca paccaye.

Uyyuttakathā.

1576Catutthe divase attha-ṅgate sūriye arogavā;  
Sace tiṭṭhatu senāya, nisīdatu nipajjatu.

1577Ākāse iddhiyā seyyaṃ, pakappetu ca iddhimā;  
Hoteva tassa pācitti, tikapācittiyaṃ siyā.

1578Ūnake ca tirattasmiṃ, atirekoti saññino;  
Tattha vematikassāpi, hoti āpatti dukkaṭaṃ.

1579Purāruṇāva nikkhamma, tatiyāya ca rattiya;  
Na doso puna vasantassa, gilānassāpadāsipi.

Senāvāsakathā.

1580Uyyodhikaṃ balaggaṃ vā, senābyūhampi vā pana;  
Dassanathāyanīkaṃ vā, hoti pācitti gacchato.

1581Purime pana yo vutto, ‘‘hatthī dvādasaporiso’’;  
Iti tena tayo hatthī, ‘‘hatthānīka’’nti dīpitaṃ.

1582Sesesupi ca eseva, nayo ñeyyo vibhāvinā;  
Tiṇṇameḷakalomena, samuṭṭhānādayo samā.

Uyyodhikakathā.

Aceḷakavaggo pañcamo.

1583Piṭṭhādīhi kataṃ majjaṃ, **surā** nāmāti vuccati;

Pupphādīhi kato sabbo, āsavo hoti **merayaṃ**.

**1584**Bījato pana paṭṭhāya, pivantassubhayampi ca;  
Payoge ca payoge ca, hoti pācitti bhikkhuno.

**1585**Tikapācittiyaṃ vuttaṃ, amajje majjasaññino;  
Tattha vematikassāpi, hoti āpatti dukkaṭaṃ.

**1586**Amajjaṃ majjavaṇṇaṇca, majjagandharasampi ca;  
Ariṭṭhaṃ loṇasovīraṃ, suttakaṃ pivatopi ca.

**1587**Vāsagāhāpanatthāya, pakkipitvāna īsakam;  
Sūpādīnaṃ tu pākepi, anāpatti pakāsītā.

**1588**Hotelaḥkasamuṭṭhānaṃ, acittaṃ vatthujānaṇā;  
Idaṅcākusaleneva, pānato lokavajjakaṃ.

Surāpānakathā.

**1589**Yena kenaci aṅgena, hasādhippāyino pana;  
Phusato upasampannaṃ, hoti pācitti bhikkhuno.

**1590**Šabbattha dukkaṭaṃ kāya-paṭibaddhādike naye;  
Tathevānupasampanne, dīpitaṃ tikadukkaṭaṃ.

**1591**Ettha cānupasampanna-ṭṭhāne tiṭṭhati bhikkhunī;  
Khidḍādhippāyino tampi, phusantassa ca dukkaṭaṃ.

**1592**Anāpatti nahasādhi-ppāyassa phusato paraṃ;  
Sati kicce phusantassa, tathā ummattakādino.

Aṅgulipatodakakathā.

**1593**Jale nimujjanādīna-matthāya pana kevalaṃ;  
Padavāresu sabbesu, otarantassa dukkaṭaṃ.

**1594**Kīlāpekkho sace hutvā, jale uparigoppake;  
Nimujjeyyapi vā bhikkhu, ummujjeyya tareyya vā.

**1595**Payoge ca payoge ca, tassa pācittiyaṃ siyā;  
Antoyevodake tassa, nimujjitvāna gacchato.

**1596**Hatthapādapayogehi, pācittiṃ paridīpaye;  
Hattheheva tarantassa, hatthavārehi kāraye.

**1597**Yena yena panaṅgena, bhikkhuno tarato jalaṃ;  
Tassa tassa payogena, pācittiṃ paridīpaye.

**1598**Taruto tīrato vāpi, pācitti patato jale;  
Tikapācittiyaṃ vuttaṃ, tatheva tikadukkaṭaṃ.

- 1599Pājentopi sace nāvaṃ, arittena phiyena vā;  
Ussārentopi tīre vā, nāvaṃ kīlati dukkaṭaṃ.
- 1600Hatthena vāpi pādena, kaṭṭhena kathalāya vā;  
Udakaṃ nīharantassa, hoti āpatti dukkaṭaṃ.
- 1601Udakaṃ kañjikaṃ vāpi, cikkhallaṃ vāpi vikkhipaṃ;  
Kīlantassāpi bhikkhussa, hoti āpatti dukkaṭaṃ.
- 1602Vigāhitvā jalaṃ kicce, sati nimmujjanādikaṃ;  
Karontassa anāpatti, tathā pārañca gacchato.
- 1603Samuṭṭhānādayo tulyā, paṭhamantimavatthunā;  
Anantarassimassāpi, natthi kāci visesatā.

Hasadhammakathā.

- 1604Vuccamāno sace bhikkhu, paññatteneva bhikkhunā;  
Akattukāmatāyassa, vacanaṃ dhammameva vā.
- 1605Yo asikkhitukāmo, na karoti panādaraṃ;  
Tassānādariye tasmim, pācittiyamudīraye.
- 1606Tikapācittiyaṃ vuttaṃ, tikātītena satthunā;  
Tathevānupasampannā-nādare tikadukkaṭaṃ.
- 1607Suttenevābhidhammena, apaññattena bhikkhunā;  
Dukkaṭaṃ sāmaṇerena, vuttassa ubhayenapi.
- 1608‘Ācariyānamayaṃ gāho, amhākaṃ tu paveniyā;  
Āgato’’ti bhaṇantassa, na dosummattakādino.
- 1609Ettha neva gahetabbo, gārayhācariyuggaho;  
Omasavādatulyāva, samuṭṭhānādayo nayā.

Anādariyakathā.

- 1610Bhayasañjananatthāya, rūpādiṃ upasaṃhare;  
Bhayānakaṃ kathaṃ vāpi, katheyya parasantike.
- 1611Disvā vā pana taṃ sutvā, mā vā bhāyatu, bhāyatu;  
Itarassa tu bhikkhussa, hoti pācitti taṅkhaṇe.
- 1612Tikapācittiyaṃ vuttaṃ, tatheva tikadukkaṭaṃ;  
Sāmaṇeraṃ gahaṭṭhaṃ vā, bhimsāpentassa bhikkhuno.
- 1613Nabhiṃsāpetukāmassa, anāpattādikammino;  
Samuṭṭhānādi sabbampi, anantarasamaṃ matam.

Bhiṃsāpanakathā.

1614 Jotiṃ tappetukāmo ce, jalāpeyya jaleyya vā;  
Ṭhapetvā hoti pācitti, tathārūpaṃ tu paccayaṃ.

1615 Sayāṃ samādahantassa, yāva jālā na jāyati;  
Tāva sabbapayogesū, hoti āpatti dukkaṭaṃ.

1616 Jāluṭṭhāne panāpatti, pācitti paridīpitā;  
Jālāpentassa aññena, hoti āpatti dukkaṭaṃ.

1617 Gilānassa gilānoti, saññissa vimatissa vā;  
Alātaṃ ukkhipantassa, avijjhātaṃ tu dukkaṭaṃ.

1618 Vijjhātaṃ tujjalantassa, yathāvatthukatā matā;  
Anāpatti gilānassa, kataṃ aññena vā pana.

1619 Visibbentassa aṅgāraṃ, padīpujjālanādike;  
Samuṭṭhānādayo sabbe, sañcarittasamā matā.

Jotisaṃādahanakathā.

1620 Apuñṇe addhamāsasmiṃ, dese ce majjhime pana;  
“Nhāyissāmī”ti cuññaṃ vā, mattikaṃ vāpi gomayaṃ.

1621 Abhisankharato sabba-payogesupī dukkaṭaṃ;  
Nhānassa pariyoṣāne, hoti pācitti bhikkhuno.

1622 Atirekaddhamāsūna-saññino vimatissa vā;  
Dukkaṭaṃ atirekaddha- māse ca samayesu ca.

1623 Nhāyantassa anāpatti, nadīpārampi gacchato;  
Vālikaṃ ukkiritvāna, katāvāṭesu vā tathā.

1624 Paccantimepi vā dese, sabbesaṃ āpadāsupī;  
Idameḷakalomena, samuṭṭhānādinā samaṃ.

Nhānakathā.

1625 Cīvaraṃ yaṃ nivāsetuṃ, sakkā pārupitumpi vā;  
Channamaññātaraṃ bhikkhu, rajitvā yattha katthaci.

1626 Padese kaṃsanīlena, pattanīlena vā pana;  
Yena kenaci kāḷena, kaddamenapi vā tathā.

1627 Maṅgulassa mayūrassa, piṭṭhiakhippamāṇakaṃ;  
Akatvā kappiyaṃ binduṃ, pācitti paribhuñjato.

1628 Pāḷikaṇṇikakappo vā, na ca vaṭṭati katthaci;  
Ekaṃ vāpi anekaṃ vā, bindu vaṭṭati vaṭṭakaṃ.

1629 Ādinnepi anādinna-saññino vimatissa ca;  
Dukkaṭaṃ muninā vuttaṃ, anāpatti pakāsītā.

1630 Kappo naṭṭhepi vā saddhiṃ, tena saṃsibbitesu vā;  
Kriyākriyamidaṃ vuttaṃ, samuṭṭhāneḷakūpamaṃ.

Dubbaṇṇakaraṇakathā.

1631 Vikappanā duve vuttā, sammukhāsammukhātipi;  
Sammukhāya vikappento, bhikkhussekassa santike.

1632 Ekattaṃ bahubhāvaṃ vā, dūrasantikataṃpi vā;  
Cīvarānaṃ tu jānitvā, yathāvacanayogato.

1633: ‘Imāhaṃ cīvaraṃ tuyhaṃ, vikappemī’ ti niddise;  
Kappatettāvataṃ kāmaṃ, nidhetuṃ, na ca kappati.

1634 Paribhogādikaṃ tena, apaccuddhaṭato pana;  
Tena paccuddhaṭeṃeva, paribhogādi vaṭṭati.

1635: ‘Santakaṃ pana mayhaṃ tvaṃ, paribhuñja pariccaja;  
Yathāpaccayaṃ karohī’ ti, vutte paccuddhaṭaṃ siyā.

1636 Aparā sammukhā vuttā, bhikkhussekassa santike;  
Yassa kassaci nāmaṃ tu, gahetvā sahadhammināṃ.

1637: ‘Imāhaṃ cīvaraṃ tissa- bhikkhuno, tissatheriyā;  
Vikappemī’ ti vattaḃbaṃ, vattaḃbaṃ puna tenapi.

1638: ‘Tissassa bhikkhuno vā tvaṃ, tassā tissāya theriyā;  
Santakaṃ paribhuñjāhi, vissajjehī’ ti vā tathā.

1639 Tato pabhuti sabbampi, paribhogādi vaṭṭati;  
Evaṃ parammukhāyāpi, vattaḃbaṃ ekasantike.

1640: ‘Imāhaṃ cīvaraṃ tuyhaṃ, vikappatthāya dammi’ ti;  
Puna tenapi vattaḃbaṃ, ‘ko te mitto’ ti bhikkhunā.

1641 Itarenapi vattaḃbaṃ, ‘tisso tissā’ ti vā puna;  
Vattaḃbaṃ bhikkhunā tena, ‘idaṃ tissassa santakaṃ.

1642 Tissāya theriyā vā tvaṃ, santakaṃ paribhuñja vā;  
Vissajjehī’ ti vā vutte, hoti paccuddhaṭaṃ puna.

1643 Icchetāsu pana dvīsu, yāya kāyaci cīvaraṃ;  
Vikappetvā sadhammesu, yassa kassaci pañcasu.

1644 Apaccuddhāraṃ vāpi, avissāsenā tassa vā;  
Yena taṃ vinayaṃ kammaṃ, kataṃ panidha bhikkhunā.

1645 Cīvaraṃ paribhuñjeyya, hoti pācitti bhikkhuno;  
Tañcevaḍhiṭṭhahantassa, vissajjantassa dukkaṭaṃ.

1646 Paccuddhāraṃ kavatthesu, apaccuddhārasaññino;  
Tattha vematikassāpi, hoti āpatti dukkaṭaṃ.

1647 Paccuddhāraṇasaññissa, vissāsā paribhuñjato;  
Anāpatti samuṭṭhānaṃ, kathinenādinā samaṃ.

Vikappanakathā.

1648 Adhiṭṭhānupagaṃ pattamaṃ, cīvaraṃ vāpi tādisamaṃ;  
Tathā sūciḡharaṃ kāya-bandhanaṃ vā nisīdanaṃ.

1649 Apanetvā nidhentassa, hasāpekkhassa kevalamaṃ;  
Hoti pācittiyamaṃ aññaṃ, āṇāpentassa dukkaṭamaṃ.

1650 Tenāpanihite tassa, pācittimaṃ paridīpaye;  
Vuttaṃ anupasampanna-santake tikadukkaṭamaṃ.

1651 Vinā vuttappakārāni, pattādīni tato pana;  
Aññaṃ apanidhentassa, hoti āpatti dukkaṭamaṃ.

1652 Sabbesvanupasampanna-santakesupi dukkaṭamaṃ;  
Dunnikkhittamanāpatti, paṭisāmayato pana.

1653 Tathā ‘‘dhammakathaṃ katvā, dassāmī’’ti nidheti ce;  
Avihesetukāmassa, akīḷassādikammino.

1654 Samuṭṭhānādayo tulyā, dutiyantimavatthunā;  
Idaṃ akusaleneva, sacittañca tivedanaṃ.

Cīvarāpanidhānakathā.

Surāpānavaggo chaṭṭho.

1655 Tiracchānagataṃ pāṇamaṃ, mahantaṃ khuddakampi vā;  
Hoti pācittiyāpatti, mārentassassa bhikkhuno.

1656 Appāṇe pāṇasaññissa, vimatissubhayattha ca;  
Dukkaṭamaṃ tu anāpatti, asañcicca ajānato.

1657 Na ca māretukāmassa, tathā ummattakādino;  
Samuṭṭhānādayo tulyā, tatiyantimavatthunā.

Sañciccaṇānakathā.

1658 Sappāṇakaṃ jalaṃ jānaṃ, pācitti paribhuñjato;  
Payogabahutāyassa, pācittibahutā siyā.

1659 Ekeneva payogena, avicchijja sace pana;  
Pivato pattapūrampi, ekaṃ pācittiyamaṃ siyā.

1660 Tādisenuakenassa, āviñchitvāna sāmisaṃ;  
Dhovato pana pattamaṃ vā, nibbāpentassa yāguyo.

1661 Hatthena taṃ uḷuṅkena, gahetvā nhāyatopi vā;

Payoge ca payoge ca, pācitti paridīpitā.

**1662** Appāṇakepi sappāṇa-saññissa ubhayatthapi;  
Vimatissāpi bhikkhussa, hoti āpatti dukkaṭaṃ.

**1663** Sappāṇepi ca appāṇe, appāṇamiti saññino;  
Na doso ‘‘paribhogena, na marantī’’ti jānato.

**1664** Patanaṃ salabhādīnaṃ, ñatvā suddhena cetasā;  
Padīpujjalanañcetta, ñatvā sappāṇabhāvaṃ.

**1665** Bhuñjato jalasaññāya, ñeyyā paṇṇattivajjatā;  
Siñcane siñcanaṃ vuttaṃ, paribhoge idaṃ pana.

**1666** Ayameva visesoti, tassa ceva panassa ca;  
Adinnādānatulyāva, samuṭṭhānādayo nayā.

Sappāṇakakathā.

**1667** Nihataṃ tu yathādhammaṃ, kiccādhikaraṇaṃ puna;  
Nihātabbanti pācitti, ukkoṭentassa bhikkhuno.

**1668** ‘‘Akataṃ dukkataṃ kammaṃ, kātabbaṃ punadevi’’ti;  
Vadatā pana taṃ kammaṃ, uccāletuṃ na vaṭṭati.

**1669** Sace vippakate kamme, paṭikkosati taṃ puna;  
Saññāpetvāva kātabbaṃ, na kātabbaṃ panaññathā.

**1670** Adhamme pana kammaṃ, dhammakammanti saññino;  
Vimatissubhayatthāpi, hoti āpatti dukkaṭaṃ.

**1671** ‘‘Adhammena ca vaggena, na ca kammārahassa vā;  
Kata’’nti jānato natthi, doso ukkoṭane pana.

**1672** Tathā ummattakādīna-manāpatti pakāsītā;  
Omasavādatulyāva, samuṭṭhānādayo nayā.

Ukkoṭanakathā.

**1673** Saṅghādisesaṃ duṭṭhullaṃ, āpattiṃ bhikkhuno pana;  
Ñatvā chādayato tassa, pācitti pariyāputā.

**1674** Nikkhipitvā dhuraṃ tassa, paṭicchādanahetukaṃ;  
Āroceti sacaññassa, sopi aññassa vāti hi.

**1675** Evaṃ satampi bhikkhūnaṃ, sahasampi ca tāva taṃ;  
Āpajjateva āpattiṃ, yāva koṭi na chijjati.

**1676** Mūlenārocitasseva, dutiyassa pakāsīte;  
Tatiyena nivattitvā, koṭi chinnāti vuccati.



- 1677 Duṭṭhullāya ca duṭṭhalla-saññī pācittiyaṃ phuse;  
Itaresu pana dvīsu, dukkaṭaṃ paridīpitaṃ.
- 1678 Aduṭṭhullāya sabbattha, niddiṭṭhaṃ tikadukkaṭaṃ;  
Sabbatthānupasampanna-vāresupi ca dukkaṭaṃ.
- 1679: ‘Saṅghassa bhedanādīni, bhavissantī’ ti vā pana;  
Na ca chādetukāmo vā, sabhāgaṃ vā na passati.
- 1680: ‘Paññāyissati kammena, sakenāyanti kakkhaḷo’;  
Anāroceti ce doso, natthi ummattakādino.
- 1681 Dhuranikkhepatulyāva, samuṭṭhānādayo nayā;  
Kāyakammaṃ vacīkammaṃ, akriyaṃ dukkhavedanaṃ.

Duṭṭhullakathā.

- 1682 Ūnavāsativassaṃ yo, kareyya upasampadaṃ;  
Tassa pācittiyaṃ hoti, sesānaṃ hoti dukkaṭaṃ.
- 1683 Upasampādito ceso, jānatā vā ajānatā;  
Hotevānupasampanno, kātabbo punareva so.
- 1684 Dasavassaccayenassa, upajjhāyassa ce sato;  
Upasampādane doso, aññesaṃ natthi kocipi.
- 1685 Muñcitvā pana taṃ bhikkhuṃ, gaṇo ce paripūrati;  
Honti te sūpasampannā, na doso koci vijjati.
- 1686 Upajjhāyo sace hutvā, gaṇaṃ ācariyampi vā;  
Pariyesati pattaṃ vā, sammannati ca māḷakaṃ.
- 1687: ‘Upasampādayissāmi’ , iti sabbesu tassa hi;  
Nattiyā ca tathā dvīsu, kammavācāsu dukkaṭaṃ.
- 1688 Kammavācāya osāne, pācitti paridīpitā;  
Ūnavāsatisaññissa, paripuṇṇepi puggale.
- 1689 Vimatissubhayatthāpi, hoti āpatti dukkaṭaṃ;  
Paripuṇṇoti saññissa, ubhayattha na dosatā.
- 1690 Tathā ummattakassāpi, ādikammikabhikkhuno;  
Adinnādānatulyāva, samuṭṭhānādayo nayā.

Ūnavāsatikathā.

- 1691 Theyyasatthena jānanto, saṃvidhāya sace pana;  
Maggāṃ gacchati saddhiṃ yo, tassa pācittiyaṃ siyā.
- 1692 Gamane saṃvidhāne ca, vattabbo yo vinicchayo;  
So ca **bhikkhunivaggasmim**, vuttattā na ca uddhaṭo.

1693 Maggātavivisaṅkete, yathāvatthukameva tu;  
Tesvasaṃvidahantesu, sayamaṃ vidahatopi ca.

1694 Tathevātheyyasattheṇi, theyyasatthanti saññino;  
Vimattissubhayatthāpi, hoti āpatti dukkaṭaṃ.

1695 Atheyyasatthasaññissa, asaṃvidahatopi ca;  
Āpadāsu anāpatti, visaṅkete ca kālike.

1696 Theyyasatthasamuṭṭhānaṃ, kathitaṃ kāyacittato;  
Kāyavācācittato ca, ticittaṅca tivedanaṃ.

Theyyasatthakathā.

1697 Hoti bhikkhuniyā saddhiṃ, saṃvidhānena sattamaṃ;  
Samuṭṭhānādīnā tulyaṃ, vireso natthi kocipi.

Saṃvidhānakathā.

1698 Kammaṃ kilesa pāko ca, upavādo atikkamo;  
Antarāyakaṃ ete, pañca dhammā pakāsita.

1699 ‘Anantarāyikā ete, yathā honti tathā ahaṃ;  
Desitaṃ muninā dhamma-mājanāmi’ ti yo vade.

1700 Tikkhattamaṃ tehi vattabbo, ye passanti suṇanti ca;  
‘Mā hevaṃ avacāyasmā’, iti bhikkhūhi so pana.

1701 Dukkaṭaṃ avadantassa, taṃ anissajato ca;  
Ñattiyā ca tathā dvīhi, kammavācāhi dukkaṭaṃ.

1702 Kammavācāya osāne, pācitti paridīpita;  
Tikapācittiyamaṃ vuttaṃ, adhamme tikadukkaṭaṃ.

1703 Nāpattākatakammaṃ, paṇinissajato ca;  
Samuṭṭhānādayo sabbe, vuttā samanubhāsane

Ariṭṭhakathā.

1704 Ñatvākatānudhammena, tathāvādīkabhikkhunā;  
Saṃvaseyya ca bhūñjeyya, pācitti saha seyya vā.

1705 Uposathādikaṃ kammaṃ, karoto saha tena hi;  
Kammaṃ pariyosāne, tassa pācittiyamaṃ siyā.

1706 Ekeneva payogena, gaṇhato āmisamaṃ bahumaṃ;  
Dadato tathā ekaṃ, bahūni ca bahūsvapi.

1707 Ukkhittake nipannasmiṃ, itaro seti ce pana;  
Itarasmaṃ nipanne vā, paro seti ubhopi vā.

1708 Nipajjanapayogānaṃ, vasenāpattiyo siyuṃ;  
Ekanānūpacāresu, ekacchanne vinicchayo.

1709 Anukkhittepi ukkhitta-saññino pana bhikkhuno;  
Vimatissubhayatthāpi, dukkaṭaṃ paridīpitaṃ.

1710 Anāpattubhayatthāpi, anukkhittakasaññino;  
Nissaṭṭhoti ca taṃ diṭṭhiṃ, saññissosāritoti ca.

1711 Tathā ummattakādīnaṃ, idaṃ paṇṇattivajjakam;  
Adinnādānatulyāva, samuṭṭhānādayo nayā.

Ukkhittakathā.

1712 Tathā vināsitaṃ jānaṃ, upalāpeyya tena vā;  
Upaṭṭhāpeyya pācitti, sambhuñjeyya vaseyya vā.

1713 Saṃvāseṇa ca liṅgena, daṇḍakammena nāsanā;  
Tisso ettha adhippetā, daṇḍakammena nāsanā.

1714 Sambhogā sahaseyyā ca, anantarasamā matā;  
Tattha vuttanayeneva, veditabbo vinicchayo.

1715 Samuṭṭhānādayo sabbe, ariṭṭhena samā matā;  
Na hettha kiñci vattabbaṃ, sabbaṃ uttānamevidaṃ.

Kaṇṭakakathā.

Sappāṇakavaggo sattamo.

1716 Vuccamāno hi bhikkhūhi, bhikkhu sikkhāpadena yo;  
“Sikkhāpade panetasmim, na sikkhissāmi tāvahaṃ.

1717 Yāva nāññaṃ viyattañca, pakataññaṃ bahussutaṃ;  
Pucchāmī”ti bhaṇantassa, tassa pācittiyaṃ siyā.

1718 Satthunānupasampanne, dīpitaṃ tikadukkaṭaṃ;  
Na sallekhāyidaṃ hoti, vuccamānassubhohipi.

1719 Apaññattena tassevaṃ, vadato hoti dukkaṭaṃ;  
Na dosummattakādīnaṃ, “sikkhissāmi”ti bhāsato.

Sahadhammikakathā.

1720 Uddiṭṭhehi kimeteḥi, kukkucādinidānato;  
Hoti pācittiyāpatti, sikkhāpadavivaṇṇane.

1721 Tikapācittiyaṃ vuttaṃ, tatheva tikadukkaṭaṃ;  
Vivaṇṇenupasampanna-santike taṃ sace pana.

1722 Dukkaṭaṃ panubhinnaṃpi, aññadhammavivaṇṇane;

Navivaṇṇetukāmassa, “suttantaṃ pariyāpuṇa.

**1723** Vinayaṃ pana pacchāpi, handa pariyāpuṇissasi”;  
Iccevamaṃ tu vadantassa, tathā ummattakādino.

**1724** Anāpattīti nātabbaṃ, samuṭṭhānādayo nayā;  
Anantarassimassāpi, omasavādasādisā.

Vilekhanakathā.

**1725** Aññāṇena panāpatti, makkho nevasa vijjati;  
Kāretabbo tathā bhikkhu, yathā dhammo ṭhito pana.

**1726** Tassāropaniyo moho, uttarimpi hi bhikkhuno;  
Dutiyeneva kamma, nindivā tañhi puggalaṃ.

**1727** Evaṃ āropite mohe, yadi moheti yo pana;  
Tasmiṃ mohanake vuttā, pācitti pana puggale.

**1728** Adhamme pana kammaṃ, dīpitaṃ tikadukkaṃ;  
Tathānāropite mohe, dukkaṃ parikittitaṃ.

**1729** Na ca mohetukāmassa, vitthārenāsutassapi;  
Ūnake dvattikkhattuṃ vā, vitthārenāsutassa ca.

**1730** Anāpattīti viññeyyaṃ, tathā ummattakādino;  
Samuṭṭhānādayo sabbe, anantarasamā matā.

Mohanakathā.

**1731** Kuddho deti pahāraṃ ce, tassa pācittiyaṃ siyā;  
Sampaharitukāmena, pahāre bhikkhuno pana.

**1732** Dinne bhijjatu sīsaṃ vā, pādo vā paribhijjatu;  
So ce maratu vā, mā vā, pācitti paridīpita.

**1733** Virūpakaraṇāpekkho, “iccāyaṃ na virocati”;  
Kaṇṇaṃ vā tassa nāsaṃ vā, yadi chindati dukkaṃ.

**1734** Tathēvānupasampanne, itthiyā purisassa vā;  
Tiracchānagatassāpi, pahāraṃ deti dukkaṃ.

**1735** Sace paharatitthiṇca, bhikkhu rattena cetasā;  
Garukā tassa āpatti, viniddiṭṭhā mahesinā.

**1736** Pahāraṃ deti makkhādhi-ppāyo doso na vijjati;  
Kāyena kāyabaddhena, tathā nissaggiyena vā.

**1737** Passivā antarāmagge, coraṃ paccatthikampi vā;  
Heṭhetukāmamāyantaṃ, “mā idhāgacchupāsaka”.

1738Iti vatvā panāyantam, ‘‘gaccha re’’ti ca muggaram;  
Sattham vāpi gahetvā vā, paharitvā tu yāti ce.

1739Anāpatti sace tena, pahārena matepi ca;  
Eseva ca nayo vutto, dhuttavālamigesupi.

1740Tikapācittiyam vuttam, sese ca tikadukkaṭam;  
Kāyacittasamuṭṭhānam, sacittam dukkhavedanam.

Pahārakathā.

1741Kāyam vā kāyabaddham vā, uccāreyya sace pana;  
Hoti pācittiyāpatti, tassuggiraṇapaccayā.

1742Uggiritvā viraddho so, pahāram deti ce pana;  
Asampaharitukāmena, dinnattā dukkaṭam siyā.

1743Sace tena pahārena, pahaṭassa ca bhikkhuno;  
Hatthādīsipi yaṃ kiñci, aṅgam bhijjati dukkaṭam.

1744Seso anantare vutta-nayena vinayaññunā;  
Samuṭṭhānādīnā saddhiṃ, veditabbo vinicchayo.

Talasattikathā.

1745Amūlakena saṅghādi-sesena pana bhikkhu yo;  
Codāpeyyapi codeyya, tassa pācittiyam siyā.

1746Tikapācittiyam tattha, diṭṭhācāravipattiyā;  
Codato dukkaṭāpatti, sese ca tikadukkaṭam.

1747Tathāsaññissanāpatti, tathā ummattakādino;  
Omasavādatulyāva, samuṭṭhānādayo nayā.

Amūlakakathā.

1748Sañcicca pana kukkucam, uppādentassa bhikkhuno;  
‘‘Ūnavīsativasso tvam, maññe’’ iccevamādīnā.

1749Hoti vācāya vācāya, pācitti pana bhikkhuno;  
Tathārūpe panaññasmiṃ, sace asati paccaye.

1750Tikapācittiyam vuttam, sese ca tikadukkaṭam;  
Nauppādetukāmassa, kukkucam natthi vajjatā.

1751:‘‘Hitesitāyahaṃ maññe, nisinnam itthiyā saha;  
Vikāle ca tayā bhuttam, mā eva’’nti ca bhāsato.

1752Tathā ummattakādīna-manāpatti pakāsītā;  
Samuṭṭhānādayo sabbe, anantarasamā matā.

## Sañciccakathā.

- 1753 Sace bhaṇḍanaajātānaṃ, bhikkhūnaṃ pana bhikkhu yo;  
Tiṭṭheyyupassutiṃ sotuṃ, tassa pācittiyaṃ siyā.
- 1754 ‘Yaṃ ime tu bhaṇissanti, taṃ sossāmī’ ti gacchato;  
Codetukāmatāyassa, dukkaṭaṃ tu pade pade.
- 1755 Purato gacchato sotuṃ, ohīyantassa dukkaṭaṃ;  
Gacchato turitaṃ vāpī, ayameva vinicchayo.
- 1756 Ṭhitokāsaṃ panāgantvā, yadi mantenti attano;  
Ukkāsivāpī vā ettha, ñāpetabbamahanti vā.
- 1757 Tassevamakarontassa, pācitti savane siyā;  
Tikapācittiyaṃ vuttaṃ, sese ca tikadukkaṭaṃ.
- 1758 ‘Imesaṃ vacanaṃ sutvā, oramissa’ nti gacchato;  
Tathā ummattakādīna-manāpatti pakāsītā.
- 1759 Theyyasatthasamuṭṭhānaṃ, idaṃ hoti kriyākriyaṃ;  
Kāyakammaṃ vacīkammaṃ, sadosaṃ dukkhavedanaṃ.

## Upassutikathā.

- 1760 Dhammikānaṃ tu kammānaṃ, chandaṃ datvā sace pana;  
Pacchā khīyati pācitti, vācato vācato siyā.
- 1761 Adhamme pana kammaṃ, dhammakammanti saññino;  
Vimatissubhayatthāpī, hoti āpatti dukkaṭaṃ.
- 1762 ‘Adhammena ca vaggena, tathākammārahassa ca;  
Ime kammaṃ karontī’ ti, ñatvā khīyati tassa ca.
- 1763 Tathā ummattakādīna-manāpatti pakāsītā;  
Amūlakasamānāva, samuṭṭhānādayo nayā.

## Kammaṭṭibāhanakathā.

- 1764 Yāva ārocitaṃ vatthu, avinicchitameva vā;  
Ṭhapitā ñatti vā niṭṭhaṃ, kammavācā na gacchati.
- 1765 Etasmiṃ antare kammaṃ, kopetuṃ parisāya hi;  
Hatthapāsaṃ jahantassa, hoti āpatti dukkaṭaṃ.
- 1766 Adatvā jahite chandaṃ, tassa pācittiyaṃ siyā;  
Dhammakamme adhamme ca, vimatissa ca dukkaṭaṃ.
- 1767 Adhammepi ca kammaṃ, dhammakammanti saññino;  
‘Saṅghassa bhaṇḍanādīni, bhavissantī’ ti saññino.

1768 Gilāno vā gilānassa, karaṇīye na dosatā;  
Na ca kopetukāmassa, kammaṃ passāvanādinā.

1769 Pīlitassāgamissāmi, iccevaṃ gacchatopi vā;  
Samaṃ samanubhāseṇa, samuṭṭhānaṃ kriyākriyaṃ.

Chandaṃ adatvā gamanakathā.

1770 Samaggena ca saṅghena, saddhiṃ datvāna cīvaram;  
Sammatassa hi bhikkhussa, pacchā khīyati yo pana.

1771 Tassa vācāya vācāya, pācitti paridīpitā;  
Tikapācittiyaṃ dhamma- kamme vuttaṃ tu cīvaram.

1772 Thapetvāññaparikkhāraṃ, datvā khīyati dukkaṭaṃ;  
Saṅghenāsammatassāpi, cīvaram aññameva vā.

1773 Tathevānupasampanne, sabbatthāpi ca dukkaṭaṃ;  
Chandādīnaṃ vaseneva, karontaṇca sabhāvato.

1774 Khīyantassa anāpatti, tathā ummattakādino;  
Amūlakasamā ñeyyā, samuṭṭhānādayo nayā.

Dubbalakathā.

1775 Iḍaṃ tiṃsakakaṇḍasmiṃ, antimena ca sabbathā;  
Tulyaṃ dvādasamaṃ sabbaṃ, ayameva visesatā.

1776 Tattha nissaggiyaṃ vuttaṃ, attano pariṇāmanā;  
Idha suddhikapācitti, puggale pariṇāmanā.

Pariṇāmanakathā.

Sahadhammikavaggo aṭṭhamo.

1777 Anikkhante ce rājasmiṃ, anikkhantāya deviyā;  
Sayanīyagharā tassa, ummāraṃ yo atikkame.

1778 Dukkaṭaṃ paṭhame pāde, pācitti dutiye siyā;  
Deviyā vāpi rañño vā, sace na veditāgamo.

1779 Paṭisaṃvidite neva-paṭisaṃviditasaññino;  
Tattha vematikassāpi, dukkaṭaṃ paridīpitaṃ.

1780 Paṭisaṃviditasaññissa, neva ca khattiyassa vā;  
Na khattiyābhisekena, abhisittassa vā pana.

1781 Ubhosubhinnamaññasmiṃ, nikkhante visatopi vā;  
Na dosummattakādīnaṃ, kathinena kriyākriyaṃ.

Antepurakathā.

- 1782 Rajataṃ jātarūpaṃ vā, uggaṇhantassa attano;  
Tassa nissaggiyāpatti, uggaṇhāpayatopi vā.
- 1783 Gaṇapuggalasaṅghānaṃ, navakammassa cetiye;  
Uggaṇhāpayato hoti, dukkaṭaṃ gaṇhatopi vā.
- 1784 Avasesaṇca muttādi-ratanaṃ attanopi vā;  
Saṅghādīnampi atthāya, uggaṇhantassa dukkaṭaṃ.
- 1785 Sace kappiyavattuṃ vā, vatthuṃ vāpi akappiyaṃ;  
Tālapaṇṇampi vā hotu, mātukaṇṇapilandhanaṃ.
- 1786 Bhaṇḍāgārikasīsena, yaṃ kiñci gihisantakaṃ;  
Tassa pācittiyāpatti, paṭisāmayato pana.
- 1787: ‘Idaṃ ṭhapetvā dehī’ ti, vuttena pana kenaci;  
‘Na vaṭṭatī’ ti vatvā taṃ, na nidhetabbameva tu.
- 1788: ‘Ṭhapehī’ ti ca pātetvā, sace gacchati puggalo;  
Palibodho hi nāmeso, ṭhapetuṃ pana vaṭṭati.
- 1789 Anuññāte panaṭṭhāne, uggahetvā anādarā;  
Sammā anikkhipantassa, hoti āpatti dukkaṭaṃ.
- 1790 Anuññāte panaṭṭhāne, gahetvā ratanaṃ pana;  
Nikkhipantassa vā sammā, bhaṇḍaṃ ratanasammatam.
- 1791 Gaṇhantassa ca vissāsaṃ, tāvakālikameva ca;  
Na dosummattakādīnaṃ, sañcarittasamodayaṃ.
- Ratanakathā.
- 1792 Majjhaṇhasamayā uddhaṃ, aruṇuggamato pure;  
Etasmiṃ antare kālo, vikāloti pavuccati.
- 1793 Santaṃ bhikkhumanāpucchā, vikāle paccayaṃ vinā;  
Parikkhittassa gāmassa, parikkhepukkame pana.
- 1794 Aparikkhittagāmassa, upacārokkamepi vā;  
Dukkaṭaṃ paṭhame pāde, pācitti dutiye siyā.
- 1795 Atha sambahulā gāmaṃ, vikāle pavisanti ce;  
Āpucchitvāva gantabbaṃ, aññamaññaṃ na caññathā.
- 1796 Gacchanti ce tato aññaṃ, tato aññanti vaṭṭati;  
Puna āpucchane kiccaṃ, natthi gāmasatepi ca.
- 1797 Passambhetvāna ussāhaṃ, vihāratthāya niggatā;  
Pavisanti sace aññaṃ, pucchitabbaṃ tu antarā.
- 1798 Katvā kulaghare bhatta- kiccaṃ aññattha vā pana;  
Sace caritukāmo yo, sappibhikkhāya vā siyā.



1799Āpucchitvāva gantabbaṃ, passe ce bhikkhu labbhati;  
Asante pana natthīti, gantabbaṃ tu yathāsukhaṃ.

1800Otaritvā mahāvīthiṃ, bhikkhuṃ yadi ca passati;  
Natthi āpucchane kiccaṃ, caritabbaṃ yathāsukhaṃ.

1801Gāmamajjhena maggena, gacchantasseva bhikkhuno;  
“Carissāmī”ti uppanne, telabhikkhāya mānase.

1802Āpucchitvāva gantabbaṃ, passe ce bhikkhu vijjati;  
Anokkamma carantassa, maggā āpucchanaena kiṃ?

1803Tikapācittiyaṃ, kāle, vikāloyanti saññino;  
Kāle vematikassāpi, hoti āpatti dukkaṭaṃ.

1804Āpucchitvāva santaṃ vā, anāpucchā asantakaṃ;  
Kicce accāyike vāpi, pavisantassa bhikkhuno.

1805Gacchato antarārāmaṃ, bhikkhunīnaṃ upassayaṃ;  
Tathā āsanasālaṃ vā, tithiyānaṃ upassayaṃ.

1806Siyā gāmena maggo ce, anāpattāpadāsupi;  
Samuṭṭhānādayo sabbe, kathinena samā matā.

1807Na kevalamanāpucchā, abandhitvā ca bandhanaṃ;  
Apārupitvā saṅghāṭiṃ, gacchatopinavajjātā.

Vikālagāmappavesanakathā.

1808Aṭṭhidantamayaṃ sūci-gharaṃ vāpi visāṇajaṃ;  
Kārāpane ca karaṇe, bhikkhuno hoti dukkaṭaṃ.

1809Lābhe bhedanakaṃ tassa, pācittiyamudīritaṃ;  
Aññassatthāya karaṇe, tathā kārāpanepi ca.

1810Aññena ca kataṃ laddhā, dukkaṭaṃ paribhuñjato;  
Anāpattāraṇike vidhe, gaṇṭhikañjanikāsupi.

1811Dakapuñchaniyā vāsi-jaṭe ummattakādino;  
Samuṭṭhānādayo nayā, sañcarittasamā matā.

Sūciharakathā.

1812Navaṃ mañcampi pīṭhaṃ vā, kārāpentena bhikkhunā;  
Aṭṭhaṅgulappamaṇena, sugataṅgulato pana.

1813Kārāpetabbamevaṃ tu, ṭhapetvā heṭṭhimāṭaniṃ;  
Sacchedā tassa pācitti, tamatikkamato siyā.

1814Aññassatthāya karaṇe, tathā kārāpanepi ca;  
Aññena ca kataṃ laddhā, dukkaṭaṃ paribhuñjato.

**1815**Anāpatti pamāṇena, karontassappamāṇikaṃ;  
Labhitvā tassa pādesu, chinditvā paribhuñjato.

**1816**Ñeva chinditukāmo ce, nikhaṇitvā pamāṇato;  
Uttānaṃ vāpi aṭṭaṃ vā, bandhitvā paribhuñjato.

Mañcakathā.

**1817**Mañcaṃ vā pana pīṭhaṃ vā, tūlonaddhaṃ kareyya yo;  
Tassuddālanakaṃ vuttaṃ, pācittiyamanīṭinā.

**1818**Anāpatti panāyoge, bandhane aṃsabaddhake;  
Bibbohane parissāve, thavikādīsu bhikkhuno.

**1819**Aññaena ca kataṃ laddhā, uddāletvā nisevato;  
Anantarassimassāpi, sañcarittasamā nayā.

Tūlonaddhakathā.

**1820**Ñisīdanaṃ karontena, kātabbaṃ tu pamāṇato;  
Pamāṇāṭikkame tassa, payoge dukkaṭaṃ siyā.

**1821**Paṭilābhena sacchedaṃ, pācittiyamudīritaṃ;  
Dvīsu ṭhānesu phāletvā, tassa tisso dasā siyuṃ.

**1822**Anāpatti pamāṇena, karontassa tadūnakaṃ;  
Vitānādiṃ karontassa, sañcarittasamā nayā.

Nisīdanakathā.

**1823**Roge kaṇḍupaṭicchādi, kātabbā hi pamāṇato;  
Pamāṇāṭikkame tassa, payoge dukkaṭaṃ siyā.

**1824**Paṭilābhena sacchedaṃ, pācittiyamudīritaṃ;  
Anāpattinayopettha, anantarasamo mato.

Kaṇḍupaṭicchādikathā.

**1825**Pamāṇeneva kātabbā, tathā vassikasāṭikā;  
Pamāṇāṭikkame tassa, anantarasamo nayo.

Vassikasāṭikakathā.

**1826**Cīvarena sace tulya-ppamāṇaṃ sugatassa tu;  
Cīvaraṃ bhikkhu kāreyya, karaṇe dukkaṭaṃ siyā.

**1827**Paṭilābhena sacchedaṃ, pācittiyamudīritaṃ;  
Anantarasamoyeva, anāpattinayo mato.

**1828**Dīghaso ca pamāṇena, nava tassa vidatthiyo;  
Tiriyaṃ cha viniddiṭṭhā, sugatassa vidatthiyā.

1829 Aññena ca kataṃ laddhā, sevato dukkaṭaṃ bhava;  
Samuṭṭhānādayo sabbe, sañcarittasamā matā.

Nandakathā.

Rājavaggo navamo.

Iti vinayavinicchaye pācittiyakathā niṭṭhitā.

### Pāṭidesanīyakathā

1830 Yo cantaragharaṃ bhikkhu, pavittihāya tu hatthato;  
Aññātikāya yaṃ kiñci, tassa bhikkhuniyā pana.

1831 Sahatthā paṭiggaṇheyya, khādanaṃ bhojanampi vā;  
Gahaṇe dukkaṭaṃ bhoge, pāṭidesaniyaṃ siyā.

1832 Rathikāyapi vā byūhe, sandhisīghāṭakesu vā;  
Hatthisālādike ṭhatvā, gaṇhatopi ayaṃ nayo.

1833 Rathikāya sace ṭhatvā, deti bhikkhuni bhojanaṃ;  
Āpatti antarārāme, ṭhatvā gaṇhāti bhikkhu ce.

1834 Etthantaragharaṃ tassā, pavittihāya hi vākyato;  
Bhikkhussa ca ṭhitaṭṭhānaṃ, nappamāṇanti vaṇṇitaṃ.

1835 Tasmā bhikkhuniyā ṭhatvā, āramādīsu dentiyā;  
Vīthiyādīsu ce ṭhatvā, na doso paṭigaṇhato.

1836 Yāmakālikasattāha-kālikaṃ yāvajīvikaṃ;  
Āhāratthāya gahaṇe, ajjhohāre ca dukkaṭaṃ.

1837 Āmisena asambhinna-rasaṃ sandhāya bhāsitaṃ;  
Pāṭidesaniyāpatti, sambhinnekarase siyā.

1838 Ekatoupasampanna-hatthato paṭigaṇhato;  
Kālikānaṃ catunnampi, āhāratthāya dukkaṭaṃ.

1839 Ñātikāyapi aññāti-saññino vimatissa vā;  
Dukkaṭaṃ ñātisaññissa, tathā aññātikāya vā.

1840 Dāpentiyā anāpatti, dadamānāya vā pana;  
Nikkhipitvāntarārāmā-dīsu ṭhatvāpi dentiyā.

1841 Gāmato nīharitvā vā, deti ce bahi vaṭṭati;  
“Paccaye sati bhujjā”’ti, deti ce kālikattayaṃ.

1842 Hatthato sāmaṇerīnaṃ, sikkhamānāya vā tathā;  
Idaṃ eḷakalomena, samuṭṭhānaṃ samaṃ matāṃ.

Paṭhamapāṭidesanīyakathā.

- 1843 Avutte ‘‘apasakkā’’ti, ekenāpi ca bhikkhunā;  
Sacejjhoharaṇatthāya, āmisam paṭigaṇhati.
- 1844 Gahaṇe dukkaṭam bhoge, pāṭidesaniyam siyā;  
Ekatoupasampannam, na vārentassa dukkaṭam.
- 1845 Tathevānupasampannā-yupasampannasaññino;  
Tattha vematikassāpi, hoti āpatti dukkaṭam.
- 1846 Anāpattittano bhattam, padāpeti na deti ce;  
Tathā aññassa bhattam vā, na dāpeti padeti ce.
- 1847 Yam na dinnam tam dāpeti, na dinnam yattha vāpi ca;  
Tattha tampi ca sabbesam, samam dāpeti bhikkhunī.
- 1848 Vosāsantī tithā sikkha-mānā vā sāmaṇerikā;  
Bhojanāni ca pañceva, vinā, ummattakādino.
- 1849 Kathinena samuṭṭhānam, samānanti pakāsitam;  
Kriyākriyamidaṃ vuttam, ticittaṇca tivedanam.

Dutiyapāṭidesanīyakathā.

- 1850 Sekkhanti sammate bhikkhu, laddhasammutike kule;  
Gharūpacārokkamanā, pubbeva animantito.
- 1851 Agilāno gahetvā ce, paribhuñjeyya āmisam;  
Gahaṇe dukkaṭam bhoge, pāṭidesaniyam siyā.
- 1852 Yāmakālikasattāha-kālike yāvajīvike;  
Gahaṇe paribhoge ca, hoti āpatti dukkaṭam.
- 1853 Asekkhasammate sekkha-sammatanti ca saññino;  
Tattha vematikassāpi, tatheva paridīpitaṃ.
- 1854 Anāpatti gilānassa, gilānassāvasesake;  
Nimantitassa vā bhikkhā, aññesam tattha dīyati.
- 1855 Gharato nīharitvā vā, denti ce yattha katthaci;  
Niccabhattādike vāpi, tathā ummattakādino.
- 1856 Anāgate hi bhikkhumhi, gharato paṭhamam pana;  
Nīharitvā sace dvāre, sampatte denti vaṭṭati.
- 1857 Bhikkhum pana ca disvāva, nīharitvāna gehato;  
Na vaṭṭati sace denti, samuṭṭhāneḷakūpamam.

Tatīyapāṭidesanīyakathā.

- 1858 Gahaṭṭhenāgahaṭṭhena, itthiyā purisena vā;  
Ārāmaṃ upacāram vā, pavisitvā sace pana.

- 1859‘Itthannāmassa te bhattaṃ, yāgu vā āharīyati’’;  
Evamārocitaṃ vuttaṃ, paṭisaṃviditanti hi.
- 1860Āharīyatu taṃ pacchā, yathārocitameva vā;  
Tassa vā parivāraṃpi, aññaṃ katvā bahūṃ pana.
- 1861Yāguyā viditaṃ katvā, pūvaṃ bhattaṃ haranti ce;  
Idampi viditaṃ vuttaṃ, vaṭṭatīti **kurundiyaṃ**.
- 1862Kulāni pana aññāni, deyyadhammaṃ panattano;  
Haranti tena saddhiṃ ce, sabbhaṃ vaṭṭati tampi ca.
- 1863Anārocitamevaṃ yaṃ, yaṃ ārāmaṃānābhataṃ;  
Taṃ asaṃviditaṃ nāma, sahadhammikañāpitaṃ.
- 1864Yaṃ asaṃviditaṃ katvā, ābhataṃ pana taṃ bahi;  
Ārāmaṃ pana pesetvā, kārapetvā tamāhare.
- 1865Gantvā vā antarāmagge, gahetabbaṃ tu bhikkhunā;  
Sace evamakavā taṃ, ārāme upacārato.
- 1866Gahetvājjhoharantassa, gahaṇe dukkaṭaṃ siyā;  
Ajjhohārapayogesu, pāṭidesaniyaṃ mataṃ.
- 1867Paṭisaṃviditeyeva, asaṃviditasaññino;  
Tattha vematikassāpi, hoti āpatti dukkaṭaṃ.
- 1868Paṭisaṃvidite tassa, gilānassāvasesake;  
Bahārāme gahetvā vā, antoyevassa bhuñjato.
- 1869Tatthajātaphalādīni, anāpatteva khādato;  
Samuṭṭhānādayo sabbe, kathinena samā matā.

Catutthapāṭidesanīyakathā.

Iti vinayavinicchaye pāṭidesanīyakathā niṭṭhitā.

### Sekhiyakathā

- 1870Yo anādariyeneva, purato pacchatopi vā;  
Olambetvā nivāseyya, tassa cāpatti dukkaṭaṃ.
- 1871Hatthisoṇḍādītulyaṃ tu, nivāsentassa dukkaṭaṃ;  
Āpattibhīrunā niccaṃ, vatthabbaṃ parimaṇḍalaṃ.
- 1872Jānumaṇḍalato heṭṭhā, aṭṭhaṅgulappamaṇakaṃ;  
Otāretvā nivatthabbaṃ, tato ūnaṃ na vaṭṭati.
- 1873Asañciccāsatisāpi, ajānantassa kevalaṃ;  
Anāpatti gilānassā-padāsummattakādino.

## Parimaṇḍalakathā.

1874 Ubho koṇe samaṃ katvā, sādaraṃ parimaṇḍalaṃ;  
Katvā pārūpītabbevaṃ, akarontassa dukkaṭaṃ.

1875 Avisesena vuttaṃ tu, idaṃ sikkhāpadadvayaṃ;  
Tasmā ghare vihāre vā, kattabbaṃ parimaṇḍalaṃ.

## Dutiyāṃ.

1876 Gaṇṭhikaṃ paṭimuñcitvā, katvā koṇe ubho samaṃ;  
Chādetvā maṇibandhaṇca, gantabbaṃ gīvameva ca.

1877 Tathā akatvā bhikkhussa, jattūnīpi urampī ca;  
Vivaritvā yathākāmaṃ, gacchato hoti dukkaṭaṃ.

## Tatīyāṃ.

1878 Galavāṭakato uddhaṃ, sīsaṇca maṇibandhato;  
Hatthe piṇḍikamaṃsamhā, heṭṭhā pāde ubhopī ca.

1879 Vivaritvāvasesaṇca, chādetvā ce nisīdati;  
Hoti so suppaṭicchanno, doso vāsūpagassa na.

## Catutthāṃ.

1880 Hatthaṃ vā pana pādaṃ vā, acālentena bhikkhunā;  
Suvīṇitena gantabbaṃ, chaṭṭhe natthi visesatā.

## Pañcamachaṭṭhāni.

1881 Śatīmatāvīkārena, yugamattaṇca pekkhinā;  
Susaṃvutena gantabbaṃ, bhikkhunokkhittacakkhunā.

1882 Yattha katthaci hi ṭṭhāne, ekasmiṃ antare ghare;  
Ṭṭatvā parissayābhāvaṃ, oloketumpī vaṭṭati.

1883 Yo anādariyaṃ katvā, olokeno tahiṃ tahiṃ;  
Sacentaraghare yāti, dukkaṭaṃ aṭṭhamaṃ tathā.

## Sattamaṭṭhamāni.

1884 Ekato ubhato vāpī, hutvā ukkhittacīvaro;  
Indakhīlakato anto, gacchato hoti dukkaṭaṃ.

## Navamaṃ.

1885 Tathā nisinnakālepi, nīharantena kuṇḍikaṃ;  
Anukkhīpitvā dātabbā, doso vāsūpagassa na.

## Dasamaṃ.

Paṭhamo vaggo.

**1886**Na vaṭṭati hasantena, gantuñceva nisīdituṃ;  
Vatthusmiṃ hasanīyasmim, sitamattaṃ tu vaṭṭati.

Paṭhamadutiyāni.

**1887**Appasaddena gantabbaṃ, catuttheṇi ayaṃ nayo;  
Mahāsaddaṃ karontassa, ubhayatthāpi dukkaṭaṃ.

Tatīyacatutthāni.

**1888**Kāyappacālakam katvā, bāhusīsappacālakam;  
Gacchato dukkaṭaṃ hoti, tatheva ca nisīdato.

**1889**Kāyaṃ bāhuñca sīsañca, paggahetvā ujum pana;  
Gantabbamāsitabbañca, sameniriyāpathena tu.

**1890**Nisīdanena yuttesu, tīsu vāsūpagassa hi;  
Anāpattīti ñātabbaṃ, viññunā vinayaññunā.

Dutīyo vaggo.

**1891**Khambhaṃ katvā sasīsaṃ vā, pārūpitvāna gacchato;  
Dukkaṭaṃ muninā vuttaṃ, tathā ukkuṭikāya vā.

**1892**Hatthapallatthikāyāpi, dussapallatthikāya vā;  
Tassantaraghare hoti, nisīdantassa dukkaṭaṃ.

**1893**Dutīye ca catutthe ca, chaṭṭhe vāsūpagassa tu;  
Anāpattīti sārūppā, chabbīsati pakāsītā.

Chaṭṭhaṃ.

**1894**Sakkaccaṃ satiyuttana, bhikkhunā pattasaññinā;  
Piṇḍapāto gahetabbo, samasūpova viññunā.

**1895**Sūpo bhattacatubbhāgo, “samasūpo”ti vuccati;  
Muggamāsakulathānaṃ, sūpo “sūpo”ti vuccati.

**1896**Anāpatti asañcicca, gilānassa raserase;  
Tatheva ñātakādīnaṃ, aññatthāya dhanena vā.

Sattamaṭṭhamanavamāni.

**1897**Antolekhāpamāṇena, pattassa mukhavaṭṭiyā;  
Pūritova gahetabbo, adhiṭṭhānūpagassa tu.

**1898**Tattha thūpīkataṃ katvā, gaṇhato yāvakālikam;  
Yaṃ kiñci pana bhikkhussa, hoti āpatti dukkaṭaṃ.

- 1899** Adhiṭṭhānūpage patte, kālikattayameva ca;  
Sese thūpīkatam sabbam, vaṭṭateva na saṃsayo.
- 1900** Dvīsu pattesu bhattam tu, gahetvā pattamekakaṃ;  
Pūretvā yadi peseti, bhikkhūnam pana vaṭṭati.
- 1901** Patte pakkhippamānam yaṃ, ucchukhaṇḍaphalādikaṃ;  
Orohati sace heṭṭhā, na tam thūpīkatam siyā.
- 1902** Pupphatakkolakādīnam, ṭhapetvā ce vaṭṭasakaṃ;  
Dinam ayāvakālittā, na tam thūpīkatam siyā.
- 1903** Vaṭṭasakaṃ tu pūvassa, ṭhapetvā odanopari;  
Piṇḍapātam sace denti, idam thūpīkatam siyā.
- 1904** Bhattassūpari paṇṇam vā, thālakaṃ vāpi kiñcipi;  
Ṭhapetvā paripūretvā, sace gaṇhāti vaṭṭati.
- 1905** Paṭiggahetumevassa, tam tu sabbam na vaṭṭati;  
Gahitam sugahitam, pacchā, bhuñjitabbaṃ yathāsukham.

Tatiyo vaggo.

- 1906** Paṭṭhamaṃ dutiyaṃ vutta-nayaṃ tu tatiye pana;  
Uparodhimadassetvā, bhottabbaṃ paṭipāṭiyā.
- 1907** Aññesaṃ attano bhattam, ākiram pana bhājane;  
Natthomasati ce doso, tathā uttaribhaṅgakaṃ.

Tatiyaṃ.

- 1908** Catutthe yaṃ tu vattabbaṃ, vuttam pubbe asesato;  
Pañcame matthakaṃ doso, madditvā paribhuñjato.
- 1909** Anāpatti gilānassa, parittepī ca sesake;  
Ekato pana madditvā, saṃkaḍḍhitvāna bhuñjato.

Catutthapañcamāni.

- 1910** Yo bhiyyokamyatāhetu, sūpaṃ vā byañjanampi vā;  
Paṭicchādeyya bhattena, tassa cāpatti dukkaṭam.

Chaṭṭham.

- 1911** Viññattiyaṃ tu vattabbaṃ, apubbaṃ natthi kiñcipi;  
Aṭṭhame pana ujjhāne, gilānopi na muccati.
- 1912** ‘Dassāmi dāpessāmī’ ti, oloketassa bhikkhuno;  
Anāpattīti ñātabbaṃ, na ca ujjhānasaññino.

Aṭṭhamam.



**1913** Mahantaṃ pana moraṇḍaṃ, kukkuṭaṇḍaṇca khuddakaṃ;  
Tesaṃ majjhappamaṇeṇa, kattaḅbo kabaḷo pana.

**1914** Khajjake pana sabbattha, mūlakhādaniyādike;  
Phalāphale anāpatti, gilānummattakādino.

Navamaṃ.

**1915** Adīgho pana kātabbo, ālopo parimaṇḍalo;  
Khajjatuttaribhaṅgasmīṃ, anāpatti phalāphale.

Dasamaṃ.

Catuttho vaggo.

**1916** Anāhaṭe mukhadvāraṃ, appatte kabaḷe pana;  
Attano ca mukhadvāraṃ, vivarantassa dukkaṭaṃ.

Paṭhamaṃ.

**1917** Mukhe ca sakalaṃ hatthaṃ, pakkipantassa dukkaṭaṃ;  
Mukhe ca kabaḷaṃ katvā, kathetuṃ na ca vaṭṭati.

**1918** Vacanaṃ yattakenassa, paripuṇṇaṃ na hoti hi;  
Mukhasmiṃtattake sante, byāharantassa dukkaṭaṃ.

**1919** Mukhe harītakādīni, pakkipitvā katheti yo;  
Vacanaṃ paripuṇṇaṃ ce, kathetuṃ pana vaṭṭati.

Dutiyatatiyāni.

**1920** Yo piṇḍukkhepakāṃ bhikkhu, kabaḷacchedakampi vā;  
Makkaṭo viya gaṇḍe vā, katvā bhuñjeyya dukkaṭaṃ.

Catutthapañcamachattāni.

**1921** Niddhunitvāna hatthaṃ vā, bhattaṃ sitthāvākāraṃ;  
Jivhānicchāraṃ vāpi, tathā ‘‘capu capū’’ti vā.

**1922** Anādaravaseneva, bhuñjato hoti dukkaṭaṃ;  
Sattame aṭṭhame natthi, doso kacavarujjhane.

Sattamadasamāni.

Pañcama vaggo.

**1923** Katvā evaṃ na bhottabbaṃ, saddaṃ ‘‘suru surū’’ti ca;  
Hatthanillehakaṃ vāpi, na ca vaṭṭati bhuñjituṃ.

**1924** Phāṇitaṃ ghanayāguṃ vā, gahetvā āṅgulīhi taṃ;  
Mukhe āṅguliyo bhottuṃ, pavesetvāpi vaṭṭati.

**1925**Na patto lehitabbova, ekāyaṅgulikāya vā;  
Ekaotthopi jivhāya, na ca nillehitabbako.

Catuttham.

**1926**Śāmisena tu hatthena, na ca pānīyathālakam;  
Gahetabbam, paṭikkhittam, paṭikkūlavasena hi.

**1927**Puggalassa ca saṅghassa, gahaṭṭhassattanopi ca;  
Santako pana saṅkho vā, sarāvaṃ vāpi thālakam.

**1928**Tasmā na ca gahetabbam, gaṇhato hoti dukkaṭam;  
Anāmisena hatthena, gahaṇam pana vaṭṭati.

Pañcamaṃ.

**1929**Uddharitvāpi bhinditvā, gahetvā vā paṭiggāhe;  
Nīharitvā anāpatti, chaḍḍentassa gharā bahi.

Chaṭṭham.

**1930**Chattam yaṃ kiñci hatthena, sarīrāvayavena vā;  
Sace dhārayamānassa, dhammam deseti dukkaṭam.

Sattamaṃ.

**1931**Ayameva nayo vutto, daṇḍapāṇimhi puggale;  
Catuhatthappamāṇova, daṇḍo majjhimahatthato.

Aṭṭhamam.

**1932**Tatheva satthapāṇissa, dhammam deseti dukkaṭam;  
Satthapāṇi na hotāsiṃ, sannayhitvā ṭhito pana.

Navamaṃ.

**1933**Dhanuṃ sarena saddhiṃ vā, dhanuṃ vā sarameva vā;  
Sajiyam nijiyam vāpi, gahetvā dhanudaṇḍakam.

**1934**Ṭhitassapi nisinnassa, nipannassāpi vā tathā;  
Sace deseti saddhammam, hoti āpatti dukkaṭam.

**1935**Paṭimukkampi kaṇṭhamhi, dhanuṃ hatthena yāvatā;  
Na gaṇhāti naro tāva, dhammam deseyya vaṭṭati.

Chaṭṭho vaggo.

**1936**Pādukāruḷhakassāpi, dhammam deseti dukkaṭam;  
Akkamitvā ṭhitassāpi, paṭimukkassa vā tathā.

Paṭhamam.

1937Upāhanagatassāpi, ayameva vinicchayo;  
Sabbattha agilānassa, yāne vā sayanepi vā.

1938Nipānassāgilānassa, kaṭasāre chamāya vā;  
Pīṭhe mañcepi vā ucce, nisinnena ṭhitena vā.

1939Na ca vaṭṭati desetum, ṭhatvā vā uccabhūmiyaṃ;  
Sayanesu gatenāpi, sayanesu gatassa ca.

1940Samāne vāpi ucce vā, nipanne neva vaṭṭati;  
Nipānena ṭhitassāpi, nipānassapi vaṭṭati.

1941Nisinnena nisinnassa, ṭhitassāpi ca vaṭṭati;  
Ṭhitasseva ṭhitenāpi, desetumpi tatheva ca.

Dutiyatatiyacatutthāni.

1942Pallatthikā nisinnassa, agilānassa dehino;  
Tathā veṭṭitasāsassa, dhammaṃ deseti dukkaṭaṃ.

1943Kesantaṃ vivarāpetvā, deseti yadi vaṭṭati;  
Sasīsaṃ pārutassāpi, ayameva vinicchayo.

Pañcamachaṭṭhasattamāni.

1944Aṭṭhame navame vāpi, dasame natthi kiñcīpi;  
Sacepi therupaṭṭhānaṃ, gantvāna daharaṃ ṭhitaṃ.

1945Pañhaṃ pucchati ce thero, kathetum na ca vaṭṭati;  
Tassa passe panaññaṃ, kathetabbaṃ vijānatā.

Aṭṭhamanavamadasamāni.

Sattamo vaggo.

1946Gacchato purato pañhaṃ, na vattabbaṃ tu pacchato;  
“Pacchimassa kathemī”ti, vattabbaṃ vinayaññunā.

1947Saddhiṃ uggahitaṃ dhammaṃ, sajjhāyati hi vaṭṭati;  
Samameva yugaggāhaṃ, kathetum gacchatopi ca.

Paṭhamaṃ.

1948Ekekassāpi cakkassa, pathenāpi ca gacchato;  
Uppathena samaṃ vāpi, gacchantasseva vaṭṭati.

Dutiyam.

1949Tatiye natthi vattabbaṃ, catutthe harite pana;  
Uccārādicatukkaṃ tu, karoto dukkaṭaṃ siyā.

1950 Jīvarukkhassa yaṃ mūlaṃ, dissamānaṃ tu gacchati;  
Sākhā vā bhūmilaggā taṃ, sabbam haritameva hi.

1951 Sace aharitaṃ thānaṃ, pekkhantasseva bhikkhuno;  
Vaccam nikkhamatevassa, sahasā pana vaṭṭati.

1952 Palālaṇḍupake vāpi, gomaye vāpi kismici;  
Kattabam, haritaṃ pacchā, tamottharati vaṭṭati.

1953 Kato aharite thāne, haritaṃ eti vaṭṭati;  
Siṅghānikā gatā ettha, kheḷeneva ca saṅghaṃ.

Catuttham.

1954 Vaccakuṭṭisamuddādi-udakesupi bhikkhuno;  
Tesaṃ aparibhogattā, karoto natthi dukkaṭam.

1955 Deve pana ca vassante, udakoghe samantato;  
Ajalam alabhantena, jale kātumpi vaṭṭati.

Pañcamaṃ.

Aṭṭhamo vaggo.

1956 Samuṭṭhānādayo ñeyyā, sekhiyānaṃ panettha hi;  
Ujjagghikādicattāri, kabaḷena mukhena ca.

1957 Chamānicāsanaṭṭhāna-pacchā uppathavā dasa;  
Samuṭṭhānādayo tulyā, vuttā samanubhāsane.

1958 Chattam daṇḍāvudham sattham, pādukāruḷhupāhanā;  
Yānaṃ sayanapallattha-veḷhitogunṭhitāni ca.

1959 Dhammadesanātulyāva, samuṭṭhānādinā pana;  
Sūpodanena viññatti, theyyasatthasamaṃ mataṃ.

1960 Avasesā tipaññāsa, samānā paṭhamena tu;  
Sekhiyesupi sabbesu, anāpattāpadāsupi.

1961 Ujjhānasaññike thūpī-kate sūpapaṭicchade;  
Tīsu sikkhāpadesveva, gilāno na panāgato.

Sekhiyakathā.

1962 Imam viditvā vinaye vinicchayaṃ;  
Visārado hoti, vinītamānaso;  
Parehi so hoti ca duppadhamsiyo;  
Tato hi sikkhe satataṃ samāhito.

1963 Imam paramasaṃkaram saṃkaram;  
Avecca savanāmataṃ nāmataṃ;

Paṭuttamadhike hite ke hi te;  
Na yanti kalisāsane sāsane.

Iti vinayavinicchaye

Bhikkhuvibhaṅgakathā niṭṭhitā.

## Bhikkhunīvibhaṅgo

1964 Bhikkhunīnaṃ hitatthāya, vibhaṅgaṃ yaṃ jinobraṇḍi;  
Tasmiṃ api samāseṇa, kiñcimattaṃ bhaṅgamaṃ.

### Pārājikakathā

1965 Chandaso methunaṃ dhammaṃ, paṭisevैया yā pana;  
Hoti pārājikā nāma, samaṇī sā pavuccati.

1966 Manussapurisādīnaṃ, navannaṃ yassa kassaci;  
Sajjivassāpyajīvassa, santhatam vā asanthatam.

1967 Attano tividhe magge, yebhuyyakkhāyitādikaṃ;  
Aṅgajātaṃ pavesentī, allokāse parājitā.

1968 Itto paramavatvāva, sādharmaṇavinicchayaṃ;  
Asādharmaṇamevāhaṃ, bhaṇissāmi samāsato.

1969 Adhakkhakaṃ sarīrakaṃ, yadubbhajāṇumaṅḍalaṃ;  
Sarīrakena ce tena, phuseyya bhikkhunī pana.

1970 Avassutassāvassutā, manussapuggalassa yā;  
Sarīramassa tena vā, phuṭṭhā pārājikā siyā.

1971 Kapparassa panuddhampī, gahitaṃ ubbhajāṇunā;  
Yathāvuttappakārena, kāyenānena attano.

1972 Purisassa tathā kāya- paṭibaddhaṃ phusantiyā;  
Tathā yathāparicchinna- kāyabaddhena attano.

1973 Avasesena vā tassa, kāyaṃ kāyena attano;  
Hoti thullaccayaṃ tassā, payoge purisassa ca.

1974 Yakkhapetatiracchāna- paṅḍakānaṃ adhakkhakaṃ;  
Ubbhajāṇuṃ tathevassā, ubhatovassave sati.

1975 Ekatoṇṇavassave cāpi, thullaccayamudīritaṃ;  
Avasese ca sabbattha, hoti āpatti dukkaṭaṃ.

1976 Ubbhakkhakamadhojāṇu- maṅḍalaṃ pana yaṃ idha;  
Kapparassa ca heṭṭhāpi, gataṃ ettheva saṅghaṃ.

1977 Kelāyati sace bhikkhu, saddhiṃ bhikkhuniyā pana;

Ubhinnaṃ kāyasamsagga-rāge sati hi bhikkhuno.

- 1978**Hoti saṅghādisesova, nāso bhikkhuniyā siyā;  
Kāyasamsaggarāgo ca, sace bhikkhuniyā siyā.
- 1979**Bhikkhuno methuno rāgo, gehapemampi vā bhava;  
Tassā thullaccayaṃ vuttaṃ, bhikkhuno hoti dukkaṭaṃ.
- 1980**Ubhinnaṃ methune rāge, gehapemepi vā sati;  
Avisesena niddiṭṭhaṃ, ubhinnaṃ dukkaṭaṃ pana.
- 1981**Yassa yattha manosuddhaṃ, tassa tattha na dosatā;  
Ubhinnampi anāpatti, ubhinnaṃ cittasuddhiyā.
- 1982**Kāyasamsaggarāgena, bhinditvā paṭhamaṃ pana;  
Pacchā dūseti ce neva, hoti bhikkhunidūsako.
- 1983**Atha bhikkhuniyā phuṭṭho, sādiyantova cetasā;  
Niccalo hoti ce bhikkhu, na hotāpatti bhikkhuno.
- 1984**Bhikkhunī bhikkhunā phuṭṭhā, sace hotipi nicalā;  
Adhivāseti samphassaṃ, tassā pārājikaṃ siyā.
- 1985**Tathā thullaccayaṃ khetto, dukkaṭaṅca viniddise;  
Vuttattā “kāyasamsaggaṃ, sādiyeyyā”ti satthunā.
- 1986**Tassā kriyasamuṭṭhānaṃ, evaṃ sati na dissati;  
Idaṃ tabbahuleneva, nayena paridīpitaṃ.
- 1987**Anāpatti asaṅcicca, ajānitvāmasantiyā;  
Sati āmasane tassā, phassaṃ vāsādiyantiyā.
- 1988**Vedanaṭṭāya vā khitta-cittāyummattikāya vā;  
Samuṭṭhānādayo tulyā, paṭhamantimavatthunā.

Ubbhajāṇumaṅḍalakathā.

- 1989**Pārājikattaṃ jānanti, saliṅge tu ṭhitāya hi;  
“Na kassaci parassāhaṃ, āroccasāmi dāni”ti.
- 1990**Dhure nikkhittamattasmiṃ, sā ca pārājikā siyā;  
Ayaṃ vajjapaṭicchādi-nāmikā pana nāmato.
- 1991**Sesaṃ sappānavaggasmiṃ, duṭṭhullena samaṃ naye;  
Viseso tatra pācitti, idha pārājikaṃ siyā.

Vajjapaṭicchādikathā.

- 1992**Saṅghenukkhittako bhikkhu, ṭhito ukkhepane pana;  
Yaṃdiṭṭhiko ca so tassā, diṭṭhiyā gahaṇena taṃ.

- 1993** Anuvatteyya yā bhikkhuṃ, bhikkhunī sā visumpi ca;  
Saṅghamajjhēpi aññāhi, vuccamānā tatheva ca.
- 1994** Acajantīva taṃ vatthuṃ, gahetvā yadi tiṭṭhati;  
Tassa kammaṣa osāne, ukkhittassānuvattikā.
- 1995** Hoti pārājikāpannā, hotāsākiyadhītarā;  
Puna appaṭṭisandheyā, dvidhā bhinnā silā viya.
- 1996** Adhamme pana kammaṣmiṃ, niddiṭṭhaṃ tikadukkaṭaṃ;  
Samuṭṭhānādayo sabbe, vuttā samanubhāsane.
- Ukkhittānuvattikakathā.
- 1997** Apārājikakhattassa, gahaṇaṃ yassa kassaci;  
Aṅgassa pana taṃ hattha-ggahaṇanti pavuccati.
- 1998** Pārutassa nivatthassa, gahaṇaṃ yassa kassaci;  
Etaṃ saṅghāṭiyā kaṇṇa-ggahaṇanti pavuccati.
- 1999** Kāyaṣaṃsaggasānkhāta-asaddhammassa kāraṇā;  
Bhikkhunī hatthapāsasmīṃ, tiṭṭheyya purisassa vā.
- 2000** Sallapeyya tathā tattha, ṭhatvā tu purisena vā;  
Sāṅketāṃ vāpi gaccheyya, iccheyyā gamanassa vā.
- 2001** Tadattāyā paṭicchanna-ṭṭhānaṅca paviseyya vā;  
Upasaṃhareyya kāyaṃ vā, hatthapāse ṭhitā pana.
- 2002** Ayamassamaṇī hoti, vinaṭṭhā aṭṭhavatthukā;  
Abhabbā punaruḥhāya, chinno tālova matthake.
- 2003** Anulomena vā vatthuṃ, paṭilomena vā cutā;  
Aṭṭhamāṃ paripūrentī, tathekantarikāya vā.
- 2004** Athādito panekaṃ vā, dve vā tīṇipi satta vā;  
Satakkhattumpi pūrentī, neva pārājikā siyā.
- 2005** Āpattiyo panāpannā, desetvā tāhi muccati;  
Dhuranikkhepanaṃ katvā, desitā gaṇanūpikā.
- 2006** Na hotāpattiyā aṅgaṃ, saussāhāya desitā;  
Desanāgaṇanaṃ neti, desitāpi adesitā.
- 2007** Anāpatti asaṅcicca, ajānitvā karontiyā;  
Samuṭṭhānādayo sabbe, anantarasamā matā.
- 2008** ‘‘Asaddhammo’’ti nāmettha, kāyaṣaṃsagganāmako;  
Ayamuddisito attho, sabbaaṭṭhakathāsupi.
- 2009** Viññū paṭibalo kāya-ṣaṃsaggaṃ paṭipajjituṃ;  
Kāyaṣaṃsaggabhāve tu, sādhaṅgaṃ vacanaṃ idaṃ.

Aṭṭhavatthukakathā.

**2010**Avassutā paṭicchādī, ukkhittā aṭṭhavatthukā;  
Asādhāraṇapaññattā, catassova mahesinā.

Pārājikakathā niṭṭhitā.

**Saṅghādisesakathā**

**2011**Yā pana bhikkhunī ussayavādā;  
Aṭṭakarī mukharī vihareyya;  
Yena kenaci narenidha saddhiṃ;  
Sā garukaṃ kira dosamupeti.

**2012**Sakkiṃ vāpi sahāyaṃ vā, pariyesati dukkaṭaṃ;  
Pade pade tathā aṭṭaṃ, kātuṃ gacchantiyāpi ca.

**2013**Āroceti sace pubbaṃ, bhikkhunī attano kathaṃ;  
Disvā vohārikaṃ tassā, hoti āpatti dukkaṭaṃ.

**2014**Āroceti sace pacchā, itaro attano kathaṃ;  
Hoti bhikkhuniyā tassā, thullaccayamanantaraṃ.

**2015**Ārocetitaro pubbaṃ, sace so attano kathaṃ;  
Pacchā bhikkhunī ce pubba-sadisova vinicchayo.

**2016**‘Ārocehi’ ti vuttā ce, ‘kathaṃ tava mamāpi ca’;  
Ārocetu yathākāmaṃ, paṭhame dukkaṭaṃ siyā.

**2017**Dutiyārocane tassā, thullaccayamudīritaṃ;  
Upāsakena vuttepi, ayameva vinicchayo.

**2018**Ārocitakathaṃ sutvā, ubhinnampi yathā tathā;  
Vinicchaye kate tehi, aṭṭe pana ca niṭṭhite.

**2019**Aṭṭassa pariyosāne, jaye bhikkhuniyā pana;  
Parājayepi vā tassā, hoti saṅghādisesatā.

**2020**Dūtaṃ vāpi pahiṇitvā, āgantvāna sayampi vā;  
Paccatthikamanussehi, ākaḍḍhīyati yā pana.

**2021**Ārāme pana aññehi, anācāraṃ kataṃ sace;  
Anodissa paraṃ kiñci, rakkhaṃ yācati tattha yā.

**2022**Yāya kiñci avuttāva, dhammaṭṭhā sayameva tu;  
Sutvā taṃ aññato aṭṭaṃ, niṭṭhāpentī sace pana.

**2023**Tassā, ummattikādīna-manāpatti pakāsītā;  
Kathinena samuṭṭhānaṃ, tulyaṃ sakiriyaṃ idaṃ.

Aṭṭakārikathā.



- 2024**Jānantī bhikkhunī coriṃ, vajjhaṃ viditameva yā;  
Saṅghaṃ anapaloketvā, rājānaṃ gaṇameva vā.
- 2025**Vuṭṭhāpeyya vinā kappam, corivuṭṭhāpanaṃ pana;  
Saṅghādisesamāpatti-māpanā nāma hoti sā.
- 2026**Pañcamāsagghanaṃ yāya, haritaṃ parasantakaṃ;  
Atirekagghanaṃ vāpi, ayaṃ ‘‘corī’’ti vuccati.
- 2027**Bhikkhunīsu panaññāsu, titthiyesupi vā tathā;  
Yā pabbajitapubbā sā, ayaṃ ‘‘kappā’’ti vuccati.
- 2028**Vuṭṭhāpeti ca yā coriṃ, ṭhapetvā kappamevidaṃ;  
Sace ācarinaṃ pattam, cīvaram pariyesati.
- 2029**Sammannati ca sīmaṃ vā, tassā āpatti dukkaṭam;  
Ñattiyā dukkaṭam dvīhi, kammavācāhi ca dvayaṃ.
- 2030**Thullaccayassa, kammante, garukaṃ niddise budho;  
Gaṇo ācarinī ceva, na ca muccati dukkaṭam.
- 2031**Anāpatti ajānantī, vuṭṭhāpeti, tatheva ca;  
Kappam vā apaloketvā, tassā ummattikāya vā.
- 2032**Corivuṭṭhāpanaṃ nāma, jāyate vācaccittato;  
Kāyavācādito ceva, sacittaṅca kriyākriyaṃ.
- Corivuṭṭhāpanakathā.
- 2033**Gāmantaram nadīpāram, gaccheyyekāva yā sace;  
Ohīyeyya gaṇamhā vā, rattiṃ vippavaseyya vā.
- 2034**Paṭhamāpattikaṃ dhammaṃ, sāpannā garukaṃ siyā;  
Sakagāmā anāpatti, ñātābbā nikkhamantiyā.
- 2035**Nikkhamitvā tato aññaṃ, gāmaṃ gacchantiyā pana;  
Dukkaṭam padavārena, veditabbaṃ vibhāvinā.
- 2036**Ekena padavārena, gāmassa itarassa ca;  
Parikkhepe atikkante, upacārokkamepi vā.
- 2037**Thullaccayaṃ atikkante, okkante dutiyena tu;  
Pādena garukāpatti, hoti bhikkhuniyā pana.
- 2038**Nikkhamitvā sace pacchā, sakaṃ gāmaṃ visantiyā;  
Ayameva nayo ñeyyo, vaticchiddena vā tathā.
- 2039**Pākārena vihārassa, bhūmiṃ tu pavasiyā;  
Kappiyanti pavīṭṭhattā, na doso koci vijjati.
- 2040**Bhikkhunīnaṃ vihārassa, bhūmi tāsam tu kappiyā;  
Hoti bhikkhuvihārassa, bhūmi tāsamakappiyā.

- 2041** Hatthiassarathādīhi, iddhiyā vā visantiyā;  
Anāpatti siyāpatti, padasā gamane pana.
- 2042** Yaṃ kiñci sakagāmaṃ vā, paragāmampi vā tathā;  
Bahigāme pana ṭhatvā, āpatti pavisantiyā.
- 2043** Lakkhaṇenupapannāya, nadiyā dutiyaṃ vinā;  
Pāraṃ gacchati yā tīraṃ, tassā samaṇiyā pana.
- 2044** Paṭhamaṃ uddharitvāna, pādaṃ tīre ṭhapentiya;  
Hoti thullaccayāpatti, dutiyātikkame garu.
- 2045** Antaranadiyaṃyeva, saddhiṃ dutiyikāya hi;  
Bhaṇḍitvā orimaṃ tīraṃ, tathā paccuttarantiyā.
- 2046** Iddhiyā setunā nāvā-yānarajjūhi vā pana;  
Evampi ca paraṃ tīraṃ, anāpattuttarantiyā.
- 2047** Nhāyituṃ pivituṃ vāpi, otiṇṇātha nadiṃ puna;  
Padasāvorimaṃ tīraṃ, paccuttarati vaṭṭati.
- 2048** Padasā otaritvāna, nadiṃ uttaraṇe pana;  
Ārohitvā tathā setuṃ, anāpattuttarantiyā.
- 2049** Setunā upagantvā vā, yānākāsehi vā sace;  
Yāti uttaraṇe kāle, padasā garukaṃ phuse.
- 2050** Nadiyā pārimaṃ tīraṃ, ito orimatīrato;  
Ullāṅghitvāna vegena, anāpattuttarantiyā.
- 2051** Piṭṭhiyaṃ vā nisīditvā, khandhe vā uttarantiyā;  
Hatthasaṅghātane vāpi, dussayānepi vaṭṭati.
- 2052** ‘Pureruṇodayāyeva, pāsaṃ dutiyikāya hi;  
Gamissāmī’ ti ābhogaṃ, vinā bhikkhuniyā pana.
- 2053** Ekagabbhepi vā hattha-pāsaṃ dutiyikāya hi;  
Atikkamma siyāpatti, aruṇaṃ uṭṭhapentiya.
- 2054** ‘Gamissāmī’ ti ābhogaṃ, katvā gacchantiyā pana;  
Na doso dutiyā pāsaṃ, uṭṭheti aruṇaṃ sace.
- 2055** Indakhīlamatikamma, araṇṇaṃ ettha dīpitaṃ;  
Gāmato bahi nikkamma, tassā dutiyikāya tu.
- 2056** Dassanassupacāraṃ tu, jānitvā vijahantiyā;  
Hoti thullaccayāpatti, jahite garukaṃ siyā.
- 2057** Sāṇipākārapākāra-taruantarite pana;  
Savanassupacārepi, sati āpatti hoti hi.
- 2058** Ajjhokāse tu dūrepi, dassanassupacāratā;

Hoti, ettha kathaṃ dhamma-savanārocane viya.

**2059** Maggamūlhasa saddena, viya kūjantiyā pana;  
“Ayye”ti tassā saddassa, savanātikamepi ca.

**2060** Hoti, bhikkhuniyāpatti, garukā evarūpake;  
Ettha bhikkhunī ekāpi, gaṇāyevāti vuccati.

**2061** Ohīyitvātha gacchantī, “pāpuṇissāmi dānihaṃ”;  
Icevaṃ tu saussāhā, anubandhati vaṭṭati.

**2062** Dvinnāṃ maggaṃ gacchantīnaṃ, ekā gantuṃ no sakkoti;  
Ussāhassacchedaṃ katvā, ohīnā ce tassāpatti.

**2063** Itarāpi sace yāti, “ohīyatu aya”nti ca;  
Hoti tassāpi āpatti, saussāhā na hoti ce.

**2064** Gacchantīsu tathā dvīsu, purimā yāti ekakaṃ;  
Aññaṃ pana sace maggaṃ, pacchimāpi ca gaṇhati.

**2065** Ekissā pana pakkanta-tṭhāne tiṭṭhati cetarā;  
Tasmā tattha ubhinnampi, anāpatti pakāsītā.

**2066** Aruṇuggamanā pubbe, nikkhamitvā sagāmato;  
Aruṇuggamane kāle, gāmantaragatāya hi.

**2067** Atikkamantiyā pāraṃ, nadiyā dutiyikaṃ vinā;  
Āpattiyo catassopi, honti ekakkhaṇe pana.

**2068** Pakkantā vāpi vibbhantā, yātā petānaṃ lokam vā;  
Pakkhasaṅkantā vā naṭṭhā, saddhiṃ yātā sā ce hoti.

**2069** Gāmantarokkamādīni, cattāripi karontiyā;  
Anāpattīti ñātabbaṃ, evaṃ ummattikāyapi.

**2070** Rattiyaṃ vippavāsaṃ tu, hatthapāsova rakkhati;  
Agāmake araṇṇe tu, gaṇā ohīyanaṃ matam.

**2071** Sakagāme yathākāmaṃ, divā ca vicarantiyā;  
Cattāropi ca saṅghādi-sesā tassā na vijjare.

**2072** Samuṭṭhānādayo tulyā, paṭhamantimavatthunā;  
Sacittaṃ kāyakammañca, ticittañca tivedanaṃ.

Gāmantaragamanakathā.

**2073** Sīmāsammutiya ceva, gaṇassa pariyesane;  
Ñattiyā dukkaṭaṃ, dvīhi, honti thullaccayā duve.

**2074** Kammaṃ pariyosāne, hoti saṅghādisesatā;  
Tikaṃ saṅghādisesaṃ tu, adhamme tikadukkaṭaṃ.

**2075** Pucchitvā kārakaṃ saṅghaṃ, chandaṃ datvā gaṇassa vā;  
Vatte vā pana vattantiṃ, asante kārakepi vā.

**2076** Bhikkhuniṃ pana ukkhittaṃ, yā osāreti bhikkhuni;  
Tassā ummattikādīna-manāpatti pakāsītā.

**2077** Saṅghabhedasamā vuttā, samuṭṭhānādayo nayā;  
Kriyākriyamidaṃ vuttaṃ, ayameva visesatā.

Catutthaṃ.

**2078** Sayāṃ avassutā tathā, avassutassa hatthato;  
Manussapuggalassa ce, yadeva kiñci gaṇhati.

**2079** Āmisāṃ, gahaṇe tassā;  
Thullaccayamudīritaṃ;  
Ajjhohāresu saṅghādi-;  
Sesā honti payogato.

**2080** Ekatovassute kiñci, paṭiggaṇhati, dukkaṭaṃ;  
Ajjhohārappayogesū, thullaccayacayo siyā.

**2081** Yakkhapetatiracchāna-paṇḍakānañca hatthato;  
Manussaviggahānampi, ubhatovassute tathā.

**2082** Ekatovassute ettha, uduke dantakaṭṭhake;  
Gahaṇe paribhoge ca, sabbatthāpi ca dukkaṭaṃ.

**2083** Ubhayāvassutābhāve, na doso yadi gaṇhati;  
“Avassuto na cāya”nti, ñatvā gaṇhati yā pana.

**2084** Tassā ummattikādīna-manāpatti pakāsītā;  
Samuṭṭhānādayo tulyā, paṭhamantimavatthunā.

Pañcamaṃ.

**2085** Uyyojane panekissā, itarissā paṭiggahe;  
Dukkaṭāni ca bhogesū, thullaccayagaṇo siyā.

**2086** Bhojanassāvasānasmim, hoti saṅghādisesatā;  
Yakkhādīnaṃ catunnampi, tatheva purisassa ca.

**2087** Dantakaṭṭhudakānañca, gahaṇuyyojane pana;  
Tesañca paribhoge, dukkaṭaṃ parikittitaṃ.

**2088** Yakkhādīnaṃ tu sesassa, gahaṇuyyojane pana;  
Bhoge ca dukkaṭaṃ, bhutte, thullaccayamudīritaṃ.

**2089** “Nāvassuto”ti ñatvā vā, kupitā vā na gaṇhati;  
Kulānuddayatā vāpi, uyyojeti ca yā pana.

**2090** Tassā ummattikādīna-manāpatti pakāsītā;

Adinnādānatulyāva, samuṭṭhānādayo nayā.

Chaṭṭhaṃ.

**2091** Sattamaṃ aṭṭhamaṃ saṅgha-bhedena sadisaṃ matamaṃ;  
Samuṭṭhānādinā saddhiṃ, natthi kāci visesatā.

Sattamaṭṭhamāni.

**2092** Navame dasame vāpi, vattabbaṃ natthi kiñcipi;  
Anantarasaṃāyeva, samuṭṭhānādayo nayā.

Navamadasamāni.

**2093** Duṭṭhadosaadvayenāpi, sañcarittena tena cha;  
Yāvataiyakā aṭṭha, cattāri ca ito tato.

Saṅghādisesakathā.

**Nissaggiyakathā**

**2094** Adhiṭṭhānūpagaṃ pattaṃ, anadhiṭṭhāya bhikkhunī;  
Vikappanamakatvā vā, ekāhampi ṭhapeyya ce.

**2095** Aruṇuggamaneneva, saddhiṃ bhikkhuniyā siyā;  
Tassā nissaggiyāpatti, pattasannidhikāraṇā.

**2096** Seso pana kathāmaggo, pattasikkhāpade idha;  
Sabbo vuttanayeneva, veditabbo vinicchayo.

**2097** Dasāhātikkame tattha, ekāhātikkame idha;  
Tassimassa ubhinnampi, ayameva visesatā.

Paṭhamamaṃ.

**2098** Akāle cīvaram dinnamaṃ, dinnamaṃ kālepi kenaci;  
Ādissa pana “sampattā, bhājentū”ti niyāmitamaṃ.

**2099** Akālacīvaram “kāla-cīvara”nti sace pana;  
Bhājāpeyya ca yā tassā, payoge dukkaṭamaṃ siyā.

**2100** Attanā paṭiladdhamaṃ yaṃ, taṃ tu nissaggiyamaṃ bhava;  
Labhitvā pana nissatṭhamaṃ, yathādāne niyojaye.

**2101** Katvā vinayakammaṃ tu, paṭiladdhampi taṃ puna;  
Tassa cāyamadhippāyo, sevituṃ na ca vaṭṭati.

**2102** Akālavatthasaññāya, dukkaṭamaṃ kālacīvare;  
Ubhayatthapi niddiṭṭhamaṃ, tathā vematikāyapi.

**2103** Kālacīvarasaññāya, cīvare ubhayatthapi;

Na dosummattikādīnaṃ, tisamuṭṭhānatā matā.

Dutiyāṃ.

**2104**Cīvaresupi bandhitvā, ṭhapitesu bahūsvapi;  
Ekāyeva siyāpatti, acchindati sace sayāṃ.

**2105**Tathācchindāpane ekā, ekāyāṇattiyā bhava;  
Itaresu ca vatthūnaṃ, payogassa vasā siyā.

**2106**Tikapācitti aññasmiṃ, parikkhāre tu dukkaṭaṃ;  
Tikadukkaṭamuddiṭṭhaṃ, itarissā tu cīvare.

**2107**Tāya vā dīyamānaṃ tu, tassā vissāsameva vā;  
Gaṇhantiyā anāpatti, tisamuṭṭhānatā matā.

Tatīyāṃ.

**2108**Viññāpetvā sace aññaṃ, tadaññaṃ viññāpentiyā;  
Viññattidukkaṭaṃ tassā, lābhā nissaggiyaṃ siyā.

**2109**Tikapācittiyāṃ vuttaṃ, anaññe dvikadukkaṭaṃ;  
Anaññenaññasaññāya, appahontepi vā puna.

**2110**Tasmiṃ taññeva vā aññaṃ, aññenatthepi vā sati;  
Ānisaṃsaṅca dassetvā, tadaññaṃ viññāpentiyā.

**2111**Anāpattīti ñātabbaṃ, tathā ummattikāyapi;  
Sañcarittasamā vuttā, samuṭṭhānādayo nayā.

Catutthāṃ.

**2112**Aññaṃ cetāpetvā pubbaṃ, pacchā aññaṃ cetāpeyya;  
Evaṃ saññāyaññaṃ dhaññaṃ, mayhaṃ ānetvā detīti.

**2113**Cetāpanapayogena, mūlaṭṭhāya hi dukkaṭaṃ;  
Lābhe nissaggiyaṃ hoti, tena caññena vābhatāṃ.

**2114**Sesaṃ anantareneva, sadisanti viniddise;  
Samuṭṭhānādinā saddhiṃ, apubbaṃ natthi kiñcīpi.

Pañcamāṃ.

**2115**Aññadatthāya dinnena, parikkhārena yā pana;  
Cetāpeyya sace aññaṃ, saṅghikenidha bhikkhunī.

**2116**Payoge dukkaṭaṃ, lābhe, tassā nissaggiyaṃ siyā;  
Anaññadatthike ettha, niddiṭṭhaṃ dvikadukkaṭaṃ.

**2117**Sesakaṃ aññadatthāya, anāpattupanentiyā;  
Pucchitvā sāmike vāpyā-padāsummattikāya vā.

2118 Sañcarittasamā vuttā, samuṭṭhānādayo nayā;  
Sattamaṃ chaṭṭhasadisamaṃ, sayamaṃ yācitakamaṃ vinā.

Chaṭṭhasattamāni.

2119 Aṭṭhame navame vāpi, vattabbaṃ natthi kiñcipi;  
“Mahājanikasaññāci-kenā”ti padatādhikā.

2120 Dasamepi kathā sabbā, anantarasamā matā;  
Samuṭṭhānādinā saddhiṃ, viseso natthi kocipi.

Aṭṭhamanavamadasamāni.

Paṭhamo vaggo.

2121 Atirekacatukkamaṃ, garupāvuraṇamaṃ pana;  
Cetāpeyya sace tassā, catusaccappakāsina.

2122 Payoge dukkaṭamaṃ vuttaṃ, lābhe nissaggiyamaṃ matamaṃ;  
Kahāpaṇacatukkaṃ tu, kaṃso nāma pavuccati.

2123 Ūnake tu catukkaṃse, uddiṭṭhamaṃ dvikadukkaṭamaṃ;  
Anāpatti catukkaṃsa-paramamaṃ garukamaṃ pana.

2124 Cetāpeti tadūnaṃ vā, ñātakānañca santake;  
Aññassatthāya vā atta-dhanenummattikāya vā.

2125 Cetāpentaṃ mahagghamaṃ yā, cetāpetappameva vā;  
Samuṭṭhānādayo sabbe, sañcarittasamā matā.

Ekādasamaṃ.

2126 Lahupāvuraṇamaṃ aḍḍha- teyyakamaṃ sagghanaṃ pana;  
Tato ce uttariṃ yaṃ tu, cetāpeti hi bhikkhunī.

2127 Tassā nissaggiyāpatti, pācitti pariyāputā;  
Anantarasamaṃ sesamaṃ, natthi kāci visesatā.

Dvādasamaṃ.

2128 Sādhāraṇāni sesāni, tāni aṭṭhārasāpi ca;  
Imāni dvādasevāpi, samatiṃseva honti hi.

Nissaggiyakathā.

**Pācittiyakathā**

2129 Lasuṇamaṃ bhaṇḍikamaṃ vuttaṃ, na ekadvitimiñjakamaṃ;  
Āmakamaṃ māgadhamyeva, “khādissāmī”ti gaṇhati.

2130 Gahaṇe dukkaṭamaṃ tassā, pācitti yadi khādati;

Ajjhohāravaseneva, pācittiṃ paridīpaye.

**2131**Dve tayo bhaṇḍike saddhiṃ, saṅkhāditvā sace pana;  
Ajjhoharati yā tassā, ekaṃ pācittiyaṃ siyā.

**2132**Bhinditvā tattha ekekaṃ, miñjaṃ khādantiyā pana;  
Miñjanaṃ gaṇanāyassā, pācittigaṇanā siyā.

**2133**Palaṇḍuko bhañjanako, harito cāpalopi ca;  
Lasuṇā pana cattāro, vaṭṭanteva sabhāvato.

**2134****Palaṇḍuko** paṇḍuvaṇṇo, **bhañjano** lohitopi ca;  
**Harito** haritavaṇṇo, **cāpalo** setakopi ca.

**2135**Ekā miñjā palaṇḍussa, bhañjanassa duve siyuṃ;  
Tisso haritakassāpi, cāpalo hotyamiñjako.

**2136**Sūpamaṃsādisaṃpāke, sālāvuttaribhaṅgake;  
Na dosummattikādīnaṃ, samuṭṭhāneḷakūpamaṃ.

Paṭhamamaṃ.

**2137**Ṣambādhe upakacchesu, muttassa karaṇepi vā;  
Ekalomampi pācitti, saṃharāpentiyā siyā.

**2138**Bahukepi tathā lome, saṃharāpentiyā pana;  
Payogagaṇanāyassā, na lomagaṇanāya hi.

**2139**Na doso sati ābādhe, lomake saṃharantiyā;  
Samuṭṭhānādayo magga- saṃvidhānasamā matā.

Dutiyamaṃ.

**2140**Hoti antamaso mutta-karaṇassa talaghātane;  
Kesarenāpi rāgena, pācitti padumassa vā.

**2141**Gaṇḍamaṃ tattha vaṇamaṃ vāpi, na doso paharantiyā;  
Samuṭṭhānādayo tulyā, paṭhamantimavatthunā.

Tatiyamaṃ.

**2142**Yā panuppalapattampi, byañjane bhikkhunattano;  
Kāmarāgaparetā tu, paveseti na vaṭṭati.

**2143**Idamaṃ vatthuvaseneva, vuttaṃ tu jatumaṭṭhakaṃ;  
Daṇḍamelāḷukaṃ vāpi, muttassa karaṇe pana.

**2144**Samphassaṃ sādiyantiyā, paveseti sace pana;  
Pavesāpeti vā tasmīṃ, tassā pācittiyaṃ siyā.

**2145**Ābādhapaccayā doso, natthi ummattikāya vā;



Talaghātakatulyāva, samuṭṭhānādayo matā.

Catutthaṃ.

- 2146** Aṅgulīnaṃ pana dvinnaṃ, aggapabbadvayādhikaṃ;  
Pācittiyaṃ pavesetvā, dakasuddhiṃ karontiyā.
- 2147** Ekissāṅguliyaṃ tīṇi, pabbāni pana dīghato;  
Pācittiyaṃ bhava suddhiṃ, pavesetvādiyantiyā.
- 2148** Catunnaṃ vāpi tissannaṃ, ekapabbampi yā pana;  
Vitthārato paveseti, tassā pācittiyaṃ siyā.
- 2149** Iti sabbappakārena, **mahāpaccariyā** pana;  
Abhibyattaraṃ katvā, ayamatto vibhāvito.
- 2150** Doso dvaṅgulapabbe vā, natthi ābādhakāraṇā;  
Adhikampi pavesetvā, dakasuddhiṃ karontiyā.
- 2151** Tathā ummattikādīna-manāpatti pakāsītā;  
Samuṭṭhānādayo sabbe, talaghātasamā matā.

Pañcamaṃ.

- 2152** Bhuñjato pana bhikkhussa, pānīyaṃ vā vidhūpanaṃ;  
Gahetvā upatiṭṭheyya, tassā pācittiyaṃ siyā.
- 2153** Gahitā udakeneva, khīratakkādayo rasā;  
“Bijani”’ti ca yā kāci, vatthakoṇādi vuccati.
- 2154** Hatthapāse idhaṭṭhāna-paccayāpatti dīpitā;  
Pahārapaccayā vuttaṃ, khandhake dukkaṭaṃ visuṃ.
- 2155** Hatthapāsaṃ jahitvā vā, upatiṭṭhantiyā pana;  
Khādato khādanaṃ vāpi, hoti āpatti dukkaṭaṃ.
- 2156** Na doso deti dāpeti, tathā ummattikāya vā;  
Idaṃ eḷakalomena, samuṭṭhānaṃ samaṃ mataṃ.

Chaṭṭhaṃ.

- 2157** Viññatvā āmakam dhaññaṃ, bhajjitvā yadi bhikkhunī;  
Koṭṭetvā ca pacitvā ca, pācitti paribhuñjati.
- 2158** Na kevalaṃ tu dhaññaṃ, gahaṇeyeva dukkaṭaṃ;  
Haraṇepi ca dhaññaṃ, tathā sukkhāpane pana.
- 2159** Bhajjanatthāya dhaññaṃ, kapalluddhanasajjane;  
Aggissa karaṇe dabbi-sajjane ca, kapallake.
- 2160** Dhaññaṃpakkipane tattha, dabbiyā ghaṭṭakoṭṭane;

Papphoṭṇādikē sabba-payoge dukkaṭṭaṃ bhavē.

**2161** Bhojanañceva viññatti, pamāṇaṃ idamettha hi;  
Viññatvā vā sayamaṃ tasmā, bhajjanādīni aññato.

**2162** Viññāpetvā panaññāya, bhajjanādīni vā sayamaṃ;  
Kārāpetvāpi katvā vā, ajjhoharati yā pana.

**2163** Ajjhohārapayogesu, tassā pācittiyo siyumaṃ;  
Mātaraṃ vāpi yācitvā, pācitti paribhuñjati.

**2164** Bhajjanādīni katvā vā, kārāpetvāpi vā pana;  
Aviññatti sayamaṃ laddhaṃ, dukkaṭṭaṃ paribhuñjati.

**2165** Viññattiyā panaññāya, laddhaṃ tāya sayampi vā;  
Kārāpetvāpi katvā vā, tathā ajjhoharantiyā.

**2166** Sedakammādiatthāya, dhaññaviññattiyā pana;  
Ṭhapetvā satta dhaññāni, sesaviññattiyāpi ca.

**2167** Anāpattīti ñātabbaṃ, tathā ummattikāya ca;  
Ñātakānampi dhaññaṃ tu, āmaṃ na ca vaṭṭati.

**2168** Vinā viññattiyā laddhaṃ, navakammesu vaṭṭati;  
Samuṭṭhānādayo sabbe, addhānasadisā matā.

Sattamaṃ.

**2169** Uccāraṃ vāpi passāvaṃ, saṅkāraṃ vā vighāsakaṃ;  
Chaddēyya vā tirokuṭṭe, chaddāpeyya parehi vā.

**2170** Hoti pācittiyamaṃ tassā, pākārepi ayamaṃ nayo;  
Chaddentiyā panekeka-manekāpatti dīpītā.

**2171** Etāni pana vatthūni, cattāri sakalānīpi;  
Ekeneva payogena, ekā chaddentiyā siyā.

**2172** Āṇattiyampi eseva, nayo ñeyyo vibhāvīnā;  
Chaddane dantakaṭṭhassa, pācitti paridīpītā.

**2173** Sabbattha pana bhikkhussa, hoti āpatti dukkaṭṭaṃ;  
Avalañjēpi vā ṭhāne, oloketvāpi vā pana.

**2174** Chaddentiyā anāpatti, tathā ummattikāya vā;  
Sañcarittasamuṭṭhānaṃ, kriyākriyamidaṃ siyā.

Aṭṭhamaṃ.

**2175** Khette vā nālīkerādi-ārāme vāpi yā pana;  
Ropime haritaṭṭhāne, yattha katthaci bhikkhunī.

- 2176Tāni cattāri vatthūni, sace chaḍḍeti vā sayam;  
Chaḍḍāpeti tathā vutta-nayo āpattinicchayo.
- 2177Bhuñjamānā nisīditvā, khette tu harite tathā;  
Ucchuādīni khādantī, gacchantī pana tattha yā.
- 2178Chaḍḍeti yadi ucchiṭṭham, udakam calakāni vā;  
Hoti pācittiyam tassā, bhikkhuno hoti dukkaṭam.
- 2179Chaḍḍentiyā siyāpatti, ṭhāne antamaso jalam;  
Pivītvā matthakacchinnaṃ, nāḷikerampi tādisē.
- 2180Kasite tu panaṭṭhāne, bījanikkhepane kate;  
Na uṭṭhetānkuraṃ yāva, sabbesaṃ tāva dukkaṭam.
- 2181Lāyitampi manussānaṃ, khettaṃ rakkhati ce puna;  
Rohanatthāya tatthassā, yathāvatthukameva hi.
- 2182Na doso chaḍḍite khette, sabbaṃ chaḍḍentiyā pana;  
Samuṭṭhānādayo sabbe, aṭṭhamena samā matā.
- Navamaṃ.
- 2183Naccam vā pana gītaṃ vā, vāditaṃ vāpi bhikkhunī;  
Dassanatthāya gaccheyya, tassā pācittiyam siyā.
- 2184Dassanatthāya naccassa, gītassa savanāya ca;  
Gacchantiyā siyā tassā, padavārena dukkaṭam.
- 2185Sace ekapayogena, oloketi ca passati;  
Suṇāti tesam gītampi, ekā pācitti dīpitā.
- 2186Aññasmimpi disābhāge, naccam passati ce pana;  
Suṇāti aññato gītaṃ, visuṃ pācittiyo siyuṃ.
- 2187Payogagaṇanāyettha, āpattigaṇanā siyā;  
Naccituṃ gāyituṃ neva, sayam labhati bhikkhunī.
- 2188‘Aññaṃ naccāti vādehi’, iti vattuṃ na vaṭṭati;  
‘‘Upaṭṭhānaṃ karomā’’ti, vutte vā sampaticchituṃ.
- 2189Tassā pācitti sabbattha, bhikkhuno hoti dukkaṭam;  
‘‘Upaṭṭhānaṃ karomā’’ti, vutte bhikkhuniyā pana.
- 2190‘‘Upaṭṭhānaṃ pasattha’’nti, vattumevaṃ tu vaṭṭati;  
Ārāmeveva ṭhatvā vā, yā passati suṇāti vā.
- 2191Attano ca ṭhitokāsaṃ, āgantvā ca payojitaṃ;  
Gantvā passantiyā vāpi, tathārūpā hi kāraṇā.
- 2192Passantiyā tathā maggaṃ, naccam paṭipathepi ca;  
Tathā ummattikādīna-manāpattāpadāsūpi.

**2193** Idameḷakalomena, samuṭṭhānaṃ samaṃ matam;  
Lokavajjamidaṃ pāpa-cittañceva tivedanaṃ.

Dasamaṃ.

Lasuṇavaggo paṭhamo.

**2194** Yādha rattandhakārasmiṃ, appadīpe panekikā;  
Santiṭṭhati sace saddhiṃ, purisena ca bhikkhunī.

**2195** Tassā pācittiyam vuttaṃ, saddhiṃ vā sallapantiyā;  
Hatthapāsaṃ samāgantvā, rahassādavasena tu.

**2196** Hatthapāsaṃ jahitvā vā, purisassa sace pana;  
Ajahitvāpi vā yakkha-petādīnampi bhikkhunī.

**2197** Santiṭṭhati ca yā tassā, dukkaṭam paridīpitaṃ;  
Anāpatti sace koci, dutiyā viññu vijjati.

**2198** Tathā ummattikādīna-mathaññavihitāya vā;  
Theyyasatthasamuṭṭhānaṃ, kriyaṃ saññāvimokkhakaṃ.

Paṭhamaṃ.

**2199** Dutiye tu “paṭicchanne, okāse” ti idaṃ pana;  
Adhikaṃ itaraṃ sabbaṃ, paṭhamena samaṃ matam.

Dutiyaṃ.

**2200** Tatiyepi catutthepi, apubbaṃ natthi kiñcipi;  
Samānaṃ paṭhameneva, samuṭṭhānādīnā saha.

Tatiyacatutthāni.

**2201** Chadananto nisīditvā, anovassappadesakaṃ;  
Ajjhokāse nisīditvā, upacāraṃpi vā sace.

**2202** Atikkameti yā, hoti, dukkaṭam paṭhame pade;  
Dutiye ca pade tassā, pācitti pariyāputā.

**2203** Pallānkassa anokāse, dukkaṭam samudīritaṃ;  
Tathāpuṭṭhe anāpuṭṭha-saññāya vicikicchato.

**2204** Asaṃhārimenāpatti, gilānāyāpadāsu vā;  
Samuṭṭhānādayo sabbe, kathinena samā matā.

Pañcamaṃ.

**2205** Ekāpatti nisīditvā, hoti gacchantiyā pana;  
Ekāva anisīditvā, nipajjitvā vajantiyā.

2206 Nisīditvā nipajjitvā, honti gacchantiyā duve;  
Sesaṃ anantareneva, samuṭṭhānādinā samaṃ.

Chaṭṭhaṃ.

2207 Chaṭṭhena sattamaṃ tulyaṃ, aṭṭhame natthi kiñcipi;  
Vattabbaṃ tisamuṭṭhānaṃ, sacittaṃ dukkhavedanaṃ.

Sattamaṭṭhamāni.

2208 Niraya brahmacariyehi, attānaṃ vā parampi vā;  
Abhisapeyya pācitti, vācato vācato siyā

2209 Ṭhapetvā nirayañceva, brahmacariyañca yā pana;  
“Sunakhī sūkarī kākī, kāṇā kuṇī” tiādinā.

2210 Akkosati ca vācāya, vācāyāpatti dukkaṭaṃ;  
Tikapācittiyaṃ vuttaṃ, sesāya tikadukkaṭaṃ.

2211 Purakkhatvā vadantīna-matthadhammānusāsaṇiṃ;  
Anāpattaṭṭhameneva, samuṭṭhānādayo samā.

Navamaṃ.

2212 Rodantiyā vadhitvā vā, pācitti paridīpitā;  
Dvīsu tesu panekekaṃ, dukkaṭaṃ tu karontiyā.

2213 Sesamuttānamevettha, samuṭṭhānādayo pana;  
Dhuranikkhepatulyāva, kriyāmatṭaṃ visesakaṃ.

Dasamaṃ.

Andhakāravaggo dutiyo.

2214 Nhāyati naggā yā pana hutvā;  
Sabbapayoge dukkaṭamassā;  
Tassa ca vosāne jinavuttaṃ;  
Bhikkhuni dosaṃ sā samupeti.

2215 Acchinnacīvarā natṭha-cīvarā āpadāsu vā;  
Na doseḷakalomena, samuṭṭhānādayo samā.

Paṭṭhamaṃ.

2216 Dutīye pana vattabbaṃ, apubbaṃ natthi kiñcipi;  
Samuṭṭhānādayo sabbe, sañcarittasamā matā.

Dutiyaṃ.

2217 Dussibbitaṃ visibbetvā, sibbanatthāya cīvaraṃ;  
Anantarāya taṃ pacchā, yā na sibbeyya bhikkhunī.

2218Ṭhapetvā catupañcāhaṃ, “na sabbissāmyaha”nti hi;  
Dhure nikkhittamatteva, tassā pācittiyaṃ siyā.

2219Pacchā sibbati pācitti, nikkhipitvā dhuraṃ sace;  
Tikapācittiyaṃ vuttaṃ, sesāya tikadukkaṭaṃ.

2220Vuttaṃ ubhinnaaññasmiṃ, parikkhāre tu dukkaṭaṃ;  
Anāpatti gilānāya, antarāyepi vā sati.

2221Atikkameti pañcāhaṃ, karontī vāpi cīvaraṃ;  
Dhuranikkhepanaṃ nāma, samuṭṭhānamidaṃ mataṃ.

Tatiyaṃ.

2222Pañcāhikaṃ tu saṅghāṭi-cāraṃ yātikkameyya hi;  
Hoti pācittiyāpatti, chaṭṭhe tassāruṇuggame.

2223Ekasmiṃ cīvare ekā, pañca pañcasu dīpitā;  
Ticīvarañca saṃkacci, dakasāṭīti pañca tu.

2224Ṭikapācitti pañcāhā-natikkante dvidukkaṭaṃ;  
Pañcame divase pañca, cīvarāni nisevati.

2225Otāpeti gilānāya, anāpattipadāsupi;  
Samuṭṭhānādayo sabbe, kathinena samā matā.

Catutthaṃ.

2226Gahetvā yā anāpucchā, saṅkametabbacīvaraṃ;  
Paribhuñjati aññissā, tassā pācittiyaṃ siyā.

2227Ṭikapācittiyaṃ vuttaṃ, sesāya tikadukkaṭaṃ;  
Acchinnacīvarā naṭṭha-cīvarā āpadāsu vā.

2228Tathā ummattikādīna-manāpatti pakāsītā;  
Kathinena samuṭṭhānaṃ, tulyametaṃ kriyākriyaṃ.

Pañcamaṃ.

2229Yā hi bhikkhuni saṅghassa, labhitabbaṃ tu cīvaraṃ;  
Nivāreti sace tassā, pācitti paridīpaye.

2230Gaṇassāpi ca ekissā, lābhe āpatti dukkaṭaṃ;  
Tathevaññaṃ parikkhāraṃ, nivāreti sace pana.

2231Ānisaṃsaṃ nidassetvā, nivāreti na dosatā;  
Adinnādānatulyāva, samuṭṭhānādayo matā.

Chaṭṭhaṃ.

2232Cīvarānaṃ vibhaṅgaṃ yā, paṭisedheyya dhammikaṃ;

Hoti pācittiyaṃ tassā, dukkaṭaṃ paridīpitaṃ.

**2233**Adhamme dhammasaññāya, ubho vematikāya vā;  
Ānisaṃsaṃ nidassetvā, paṭisedhentiyaṃ pana.

**2234**Tathā ummattikādīna-manāpatti pakāsītā;  
Samuṭṭhānādayo sabbe, anantarasamā matā.

Sattamaṃ.

**2235**Nivāsanūpagaṃ vāpi, tathā pārupanūpagaṃ;  
Kappabindukataṃ kiñci, muñcitvā sahadhammike.

**2236**Pitaropi panaññassa, dadeyya yadi cīvaraṃ;  
Yassa kassaci tassāpi, pācitti pariyāputā.

**2237**Gaṇanāya vasenettha, cīvarānaṃ tu tā pana;  
Pācittiyo gaṇetabbā, bhikkhuno dukkaṭaṃ siyā.

**2238**Tāvakālikamaññesa-manāpatti dadāti ce;  
Sañcarittasamā vuttā, samuṭṭhānādayo nayā.

Aṭṭhamaṃ.

**2239**Cīvarassa vibhaṅgaṃ yā, nisedhetvāna cīvare;  
Kālaṃ atikkameyyassā, dubbalāsāya dosatā.

**2240**Adubbale tu cīvare, sudubbalanti cetasā;  
Ubhosu kañkhitāya vā, avoca dukkaṭaṃ jino.

**2241**Ānisaṃsaṃ nidassetvā, nivāreti na dosatā;  
Adinnādānatulyāva, samuṭṭhānādayo matā.

Navamaṃ.

**2242**Dhammikaṃ kathinuddhāraṃ, yā nivāreyya bhikkhunī;  
Tassā pācittiyāpatti, munindena pakāsītā.

**2243**Ānisaṃso mahā hoti, yassa atthāramūlako;  
Uddhāramūlako appo, na dātabbo panīdiso.

**2244**Ānisaṃso mahā hoti, yassa ubbhāramūlako;  
Atthāramūlako appo, dātabbo evarūpako.

**2245**Tathā samānisaṃsopi, saddhāpālanakāraṇā;  
Ānisaṃsaṃ nidassetvā, paṭisedheti vaṭṭati.

**2246**Sesaṃ pana asesena, sattamena samaṃ mataṃ;  
Samuṭṭhānādinā saddhiṃ, apubbaṃ natthi kiñcipi.

Dasamaṃ.

## Naggavaggo tatiyo.

2247 Ekāya tu nipannāya, aparā vā nipajjatu;  
Nipajjeyyūṃ saheva dve, dvinnaṃ pācittiyāṃ siyā.

2248 Āpattibahukā ñeyyā, punappunaṃ nipajjane;  
Ekāya ca nipannāya, sace ekā nisīdati.

2249 Ubho vāpi nisīdanti, samaṃ, ummattikāya vā;  
Anāpatti samuṭṭhānaṃ, eḷakena samaṃ mataṃ.

## Paṭhamāṃ.

2250 Pāvāraḷaṣāsarādiṃ, santharivā panekakaṃ;  
Saṃhārimesu teneva, pārupitvā sace pana.

2251 Nipajjanti saheva dve, tāsāṃ pācittiyāṃ siyā;  
Ekasmīṃ dukkaṭaṃ dvinnaṃ, vuttaṃ tu dvikadukkaṭaṃ.

2252 Vavatthānaṃ nidassetvā, nipajjanti sace pana;  
Na dosummattikādīnaṃ, sesāṃ tulyāṃ panādīnā.

## Dutiyāṃ.

2253 Purato ca anāpucchā, yadi caṅkamanādayo;  
Kareyya pana pācitti, aññissāphāsukāraṇā.

2254 Nivattanānaṃ gaṇanāya tassā;  
Pācittiyānaṃ gaṇanā ca ñeyyā;  
Payogatoyeva bhavanti dosā;  
Nipajjanaṭṭhānanisīdanānaṃ.

2255 Uddesādīsu pācitti, padānaṃ gaṇanāvasā;  
Tikapācittiyāṃ vuttaṃ, sesāya tikadukkaṭaṃ.

2256 Na ca aphāsukāmāya, āpucchā purato pana;  
Tassā caṅkamanādīni, anāpatti karontiyā.

2257 Adinnādānatulyāva, samuṭṭhānādayo nayā;  
Kriyākriyamidaṃ pāpa- mānasaṃ dukkhavedanaṃ.

## Tatiyāṃ.

2258 Sayāṃ anantarāyā yā, dukkhitāṃ sahaḷviniṃ;  
Nupaṭṭhāpeyya caññāya, nupaṭṭheyya sayampi vā.

2259 Dhure nikkhattamatteva, tassā pācittiyāṃ siyā;  
Antevāsiniyā vāpi, dukkaṭaṃ itarāya vā.

2260 Anāpatti gilānāya, gavesitvālabhantiyā;  
Āpadummattikādīnaṃ, dhuranikkhepanodayaṃ.



## Catuttham.

- 2261 Sakam puggalikaṃ datvā, sakavāṭaṃ upassayaṃ;  
Sayam upassayā tamhā, nikkadḍhati sace pana.
- 2262 Ekeneva payogena, dvārādīsu bahūnipi;  
Taṃ nikkadḍhantiyā tassā, ekaṃ pācittiyam siyā.
- 2263 Payogagaṇanāyetha, pācittigaṇanā matā;  
Aṇattiyampi eseva, nayo vutto mahesinā.
- 2264 ‘Ettakāva imaṃ dvārā, nikkadḍhāhī’ ti bhāsati;  
Ekāyāṇattiyā dvāra-gaṇanāpattiyo siyuṃ.
- 2265 Dukkaṭaṃ akavāṭamhā, sesāya tikadukkaṭaṃ;  
Ubhinnaṃ pana sabbattha, parikkhāresu dukkaṭaṃ.
- 2266 Sesamettha asesena, samuṭṭhānādinā saha;  
Saṅghikā hi vihārasmā, nikkadḍhanasamaṃ matam.

## Pañcamaṃ.

- 2267 Chaṭṭhe panidha vattabbaṃ, apubbaṃ natthi kiñcipi;  
Sikkhāpadenariṭṭhassa, sadisova vinicchayo.

## Chaṭṭham.

- 2268 Sāsankasammate anto-ratṭhe bhikkhuniyā pana;  
Carantiyā siyāpatti, vinā satthena cārikaṃ.
- 2269 Gāmantarapavese ca, araññe addhajojane;  
Pācittiyano nēyyo, bhikkhunā vinayaññunā.
- 2270 Na doso saha satthena, khemaṭṭhānāpadāsu vā;  
Idaṃ eḷakalomena, samuṭṭhānādinā samaṃ.

## Sattamaṃ.

- 2271 Aṭṭhame navame vāpi, anuttānaṃ na vijjati;  
Sattamena samānāni, samuṭṭhānādinā saha.

## Aṭṭhamanavamāni.

- 2272 Pācitti dhuranikkhepe, ‘na gamissāmyaha’ nti ca;  
Katvā ca dhuranikkhepaṃ, pacchā gacchantiyā tathā.
- 2273 Yojanāni pavāretvā, pañca gantumpi vaṭṭati;  
Chasu vattabbamevatthi, kinu nāmidha taṃ siyā.
- 2274 Tīṇi gantvā ca teneva, paccāgantum na vaṭṭati;  
Aññena pana maggena, pacchāgacchati vaṭṭati.

2275 Anāpattantarāyasmim, tassā dasavidhe sati;  
Āpadāsu gilānāya, alābhe dutiyāya vā.

2276 Rājacoramanussaggi-toyavāḷasarīsapā;  
Manussajīvitabrahma-cariyassantarāyikā.

2277 Samuṭṭhānādinā tulyaṃ, paṭhamantimavatthunā;  
Ayameva viseso hi, akriyaṃ dukkhavedanaṃ.

Dasamaṃ.

Tuvaṭṭavaggo catuttho.

2278 Rājāgāraṃ cittāgāraṃ, ārāmaṃ kīḷuyyānaṃ vā;  
Kīḷāvāpiṃ nānākāraṃ, daṭṭhuṃ gacchantinaṃ tāni.

2279 Niddiṭṭhaṃ muninā tāsamaṃ, dukkaṭaṃ tu pade pade;  
Padaṃ anuddharitvāva, sace passanti pañcapi.

2280 Ekāyeva panāpatti, pācitti paridīpitā;  
Gantvā passanti ce taṃ taṃ, pāṭekkāpattiyo siyuṃ.

2281 Payogabahutāyāpi, pācittibahutā siyā;  
Bhikkhussa pana sabbattha, hoti āpatti dukkaṭaṃ.

2282 Avaseso anāpatti-kathāmaggavinicchayo;  
Naccadassanatulyova, samuṭṭhānādinā saha.

Paṭhamaṃ.

2283 Āsandiṃ vā pallaṅkaṃ vā, māṇanātītaṃ vāḷūpetamaṃ;  
Sevantīnaṃ yāsaṃ tāsamaṃ, pācittāpattiṃ satthāha.

2284 Nisīdanassāpi nipajjanassa;  
Payogabāhullavasena hoti;  
Iccevamaccantayasena vuttā;  
Pācittiyānaṃ gaṇanā panevaṃ.

2285 Pāde āsandiya chetvā, bhivā pallaṅkavāḷake;  
Anāpatti samuṭṭhāna-manantarasamaṃ mataṃ.

Dutiyamaṃ.

2286 Channaṃ aññataraṃ suttaṃ, yadi kantati bhikkhunī;  
Yattakaṃ aññitaṃ hatthā, tasmim takkamhi veṭhite.

2287 Ekā pācitti niddiṭṭhā, suttakantanato pana;  
Sabbapubbapayogesū, dukkaṭaṃ hatthavārato.

2288 Na doso kantitaṃ suttaṃ, puna kantantiyā pana;  
Idaṃ eḷakalomena, samuṭṭhānādinā samaṃ.

## Tatiyaṃ.

2289 Koṭṭanaṃ taṇḍulānaṃ tu, ādiṃ katvāna dukkaṭaṃ;  
Sabbapubbapayogesu, veyyāvaccamaṃ karontiyā.

2290 Bhājanāni gaṇetvāva, pācitti yāguādisu;  
Khajjakādīsu rūpānaṃ, gaṇanāya hi dīpaye.

2291 Sace mātāpitūnampi, āgatānaṃ panattano;  
Kiñci kammaṃ akāretvā, kiñci kātuṃ na vaṭṭati.

2292 Saṅghassa yāgupāne vā, saṅghabhattepi vā tathā;  
Cetiyaassa ca pūjāya, veyyāvaccakarassa vā.

2293 Attano ca anāpatti, tathā ummattikāya vā;  
Samuṭṭhānādayo sabbe, tatiyena samā matā.

## Catutthaṃ.

2294 Pācitti dhuranikkhepe, yathā cīvarasibbane;  
Tathā idha panekāhaṃ, parihāro na labbhati.

2295 Sesamaṃ vuttanayeneva, tattha cīvarasibbane;  
Samuṭṭhānādinā saddhiṃ, veditabbaṃ vibhāvinā;

## Pañcamaṃ.

2296 Kāyena kāyabaddhena, tathā nissaggiyena vā;  
Gihīnaṃ pana yaṃ kiñci, dantaponodakaṃ vinā.

2297 Ajjhoharaṇiyaṃ aññaṃ, aññesaṃ tu dadāti yā;  
Hoti pācittiyaṃ tassā, ṭhapetvā sahadhammike.

2298 Dantakaṭṭhodake vuttaṃ, dukkaṭaṃ muninā idha;  
Yā na deti ca dāpeti, nikkhamitvāpi dentiyā.

2299 Deti bāhiralepaṃ vā, na dosummattikāya vā;  
Samuṭṭhānādayo sabbe, tatiyena samā matā.

## Chaṭṭhaṃ.

2300 Adatvā paribhuñjeyya, yā cāvasathacīvaraṃ;  
Divase tu catutthe taṃ, dhovitvā puna cīvaraṃ.

2301 Sāmaṇerāya vā anta-maso utuniyā sace;  
Tassā pācittiyaṃ vuttaṃ, tikaṃ pācittiyaṃ siyā.

2302 Tassā nissajjite tasmim, vuttaṃ tu dvikadukkaṭaṃ;  
Utunīnaṃ abhāve tu, aññāsaṃ puna pariyaye.

2303 Acchinnacīvarādīna-manāpattāpadāsūpi;

Samuṭṭhānādayo sabbe, kathinena samā matā.

Sattamaṃ.

- 2304** Adatvā rakkhaṇatthāya, vihāraṃ sakavāṭakaṃ;  
Hoti pācittiyaṃ tassā, cārikaṃ pakkamantiyā.
- 2305** Attano gāmato aññaṃ, gāmaṃ gacchantiyā pana;  
Parikkhattavihārassa, parikkhepampi vā tathā.
- 2306** Itarassupacāraṃ vā, paṭhamena padena taṃ;  
Dukkaṭaṃ samatikkante, pācitti dutiyena tu.
- 2307** Akavāṭabandhanasmim, dukkaṭaṃ paridīpitaṃ;  
Antarāye anāpatti, jaggikaṃ alabhantiyā.
- 2308** Āpadāsu gilānāya, tathā ummattikāya vā;  
Samuṭṭhānādayo sabbe, kathinena samā matā.

Aṭṭhamaṃ.

- 2309** Hatthiassarathādīhi, saṃyuttaṃ sippameva vā;  
Parūpaghātaṃ mantā-gadayogappabhedakaṃ.
- 2310** Pariyāpuṇeyya ce kiñci, yassa kassaci santike;  
Hoti pācittiyaṃ tassā, padādīnaṃ vasenidha.
- 2311** Lekhe pana anāpatti, dhāraṇāya ca guttiyā;  
Parittesu ca sabbesu, tathā ummattikāya vā.

Navamaṃ.

- 2312** Dasame natthi vattabbaṃ, navamena samaṃ idaṃ;  
Samuṭṭhānādayo dvinnaṃ, padasodhammasādisā.

Dasamaṃ.

Cittāgāravaggo pañcamaṃ.

- 2313** Sabhikkhukaṃ panārāmaṃ, jānitvā pavisantiyā;  
Anāpucchāva yaṃ kiñci, pācitti pariyāputā.
- 2314** Sace antamaso rukkha-mūlassapi ca bhikkhunī;  
Anāpucchā parikkhepaṃ, atikkāmeti yā pana.
- 2315** Upacārokkame vāpi, aparikkhattakassa tu;  
Dukkaṭaṃ paṭhame pāde, pācitti dutiye siyā.
- 2316** Abhikkhuke sabhikkhūti, saññāya panubhosupi;  
Jātaṅkākhāya vā tassā, hoti āpatti dukkaṭaṃ.

2317 Paṭhamam pavisantīnam, tāsam sīsānulokikā;  
Tā sannipatitā yattha, tāsam gacchati santikam.

2318 Santam bhikkhum panāpucchā, maggo vārāmamajjhato;  
Tena gacchantiyā vāpi, āpadāsu visantiyā.

2319 Tathā ummattikādīna-manāpatti pakāsītā;  
Dhurānikkhepatulyāva, samuṭṭhānādayo nayā.

Paṭhamam.

2320 Akkoseyya ca yā bhikkhum, paribhāseyya vā pana;  
Tikapācittiyam tassā, sese ca tikadukkaṭam.

2321 Purakkhatvā vadantīna-;  
Matthadhammānusāsaniṃ;  
Na dosomasavādena;  
Tulyo sesanayo mato.

Dutiyam.

2322 Yā saṅgham paribhāseyya, tassā pācittiyam siyā;  
Ekam sambahulā vāpi, tatheva itarāya vā.

2323 Paribhāsantiyā tassā, dukkaṭam paridīpitaṃ;  
Sesam anantareneva, samuṭṭhānādīnā samam.

Tatiyam.

2324 Nīmantitāpi vā sace, pavāritāpi vā pana;  
Nīmantanapavāraṇā, ubhopi vuttalakkhaṇā.

2325 Purebhattam tu yāguṇca, ṭhapetvā kālikattayam;  
Yā cājjhoharaṇatthāya, yam kiñci pana āmisam.

2326 Paṭiggaṇhāti ce tassā, gahaṇe dukkaṭam siyā;  
Ajjhohāravasenettha, pācitti paridīpitā.

2327 Kālikāni ca tīṇeva, āhāratthāya gaṇhāti;  
Gahaṇe dukkaṭam vuttam, tathā ajjhoharantiyā.

2328 Nīmantitā yā pana appavāritā;  
Sacepi yāguṇ pivatīdha vaṭṭati;  
Tathā kathetvā puna sāmikassa vā;  
Sacepi sā bhuñjati aññabhojanam.

2329 Kālikāni ca tīṇeva, paccaye sati bhuñjati;  
Tathā ummattikādīnam, anāpatti pakāsītā.

2330 Samuṭṭhānamidaṃ tulyam, addhānena kriyākriyam;  
Nīmantitā anāpucchā, sāmim bhuñjati ce pana.

**2331**Kappiyaṃ pana kāretvā, akāretvāpi vā yadi;  
Paribhuñjati yā tassā, pācitti kriyato siyā.

Catutthaṃ.

**2332**Bhikkhunīnaṃ avaṇṇaṃ vā, pācitti kulasantike;  
Kulassāvaṇṇanaṃ vāpi, bhikkhunīnaṃ vadantiyā.

**2333**Santaṃ bhāsantiyā dosaṃ, na dosummattikāya vā;  
Omasavādatulyāva, samuṭṭhānādayo nayā.

Pañcamaṃ.

**2334**Addhayaṃjanato ore, bhikkhu ovādadāyako;  
Na vasati sace maggo, akhemo vā sace siyā.

**2335**Ayaṃ abhikkhuko nāma, āvāso pana tattha hi;  
Upagacchantiyā vassaṃ, āpatti aruṇuggame.

**2336**Pakkantā pakkhasaṅkantā, vibbhantā vā matāpi vā;  
Vassaṃ upagatā bhikkhū, anāpattāpadāsupi.

**2337**Seso ñeyyo kathāmaggo;  
Bhikkhunovādako pana;  
Idaṃ eḷakalomena;  
Samuṭṭhānādinā samaṃ.

Chaṭṭhaṃ.

**2338**Yā bhikkhunubhatosaṅghe, vassaṃvuṭṭhā tato puna;  
“Nāhaṃ pavāressāmi”ti, sā nikkhipati ce dhuraṃ.

**2339**Dhure nikkhattamattasmiṃ, tassā pācittiyaṃ siyā;  
Sati vā antarāyasmīṃ, gilānāyāpadāsupi.

**2340**Pariyesitvāpi vā bhikkhuṃ, na doso alabhantiyā;  
Idaṃ tu dhuranikkhepa-samuṭṭhānamudīritaṃ.

Sattamaṃ.

**2341**“Ovādādīnamatthāya, na gacchissāmyaha”nti hi;  
Dhure nikkhattamattasmiṃ, pācitti paridīpaye.

**2342**Śadisaṃ tu samuṭṭhānaṃ, paṭhamantimavatthunā;  
Akriyaṃ lokavajjaṅca, kāyikaṃ dukkhavedanaṃ.

Aṭṭhamaṃ.

**2343**“Na yācissāmi ovādaṃ, na pucchissāmuposathaṃ”;  
Icevaṃ pana nikkhitte, dhure pācittiyaṃ siyā.

**2344**Sati vā antarāyasmim, gilānāyāpadāsu vā;  
Na doso pariyesitvā, dutiyaṃ alabhantiyā.

**2345**Aṭṭhamepi anāpatti, evameva pakāsītā;  
Idaṃ tu dhuranikkhepa-samuṭṭhānamudīritam.

Navamaṃ.

**2346**Pasākhe pana sañjātaṃ, gaṇḍaṃ rucitameva vā;  
Anāpucchāva saṅghaṃ vā, gaṇaṃ ekena ekikā.

**2347**‘‘Bhinda phālehi dhovā’’ti, sabbānevāṇāpentiya;  
Katesu dukkaṭāniccha, tassā pācittiyo cha ca.

**2348**‘‘Yamettha atthi kātabbaṃ, taṃ sabbaṃ tvaṃ karohi’’ti;  
Āṇāpeti sace evaṃ, so ca sabbaṃ karoti ce.

**2349**Ekāya pana vācāya, dukkaṭāni panaccha ca;  
Tassā pācittiyacchakkaṃ, dvādasāpattiyo siyuṃ.

**2350**Bhedanādīsu ekaṃ sā, āṇāpeti sace pana;  
So karoti ca sabbāni, ekaṃ pācittiyaṃ siyā.

**2351**Āpucchitvāpi vā viññuṃ, gahetvā dutiyampi vā;  
Bhedanādīni sabbāni, kārapeti sace pana.

**2352**Tassā ummattikādīna-manāpatti pakāsītā;  
Samuṭṭhānādayo sabbe, kathinena samā matā.

Dasamaṃ.

Ārāmaṃvaggo chaṭṭho.

**2353**Gaṇaṃpariyesanādismim, gabbhiniṃ vuṭṭhapentiya;  
Ñattiyā kammavācāhi, upajjhāyāya dukkaṭaṃ.

**2354**Kammavācāya osāne, pācitti pariyāputā;  
Tathā gabbhinisaññāya, na ca gabbhiniyā pana.

**2355**Ubho sañjātaṃkaṅkhāya, hoti āpatti dukkaṭaṃ;  
Tathācariniyā tassā, gaṇassāpi ca dīpitaṃ.

**2356**Dvīsvagabbhinisaññāya, na dosummattikāya vā;  
Adinnādānatulyāva, samuṭṭhānādayo nayā.

Paṭhamaṃ.

**2357**Dutiye natthi vattabbaṃ, paṭhamena samaṃ matam;  
Samuṭṭhānādinā saddhiṃ, natthi kāci visesatā.

Dutiyaṃ.

**2358**Chasvasikkhitasikkhaṃ tu, sikkhamānañhi bhikkhunī;  
Dve vassāni siyāpatti, vuṭṭhāpeyya sace pana.

**2359**Tikapācittiyaṃ vuttaṃ, dhammakamme tu satthunā;  
Adhamme pana kammaṣmiṃ, dīpitaṃ tikadukkaṭaṃ.

**2360**Chasu sikkhitasikkhaṃ yā, dve vassāni akhaṇḍato;  
Vuṭṭhāpeti anāpatti, tathā ummattikāya vā.

**2361**Imā hi cha ca sikkhāyo, saṭṭhivassāpi ce pana;  
Pabbajjāya padātabbā, adatvā na ca kāraye.

Tatiyaṃ.

**2362**Catutthe natthi vattabbaṃ, idha saṅghena sammataṃ;  
Sikkhamānāmanāpatti, hoti taṃ vuṭṭhapentiyā.

**2363**Adinnā paṭhamam hoti, sace vuṭṭhānasammuti;  
Tatthāpi ca padātabbā, upasampadamāḷake.

**2364**Tatiyañca catutthañca, samuṭṭhānādinā pana;  
Paṭhamena samaṃ ñeyyaṃ, catutthaṃ tu kriyākriyaṃ.

Catutthaṃ.

**2365**Ūnadvādasavassaṃ tu, kañci gihigataṃ pana;  
Paripuṇṇāti saññāya, na doso vuṭṭhapentiyā.

**2366**Hoti vānupasampannā, upasampādītāpi sā;  
Asesena ca sesaṃ tu, paṭhamena samaṃ mataṃ.

Pañcamaṃ.

**2367**Chaṭṭhaṃ tu tatiye vutta-nayeneva vibhāvaye;  
Sattamāpi tathā sabbam, catutthena samaṃ mataṃ.

Chaṭṭhasattamāni.

**2368**Yaṃ tuvaṭṭakavaggasmiṃ, dukkhitam sahaḷviniṃ;  
Vuttaṃ tena samaṃ ñeyyaṃ, aṭṭhamam na visesatā.

Aṭṭhamam.

**2369**Dve vassāni ca yā kāci, vuṭṭhāpitapavattiniṃ;  
Nānubandheyya ce tassā, pācitti pariyāputā.

**2370**‘Dve vassāni ahaṃ nānu-bandhissāmī’ ti ce pana;  
Dhure nikkhattamattasmiṃ, tassā pācittiyaṃ siyā.

**2371**Tañca bālamalajjiṃ vā, gilānāyāpadāsu vā;  
Nānubandhantiyā tassā, na dosummattikāya vā.



2372 Samuṭṭhānādayo tulyā, paṭhamantimavatthunā;  
Idaṃ panākriyaṃ vuttaṃ, vedanā dukkhavedanā.

Navamaṃ.

2373 Vuṭṭhāpetvā tu yā kāci, bhikkhunī sahaḷviniṃ;  
Taṃ gaheṭvā na gaccheyya, na caññaṃ āṇapeyya ce.

2374 Dhure nikkhattamattasmiṃ, tassā pācittiyaṃ siyā;  
Sati vā antarāyasmīṃ, dutiyaṃ alabhantiyā.

2375 Āpadāsu gilānāya, tathā ummattikāya vā;  
Na doso dhuranikkhepa-samuṭṭhānamidaṃ pana.

Dasamaṃ.

Gabbhinivaggo sattamo.

2376 Kumāribhūtavaggassa, paṭhamādīni tīṇipi;  
Gihigatehi tīheva, sadisānīti niddise.

2377 Yā mahūpapadā dve tu, sikkhamānā panādito;  
“Gaṭā vīsativassā”ti, viññātabbā vibhāvinā.

2378 Sace gihigatā honti, na ca vā purisaṃ gatā;  
“Sikkhamānā”ti vattabbā, tā hi sammutiādisu.

2379 Na tā “kumāribhūtā”ti, tathā “gihigatā”ti vā;  
Vattabbā panubhopetā, evaṃ vattuṃ na vaṭṭati.

2380 Sammutiṃ dasavassāya, datvā dvādasavassikā;  
Kattabbā upasampannā, sesāsupi ayaṃ nayo.

2381 Yā aṭṭhārasavassā tu, tato paṭṭhāya sā pana;  
Vuttā “kumāribhūtā”ti, tathā “gihigatā”tipi.

2382 Vuttā “kumāribhūtā”ti, sāmaṇerī hi yā pana;  
“Kumāribhūtā” icceva, vattabbā na panaññathā.

2383 Etā tu pana tissopi, sikkhāsammudidānato;  
“Sikkhamānā”ti vattumpi, vaṭṭateva na saṃsayo.

Tatiyaṃ.

2384 Ūnavādasavassāva, vuṭṭhāpeti sace paraṃ;  
Hutvā sayamupajjhāyā, sikkhamānaṃ tu bhikkhunī.

2385 Pubbe vuttanayeneva, dukkaṭānamanantaraṃ;  
Kammavācānamosāne, tassā pācitti dīpitā.

Catutthaṃ.

**2386**Pañcame natthi vattabbaṃ, catutthaṃ pañcamampi ca;  
Ubhayaṃ tisamuṭṭhānaṃ, pañcamaṃ tu kriyākriyaṃ.

Pañcamaṃ.

**2387**Saṅghenuaparikkhitvā, “alaṃ tāvā”ti vāritā;  
Upasampāditenettha, pacchā khīyati dosatā.

**2388**Ujjhāyati sace chanda-dosādīhi karontiyā;  
Na doso tisamuṭṭhānaṃ, sacittaṃ dukkhavedanaṃ.

Chaṭṭhaṃ.

**2389**Laddhe ca cīvare pacchā, asante antarāyike;  
“Vuṭṭhāpessāmi nāha”nti, dhuranikkhepane pana.

**2390**Hoti pācittiyaṃ tassā, gilānāyāpadāsupi;  
Na doso pariyesitvā, parisam alabhantiyā.

**2391**Īdañhi dhuranikkhepa-samuṭṭhānaṃ sacittakaṃ;  
Akriyaṃ lokavajjañca, hotidaṃ dukkhavedanaṃ.

Sattamaṃ.

**2392**Aṭṭhamaṃ sattameneva, sadisaṃ pana sabbathā;  
Navamepi ca vattabbaṃ, natthi uttānamevidaṃ.

**2393**Natthājānantiyā doso, tathā ummattikāya vā;  
Adinnādānatulyāva, samuṭṭhānādayo nayā.

Aṭṭhamanavamāni.

**2394**Mātarā pitarā vātha, nānuññātaṃ tu sāminā;  
Tassā pācittiyāpatti, taṃ vuṭṭhāpentiyā siyā.

**2395**Upasampadakālasmiṃ, tathā pabbājanakkhaṇe;  
Dvikkhattuṃ pucchitabbaṃ tu, bhikkhunīhi, na bhikkhunā.

**2396**Anāpatti na jānāti, mātuādīnamatthitaṃ;  
Idaṃ catusamuṭṭhānaṃ, vācato kāyavācato.

**2397**Vācāmānasato ceva, kāyavācādītopi ca;  
Kriyākriyamacittañca, ticittañca tivedanaṃ.

Dasamaṃ.

**2398**Yā pārivāsikenettha, chanda-dānena bhikkhunī;  
Vuṭṭhāpeti sace sikkha-mānaṃ pācittiyaṃ siyā.

**2399**Avuṭṭhitāyanāpatti, parisāyāvihāya vā;  
Chandaṃ tu tisamuṭṭhānaṃ, ticittañca tivedanaṃ.

## Ekādasamaṃ.

2400 Dvādase terase vāpi, vattabbaṃ natthi kiñciṃ;  
Samuṭṭhānādayo sabbe, anantarasamā matā.

## Dvādasamaterasamāni.

## Kumārībhūtavaggo aṭṭhamo.

2401 Samaṇī agilānā yā, dhāreyya chattupāhanaṃ;  
Tassā pācittiyāpatti, hotīti pariyāputā.

2402 Sace ekapayogena, maggassa gamane pana;  
Divasampi ca dhāreti, ekaṃ pācittiyaṃ siyā.

2403 Kaddamādīni passivā, omuñcitvā upāhanā;  
Chattameva ca dhārentī, yadi gacchati dukkaṭaṃ.

2404 Sace upāhanāruḷhā, disvā gacchādikaṃ pana;  
Taṃ chattamaṇāmetvā, dukkaṭaṃ hoti gacchati.

2405 Chattampi aṇāmetvā, omuñcitvā upāhanā;  
Puna dhārentiyā tassā, hoti pācittiyaṃ pana.

2406 Payogagaṇanāyeva, pācittigaṇanā siyā;  
Tikapācittiyaṃ vuttaṃ, tatheva dvikadukkaṭaṃ.

2407 Ārāme upacāre vā, doso natthāpadāsūpi;  
Idaṃ eḷakalomena, samuṭṭhānādinā samaṃ.

## Paṭhamamaṃ.

2408 Hoti bhikkhuniyā yānā, orohitvā punappunaṃ;  
Abhirūhantiyāpatti, payogagaṇanāvasā.

2409 Āpadāsu anāpatti, tathā ummattikāya vā;  
Sesaṃ anantareneva, samuṭṭhānādinā samaṃ.

## Dutiyamaṃ.

2410 Yā ca dhāreyya saṅghāṇiṃ, yaṃ kiñciṃ kaṭūpiyaṃ;  
Tassā pācittiyāpatti, hotīti pariyāputā.

2411 Dhārentiyā panetthāpi, omuñcitvā punappunaṃ;  
Payogagaṇanāyeva, tassā pācittiyō siyuṃ.

2412 Ābādhapaccayā yā tu, dhāreti kaṭisuttakaṃ;  
Tathā ummattikādīna-manāpatti pakāsītā.

2413 Sesaṃ tu paṭhameneva, sadisanti pakāsitaṃ;  
Idha cākusalaṃ cittaṃ, lokavajjaṃ visesātā.

## Tatiyaṃ.

2414 Dhāreti pana yaṃ kiñci, sace sīsūpagādisu;  
Tassā tassa ca vatthussa, gaṇanāpattiyo siyuṃ.

2415 Ābādhapaccayā doso, kiñci dhārentiyā na ca;  
Sesaṃ anantareneva, sadisaṃ paridīpitaṃ.

## Catutthaṃ.

2416 Yena kenaci gandhena, savaṇṇāvaṇṇakena ca;  
Nhāsantiyā panāpatti, nhānosāne pakāsītā.

2417 Gandhayanato sabba-payoge dukkaṭaṃ siyā;  
Ābādhapaccayā doso, natthi ummattikāya vā.

2418 Sesaṃ tu tatiyeneva, sadisaṃ sabbathā mataṃ;  
Chaṭṭhampi tatiyeneva, sadisanti pakāsitaṃ.

## Pañcamachaṭṭhāni.

2419 Ubbatṭāpeyya caññāya, sambāhāpeyya vā tathā;  
Hoti bhikkhuniyāpatti, sace bhikkhuniyā pana.

2420 Ettha hatthamamocetvā, ekā ubbatṭane siyā;  
Mocetvā pana mocetvā, payogagaṇanā siyā.

2421 Sambāhanepi eseva, nayo ñeyyo vibhāvinā;  
Āpadāsu gilānāya, anāpatti pakāsītā.

2422 Sesaṃ tu tatiyeneva, samuṭṭhānādinā samaṃ;  
Sattamena samānāva, aṭṭhamādīni tīṇipi.

## Sattamaṭṭhamanavamadasamāni.

2423 Yā antoupacārasmiṃ, bhikkhussa purato pana;  
Anāpucchā nisīdeyya, chamāyapi na vaṭṭati.

2424 Tikapācittiyaṃ vuttaṃ, pucchite dukkaṭadvayaṃ;  
Āpadāsu gilānāya, na dosummattikāya vā.

2425 Idaṃ pana samuṭṭhānaṃ, kathinena samaṃ mataṃ;  
Kriyākriyamacittaṅca, ticittaṅca tivedanaṃ.

## Ekādasamaṃ.

2426 Anokāsakataṃ bhikkhuṃ, pañhaṃ puccheyya dosatā;  
Vinaye ca katokāsaṃ, suttaṃ pucchantiyāpi ca.

2427 Kāretvā pana okāsaṃ, anodissāpi pucchati;  
Na doso padasodhamma-samuṭṭhānamidaṃ pana.

Dvādasamaṃ.

2428 Saṃkaccikaṃ vinā gāmaṃ, padasā pavisantiyā;  
Parikkhittassa gāmassa, parikkhepokkame pana.

2429 Dukkaṭaṃ paṭhame pāde, pācitti dutiye siyā;  
Upacārokkamepettha, eseva ca nayo mato.

2430 Yassā saṃkaccikaṃ naṭṭhaṃ, acchinnaṃ vāpi kenaci;  
Anāpatti siyā tassā, gilānāyāpadāsupi.

2431 Idameḷakalomena, samuṭṭhānādinā samaṃ;  
Sesaṃ vuttanayeneva, viññātabbaṃ vibhāvīnā.

Terasamaṃ.

Chattupāhanavaggo navamo.

Iti vinayavinicchaye pācittiyakathā niṭṭhitā.

### Pāṭidesanīyakathā

2432 Agilānā sace sappiṃ, laddhaṃ viññattiyā sayamaṃ;  
‘‘Bhuñjissāmi’’ti gahaṇe, dukkaṭaṃ paridīpitaṃ.

2433 Ajjhohāravaseneva, pāṭidesaniyaṃ siyā;  
Tipāṭidesaniyaṃ tu, gilānāya dvidukkaṭaṃ.

2434 Gilānā viññāpetvāna, pacchā sevantiyāpi ca;  
Gilānāyāvasesaṃ vā, viññattaṃ nātakādito.

2435 Aññassatthāya vā atta-dhanenummattikāya vā;  
Anāpatti samuṭṭhānaṃ, addhānasadisamaṃ mataṃ.

Paṭhamaṃ.

2436 Ayameva ca sesesu, dutiyādīsu nicchayo;  
Samuṭṭhānādinā saddhiṃ, natthi kāci visesatā.

2437 Anāgatesu sabbesu, sappiādīsu pāḷiyaṃ;  
Bhuñjantiyā tu viññatvā, aṭṭhasupi ca dukkaṭaṃ.

Iti vinayavinicchaye

Pāṭidesanīyakathā niṭṭhitā.

2438 Sekhiyā pana ye dhammā, uddiṭṭhā pañcasattati;  
Tesaṃ mahāvibhaṅge tu, vutto atthavinicchayo.

Iti vinayavinicchaye

Sikkhākaṇṭīyakathā niṭṭhitā.

2439 Ubhatopātīmokkhānaṃ;  
Savibhaṅgānameva yo;  
Attho aṭṭhakathāsāro;  
So ca vutto visesato.

2440 Tañca sabbaṃ samādāya, vinayassa vinicchayo;  
Bhikkhūnaṃ bhikkhunīnañca, hitatthāya kato mayā.

2441 Imaṃ paṭibhānājantu no jantuno;  
Suṇanti vinaye hi te ye hite;  
Janassa sumatāyane tāyane;  
Bhavanti pakatañño tañño.

2442 Bahusāranaye vinaye parame;  
Abhipatthayatā hi visāradatā;  
Paramā pana buddhimatā mahatī;  
Kaṇṭīyatamā yatinādaratā.

2443 Avagacchati yo pana bhikkhu imaṃ;  
Vinayassa vinicchayamatthayutaṃ;  
Amaraṃ ajaraṃ arajaṃ arujaṃ;  
Adhigacchati santipadaṃ pana so.

Iti vinayavinicchaye

Bhikkhunīvibhaṅgakathā niṭṭhitā.

**Khandhakakathā**

**Mahāvaggo**

**Mahākhandhakakathā**

**Pabbajjākathā**

2444 Sīlakkhandhādiyuttena, subhakkhandhena desite;  
Khandhakepi pavakkhāmi, samāsenā vinicchayaṃ.

2445 Mātarā ananuññātaṃ, pitarā vāpi bhikkhuno;  
Bhaṅḍukammamapucchitvā, pabbājentassa dukkaṭaṃ.

2446 Uddesaparipecchāya, sayāṃ ce byāvaṭo siyā;  
Daharo āṇāpetabbo, pabbājetvānāyāti ca.

2447 Upajjhāyamathuddissa, avutto daharo pana;  
Pabbājeti sace taṃ so, sayamevāpi vaṭṭati.

2448 Sāmaṇeropī vattabbo, daharo natthi tattha ce;  
“Khaṅḍasīmamaṃ netvā, pabbājetvānāyā”ti ca.

- 2449 Saraṇāni panetassa, dātabbāneva attanā;  
Evampi bhikkhunāyeva, hoti pabbājito naro.
- 2450 Purisaṃ bhikkhuto añño, pabbājeti na vaṭṭati;  
Itthiṃ bhikkhunito añño, pabbājeti na vaṭṭati.
- 2451 Sāmaṇeropi vā dātuṃ, sāmaṇerīpi vā tathā;  
Āṇattiyā ubhinnampi, kāsāyāni labhanti te.
- 2452 Sayameva ca yaṃ kiñci, pabbājentena bhikkhunā;  
Kesāpanayanaṃ katvā, paṭhamaṃ uduke puna.
- 2453 Nhāpetabbo siyā suṭṭhu, ghaṃsitvā gomayādinā;  
Sarīre pīlakā vāpi, kacchu vā tassa honti ce.
- 2454 Mātā yathā niyaṃputtaṃ, na jigucchati sabbaso;  
Nhāpetabbova yatinā, tatheva ajigucchatā.
- 2455 Kasmā? Panettakenāpi, upakārena sāsane;  
So sadā balavasneho, hotupajjhāyakādisu.
- 2456 Vinodetvā panuppannaṃ, ukkaṇṭhaṃ kulaputtakā;  
Sikkhāyo paripūretvā, nibbānaṃ pāpuṇanti hi.
- 2457 Gandhacūṇṇena vā pacchā, cūṇṇenapi haliddiyā;  
Sarīraṃ tassa sīsaṅca, ubbaṭṭetvā punappunaṃ.
- 2458 Gihigandhaṃ vinodetvā, kāsāyāni panekato;  
Dvattikkhattuṃ sakiṃ vāpi, dātabbānissa bhikkhunā.
- 2459 Atha hatthepi vā tassa, adatvā sayameva taṃ;  
Acchādeti upajjhāyo, vaṭṭatācariyopi vā.
- 2460 Nivāseti anāṇatto, so pārupati vā sayamaṃ;  
Apanetvā tato sabbamaṃ, puna dātabbameva taṃ.
- 2461 Bhikkhunā tu sahatthena, tathā āṇattiyāpi vā;  
Dinnaṃ vaṭṭati kāsāvaṃ, nādinnaṃ pana vaṭṭati.
- 2462 Tasseva santakaṃ vāpi, kā kathā attasantake;  
Vandāpetvā tattha bhikkhū, kārapetvāna ukkuṭṭiṃ.
- 2463 Añjaliṃ paggaḥāpetvā, dātabbaṃ saraṇattayaṃ;  
Paṭipāṭivaseneva, na ca uppaṭipāṭiyā.
- 2464 Sace ekapadaṃ vāpi, deti ekakkharampi vā;  
Paṭipāṭiṃ virajjhivā, gahitaṃ ce na vaṭṭati.
- 2465 Tikkhattuṃ yadi vā deti, buddhaṃ saraṇameva vā;  
Tathā sesesu cevampi, na dinnāneva honti hi.
- 2466 Katvānunāsikantāni, ekābaddhāni vā pana;

Vicchinditvātha ma-ntāni, dātabbāni vijānatā.

2467 Upasampadakammaṃ tu, ekatosuddhiyā siyā;  
Na hoti pana pabbajjā, ubhatosuddhiyā vinā.

2468 Tasmā ācariyenāpi, tathāntevāsikenapi;  
Bu-ddha-kārādayo vaṇṇā, ṭhānakaraṇasampadaṃ.

2469 Ahāpentena vattabbā, pabbajjāguṇamicchatā;  
Ekavaṇṇavināsenā, pabbajjā hi na rūhati.

2470 Yadi siddhāpi pabbajjā, saraṇāgamanatova hi;  
Dātabbā dasa sīlāni, pūraṇatthāya bhikkhunā.

Pabbajjākathā.

2471 Upajjhāyamathācariyaṃ, nissāya vasatā pana;  
Kattabbāneva vattāni, piyasīlena bhikkhunā.

2472 Āsanaṃ paññapetabbaṃ, dantakaṭṭhaṃ mukhodakaṃ;  
Dātabbaṃ tassa kālena, sace yāgu bhavissati.

2473 Yāgu tassupanetabbā, saṅghato kulatopi vā;  
Patte vattañca kātabbaṃ, vattaṃ gāmapavesane.

2474 Cīvare yāni vattāni, vuttāni hi mahesinā;  
Senāsane tathā pāda-pīṭhakathalikādisu.

2475 Evamādīni vattāni, sabbāni pana rogato;  
Vuṭṭhānāgamanantāni, sattatiṃsasataṃ siyuṃ.

2476 Vattabhedena sabbattha, dukkaṭaṃ tu pakāsitaṃ;  
Anādaravaseneva, akarontassa bhikkhuno.

Upajjhāyācariyavattakathā.

2477 Upajjhāyassa vattāni, tathā saddhivihārike;  
Sataṃ terasa honteva, tathāntevāsikepi ca.

Saddhivihārikantevāsikavattakathā.

2478 Pakkante vāpi vibbhante, pakkhasaṅkantake mate;  
Āṇattiyā upajjhāyā, passambhati ca nissayo.

2479 Hoti ācariyamhāpi, chadhā nissayabhedanaṃ;  
Pakkante vāpi vibbhante, pakkhasaṅkantake mate.

2480 Āṇattiyaṃ ubhinnaṃpi, dhuranikkhepanepi ca;  
Ekekassa ubhinnaṃ vā, nālaye sati bhijjati.

2481 Upajjhāyasamodhāna-gatassāpi ca bhijjati;



Dassanaṃ savanañcāti, samodhānaṃ dvidhā matam.

**2482** Addhikassa gilānassa, gilānupaṭṭhakassa ca;  
Yācitassa na dosova, vasitum nissayaṃ vinā.

**2483** Jānatā attano ceva, vane phāsuvihāratam;  
Sabhāge dāyakesante, vasitumpi ca vaṭṭati.

Nissayaapaṭippassambhanakathā.

**2484** Kuṭṭhiṃ gaṇḍiṃ kilāsiñca, sosiñca apamārikam;  
Tathā rājabhaṭam coram, likhitam kārabhedakam.

**2485** Kasāhatam narañceva, purisaṃ lakkhaṇāhatam;  
Iṇāyikañca dāsañca, pabbājentassa dukkaṭam.

**2486** Hatthacchinnaṃ maḷacchinnaṃ, pādacchinnañca puggalam;  
Kaṇṇanāsangulicchinnaṃ, kaṇḍaracchinnameva ca.

**2487** Kāṇam kuṇiñca khujañca, vāmanam phaṇahatthakam;  
Khañjam pakkhahatañceva, sīpadim pāparoginam.

**2488** Jarāya dubbalam andham, badhirañceva mammanam;  
Pīṭhasappim tathā mūgam, pabbājentassa dukkaṭam.

**2489** Atidighotirasso vā, atikālopi vā tathā;  
Accodātopi vā maṭṭha-tambalohanidassano.

**2490** Atithūlo atikisso, mahāsīsopi vā tathā;  
Atikhuddakasīsena, sahiteṇa yuttopi vā.

**2491** Kuṭakuṭakasīso vā, tathā sikharasīsako;  
Veḷunāḷisamānena, sīsena ca yuto naro.

**2492** Kappasīsopi pabbhāra-sīso vā vaṇasīsako;  
Tathā kaṇṇikakeso vā, thūlakesopi vā tathā.

**2493** Pūtinillomasīso vā, jātipaṇḍarakesako;  
Jātiyā tambakeso vā, tathevāvaṭṭasīsako.

**2494** Sīsalomekabaddhehi, bhamukehi yuttopi vā;  
Sambaddhabhamuko vāpi, nillomabhamukopi vā.

**2495** Mahantakhuddanetto vā, tathā visamalocano;  
Kekaro vāpi gambhīra-netto visamacakkalo.

**2496** Jatumūsikakaṇṇo vā, hatthikaṇṇopi vā pana;  
Chiddamattakakaṇṇo vā, tathevāviddhakaṇṇako.

**2497** Tathā ṭaṅkitakaṇṇo vā, pūtikaṇṇopi vā pana;  
Yonakādippabhedopi, nāyam parisadūsako.

- 2498 Atipiṅgalanetto vā, tathā nippakhumakkhi vā;  
Assupaggharanetto vā, pakkapupphitalocano.
- 2499 Tatheva ca mahānāso, atikhuddakanāsiko;  
Tathā cipiṭanāso vā, naro kuṭīlanāsiko.
- 2500 Nīccavissavanāso vā, yo vā pana mahāmukho;  
Vaṅkabhinnamukho vāpi, mahāoṭṭhopi vā pana.
- 2501 Tathā tanukaotṭho vā, vipuluttaraotṭhako;  
Oṭṭhachinnopi uppakka-mukho eḷamukhopi vā.
- 2502 Saṅkhatuṇḍopi duggandha-mukho vā pana puggalo;  
Mahādantopi accantaṃ, tathā asuradantako.
- 2503 Heṭṭhā uparito vāpi, bahinikkhantadantako;  
Adanto pūtidanto vā, atikhuddakadantako.
- 2504 Yassa dantantare danto, kāḷakadantasannibho;  
Sukhumova ṭhito, taṃ ce, pabbājetumpi vaṭṭati.
- 2505 Yo mahāhanuko poso;  
Dīghena hanunā yuto;  
Cipiṭahanuko vāpi;  
Rassena hanunā yuto.
- 2506 Nimmassudāṭhiko vāpi, atidīghagalopi vā;  
Atirassagalopi vā, bhinnagaṇṭhigalopi vā.
- 2507 Tathā bhattṭhaṃsakūṭo vā, bhinnapiṭṭhiuropi vā;  
Sudīgharassahattho vā, kacchukaṇḍusamāyuto.
- 2508 Mahānisadamāṃso vā, uddhanaggupamāyuto;  
Vātaṇḍiko mahāūru, saṅghaṭṭanakajāṇuko.
- 2509 Bhinnajāṇu mahājāṇu, dīghajāṅgho vijāṅghako;  
Vikaṭo vāpi paṇho vā, tathā ubbaddhapiṇḍiko.
- 2510 Yaṭṭhijaṅgho mahājāṅgho, mahāpādopi yo naro;  
Tathā piṭṭhikapādo vā, mahāpaṇhipi vā pana.
- 2511 Vaṅkapādo naro yo vā, gaṇṭhikaṅgulikopi vā;  
Yo panandhanakho vāpi, kāḷapūtinakhopi ca.
- 2512 Iccevamādikaṃ kañci, naraṃ parisadūsakaṃ;  
Pabbājentassa bhikkhussa, hoti āpatti dukkaṭaṃ.
- Parisadūsakakathā.
- 2513 ‘Sāmaṇerajja mā khāda, mā bhuñja ca pivā’ ti ca;  
Nivārentassa āhāraṃ, hoti āpatti dukkaṭaṃ.

2514. ‘Nivāressāmi āhāra’ -miti vā pattacīvaram;  
Anto nikkhipato sabba-payogesupi dukkaṭaṃ.
2515. Dubbacasāmaṇerassa, anācārassa kevalaṃ;  
Daṇḍakammaṃ have katvā, hitakāmena bhikkhunā.
2516. Yāguṃ vā pana bhattaṃ vā, dassetvā kira bhāsituṃ;  
‘‘Āhaṭe daṇḍakamme tvamaṃ, lacchasiḍa’’nti vaṭṭati.
2517. Aparādhānurūpena, daṇḍakammaṃ tu kāraye;  
Vālikāsālilādīna-māharāpanameva taṃ.
2518. Sīse vā nikkhipāpetuṃ, pāsāṇādīni kānici;  
Nipajjāpetumuṃhe vā, pāsāṇe bhūmiyāpi vā.
2519. Udaṃ vā pavesetuṃ, na ca vaṭṭati bhikkhuno;  
Idhāvaraṇamattaṃ tu, daṇḍakammaṃ pakāsitaṃ.

Nivāraṇakathā.

2520. Pakkhopakkamikāsittā, catuttho panusūyako;  
Napaṃsakena pañcete, paṇḍakā paridīpitā.
2521. Tesu āsittusūyānaṃ, pabbajjā na nivāritā;  
Itaresaṃ tu tiṇṇampi, paṇḍakānaṃ nivāritā.
2522. Vāritā yassa pabbajjā, nāsetabboti so mato;  
Tividhe pana te ṇatvā, pabbājentassa dukkaṭaṃ.

Paṇḍakakathā.

2523. Liṅgattheno ca saṃvāsa-ttheno tadubhayassa ca;  
Theyyasaṃvāsako nāma, tividhopi pavuccati.
2524. Sayameva ca yo tattha, pabbajitvā na gaṇhati;  
Bhikkhuvassāni vā neva, yathāvuḍḍhampi vandanāṃ.
2525. Liṅgattheno ayaṃ liṅga-mattassa thenato siyā;  
Yo ca pabbajito hutvā, bhikkhuvassāni gaṇhati.
2526. Saṃvāsaṃ sādiyantova, saṃvāsathenako mato;  
Ubhayatthenako vutta-nayoyeva, yathāha ca.
2527. ‘Rājadubbhikkhakantāra-rogaveribhayehi vā;  
Cīvarāharaṇatthaṃ vā, liṅgamādiyatiḍha yo.
2528. Saṃvāsaṃ nādhivāseti, yāva so suddhamānaso;  
Theyyasaṃvāsako nāma, tāva esa na vuccati’’.

Theyyasaṃvāsakakathā.

2529: ‘Titthiyohaṃ bhavissa’nti, upasampannabhikkhu ce;  
Saliṅgeneva yo yāti, titthiyānamupassayaṃ.

2530: Gacchato padavārena, hoti āpatti dukkaṭaṃ;  
Hoti titthiyapakkanto, liṅge tesāṃ tu nissite.

2531: ‘Titthiyohaṃ bhavissa’nti, kusacīrādikaṃ pana;  
Sayameva nivāseti, sopi pakkantako siyā.

2532: Naggo ājīvakādīnaṃ, gantvā tesāṃ upassayaṃ;  
Luñcāpeti sace kese, vattānādiyatīdha vā.

2533: Morapiñchādikaṃ tesāṃ, liṅgaṃ gaṇhāti vā sace;  
Sārato ceva vā tesāṃ, pabbajjaṃ laddhimeva vā.

2534: Hoti titthiyapakkanto, na panesa vimuccati;  
Naggassa gacchato vuttaṃ, padavārena dukkaṭaṃ.

2535: Vutto anupasampanna-vasena theyyavāsako;  
Tathā titthiyapakkanto, upasampannabhikkhunā.

Titthiyapakkantakathā.

2536: Nāgo vāpi supaṇṇo vā, yakkho sakkopi vā idha;  
Tiracchānagato vutto, pabbājetuṃ na vaṭṭati.

Tiracchānakathā.

2537: Pañcānantarike pose, pabbājentassa dukkaṭaṃ;  
Ubhatobyañjanañceva, tathā bhikkhunīdūsakaṃ.

2538: Ekatoupasampannaṃ, bhikkhunīnaṃ tu santike;  
Dūsetvā pana so neva, bhikkhunīdūsako siyā.

2539: Sace anupasampanna-dūsako upasampadaṃ;  
Labhateva ca pabbajjaṃ, sā ca neva parājītā.

Ekādasaabhabbapuggalakathā.

2540: Nūpasampādanīyova, anupajjhāyako naro;  
Karoto dukkaṭaṃ hoti, na kuppati sace kataṃ.

2541: Kuppatīti vadanteke, na gahetabbameva taṃ;  
Sesesupi ayaṃ ñeyyo, nayo sabbattha viññunā.

2542: Upasampadakammaṃ, abhabbā pañcavīsati;  
Ajānitvā kato cāpi, osāro nāsanāraho.

2543: Hatthacchinnādibāttiṃsa, kuṭṭhiādi ca terasa;  
Apatto tesamosāro, kato ce pana rūhati.

- 2544 Ekūpajjhāyako hoti;  
Honti ācariyā tayo;  
Upasampadāpekkhā ca;  
Honti dve vā tayopi vā.
- 2545 Tīhi ācariyeheva, ekato anusāvanam;  
Osāretvā kataṃ kammaṃ, na ca kuppati kappati.
- 2546 Ekūpajjhāyako hoti;  
Ācariyopi tathekato;  
Upasampadāpekkhā ca;  
Honti dve vā tayopi vā.
- 2547 Anupubbena sāvetvā, tesam nāmaṃ tu tena ca;  
Ekato anusāvetvā, katampi ca na kuppati.
- 2548 Nānupajjhāyakenāpi, nānācariyakena ca;  
Aññaṃaññaṃanusāvetvā, kataṃ kammañca vaṭṭati.
- 2549 Śumano tissatherassa, anusāveti sissakaṃ;  
Tisso sumanatherassa, anusāveti sissakaṃ.
- 2550 Nānupajjhāyakeneva, ekācariyakenidha;  
Upasampadā paṭikkhittā, buddhenādiccabandhunā.

Mahākhandhakakathā.

### Uposathakkhandhakakathā

- 2551 Baddhābaddhaseneva, sīmā nāma dvidhā matā;  
Nimittena nimittaṃ tu, ghaṭetvā pana sammatā.
- 2552 Ayaṃ sīmāvipattīhi, ekādasahi vajjitā;  
Baddhā nāma siyā sīmā, sā tisampattisaṃyutā.
- 2553 Khaṇḍasamānasaṃvāsā-vippavāsādibhedato;  
Iti baddhā tidhā vuttā, abaddhāpi tidhā matā.
- 2554 Gāmato udakukkhepā, sattabbhantaratopi ca;  
Tattha gāmaparicchedo, “**gāmasīmā**”ti vuccati.
- 2555 Jātassare samudde vā, nadiyā vā samantato;  
Majjhimassudakukkhepo, **udakukkhepasaññito**.
- 2556 Agāmake araññe tu, sattevabbhantarā pana;  
Samantato ayaṃ sīmā, **sattabbhantaranāmikā**.
- 2557 Ekaṃ abbhantaram vuttaṃ, aṭṭhavīsatihatthakaṃ;  
Guḷukkhepanayeneva, udakukkhepakā matā.
- 2558 Imā dve pana sīmāyo, vaḍḍhanti parisāvasā;  
Abbhantarūdakukkhepā, ṭhitokāsā paraṃ siyumu.

- 2559) Thito antoparicchede, hatthapāsaṃ vihāya vā;  
Tattakaṃ anatikkamma, paricchedampi vā paraṃ.
- 2560) Thito kammaṃ vikopeti, iti aṭṭhakathānayo;  
Tasmā so hatthapāse vā, kātabbo bahi vā pana.
- 2561) Baddhasīmāya saṅghānaṃ, nimittaṃ disakittanaṃ;  
Ñatvā pamāṇaṃ sodhetvā, sīmaṃ bandheyya paṇḍito.
- 2562) Tikoṇaṃ caturassaṅga, vaṭṭaṅga paṇavūpamaṃ;  
Vitānaṃ dhanukākāraṃ, mudiṅgasakaṭṭupamaṃ.
- 2563) Pabbataṃ vanaṃ pāsānaṃ, rukkaṃ maggaṅga vammikaṃ;  
Udakaṅga nadiṅga, nimittānaṭṭha dīpaye.
- 2564) Tesu tīṇi nimittāni, ādiṃ katvā samantato;  
Nimittānaṃ satenāpi, bandhituṃ pana vaṭṭati.
- 2565) Tiyojanaparā sīmā, ukkaṭṭhāti pakāsītā;  
Ekavīsati bhikkhūnaṃ, gaṇhantī heṭṭhimā matā.
- 2566) Ukkaṭṭhāyapi ukkaṭṭhā, heṭṭhimāyapi heṭṭhimā;  
Etā dvepi asīmāti, vuttā ādiccabandhunā.
- 2567) Nimittaṃ pana kittetvā, sabbameva samantato;  
Pacchā ñattidutiyena, sīmaṃ bandhitumarahati.
- 2568) Bandhitvānantaraṃ pacchā, cīvarāvippavāsakaṃ;  
Sammannitvāna baddhā sāvippavāsāti vuccati.
- 2569) Nadīsarasamuddesu, sīmaṃ bandhati ce pana;  
Na vottharati teneva, asīmāti jinobravi.
- Sīmākathā.
- 2570) Dinakārakakattabbā-kārānaṅga vasā pana;  
Navevuposathā vuttā, buddhenādiccabandhunā.
- 2571) Cātuddaso pannaraso, sāmaggī ca uposatho;  
Divaseneva niddiṭṭhā, tayopete uposathā.
- 2572) Saṅghe uposatho ceva, gaṇe puggaluposatho;  
Kārakānaṃ vaseneva, tayo vuttā uposathā.
- 2573) Suttuddesābhidhāno ca, pārisuddhiuposatho;  
Adhiṭṭhānanti niddiṭṭhā, tayo kammauposathā.
- 2574) Saṅghassa pātimokkha ca, pārisuddhi gaṇassa ca;  
Adhiṭṭhānamathekassa, niddiṭṭhaṃ pana satthunā.
- 2575) Pātimokkhassa uddesā, paṅca vuttā mahesinā;  
Nidānaṃ uddisitvāna, sāvetaṭṭhaṃ tu sesakaṃ.

- 2576 Ayameva nayo ñeyyo, sesesupi ca viññunā;  
Cattāro bhikkhunīnañca, uddesā navime pana.
- 2577 Pātimokkhassa uddeso, kātabbova uposathe;  
Antarāyaṃ vinā ceva, anuddeso nivārito.
- 2578 Thero ca issaro tassa;  
“Therādheyya”’nti pāṭhato;  
Avattantena ajjhittṭho;  
Yassa so pana vattati.
- 2579 Uddisante samappā vā, āgacchanti sace pana;  
Uddittṭhaṃ taṃ suddittṭhaṃ, sāvetaḃbaṃ tu sesakaṃ.
- 2580 Uddittṭhamatte bhikkhūnaṃ, parisāyuttṭhitāya vā;  
Pārisuddhi tu kattabbā, mūle tesam, sace bahū.
- 2581 Sammajjituṃ padīpetuṃ, paññāpetuṃ dakāsane;  
Viniddittṭhassa therena, akarontassa dukkaṭaṃ.
- 2582 Katvā sammajjanaṃ dīpaṃ, ṭhapetvā udakāsanaṃ;  
Gaṇaṇattim ṭhapetvāva, kattabbo tihuposatho.
- 2583 Pubbakiccaṃ samāpetvā, adhiṭṭheyya panekako;  
No ce adhiṭṭhaheyyassa, hoti āpatti dukkaṭaṃ.
- 2584 Adhammena ca vaggena, samaggena adhammato;  
Tathā dhammena vaggena, samaggena ca dhammato.
- 2585 Uposathassa etāni, kammānīti jinobravi;  
Catūsvapi panetesu, catutthaṃ dhammikaṃ mataṃ.
- 2586 Adhammenidha vaggo hi, katamo cethuposatho?  
Vasanti ekasīmāyaṃ, cattāro yattha bhikkhuno.
- 2587 Ekassa pārisuddhiṃ te, āṇayitvā tayo janā;  
Karonti pārisuddhiṃ ce, adhammo vagguposatho.
- 2588 Adhammena samaggo hi, cattāro bhikkhunekato;  
Karonti pārisuddhiṃ ce, samaggo hotyadhammiko.
- 2589 Dhammena pana vaggo hi, katamo so uposatho;  
Vasanti ekasīmāyaṃ, cattāro yattha bhikkhuno.
- 2590 Ekassa pārisuddhiṃ te, āṇayitvā tayo janā;  
Pātimokkhuddisante ce, vaggo dhammenuposatho.
- 2591 Dhammato hi samaggo so;  
Cattāro bhikkhunekato;  
Pātimokkhuddisantīdha;  
Samaggo dhammato mato.

- 2592** Vagge samagge vaggoti, saññino vimatissa vā;  
Uposatham karontassa, hoti āpatti dukkaṭam.
- 2593** Bhedādhippāyato tassa, hoti thullaccayaṃ pana;  
Vagge samaggenāpatti, samaggoti ca saññino.
- 2594** Ukkhittena gahaṭṭhena, sesehi sahadhammihi;  
Cutanikkhittasikkhehi, ekādasahi vā saha.
- 2595** Uposatho na kātabbo, sabhāgāpattikena vā;  
Chandena pārivutthena, karoto hoti dukkaṭam.
- 2596** Adesetvā panāpattiṃ, nāvikatvāna vematiṃ;  
Uposatho na kātabbo, dine vā anuposathe.
- 2597** Uposathe panāvāsā, sabhikkhumhā ca bhikkhunā;  
Āvāso vā anāvāso, na gantabbo kudācanaṃ.
- 2598** Yasmim uposathe kiccaṃ;  
Āvāse pana vattati;  
So ce sabhikkhuko nāma;  
Āvāsoti pakāsito.
- 2599** Uposatho kimatthāya, kimatthāya pavāraṇā;  
Uposatho samaggattho, visuddhatthā pavāraṇā.
- 2600** Kopetuṃ dhammikaṃ kammaṃ, paṭikkoseyya dukkaṭam;  
Chandaṃ vā kāyasāmaggiṃ, adentassapi dukkaṭam.
- 2601** Hoti pañcavidho saṅgho, catuvaggādibhedato;  
So ca kattabbakammassa, vasena paridīpito.
- 2602** Pavāraṇaṃ tathābbhānaṃ, kammañca upasampadaṃ;  
Ṭhapetvā catuvaggena, akattabbaṃ na vijjati.
- 2603** Pañcavaggena abbhānaṃ, majjhadesūpasampadaṃ;  
Dasavaggena abbhānaṃ, vinā sabbaṃ tu vaṭṭati.
- 2604** Kammaṃ vīsativaggena, na kattabbaṃ na kiñcipi;  
Ūne dosoti ñāpetuṃ, nādhike atirekatā.
- 2605** Cattāro pakatattāva, kammappattāti dīpitā;  
Catuvaggena kattabbe, sesesu ca ayaṃ nayo.
- 2606** Catuvaggādikattabbaṃ, katvāsaṃvāsapuggalaṃ;  
Gaṇapūraṃ karontassa, kataṃ kuppati dukkaṭam.
- 2607** Parivāsādikammeṇi, tatraṭṭhaṃ gaṇapūraṃ;  
Kavā pana karontānaṃ, tathā, sesaṃ tu vaṭṭati.

Uposathakkhandhakakathā.



### Vassūpanāyikakkhandhakathā

- 2608**Purimā pacchimā cāti, duve vassūpanāyikā;  
Ālayo vā vacībhedo, kattabbo upagacchatā.
- 2609**Vassūpagamanam vāpi, jānam anupagacchato;  
Temāsamavasitvā vā, carantassapi dukkaṭam.
- 2610**Rukkhassa susire chatte, cāṭichavakuṭṭisu vā;  
Ajjhokāsepi vā vassam, upagantum na vaṭṭati.
- 2611**Vassacchede anāpatti, antarāyo sace siyā;  
Chinnavassassa bhikkhussa, vāritāva pavāraṇā.
- 2612**Mātāpitūnam pana dassanattham;  
Pañcannamatthe sahadhammikānam;  
Daṭṭhum gilānam tadupaṭṭhakānam;  
Bhattādi nesam pariyesanattham.
- 2613**Tathānabhirataṃ gantvā, vūpakāsessamuṭṭhitam;  
Diṭṭhiṃ vā tassa kukkucam, vinodessāmahanti vā.
- 2614**Evam sattāhakiccena, bhikkhunā vinayaññunā;  
Apeṣitepi gantabbam, pageva pahite pana.
- 2615**Vassam upagatenettha, animantitabhikkhunā;  
Dhammassa savanatthāya, gantum pana na vaṭṭati.
- 2616**‘Asukam nāma divasam, sannipāto bhavissati’;  
Icevam katikā pubbam, katā ce pana vaṭṭati.
- 2617**‘Dhovissāmi rajissāmi, bhaṇḍaka’nti na vaṭṭati;  
Sacācariyupajjhāyā, paṇṇanti ca vaṭṭati.
- 2618**Uddesādīnamatthāya, gantum neva ca vaṭṭati;  
Garūnam dassanatthāya, gantum labhati puggalo.
- 2619**Sace ācariyo ‘‘ajja, mā gacchāhī’’ti bhāsati;  
Ratticchede anāpatti, hotīti paridīpitā.
- 2620**Yassa kassaci ñātissa, upaṭṭhākakulassa vā;  
Gacchato dassanatthāya, ratticchede ca dukkaṭam.
- 2621**‘Āgamissāmi ajjeva, gantvāham gāmaka’nti ca;  
Sace pāpuṇitum gaccam, na sakkoteva vaṭṭati.
- 2622**Vaje satthepe nāvāyam, tisu ṭhānesu bhikkhuno;  
Vassacchede anāpatti, pavāretuṇca vaṭṭati.
- 2623**Sati paccayavekalle, sarīrāphāsutāya vā;  
Eseva antarāyoti, vassam chetvāpi pakkame.

- 2624 Yena kenantarāyena, vassaṃ nopagato hi yo;  
Dutiya upagantabbā, chinnavassena vā pana.
- 2625 Vassaṃ anupagantvā vā, tadaheva ca gacchati;  
Bahiddhā eva sattāhaṃ, upagantvāpi vā pana.
- 2626 Vītināmeti ce tassa, purimāpi na vijjati;  
Paṭissave ca bhikkhussa, hoti āpatti dukkaṭaṃ.
- 2627 Vassaṃ panupagantvā ca, uṭṭhāpetvā na cāruṇaṃ;  
Gacchato pana sattāha-karaṇeneva bhikkhuno.
- 2628 Antoyeva ca sattāhaṃ, nivattantassa tassa tu;  
Anāpattīti ko vādo, vasitvā bahi gacchato.
- 2629 ‘‘Vasissāmīdha vassa’’nti, ālayo yadi vijjati;  
Nopetasatiyā vassaṃ, tena senāsaṇaṃ pana.
- 2630 Gahitaṃ suggahitaṃ hoti, chinnavasso na hoti so;  
Labhateva pavāretuṃ, na doso koci vijjati.
- 2631 ‘‘Imasmim vihāre temāsaṃ, imaṃ vassaṃ upemi’’ti;  
Nicchārite ca tikkhattuṃ, vassaṃ upagato siyā.
- 2632 Ādiṃ tu navamim katvā, gantuṃ vaṭṭati bhikkhuno;  
Āgacchatu ca pacchā so, mā vā doso na vijjati.

Vassūpanāyikakkhandhakakathā.

### Pavāraṇakkhandhakakathā

- 2633 Cātuddasī pañcadasī, sāmaggī ca pavāraṇā;  
Tevācī dvekavācī ca, saṅghe ca gaṇapuggale.
- 2634 Etā pana munindena, vuttā nava pavāraṇā;  
Tīṇi kammāni muñcitvā, anteneva pavāraye.
- 2635 Pubbakiccaṃ samāpetvā, pattakalle samānite;  
Ñattiṃ ṭhapetvā saṅghena, kattabbā hi pavāraṇā.
- 2636 Pavārentesu theresu, nisīdeyya navo pana;  
Sayam yāva pavāreyya, tāva ukkuṭikañhi so.
- 2637 Ñattiṃ vatvā pavāreyyuṃ, cattāro vā tayopi vā;  
Pubbakiccaṃ samāpetvā, ekāvāse vasanti ce.
- 2638 Aññaṃamaññaṃ pavāreyyuṃ, vinā ñattiṃ duve janā;  
Adhiṭṭheyya panekopi, sesā saṅghapavāraṇā.
- 2639 Pavārite ca saṅghasmim, kareyyanāgato pana;  
Avuṭṭho chinnavasso vā, pārissuddhiuposathaṃ.

- 2640**Pañca yasmim panāvāse, cattāro vā tayopi vā;  
Ekekassa haritvāna, samaṇā te pavāraṇaṃ.
- 2641**Aññaṃaṇñaṃ pavārenti, sace āpatti dukkaṭaṃ;  
Sesaṃ uposathe vutta-nayenidha naye budho.
- 2642**Pārisuddhippadānena, sampādetattano sucim;  
Chandadānena saṅghassa, sabbaṃ sādheti, nattano.
- 2643**Tasmā pana ubhinnaṃpi, kiccāsiddhatthamevidha;  
Pārisuddhipi dātabbā, chandaṃ dentena bhikkhunā.
- 2644**Chandekena bahūnaṃpi, hātabbo pārisuddhipi;  
Paramparāhaṭo chando, na gacchati visuddhiyā.
- 2645**Chandaṃ vā pārisuddhim vā, gahetvā vā pavāraṇaṃ;  
Sāmaṇerādibhāvaṃ vā, paṭijāneyya hāraṃko.
- 2646**Sace so saṅghamappatvā, vibbameyya mareyya vā;  
Nāhaṭaṇceva taṃ sabbaṃ, patvā cevaṃ siyāhaṭaṃ.
- 2647**Saṅghaṃ patvā pamatto vā, sutto vā khittacittako;  
Nāroceti anāpatti, hoti sañcicca dukkaṭaṃ.
- 2648**Ye te vipassanāyuttā, rattindivamatanditā;  
Pubbarattāpararattaṃ, vipassanaparāyaṇā.
- 2649**Ādadhaphāsuvihārānaṃ, siyā na parihāniti;  
Pavāraṇāya saṅgāho, vutto kattikamāsake.

Pavāraṇakkhandhakakathā.

### **Cammakkhandhakakathā**

- 2650**Elakājamigānaṃ tu, cammaṃ vaṭṭati bhikkhuno;  
Rohiteṇikuraṅgānaṃ, pasadaṃmigamātuyā.
- 2651**Thapetvā cammamesaṃ, aññaṃ dukkaṭavattthukaṃ;  
Thavikopāhane sabbaṃ, cammaṃ vaṭṭatyamānusaṃ.
- 2652**Vaṭṭanti majjhime dese, na guṇaṅguṇupāhanā;  
Vaṭṭanti antoārāme, sabbathāpi ca rogino.
- 2653**Puṭakhallakabaddhā ca, tatheva pāliguṇṭhimā;  
Tūlapuṇṇā na vaṭṭanti, sabbanīlādayopi ca.
- 2654**Citrā upāhanā meṇḍa-visāṇūpamavaddhikā;  
Na ca vaṭṭanti morassa, piñchena parisibbitā.
- 2655**Majjārakālakolūka-sīhabyagghuddadīpinaṃ;  
Ajinaṃ ca cammena, na vaṭṭati parikkhaṭā.

- 2656 Puṭādiṃ apanetvā vā, chinditvā vāpi sabbaso;  
Vaṇṇabhedam tathā katvā, dhāretabbā upāhanā.
- 2657 Sabbāpi pana dhāretum, na ca vaṭṭanti pādukā;  
Ṭhapetvā tattha passāva- vaccācamanapādukā.
- 2658 Āsandiñceva pallaṅkaṃ, uccāsayanasaññitaṃ;  
Atikkantapamāṇaṃ tu, sevamānassa dukkaṭaṃ.
- 2659 Gonakaṃ kuttakaṃ cittaṃ, paṭikaṃ paṭalikampi ca;  
Ekantalomiṃ vikatiṃ, tūlikaṃ uddalomikaṃ.
- 2660 Kaṭṭissaṃ pana koseyyaṃ, hatthiassarathattharaṃ;  
Kadalimigapavara-paccattharaṇakampi ca.
- 2661 Heṭṭhā rattavitānassa, dvidhā rattūpadhānakaṃ;  
Akappiyamidaṃ sabbam, dukkaṭaṃ paribhuñjato.
- 2662 Heṭṭhā akappiye paccatthare sati na vaṭṭati;  
Uddham setavitānampi, tasmim asati vaṭṭati.
- 2663 Āsandiṃ pana pallaṅkaṃ, ṭhapetvā tūlikampi ca;  
Sesaṃ pana ca sabbampi, labhate gihisantakaṃ.
- 2664 Dhammāsane anāpatti, bhattagepi nisīditum;  
Bhūmattharaṇake tattha, sayitumpi ca vaṭṭati.

Cammakkhandhakakathā.

### Bhesajjakkhandhakakathā

- 2665 Vuttā gahapatissāpi, sammutussāvanantikā;  
Gonisādīti kappiyā, catasso honti bhūmiyo.
- 2666 Saṅghassa santakaṃ gehaṃ, santakaṃ bhikkhunopi vā;  
Kappiyaṃ pana kattabbaṃ, sahaseyyappahonakaṃ.
- 2667 Ṭhapetvā bhikkhumaññehi, dinnam kappiyabhūmiyā;  
Atthāya santakaṃ tesam, gehaṃ **gahapate**vidaṃ.
- 2668 Sā hi **sammutikā** nāma, yā hi saṅghena sammatā;  
Kammavācamavatvā vā, vaṭṭatevāpalokanaṃ.
- 2669 Paṭhamiṭṭhakapāsāṇa-thambhādiṭṭhapane pana;  
“Kappiyakuṭim karomā”ti, vadantehi samantato.
- 2670 Ukkhipitvā ṭhapentesu, āmasitvā paresu vā;  
Sayamevukkipitvā vā, ṭhapeyyussāvanantikā.
- 2671 Iṭṭhakādiṭṭhānaṃ, bhikkhūnaṃ vadatam pana;  
Vācāya pariyosānaṃ, samakālam tu vaṭṭati.

- 2672 Ārāmo aparikkhitto, sakalo bhuyyatopi vā;  
Duvidhopi ca viññūhi, **gonisādī**ti vuccati.
- 2673 Etā pana catassopi, honti kappiyabhūmiyo;  
Ettha pakkañca vutthañca, sabbam vaṭṭati āmisam.
- 2674 Ussāvanantikā yā sā, thambhādīsu adhiṭṭhitā;  
Thambhādīsvapanītesu, tadaññesupi tiṭṭhati.
- 2675 Apanītesu sabbesu, siyā jahitavatthukā;  
Gonisādī parikkhitā, sesā chadananāsato.
- 2676 Bhikkhum ṭhapetvā aññesam, hatthato ca paṭiggaho;  
Tesañca sannidhi anto- vuttam bhikkhussa vaṭṭati.
- 2677 Bhikkhussa bhikkhuniyā vā, santakam saṅghikampi vā;  
Antovutthañca pakkañca, ubhinnaṃ na ca vaṭṭati.
- 2678 Akappakuṭiyā vuttam, sappiādivimissitam;  
“Antovuttha”nti niddiṭṭham, paṭhamam kālikadvayam.
- 2679 Teheva sappiādīhi, bhikkhunā yāvajīvikam;  
Pakkam tam pana sattāham, vaṭṭateva nirāmisam.
- 2680 Sace āmisasamsaṭṭham, pakkam tam paribhuñjati;  
Antovutthañca bhīyyopi, sāmapakkañca bhūñjati.
- 2681 Yāvakālikamāhāro, pānakam yāmakālikam;  
Sattāhakālikam nāma, sappiādikapañcakam.
- 2682 Sesam pana haliddādi, bhesajjam yāvajīvikam;  
Catudhā kālikā vuttā, udakam hotyakālikam.
- 2683 Paṭiggahavaseneva, kālātītā tikālikā;  
Honti dosakarā bhuttā, abhuttam tatiyampi ca.
- 2684 Ambam jambu ca cocañca, mocañca madhu muddikā;  
Sālu phārusakañcāti, pānakam aṭṭhadhā matam.
- 2685 Pānakatthamanuññātam, phalam pakkañca āmakam;  
Pānahetu paṭikkhitto, savatthukapaṭiggaho.
- 2686 Ambapakkam sukoṭṭetvā, madditvā udae pana;  
Pacchā parissavam katvā, pātum vaṭṭati pānakam.
- 2687 Vaṭṭatādiccapākam tu, aggipakkam na vaṭṭati;  
Eseva ca nayo sesa-pānakesupi dīpito.
- 2688 Pupphapattaphalucchūnam, cattāro panime rasā;  
Anuññātā imānaṭṭha, pānāni anujānatā.
- 2689 Sabbo puppharaso vutto, madhukassa rasam vinā;

Sabbo pattaraso vutto, pakkaḍākarasaṃ vinā.

**2690**Ṣattannaṃ sānulomānaṃ, dhaññaṃ phalajaṃ rasaṃ;  
Ṭhapetvānumato sabbo, vikāle phalajo raso.

**2691**Yāvakālikapattāna-mapi sītudake kato;  
Madditvādiccapākopi, vikāle pana vaṭṭati.

**2692**Tālañca nāḷikerañca, panasāṃ labujampi ca;  
Tipusālābukumbhaṇḍaṃ, tathā pussaphalampi ca.

**2693**Evameḷālukañcāti, navetāni phalāni hi;  
Aparaṇñañca sabbampi, sattadhaññaṃ anulomikaṃ.

**2694**Badaraṃ timbarū selu, kosambaṃ karamaddakaṃ;  
Mātuluṅgakapitthañca, vettaṃ ciñcaphalampi ca.

**2695**Phalānaṃ evamādīnaṃ, khuddakānaṃ raso pana;  
Aṭṭhapānānulomattā, niddiṭṭho anulomike.

**2696**Sānulomassa dhaññaṃ, ṭhapetvā phalajaṃ rasaṃ;  
Añño phalaraso natthi, ayāmakāliko idha.

Bhesajjakkhandhakakathā.

### **Kathinakkhandhakakathā**

**2697**Bhikkhūnaṃ vuṭṭhavassānaṃ, kathinatthāramabravi;  
Pañcannaṃ ānisaṃsānaṃ, kāraṇā munipuṅgavo.

**2698**Na ullikhitamattādi-catuvīsativajjitaṃ;  
Cīvaraṃ bhikkhunādāya, uddharitvā purāṇakaṃ.

**2699**Navāṃ adhiṭṭhahitvāva, vattabbaṃ vacasā puna;  
“Imināntaravāsena, kathinaṃ attharāmi”ti.

**2700**Vutte tikkhattumiccevaṃ, kathinaṃ hoti atthataṃ;  
Saṅghaṃ panupasaṅkamma, ādāya kathinaṃ iti.

**2701**“Atthataṃ kathinaṃ bhante, saṅghassa anumodatha;  
Dhammiko kathinatthāro”, vattabbaṃ tena bhikkhunā.

**2702**“Suatthataṃ tayā bhante, saṅghassa kathinaṃ puna;  
Dhammiko kathinatthāro, anumodāmi”tīraye.

**2703**Kathinassa ca kiṃ mūlaṃ, kiṃ vatthu kā ca bhūmiyo;  
Katidhammavido bhikkhu, kathinatthāramarahati.

**2704**Mūlamekaṃ, siyā vatthu, tividhaṃ, bhūmiyo cha ca;  
Aṭṭhadhammavido bhikkhu, kathinatthāramarahati.

- 2705 Saṅgho mūlanti niddiṭṭhaṃ, vatthu hoti ticīvaraṃ;  
Khomādīni cha vuttāni, cīvarāni cha bhūmiyo.
- 2706 Pubbapaccuddharādhiṭṭhā-natthāro mātikāpi ca;  
Palibodho ca uddhāro, ānisaṃsā panaṭṭhime.
- 2707 Dhovanañca vicāro ca, chedanam bandhanampi ca;  
Sibbanam rajanam kappam, “**pubbakicca**”nti vuccati.
- 2708 Saṅghāṭi uttarāsaṅgo, atho antaravāsako;  
Paccuddhāro adhiṭṭhānam, atthāropesameva tu.
- 2709 Pakkamanañca niṭṭhānam, sannīṭṭhānañca nāsanam;  
Savanāsā ca sīmā ca, sahubbhāroti aṭṭhimā.
- 2710 Katacīvaramādāya, āvāse nirapekkhako;  
Atikkantāya sīmāya, hoti **pakkamanantikā**.
- 2711 Ānisaṃsamathādāya, vihāre anapekkhako;  
Gantvā pana vihāram so, aññaṃ sukhavihārikam.
- 2712 Tattha taṃ viharantova, karoti yadi cīvaram;  
Niṭṭhite cīvare tasmim, **niṭṭhānantā**ti vuccati.
- 2713 ‘Cīvaram na karissāmi, na paccessam tamassam’;  
Evam tu dhuranikkhepe, **sanniṭṭhānantikā** matā.
- 2714 Kathinacchādanam laddhā, “na paccessa”nti ce gato;  
Karonasseva natṭham vā, dadḍham vā **nāsanantikā**.
- 2715 Laddhānisamso sāpekkho, bahisīmam gato pana;  
Suṇāti cantarubbhāram, sā hoti **savanantikā**.
- 2716 Cīvarāsāya pakkanto, bahisīmam gato pana;  
“Dassāmi cīvaram tuyham”, vutto savati kenaci.
- 2717 Puna vutte “na sakkomi, dātunti tava cīvaram”;  
Āsāya chinnamattāya, **āsāvacchedikā** matā.
- 2718 Vassamvuṭṭhavihāramhā, vihāraññaṃ gato siyā;  
Āgaccham antarāmagge, taduddhāramatikkame.
- 2719 Tassa so kathinuddhāro, **sīmātikkantiko** mato;  
Kathinānisamamādāya, sāpekkhova sace gato.
- 2720 Sambhuṇāti punāgantvā, kathinuddhārameva ce;  
Tassa so kathinuddhāro, “**sahubbhāro**”ti vuccati.
- 2721 Pakkamanañca niṭṭhānam, sannīṭṭhānañca sīmato;  
Cattāro puggalādhīnā, saṅghādhīnantarubbhāro.
- 2722 Nāsanam savanañceva, āsāvacchedikāpi ca;

Tayopi kathinubbhārā, na tu saṅghā, na bhikkhuto.

**2723**Āvāsapalibodho ca, palibodho ca cīvare;  
Palibodhā duve vuttā, yuttamuttatthavādinā.

**2724**Aṭṭhannaṃ mātikānaṃ vā, antarubbhāratopi vā;  
Ubbhārāpi duve vuttā, kathinassa mahesinā.

**2725**Anāmantāsamādānaṃ, gaṇato yāvadatthikaṃ;  
Tattha yo cīvaruppādo, ānisaṃsā ca pañcime.

Kathinakkhandhakakathā.

### **Cīvarakkhandhakakathā**

**2726**Cīvarassa panuppādā, aṭṭha cīvaramātikā;  
Sīmāya deti, katikā, bhikkhāpaññattiyā, tathā.

**2727**Saṅghassa, ubhatosaṅghe, vassaṃvuṭṭhassa deti ca,;  
Ādissa, puggalassāti, aṭṭhimā pana mātikā.

**2728**Tattha **sīmāya detīti**, antosīmaṃ gatehi tu;  
Bhikkhūhi bhājetabbanti, vaṇṇitaṃ varavaṇṇinā.

**2729****Katikāya ca dinnam** ye, vihārā ekalābhakā;  
Ettha dinnañca sabbehi, bhājetabbanti vuccati.

**2730**Saṅghassa dhuvakārā hi, yattha karīyanti tattha ca;  
**Bhikkhāpaññattiyā dinnam**, dinnam vuttaṃ mahesinā.

**2731****Saṅghassa** pana yaṃ dinnam, ujubhūtena cetasā;  
Tañhi sammukhibhūtena, bhājetabbanti vuccati.

**2732****Ubhatosaṅgha** muddissa, deti saddhāya cīvaram;  
Thokā vā bahu vā bhikkhū, samabhāgova vaṭṭati.

**2733****Vassaṃvuṭṭhassa saṅghassa**, cīvaram deti yaṃ pana;  
Taṃ tasmim vūṭṭhavassena, bhājetabbanti vaṇṇitaṃ.

**2734**Yāguyā pana bhatte vā, **detiādissa** ce pana;  
Cīvaram tattha tattheva, yojetabbam vijānatā.

**2735**Puggalaṃ pana uddissa, cīvaram yaṃ tu dīyati;  
**Puggalodissakam** nāma, dānaṃ taṃ tu pavuccati.

**2736**Sahadhammikesu yo koci, pañcasvapi “mamaccaye;  
Ayaṃ mayhaṃ parikkhāro, mātuyā pitunopi vā.

**2737**Upajjhāyassa vā hotu”, vadaticceveva ce;  
Na hoti pana taṃ tesam, saṅghasseva ca santakam.



- 2738 Pañcannaṃ accaye dānaṃ, na ca rūhati kiñcipi;  
Saṅghasseva ca taṃ hoti, gihīnaṃ pana rūhati.
- 2739 Bhikkhu vā sāmaṇero vā, kālaṃ bhikkhunupassaye;  
Karotyassa parikkhārā, bhikkhūnaṃyeva santakā.
- 2740 Bhikkhunī sāmaṇerī vā, vihārasmiṃ sace matā;  
Honti tassā parikkhārā, bhikkhunīnaṃ tu santakā.
- 2741: ‘Dehi netvāsukassā’ ti, dīnaṃ taṃ purimassa tu;  
‘Idaṃ dammī’ ti dīnaṃ taṃ, pacchimasseva santakaṃ.
- 2742 Evaṃ dinnavidhiṃ ñatvā, matassa vāmatassa vā;  
Vissāsaṃ vāpi gaṇheyya, gaṇhe matakacīvaram.
- 2743 Mūlapattaphalakkhandha-tacapupphappabhedato;  
Chabbidhaṃ rajanaṃ vuttaṃ, vantadosena tādīnā.
- 2744 Mūle haliddiṃ, khandhesu, mañjeṭṭhaṃ tuṅgahāraṃ;  
Pattesu alliyā pattaṃ, tathā pattañca nīliyā.
- 2745 Kusumbhaṃ kiṃsukaṃ pupphe, tace loddañca kaṇḍulaṃ;  
Ṭhapetvā rajanaṃ sabbhaṃ, phalaṃ sabbampi vaṭṭati.
- 2746 Kiliṭṭhasātakāṃ vāpi, dubbaṇṇaṃ vāpi cīvaram;  
Alliyā pana pattena, dhovituṃ pana vaṭṭati.
- 2747 Cīvarānaṃ kathā sesā, paṭhame kathine pana;  
Tattha vuttanayeneva, veditabbā vibhāvinā.

Cīvarakkhandhakakathā.

Mahāvaggo niṭṭhito.

## Cūlavaggo

### Pārivāsikakkhandhakakathā

- 2748 Tajjanīyaṃ niyassañca, pabbājaṃ paṭisāraṇaṃ;  
Tividhukkhepanaṅcāti, satta kammāni dīpaye.
- 2749 Tecattālīsa vattāni, **khandhake** kammasaññite;  
Navādhikāni tiṃseva, **khandhake** tadanantare.
- 2750 Evaṃ sabbāni vattāni, dvāsīteva mahesinā;  
Honti khandhakavattāni, gahitāgahaṇena tu.
- 2751 Pārivāsañca vattañca, samādinnaṃ bhikkhuno;  
Ratticchedo kathaṃ vutto, vattabhedo kathaṃ bhavē?
- 2752 Sahavāso vināvāso, anārocanaṃeva ca;

Pārivāsikabhikkhussa, ratticchedo ca dukkaṭaṃ.

2753 Ekacchanne panāvāse, pakatattena bhikkhunā;  
Nivāso dakapātena, ukkhittassa nivārito.

2754 Pārivāsikabhikkhussa, antoyeva na labbhati;  
Icevaṃ pana niddiṭṭhaṃ, **mahāpaccariyaṃ** pana.

2755: ‘Avisesena niddiṭṭhaṃ, mahāatṭhakathādisu;  
Ubhinnaṃ dakapātena, nivāso vārito’ ti hi.

2756 Abhikkhuke panāvāse, anāvāsepi katthaci;  
Vippavāsaṃ vasantassa, ratticchedo ca dukkaṭaṃ.

2757 Pārivāsikabhikkhussa, bhikkhuṃ disvāna taṅkhaṇe;  
Nārocentassa cetassa, ratticchedo ca dukkaṭaṃ.

2758 Pañceva ca yathāvuḍḍhaṃ, labhate pārivāsiko;  
Kātuṃ tattheva ca ṭhatvā, uposathapavāraṇaṃ.

2759 Vassasātiṃ yathāvuḍḍhaṃ, denti ce saṅghadāyakā;  
Oṇjanaṃ tathā bhattaṃ, labhate pañcime pana.

Pārivāsikakkhandhakakathā.

### Samathakkhandhakakathā

2760 Vivādādhāratā cānu-vādādhikaraṇampi ca;  
Āpattādhāratā ceva, kiccādhikaraṇampi ca.

2761 Etāni pana cattāri, vuttāni ca mahesinā;  
Bhedakāravatthūni, **vivādo** tattha nissito.

2762 Vipattiyo catassova, **anuvādo** upāgato;  
**Āpattādhāratā** nāma, satta āpattiyo matā.

2763 Saṅghakiccāni nissāya, **kiccādhikaraṇaṃ** siyā;  
Etesaṃ tu catunnaṃpi, samattā samathā matā.

2764 Sammukhā sati cāmūḷho, paṭiññāvinayopi ca;  
Tassapāpiyasī ceva, tathā yebhuyyasīpi ca.

2765 Tiṇavatthārako ceva, sattamo vinayo mato;  
Sattime samathā vuttā, buddhenādiccabandhunā.

2766 Vivādo sammati dvīhi, anuvādo catūhi ca;  
Āpatti pana tīheva, kiccamekena sammati.

2767 Chatṭhena paṭhamenāpi, vivādo ettha sammati;  
Sammukhāvinayādīhi, anupubbena tīhipi.

- 2768 Tatheva pañcamenāpi, anuvādo hi sammati;  
Sammukhena paṭiññāya, tiṇavatthārakena ca.
- 2769 Āpattūpasamaṃ yāti, tīheva samathehi sā;  
Sammukhāvinayeneva, kiccamekena sammati.
- 2770 Yebhuyyasikakamme tu, salākaṃ gāhaye budho;  
Gūlhena vivaṭenāpi, kaṇṇajappena vā pana.
- 2771 Alajjussade gūlhena, vivaṭeneva lajjisu;  
Bālesu kaṇṇajappena, salākaṃ gāhaye budho.
- 2772 Lajjī alajjī bāloti, kena sakkā vijānituṃ?  
Sakena kammunāyeva, tena sakkā vijānituṃ.
- 2773 Āpajjati ca sañcicca, āpattiṃ parigūhati;  
Chandādiagatiṃ yāti, **alajjī** ediso siyā.
- 2774 Nāpajjati ca sañcicca, āpattiṃ na ca gūhati;  
Na gacchatigatiñcāpi, ediso **lajji** puggalo.
- 2775 Duccintito ca dubbhāsī, tathā dukkaṭakāriko;  
Ediso pana “**bālo**”ti, lakkhaṇeneva ñāyati.
- 2776 Tidhā salākagāhena, bahukā dhammavādino;  
Yebhuyyasikakammena, kattabbanti jinobravi.
- 2777 Alajjī sānuvādo ca, asucī kammato ca yo;  
Tassapāpiyasikamma-yoggo so hoti puggalo.
- 2778 Bhaṇḍane kalahe jāte, vivādasmiṃ anappake;  
Bahuassāmaṇe ciṇṇe, anaggepi ca bhassake.
- 2779 Mūlamūlaṃ gavesantaṃ, hoti vālañca kakkhaḷaṃ;  
Tiṇavatthārakeneva, kātabbanti pakāsitaṃ.
- 2780 Yathā ca tiṇapaṇṇena, channaṃ gūthañca muttakam;  
Na ca vāyati duggandhaṃ, vūpasammati taṅkhaṇe.
- 2781 Thapetvā thullavajjañca, gihīhi paṭisaṃyutaṃ;  
Diṭṭhāvikkammikañceva, yo ca tattha na hoti taṃ.
- 2782 Sesāyāpattiyā yāva, upasampadamāḷato;  
Suddho hoti nirāpatti, tiṇavatthārake tathā.

Samathakkhandhakakathā.

### Khuddakavatthukkhandhakakathā

- 2783 Rukkhe vā pana kuṭṭevā, aṭṭāne thambhakesu vā;  
Nhāyamāno sakaṃ kāyaṃ, ugghaṃseyyassa dukkaṭaṃ.

- 2784 Kāyaṃ gandhabbahatthena, kuruvindakasuttiyā;  
Mallakena na ghaṃseyya, nāññamaññañca kāyato.
- 2785 Akataṃ mallakaṃ nāma, gilānasseva vaṭṭati;  
Kataṃ taṃ mallakaṃ nāma, sabbesampi na vaṭṭati.
- 2786 Kapāliṭṭhakakhaṇḍāni, sabbassa puthupāṇikaṃ;  
Gilānassāgilānassa, vatthavaṭṭi ca vaṭṭati.
- 2787 Vuttā pheṇakapāsāṇa-kathalā pādaghamsane;  
Vaṭṭaṃ vā caturassaṃ vā, katakaṃ na ca vaṭṭati.
- 2788 Yaṃ kiñciṇi alaṅkāraṃ, dhārentassapi dukkaṭaṃ;  
Hoti antamaso tāla-paṇṇamattampi bhikkhuno.
- 2789 Osaṇheyya sake kese, yo hatthaphaṇakena vā;  
Phaṇakenapi kocchena, dukkaṭaṃ tassa niddise.
- 2790 Sittatelo datelehi, maṇḍanatthaṃ na vaṭṭati;  
Anulomanipātattaṃ, uddhamlomena bhikkhunā.
- 2791 Hatthaṃ telena temevā, puñchitabbā siroruhā;  
Vaṭṭatuṇhābhitattassa, allahatthena puñchitum.
- 2792 Ādāse udapatte vā, yattha katthaci attano;  
Mukhabimbaṃ vinā hetum, oloketassa dukkaṭaṃ.
- 2793 ‘Sañchaviṃ tu mukhaṃ, no’ ti, daṭṭhumābādhapaccayā;  
‘Jiṇṇo no’ tīyusāṅkhāra-jānanatthañca vaṭṭati.
- 2794 Naccaṃ vā pana gītaṃ vā, vāditam vāpi bhikkhuno;  
Daṭṭhum vā pana sotum vā, gacchato hoti dukkaṭaṃ.
- 2795 Daṭṭhumantamaso mora-naccampi ca na vaṭṭati;  
Sotumantamaso danta-gītampi ca na vaṭṭati.
- 2796 Naccantassa sayam vāpi, naccāpentassa dukkaṭaṃ;  
Anāpattantarārāme, ṭhatvā suṇāti passati.
- 2797 ‘Passissāmī’ ti naccaṃ vā, gītaṃ vā pana vāditam;  
Vihārato vihāraṃ vā, gacchato hoti dukkaṭaṃ.
- 2798 Āpattantovihārepi, utṭahitvāna gacchato;  
Ṭhatvā gīvaṃ pasāretvā, passatopi ca vīthiyaṃ.
- 2799 Kesā dīghā na dhāreyyā, yo dhāreyyassa dukkaṭaṃ;  
Dvaṅgulaṃ vā dumāsaṃ vā, tato uddham na vaṭṭati.
- 2800 Nakhe nāsikalomāni, dīghāni na tu dhāraye;  
Na ca vīsati maṭṭhaṃ vā, kātum vaṭṭati bhikkhuno.
- 2801 Kappāpeyya visum massum, dāṭhikaṃ vā ṭhapeyya yo;

Samharāpeyya vā lomam, sambādhe tassa dukkaṭam.

- 2802**Chindato dukkaṭam vuttam, kese kattarikāya vā;  
Agilānassa aññena, chindāpentassa vā tathā.
- 2803**Chindato attano aṅga-jātam thullaccayam siyā;  
Sesaṅgachedane atta-vadhe āpatti dukkaṭam.
- 2804**Ahikīṭādidatṭhassa, tādisābādhapaccayā;  
Na doso chindato aṅgam, mocentassa ca lohitaṃ.
- 2805**Aparissāvano maggam, sace gacchati dukkaṭam;  
Yācamānassa vā magge, tathevādatatopi taṃ.
- 2806**Na bhuñje na pive naggo, na khāde na ca sāyaye;  
Na dade na ca gaṇheyya, na gaccheyyapī añjasaṃ.
- 2807**Vanditabbaṃ na naggena, vandāpetabbameva vā;  
Parikkammaṃ na kātabbaṃ, na naggena ca kāraye.
- 2808**Parikkamme paṭicchādī, tisso jantāgharādikā;  
Vuttā, vatthapaṭicchādī, sabbattha pana vaṭṭati.
- 2809**Yattha katthaci peḷāyaṃ, bhuñjitaṃ na ca vaṭṭati;  
Ekato bhuñjato hoti, dukkaṭam ekabhājane.
- 2810**Ekapāvuraṇā eka-ttharaṇā vā nipajjare;  
Ekamañcepi vā tesam, hoti āpatti dukkaṭam.
- 2811**Na nisīdeyya saṅghāṭi-pallatthikamupāgato;  
Kiñci kīlaṃ na kīḷeyya, palitaṃ na ca gāhaye.
- 2812**Bhamukāya nalāṭe vā, dāṭhikāyapī uggataṃ;  
Tādisaṃ palitaṃ caññaṃ, gāhāpetumpī vaṭṭati.
- 2813**Agilāno sace bhikkhu, chattaṃ dhāreyya dukkaṭam;  
Attano cīvarādīnaṃ, guttatthaṃ pana vaṭṭati.
- 2814**Hatthisoṇḍaṃ catukkaṇṇaṃ, vasanaṃ macchavāḷakaṃ;  
Velliyaṃ tālavaṇṭaṅga, nivāsentassa dukkaṭam.
- 2815**Gahipārupanaṃ vāpī, pārupantassa dukkaṭam;  
Nivāsane pārupane, parimaṇḍalatā matā.
- 2816**Lokāyataṃ na vāceyya, na ca taṃ pariyāpuṇe;  
Na tiracchānavijjā vā, vācetaḅbāva bhikkhunā.
- 2817**Na ca vaṭṭati dhāretuṃ, sabbā cāmaribījanī;  
Na cālimpeyya dāyaṃ vā, na ca lañje mukhampi ca.
- 2818**Na vahe ubhatokājaṃ, vaṭṭatantarakājakam;  
Sīsakkhandhakaṭolamba-bhāre doso na vijjati.

2819 Aṭṭhaṅgulādikaṃ bhikkhu, pacchimaṃ caturaṅgulā;  
Khādato dantakaṭṭhañca, hoti āpatti dukkaṭaṃ.

2820 Rukkhaṃ nevābhirūheyya, kicce satipi porisaṃ;  
Āpadāsu yathākāmaṃ, vaṭṭatevābhirūhituṃ.

2821 Lasuṇaṃ na ca khādeyya, sace nākallako siyā;  
Nāropetabbakaṃ buddha-vacanaṃ aññathā pana.

2822 Khipitena ca vattabbaṃ, ‘‘jīvā’’ti, gihinā puna;  
‘‘Jīvathā’’ti ca vuttena, ‘‘ciraṃ jīvā’’ti vaṭṭati.

2823 Sāmaṇeraṃ gahaṭṭhaṃ vā, ākoṭentassa dukkaṭaṃ;  
Sayane pupphasaṃkiṇṇe, na vaṭṭati nipajjituṃ.

2824 Khurabhaṇḍaṃ na gaṇheyya, sace nhāpitapubbako;  
Na ca dhāraṇiyā uṇhī, sabbā bāhiralomikā.

2825 Aṅgarāgaṃ karontassa, dukkaṭaṃ samudīritaṃ;  
Akāyabandhanassāpi, gāmaṃ pavisatopi ca.

2826 Lohajaṃ dārujaṃ sabbaṃ, kappiyaṃ mattikāmayam;  
Vinā satthañca pattañca, katakaṃ kumbhakārikaṃ.

Khuddakavatthukkhandhakakathā.

### Senāsanakkhandhakakathā

2827 Āsandiko atikkanta-pamāṇopi ca vaṭṭati;  
Tathā pañcaṅgapīṭhampi, sattaṅgampi ca vaṭṭati.

2828 Tūlonaddhā ghareyeva, mañcapīṭhā nisīdituṃ;  
Sīsapādūpadhānañca, agilānassa vaṭṭati.

2829 Saṅtharivā gilānassa, upadhānāni tattha ca;  
Paccattharaṇakaṃ datvā, nipajjantassa vaṭṭati.

2830 Tiriyaṃ muṭṭhiratanaṃ, hoti bimbohanaṃ mitaṃ;  
Dīghato ca diyaḍḍhaṃ vā, dvihatthanti **kurundiyaṃ**.

2831 Pūritā coḷapaṇṇuṇṇa-tiṇavākehi pañcahi;  
Bhisyo bhāsītā pañca, tūlānaṃ gaṇanāvasā.

2832 Bhisitūlāni pañceva, tathā tūlāni tīṇipi;  
Lomāni migapakkhīnaṃ, gabbhā bimbohanassime.

2833 Manussalomaṃ lomesu, pupphesu bakulādikaṃ;  
Suddhaṃ tamālapattañca, paṇṇesu na ca vaṭṭati.

2834 Uṇṇādikaṃ pañcavidhañca tūlaṃ;  
Mahesinā yaṃ bhisiyaṃ pavuttaṃ;  
Masūrake taṃ pana vaṭṭatīti;

**Kurundiyam** aṭṭhakathāya vuttam.

**2835**Yadetam tividham tūlam, bhisiyam tam akappiyam;  
Missam tamālapattam tu, sabbattha pana vaṭṭati.

**2836**Rūpam tu purisitthīnam, tiracchānagatassa vā;  
Kārentassa karoto vā, hoti āpatti dukkaṭam.

**2837**Jātakam pana vatthum vā, kārāpetum parehi vā;  
Mālākammaṃ latākammaṃ, sayam kātumpi vaṭṭati.

**2838**Samānāsaniko nāma, dvīhi vassehi yo pana;  
Vuḍḍho vā daharo vāpi, vassenekena vā pana.

**2839**Samānavasse vattabbam, kiñca nāmidha vijjati;  
Sattavassativassehi, pañcavasso nisīdati.

**2840**Heṭṭhā dīghāsanaṃ tiṇṇaṃ, yaṃ pahoti nisīdituṃ;  
Ekamañcepi pīṭhe vā, dve nisīdanti vaṭṭati.

**2841**Ubhatobyañjanaṃ itthiṃ, ṭhapetvā paṇḍakam pana;  
Dīghāsane anuññātam, sabbehipi nisīdituṃ.

**2842**Purimiko pacchimiko, tathevantaramuttako;  
Tayo senāsanaggāhā, sambuddhena pakāsītā.

**2843**Pubbāruṇā pāṭipadassa yāva;  
Punāruṇo bhijjati neva tāva;  
Idaṅhi senāsanagāhakassa;  
Khattanti vassūpagame vadanti.

**2844**Pātova gāhite añño, bhikkhu senāsane pana;  
Sace yācati āgantvā, vattabbo gāhitanti so.

**2845**Sanghikam apaloketvā, gahitam vassavāsikam;  
Antovassepi vibbhanto, labhate tatrajam sace.

**2846**Vuṭṭhavasso sace bhikkhu, kiñci āvāsihatthato;  
Gahetvā kappiyam bhaṇḍam, datvā tassattano pana.

**2847**‘Asukasmim kule mayham, vassāvāsikacīvaram;  
Gāhitam gaṇha’ iccevam, vatvā gacchati so disam.

**2848**Uppabbajati ce tattha, gataṭṭhāne, na labbhati;  
Gahetuṃ tassa sampattam, sanghikamyeva tam siyā.

**2849**Manusse sammukhā tattha, paṭicchāpeti ce pana;  
Sabbam labhati sampattam, vassāvāsikacīvaram.

**2850**Ārāmo ca vihāro ca, vatthūni duvidhassapi;  
Bhisi bimbohanam mañca-pīṭhanti tatiyam pana.

- 2851 Lohakumbhī kaṭāhañca, bhāṇako lohavārako;  
Vāsi pharasu kuddālo, kuṭhārī ca nikhādanam.
- 2852 Valli veḷu tiṇaṃ paṇṇaṃ, muñjapabbajameva ca;  
Mattikā dārubhaṇḍañca, pañcamaṃ tu yathāha ca.
- 2853 ‘Dvīhi saṅgahitāni dve, tatiyaṃ catusaṅgamaṃ;  
Catutthaṃ navakoṭṭhāsaṃ, pañcamaṃ aṭṭhadhā matam.
- 2854 Iti pañcahi rāsīhi, pañcanimmalalocano;  
Pañcaviśavidhaṃ nātho, garubhaṇḍaṃ pakāsayaī’.
- 2855 Idañhi pana saṅghassa, santakaṃ garubhaṇḍakaṃ;  
Vissajjento vibhājento, bhikkhu thullaccayaṃ phuse.
- 2856 Bhikkhunā garubhaṇḍaṃ tu, saṅghena hi gaṇena vā;  
Vissajjitamavissatṭhaṃ, vibhattamavibhājitaṃ.
- 2857 Purimesu hi tīsvettha, na cattāgarubhaṇḍakaṃ;  
Lohakumbhī kaṭāho ca, lohabhāṇakameva ca.
- 2858 Tividhaṃ khuddakaṃ vāpi, garubhaṇḍakamevidaṃ;  
Pādagaṇhanako loha-vārako bhājiyo mato.
- 2859 Uddhaṃ pana tato loha-vārako garubhaṇḍakaṃ;  
Bhīkārādīni sabbāni, garubhaṇḍāni honti hi.
- 2860 Bhājetabbo ayopatto;  
Tambāyothālakāpi ca;  
Dhūmanettādikaṃ neva;  
Bhājetabbanti dīpitaṃ.
- 2861 Attanā paṭiladdhaṃ taṃ, lohabhaṇḍaṃ tu kiñcīpi;  
Na puggalikabhogena, bhuñjītabbañhi bhikkhunā.
- 2862 Kamsavaṭṭakalohānaṃ, bhājanānīpi sabbaso;  
Na puggalikabhogena, vaṭṭanti paribhuñjitaṃ.
- 2863 Tipubhaṇḍepi eseva, nayo ñeyyo vibhāvinā;  
Na doso saṅghike atthi, gihīnaṃ santakesu vā.
- 2864 Khīrapāsānasambhūtaṃ, garukaṃ taṭṭakādikaṃ;  
Pādagaṇhanato uddhaṃ, ghaṭako garubhaṇḍako.
- 2865 Siṅgisajjhumayaṃ hāra-kūṭajaṃ phalikubbhavaṃ;  
Bhājanāni na vaṭṭanti, gihīnaṃ santakānīpi.
- 2866 Vāsi bhājanīyā khuddā, garubhaṇḍaṃ mahattarī;  
Tathā pharasu vejjānaṃ, sirāvedhanakampi ca.
- 2867 Kuṭhārī vāsi kuddālo, garubhaṇḍaṃ nikhādanam;  
Sikharampi ca teneva, gahitanti pakāsitaṃ.



**2868**Caturassamukhaṃ doṇi-mukhaṃ vaṅkampi tattha ca;  
Sadaṇḍaṃ khuddakaṃ sabbaṃ, garubhaṇḍaṃ nikhādanam.

**2869**Muṭṭhikamadhikaraṇī, saṇḍāso vā tulādikaṃ;  
Kiñci saṅghassa dinnam ce, tam sabbaṃ garubhaṇḍakaṃ.

**2870**Nhāpitassa ca saṇḍāso, kattarī ca mahattarī;  
Mahāpipphalakaṃ tunna-kārānaṃ garubhaṇḍakaṃ.

**2871**Valli saṅghassa dinnā vā, tathajātāpi rakkhitā;  
Aḍḍhabāhuppamaṇāpi, garu vettalatādikā.

**2872**Suttavākādinibbattā, rajjukā yottakāni vā;  
Saṅghassa dinnakāle tu, gacchanti garubhaṇḍataṃ.

**2873**Nāḷikerassa hīre vā, vāke vā pana kenaci;  
Vaṭṭetvā hi katā eka-vaṭṭāpi garubhaṇḍakaṃ.

**2874**Veḷu saṅghassa dinno vā, rakkhito tathajātako;  
Aṭṭhaṅgulāyato sūci-daṇḍamatto garuṃ siyā.

**2875**Chattadaṇḍasalākāyo, daṇḍo kattarayatṭhipi;  
Pādagaṇhanakā tela-nāḷī bhājaniyā ime.

**2876**Muñjādīsupi yaṃ kiñci, muṭṭhimattaṃ garuṃ siyā;  
Tālapaṇṇādimekampi, dinnam vā tathajātakaṃ.

**2877**Aṭṭhaṅgulappamaṇopi, garukaṃ rittapotthako;  
Mattikā pakatī vāpi, pañcavaṇṇā sudhāpi vā.

**2878**Śilesādīsu vā kiñci, dinnam vā tathajātakaṃ;  
Tālapakkapamaṇam tu, garubhaṇḍanti dīpitaṃ.

**2879**Valliveḷādikaṃ kiñci, arakkhitamagopitaṃ;  
Garubhaṇḍam na hoteva, gahetabbaṃ yathāsukhaṃ.

**2880**Rakkhitaṃ gopitaṃ vāpi, gahetabbaṃ tu gaṇhatā;  
Samakaṃ atirekaṃ vā, datvā phātikameva vā.

**2881**Añjanaṃ haritālaṅca, tathā hiṅgu manosilā;  
Bhājetabbanti viññeyyaṃ, viññunā vinayaññunā.

**2882**Dārubhaṇḍepi yo koci, sūcidaṇḍappamaṇako;  
Aṭṭhaṅgulāyato dāru-bhaṇḍako garubhaṇḍakaṃ.

**2883**Mahāatṭhakathāyaṃ tu, vibhajitvāva dassitaṃ;  
Āsandikopi sattaṅgo, bhaddapīṭhaṅca pīṭhikā.

**2884**Pīṭhameḷakapādaṅca, tathāmaṇḍakavaṭṭakaṃ;  
Kocchaṃ palālapīṭhaṅca, dhovane phalākampi ca.

**2885**Bhaṇḍikā muggaro ceva, vatthaghaṭṭanamuggaro;

Ambaṇampi ca mañjūsā, nāvā rajanadoṇikā.

- 2886** Uḷuṅkopi samuggopi, karaṇḍampi kaṭacchupi;  
Evamādi tu sabbampi, saṅghikaṃ garubhaṇḍakaṃ.
- 2887** Sabbamaṃ dārumayaṃ geha-sambhāraṃ garukaṃ matam;  
Bhājiyaṃ kappiyaṃ cammaṃ, akappiyamabhājiyaṃ.
- 2888** Eḷacammaṃ garuṃ vuttaṃ, tathevodukkhalādikaṃ;  
Pesakārādibhaṇḍaṅca, kasibhaṇḍaṅca saṅghikaṃ.
- 2889** Tathevādhārako patta-pidhānaṃ tālavaṇṭakaṃ;  
Bījanī pacchi caṅkoṭaṃ, sabbā sammunījanī garu.
- 2890** Yaṃ kiñci bhūmattharaṇaṃ, yo koci kaṭasārako;  
Cakkayuttakayānaṅca, sabbampi garubhaṇḍakaṃ.
- 2891** Chattaṅca muṭṭhipaṇṇaṅca, visāṇaṃtumbabhājanaṃ;  
Upāhanāraṇīdhamma-karaṇādi lahuṃ idaṃ.
- 2892** Hatthidanto visāṇaṅca, yathāgatamatacchitaṃ;  
Mañcapādādi yaṃ kiñci, bhājanīyamanīṭṭhitaṃ.
- 2893** Niṭṭhito tacchito vāpi, vidho hiṅgukaraṇḍako;  
Añjanī ca salākāyo, bhājanī udapuñchanī.
- 2894** Sabbamaṃ kulālabhaṇḍampi, paribhogārahaṃ pana;  
Pattaṅgārakaṭāhaṅca, dhūmadānaṃ kapallikā.
- 2895** Thūpikā dīparukkho ca, cayanacchadaniṭṭhakā;  
Saṅghikaṃ pana sabbampi, garubhaṇḍanti dīpitaṃ.
- 2896** Patto kañcanako ceva, thālakaṃ kuṇḍikāpi ca;  
Ghaṭako lohabhaṇḍepi, kuṇḍikāpi ca bhājiyā.
- 2897** Garunā garubhaṇḍaṅca, thāvarena ca thāvaram;  
Saṅghassa parivattetvā, gaṇhituṃ pana vaṭṭati.
- 2898** Adhotena ca pādena, nakkame sayanāsanam;  
Allapādena vā bhikkhu, tatheva saupāhano.
- 2899** Bhūmiyā niṭṭhubhantassa, parikammakatāya vā;  
Parikammakataṃ bhittiṃ, apassentassa dukkaṭaṃ.
- 2900** Parikammakataṃ bhūmiṃ, saṅghikaṃ mañcapīṭṭhakaṃ;  
Attano santakeneva, pattharivāna kenaci.
- 2901** Nipajjitabbaṃ, sahasā, tassa niddāyato yadi;  
Sarīrāvayavo koci, mañcaṃ phusati dukkaṭaṃ.
- 2902** Lomesu pana lomānaṃ, gaṇanāyeva dukkaṭaṃ;  
Talena hatthapādānaṃ, vaṭṭatakkamituṃ pana.

- 2903**Sahassagghanako koci, piṇḍapāto sacīvaro;  
Patto avassikaṃ bhikkhuṃ, likhitvā ṭhapitopi ca.
- 2904**Tādiso piṇḍapātova, saṭṭhivassānamaccaye;  
Uppanno saṭṭhivassassa, ṭhitikāya dade budho.
- 2905**Uddesabhattaṃ bhuñjītvā, jāto ce sāmaṇerako;  
Gahetuṃ labhati taṃ pacchā, sāmaṇerassa pāḷiyā.
- 2906**Sampunṇavīsavasso yo, sve uddesaṃ labhissati;  
Ajja so upasampanno, atītā ṭhitikā siyā.
- 2907**Sace pana salākā tu, laddhā bhattaṃ na taṃdine;  
Laddhaṃ, punadine tassa, gāhetabbaṃ, na saṃsayo.
- 2908**Uttaruttaribhaṅgassa, bhattassekacarassa hi;  
Visuñhi ṭhitikā katvā, dātabbā tu salākikā.
- 2909**Bhattameva sace laddhaṃ, na panuttaribhaṅgakaṃ;  
Laddhamuttaribhaṅgaṃ vā, na laddhaṃ bhattameva vā.
- 2910**Yena yena hi yaṃ yaṃ tu, na laddhaṃ, tassa tassa ca;  
Taṃ taṃ punadine cāpi, gāhetabbanti dīpitaṃ.
- 2911**Saṅghuddesādikaṃ bhattaṃ, idaṃ sattavidhampi ca;  
Āgantukādibhattañca, catubbidhamudīritaṃ.
- 2912**Vihāravārabhattañca, niccañca kuṭibhattakaṃ;  
Pannarasavidhaṃ bhattaṃ, uddiṭṭhaṃ sabbamevidha.
- 2913**Pāḷimaṭṭhakathañceva, oloketvā punappunaṃ;  
Saṅghike paccaye sammā, vibhajeyya vicakkhaṇo.

Senāsanakkhandhakakathā.

### Vattakkhandhakakathā

- 2914**Āgantukāvāsikapīṇḍacārī-;  
Senāsanāraññanumodanāsu;  
Vattāni bhatte gamikassa jantā-;  
Ghare tathā vaccaḷippavese.
- 2915**Ācariyupajjhāyakaṃsaddhi-;  
Vihārivattānīpi sabbasova;  
Vattāni vuttāni catuddaseva;  
Visuddhacittena vināyakena.
- 2916**Āgantukena ārāmaṃ, pavisantena bhikkhunā;  
Chattaṃ panāpanetabbaṃ, muñcitabbā upāhanā.
- 2917**Oguṇṭhanaṃ na kātabbaṃ, sīse cīvaremeva vā;  
Na hi tena ca dhotabbā, pādā pānīyavārinā.

- 2918 Vanditabbāva pucchitvā, vihāre vuḍḍhabhikkhuno;  
Kāle senāsanam tena, pucchitabbañca bhikkhunā.
- 2919 Vaccaṭṭhānañca passāva-ṭṭhānam pānīyameva ca;  
Paribhojanīyam saṅgha-katikam gocarādikam.
- 2920 Vuḍḍhamāgantukam disvā, bhikkhunāvāsikenapi;  
Pattam paṭiggahetabbam, paccuggantvāna cīvaram.
- 2921 Āsanam paññapetabbam, tassa pādodakampi ca;  
Upanikkhipitabbañca, pucchitabbañca vārinā.
- 2922 Vandeyyo paññapetabbam, tassa senāsanampi ca;  
Ajjhāvutthamavuttham vā, gocarāgocarampi ca.
- 2923 Vaccaṭṭhānañca passāva-ṭṭhānam sekkhakulāni ca;  
Pavese nikkhame kālo, vattabbo pānīyādikam.
- 2924 Sace so navako hoti;  
Āgatāgantuko yathā;  
Nisinneneva tenassa;  
Sabbamāvāsibhikkhunā.
- 2925 ‘‘Atra pattam ṭhapehīti, nisīdāhīdamāsanam’’;  
Iccevam pana vattabbam, deyyam senāsanampi ca.
- 2926 Dārumattikabhaṇḍāni, gantukāmena bhikkhunā;  
Gantabbam paṭisāmetvā, thaketvāvasathampi ca.
- 2927 Āpucchitvāpi gantabbam, bhikkhunā sayanāsanam;  
Pucchitabbe asantepi, gopetvā vāpi sādhumkam.
- 2928 Sahasā pavise nāpi, sahasā na ca nikkhame;  
Nātidūre naccāsanne, ṭhātabbam piṇḍacārinā.
- 2929 Vāmahatthena saṅghāṭim, uccāretvātha bhājanam;  
Dakkhiṇena paṇāmetvā, bhikkham gaṇheyya paṇḍito.
- 2930 Sūpam vā dātukāmāti, sallakkheyya muhuttakam;  
Olokeyyantarā bhikkhu, na bhikkhādāyikāmukham.
- 2931 Pānīyādi panāneyyam, bhikkhunāraññakenapi;  
Nakkhattam tena yogo ca, jānitabbā disāpi ca.
- 2932 Vaccapassāvatitthāni, bhavanti paṭipāṭiyā;  
Karontassa yathāvuḍḍham, hoti āpatti dukkaṭam.
- 2933 Sahasā ubbhajitvā vā, na ca vaccakuṭim vise;  
Ukkāsivā bahi ṭhatvā, pavise saṅikam pana.
- 2934 Vaccam na nitthunantena, kātabbam pana bhikkhunā;  
Khādato dantakaṭṭham vā, karoto hoti dukkaṭam.

- 2935 Vaccam pana na kātabbam, bahiddhā vaccadoṇiyā;  
Passāvopi na kātabbo, bahi passāvadoṇiyā.
- 2936 Kharena nāvalekheyya, na kaṭṭham vaccakūpake;  
Chaḍḍeyya na ca pāteyya, kheḷam passāvadoṇiyā.
- 2937 Pādukāsu ṭhitoyeva, ubbhajeyya vicakkhaṇo;  
Paṭicchādeyya tattheva, ṭhatvā nikkhamane pana.
- 2938 Nācameyya sace vaccam, katvā yo salile sati;  
Tassa dukkaṭamuddiṭṭham, muninā mohanāsina.
- 2939 Sasaddam nācametabbam, katvā capu capūti ca;  
Ācmitvā sarāvepi, sesetabbam na tūdakam.
- 2940 Ūhatampi adhovitvā, nikkhamantassa dukkaṭam;  
Uklāpāpi sace honti, sodhetabbam asesato.
- 2941 Avalekhanakaṭṭhena, pūro ce pīṭharo pana;  
Chaḍḍeyya kumbhi rittā ce, kumbhiṃ pūreyya vārinā.
- 2942 Anajjhīṭṭho hi vuḍḍhena, pātimokkham na uddise;  
Dhammam na ca bhaṇe, pañham, na puccheyya na vissaje.
- 2943 Āpucchitvā kathentassa, vuḍḍham vuḍḍhatarāgame;  
Puna āpucchane kiccam, natthīti paridīpitaṃ.
- 2944 Vuḍḍhenekavihārasmiṃ, saddhiṃ viharatā pana;  
Anāpucchā hi sajjhāyo, na kātabbo kadācīpi.
- 2945 Uddesopi na kātabbo, paripucchāya kā kathā;  
Na ca dhammo kathetabbo, bhikkhunā dhammacakkhunā.
- 2946 Na dīpo vijjhāpetabbo, kātabbo vā na ceva so;  
Vātapānakavāṭāni, thakeyya vivareyya no.
- 2947 Caṅkame caṅkamanto ca, vuḍḍhato parivattaye;  
Tampi cīvarakaṇṇena, kāyena na ca ghaṭṭaye.
- 2948 Purato neva therānaṃ, nhāyeyya na panūpari;  
Uttaram otarantānaṃ, dade maggaṃ, na ghaṭṭaye.
- 2949 Vattaṃ aparipūrento, na sīlam paripūrati;  
Asuddhasīlo duppañño, cittekaggaṃ na vindati.
- 2950 Vikkhittacittonekaggo, saddhammam na ca passati;  
Apassamāno saddhammam, dukkhā na parimuccati.
- 2951 Tasmā hi vattaṃ pūreyya, jinaputto vicakkhaṇo;  
Ovādam buddhaseṭṭhassa, katvā nibbānamehiti.

Vattakkhandhakakathā.

### Bhikkhunikkhandhakathā

- 2952** Kāyaṃ ūruṃ thanaṃ vāpi, vivarivāna bhikkhunī;  
Attano aṅgajātaṃ vā, bhikkhussa na ca dassaye.
- 2953** Bhikkhunā saha yaṃ kiñci, sampayoventiyāpi ca;  
Tato bhāsantiyā bhikkhuṃ, hoti āpatti dukkaṭaṃ.
- 2954** Na ca bhikkhuniyā dīghaṃ, dhāreyya kāyabandhanaṃ;  
Teneva kāyabandhena, thanapaṭṭena vā pana.
- 2955** Vilīvena ca paṭṭena, cammapaṭṭena vā tathā;  
Dussapaṭṭena vā dussa-veṇiyā dussavaṭṭiyā.
- 2956** Na phāsukā nametabbā, dukkaṭaṃ tu namentiyā;  
Na ghaṃsāpeyya samaṇī, jaghanaṃ aṭṭhikādinā.
- 2957** Hatthaṃ vā hatthakocchaṃ vā, pādaṃ vā mukhamūrukaṃ;  
Koṭṭāpeti sace tassā, hoti āpatti dukkaṭaṃ.
- 2958** Na mukhaṃ limpitabbaṃ tu, na cuṇṇetabbameva ca;  
Manosilāya vāpatti, mukhaṃ lañjantiyā siyā.
- 2959** Aṅgarāgo na kātabbo, mukharāgopi vā tathā;  
Avaṅgaṃ na ca kātabbaṃ, na kātabbaṃ visesakam.
- 2960** Olokanakato rāgā, oloketuṃ na vaṭṭati;  
Ṭhātabbaṃ na ca sāloke, sanaccaṃ na ca kāraye.
- 2961** Dukkaṭaṃ muninā vuttaṃ, gaṇikaṃ vuṭṭhapentiyā;  
Surāṃ vā pana maṃsaṃ vā, paṇṇaṃ vā vikkhantiyā.
- 2962** Vaḍḍhiṃ vāpi vaṇijjaṃ vā, payojetuṃ na vaṭṭati;  
Tiriṭṭaṃ kañcukaṃ vāpi, yadi dhāreti dukkaṭaṃ.
- 2963** Dāso vā pana dāsī vā, tathā kammakaropi vā;  
Na cevupaṭṭhapetabbo, tīracchānagatopi vā.
- 2964** Na ca bhikkhuniyā sabba-nīlādiṃ pana cīvaram;  
Dhāretabbaṃ, na dhāreyya, sabbaṃ namatakampi ca.
- 2965** Paṭicchannāpaṭicchannaṃ, chinnaṃ vācchinnameva vā;  
Purisabyañjanaṃ sabbaṃ, oloketuṃ na vaṭṭati.
- 2966** Dūratova ca passivā, bhikkhuṃ bhikkhuniyā pana;  
Maggō tassa padātabbo, okkamitvāna dūrato.
- 2967** Bhikkhuṃ pana ca passivā, pattaṃ bhikkhaṃ carantiyā;  
Nīharitvā tamukkujjaṃ, dassetabbaṃ tu bhikkhuno.
- 2968** Saṃvelliakaṇca kātuṃ vā, dhāretuṃ kaṭisuttakam;  
Utukāle anuññātaṃ, utunīnaṃ mahesinā.

- 2969**Itthiposayutaṃ yānaṃ, hatthavaṭṭakameva vā;  
Pāṭaṅkī ca gilānāya, vaṭṭatevābhirūhituṃ.
- 2970**Garudhamme ṭhitāyāpi, mānattaṃ tu carantiyā;  
Sammannitvā padātabbā, dutiyā pana bhikkhunī.
- 2971**Yassā pabbajjakāle tu, gabbho vuṭṭhāti itthiyā;  
Putto yadi ca tassāpi, dātabbā dutiyā tathā.
- 2972**Mātā labhati pāyetuṃ, bhojetuṃ puttamattano;  
Maṇḍetumpi ure katvā, setuṃ labhati sā pana.
- 2973**Ṭhapetvā sahaseyyaṃ tu, tasmim̐ dutiyikāya hi;  
Purisesu yathāññesu, vattitabbam̐ tatheva ca.
- 2974**Vibbhameneva sā hoti, yasmā idha abhikkhunī;  
Tasmā bhikkhuniyā sikkhā-paccakkhānaṃ na vijjati.
- 2975**Vibbhantāya yathā tassā, puna natthūpasampadā;  
Gatāya titthāyatanam̐, tathā natthūpasampadā.
- 2976**Chedanam̐ nakhakesānaṃ, purisehi ca vandanaṃ;  
Vaṇassa parikammampi, sādituṃ pana vaṭṭati.
- 2977**Na vaccakuṭiyā vacco, kātabbo yāya kāyaci;  
Heṭṭhāpi vivaṭe uddham̐, paṭicchannepi vaṭṭati.
- 2978**Na ca vaṭṭati sabbattha, pallaṅkena nisīdituṃ;  
Gilānāyaḍḍhapallaṅkam̐, vaṭṭatīti pakāsitaṃ.
- 2979**Na ca bhikkhuniyāraññe, vatthabbaṃ tu kathaṅcana;  
Atitthe naratitthe vā, nhāyituṃ na ca vaṭṭati.
- 2980**Samaṇī gandhacuṇṇena, yā ca vāsitamattiyā;  
Nhāyeyya paṭisote vā, tassā āpatti dukkaṭam̐.
- 2981**‘‘Tvamyeva paribhuñjā’’ti, paribhogatthamattano;  
Dinnaṃ abhutvā aññassa, dentiyā pana dukkaṭam̐.
- 2982**Sabbaṃ paṭiggahāpetvā, bhikkhūhi paribhuñjituṃ;  
Asantenupasampanne, bhikkhunīnaṃ tu vaṭṭati.

Bhikkhunikkhandhakakathā.

Iti vinayavinicchaye khandhakakathā niṭṭhitā.

### Catubbidhakammakathā

- 2983**Cattārimāni kammāni, apalokanasaññitaṃ;  
Ñatti ñattidutiyaṅca, kammaṃ ñatticatutthakaṃ.

- 2984 **Apalokanakammaṃ** tu, pañca ṭhānāni gacchati;  
Ñattikammaṃ navatṭhānaṃ, dutiyaṃ satta gacchati.
- 2985 Tathā ñatticatutthampi, satta ṭhānāni gacchati;  
Nissāraṇaṇca osāro, bhaṇḍukaṃ brahmadaṇḍako.
- 2986 **Apalokanakamma**ñhi, kammalakkhaṇapañcamam;  
**Nissāraṇaṇca osāraṃ**, samaṇuddesato vade.
- 2987 **Bhaṇḍukaṃ** pabbajantena, channena **brahmadaṇḍakaṃ**;  
Aññassapi ca kātabbo, tathārūpassa bhikkhuno.
- 2988 Sabbo sannipatitvāna, āpucchitvāna sabbaso;  
Cīvarādiparikkhāraṃ, saṅgho yaṃ deti tassa hi.
- 2989 Tikkhattum apaloketvā, bhikkhūnaṃ ruciyā pana;  
Evaṃ saṅghassa dānaṃ tu, hoti taṃ **kammalakkhaṇam**.
- 2990 Nissāraṇamathosāro, uposathapavāraṇā;  
Sammuti ceva dānaṇca, paṭiggāho ca sattamo.
- 2991 Paccukkaḍḍhanatā ceva, aṭṭhamī parikittitā;  
Kamma lakkhaṇaṇcāti, nava ṭhānāni ñattiyā.
- 2992 Vinicchaye asampatte, therassāvinayaññuno;  
Tassa nissāraṇā vuttā, yā sā **nissāraṇā**ti hi.
- 2993 Upasampadāpekkhassa, āgacchosāraṇāti sā;  
**Uposathavasenāpi, pavāraṇavasenapi**.
- 2994 Ñattiyā ṭhapitattā hi, ñattikammānime duve;  
“Upasampadāpekkhañhi, anusāseyyaha”nti ca.
- 2995 “Itthannāmamaṃ bhikkhum, puccheyyaṃ vinaya”nti ca;  
Evamādipavattā hi, edisā ñatti **sammuti**.
- 2996 Nissatṭhacīvarādīnaṃ, dānaṃ “**dāna**”nti vuccati;  
Āpattīnaṃ paṭiggāho, “**paṭiggāho**”ti vuccati.
- 2997 **Paccukkaḍḍhanatā** nāma, pavārukkaḍḍhanā matā;  
“Imaṃ uposathaṃ katvā, kāle pavārayāmi”ti.
- 2998 Tiṇavatthārake sabba-paṭhamā ñatti cetarā;  
**Kammalakkhaṇa**metanti, nava ṭhānāni ñattiyā.
- 2999 Ñattidutiyakammampi, satta ṭhānāni gacchati;  
Nissāraṇamathosāraṃ, sammutiṃ dānameva ca.
- 3000 Uddhāraṃ desanaṃ kamma-lakkhaṇaṃ pana sattamaṃ;  
Pattanikkujjanādī tu, **nissārosāraṇā** matā.
- 3001 **Sammuti** nāma sīmādi, sā pañcadasadhā matā;



**Dānaṃ** kathinavatthassa, **dānaṃ** matakavāsaso.

**3002** Kathinassantarubbhāro, “**ubbhāro**”ti pavuccati;  
**Desanā** kuṭivattussa, vihārassa ca vatthuno.

**3003** Tiṇavatthārahakamme ca, mohāropanatādisu;  
Kammavācāvāsenettha, **kammalakkhaṇatā** matā.

**3004** Iti ñattidutiyassa, ime satta pakāsītā;  
Tathā ñatticatutthampi, satta ṭhānāni gacchati.

**3005** Nissāraṇamathosāraṃ, sammutiṃ dānaniggahaṃ;  
Samanubhāsanañceva, sattamaṃ kammalakkhaṇaṃ.

**3006** Sattannaṃ tajjanādīnaṃ, kammānaṃ karaṇaṃ pana;  
**Nissāraṇā**tha passaddhi, tesam **osāraṇā** matā.

**3007** Ovādo bhikkhunīnaṃ tu, **sammutī**ti pakāsītā;  
Mānattaparivāsānaṃ, dānaṃ “**dāna**”nti vuccati.

**3008** Puna mūlāpaṭikkasso, “**niggaho**”ti pavuccati;  
Ukkhittassānuvattikā, aṭṭha yāvataṭṭiyakā.

**3009** Ariṭṭho caṇḍakālī ca, ekādasa bhavantime;  
Imesaṃ tu vasā ñeyyā, dasekā **samanubhāsana**.

**3010** Upasampadakammañca, kammamabbhānasaññitaṃ;  
Idaṃ ñatticatutthe tu, sattamaṃ **kammalakkhaṇaṃ**.

**3011** Apalokanakammañcā-paloketvāva kāraye;  
Ñattiyā dutiyenāpi, catutthena na kāraye.

**3012** Ñattidutiyakammāni, lahukānatthi kānici;  
Kātabbānapaloketvā, sabbā sammutiyo siyuṃ.

**3013** Sesāni apaloketvā, kātuṃ pana na vaṭṭati;  
Yathāvuttanayeneva, tena teneva kāraye.

Catubbidhakammakathā.

### **Kammavipattikathā**

**3014** Vatthuto ñattito ceva, anussāvanasīmato;  
Parisatoti pañceva, kammadosā pakāsītā.

**3015** Sammukhākaraṇīyaṃ yaṃ, taṃ karoti asammukhā;  
Kammaṃ vatthuvipannaṃ taṃ, adhammanti pavuccati.

**3016** Asammukhākaraṇīyāni, aṭṭheva ca bhavanti hi;  
Pattanikkujjanañceva, pattassukkujjanampi ca.

- 3017** Pakāsaṇīyakammañca, sekkhaummattasammuti;  
Avandiyo tathā brahma-daṇḍo dūtūpasampadā.
- 3018** Īmānaṭṭha ṭhapetvāna, sesāni pana sabbaso;  
**Sammukhākaraṇīyāni**, kammāni sugatobravi.
- 3019** Ñattito pana pañceva, vipajjananayā matā;  
Na parāmasati vatthuñca, saṅghaṃ puggalameva vā.
- 3020** Na parāmasati ñattiṃ vā, pacchā ñattiṃ ṭhabeti vā;  
Pañcahetehi kammāni, ñattitova vipajjare.
- 3021** Anussāvanato pañca, kammadosā pakāsītā;  
Na parāmasati vatthuṃ vā, saṅghaṃ puggalameva vā.
- 3022** Hāpeti sāvanaṃ vāpi, sāvetasamayepi vā;  
Evaṃ pana vipajjanti, anussāvanatopi ca.
- 3023** Ekādasahi sīmāhi, sīmato kammadosatā;  
Vuttā uposathe tāva, khandhake sabbaso mayā.
- 3024** Catuvaggena kātabbe, kammappattā anāgatā;  
Chando ca na panānīto, paṭikkosanti sammukhā.
- 3025** Evaṃ tivaṅgiko doso, parisāya vasā siyā;  
Āgatā kammappattā ca, chando ca na panāgato.
- 3026** Sammukhā paṭisedhenti, dutiye catuvaggike;  
Āgatā kammappattā ca, chandopi ca samāhaṭo.
- 3027** Paṭikkosova etthatthi, tatiye catuvaggike;  
Evaṃ pañcādivaggesu, saṅghesu tividhesupi.
- 3028** Catutthikā siyuṃ dosā, dasa dve parisāvasā;  
Evaṃ dvādasadhā ettha, kammāni hi vipajjare.

Kammavipattikathā.

### Sedamocanakathā

Ka.

Soḷasaparivārassa, parivārassa sādarā;  
Suñātha nipuṇe pañhe, gūḷhatthe bhaṇato mama.

Kha.

Divāpajjati no rattim, rattimyeva ca no divā;  
Kathañca paṭiggaṇhanto, na gaṇhanto kathaṃ pana.

Ga.

Chindantassa siyāpatti, tathevāchindatopi ca;  
Chādentassa tathāpatti-na chādentassa bhikkhuno.

Gha.

Kā cāpatti samāpatti-lābhinoyeva bhikkhuno;  
Asamāpattilābhissa, kā ca nāmassa sā bhave.

Ña.

Garukaṃ bhaṇato saccaṃ, alikaṃ bhaṇato siyuṃ;  
Lahuṃ saccaṃ bhaṇantassa, musā ca bhaṇato garuṃ.

Ca.

Pavisanto ca ārāmaṃ, āpajjati na nikkhamaṃ;  
Nikkhamantova āpatti, na ceva pavisaṃ pana;

Cha.

Samādiyanto asamādiyanto;  
Anādiyantopi ca ādiyanto;  
Dento adentopi siyā sadoso;  
Tathā karontopi ca no karonto.

Ja.

Āpajjati ca dhārento, adhārento tatheva ca;  
Dvinnaṃ mātā pitā sāva, kathaṃ hoti? Bhaṇāhi me.

Jha.

Ubhatobyañjanā itthī, gabbhaṃ gaṇhāti attanā;  
Gaṇhāpeti paraṃ gabbhaṃ, tasmā mātāpitā ca sā.

Ña.

Gāme vā yadi vāraññe, yaṃ paresaṃ mamāyitaṃ;  
Na harantova taṃ theyyā, kathaṃ pārājiko bhave;

Ṭa.

Theyyasaṃvāsako eso, liṅgasamvāsathenako;  
Parabhaṇḍaṃ agaṇhanto, tena hoti pārājito.

Ṭha.

Nāriṃ rūpavatiṃ bhikkhu, rattacitto asaṅṅato;  
Methunaṃ tāya katvāpi, na so pārājiko kathaṃ;

Ḍa.

Accharāsadisam nāriṃ, supinantena passati;  
Tāya methunasamyoge, katepi na bhavissati.

Ḍha.

Bahiddhā gehato bhikkhu, itthī gabbhantaram gatā;  
Chiddam gehassa nevatthi, katham methunato cuto;

Ṇa.

Antodussakuṭiṭṭhena, mātuḡāmena methunam;  
Santhatādivaseneva, katvā hoti parājito.

Ta.

Sutte ca vinayeyeva, khandhake sānulomike;  
Sabbattha nipuṇā dhīrā, ime pañhe bhaṇanti te.

Tha.

Khandhake parivāre ca, vinaye sānulomike;  
Ādaro karaṇīyova, paṭubhāvaṃ panicchitā.

Sedamocanakathā.

### Pakiṇṇakavinicchayakathā

**3029** Chattam paṇṇamayam kiñci, bahi anto ca sabbaso;  
Pañcavaṇṇena suttena, sibbitum na ca vaṭṭati.

**3030** Chinditum aḍḍhacandaṃ vā, paṇṇe makaradantakaṃ;  
Ghaṭakaṃ vālarūpaṃ vā, lekhā daṇḍe na vaṭṭati.

**3031** Sibbitum ekavaṇṇena, chattaṃ suttena vaṭṭati;  
Thirattham, pañcavaṇṇānam, pañjaram vā vinandhitum.

**3032** Ghaṭakaṃ vālarūpaṃ vā, lekhā vā pana kevalā;  
Bhinditvā vāpi ghaṃsitvā, dhāretum pana vaṭṭati.

**3033** Ahichattakasaṇṭhānam, daṇḍabundamhi vaṭṭati;  
Ukkiritvā katā lekhā, bandhanatthāya vaṭṭati.

**3034** Nānāvaṇṇehi suttehi, maṇḍanatthāya cīvaram;  
Samaṃ satapadādīnam, sibbitum na ca vaṭṭati.

**3035** Pattassa pariyante vā, tathā pattamukhepi vā;  
Venim saṅkhalikaṃ vāpi, karoto hoti dukkaṭam.

**3036** Paṭṭampi gaṇṭhipāsānam, aṭṭhakoṇādikaṃvidhiṃ;  
Tatthagghiyagadārūpaṃ, muggarādīṃ karonti ca.

- 3037**Tattha kakkāṭakakkhīni, uṭṭhāpentī na vaṭṭati;  
Suttā ca piḷakā tattha, duviññeyyāva dīpitā.
- 3038**Catukoṇāva vaṭṭanti, gaṇṭhipāsakapaṭṭakā;  
Kaṇṇakoṇesu suttāni, ratte chindeyya cīvare.
- 3039**Sūcikkammavikāraṃ vā, aññaṃ vā pana kiñcīpi;  
Cīvare bhikkhunā kātuṃ, kārāpetuṃ na vaṭṭati.
- 3040**Yo ca pakkhipati bhikkhu cīvaraṃ;  
Kaṇṭhipiṭṭhakkhālikādisu;  
Vaṇṇamaṭṭhamabhipatthayaṃ paraṃ;  
Tassa natthi pana mutti dukkaṭā.
- 3041**Sūcīhatthamalādīnaṃ, karaṇe cīvarassa ca;  
Tathā kiliṭṭhakāle ca, dhovanatthaṃ tu vaṭṭati.
- 3042**Rajane pana gandhaṃ vā, telaṃ vā lākhameva vā;  
Kiñci pakkhipituṃ tattha, bhikkhuno na ca vaṭṭati.
- 3043**Saṅkheṇa maṇinā vāpi, aññenāpi ca kenaci;  
Cīvaraṃ na ca ghaṭṭeyya, ghaṃsitabbaṃ na doṇiyā.
- 3044**Cīvaraṃ doṇiyaṃ katvā, nāpi ghaṭṭeyya muṭṭhinā;  
Rattaṃ paharituṃ kiñci, hattheheva ca vaṭṭati.
- 3045**Gaṇṭhike pana lekhā vā, piḷakā vā na vaṭṭati;  
Kappabinduvikāro vā, pāḷikaṇṇikabhedato.
- 3046**Thālākassa ca pattassa, bahi antopi vā pana;  
Āraggena katā lekhā, na ca vaṭṭati kācīpi.
- 3047**Āropetvā bhamaṃ pattaṃ, majjivā ce pacanti ca;  
“Maṇivaṇṇaṃ karissāma”, iti kātuṃ na vaṭṭati.
- 3048**Pattamaṇḍalake kiñci, bhittikkammaṃ na vaṭṭati;  
Na doso koci tathassa, kātuṃ makaradantaṃ.
- 3049**Na dhammakaraṇacchatte, lekhā kācīpi vaṭṭati;  
Kucchiyaṃ vā ṭhapetvā taṃ, lekhaṃ tu mukhavaṭṭiyaṃ.
- 3050**Suttaṃ vā diguṇaṃ katvā, koṭṭenti ca tahiṃ tahiṃ;  
Kāyabandhanasobhatthaṃ, taṃ na vaṭṭati bhikkhuno.
- 3051**Dasāmukhe daḷhatthāya, dvīsu antesu vaṭṭati;  
Mālākkammalatākamma-cittikampi na vaṭṭati.
- 3052**Akkhīni tattha dassetvā, koṭṭite pana kā kathā;  
Kakkāṭakkhīni vā tattha, uṭṭhāpetuṃ na vaṭṭati.
- 3053**Ghaṭaṃ deḍḍubhasīsaṃ vā, makarassa mukhampi vā;  
Vikārarūpaṃ yaṃ kiñci, na vaṭṭati dasāmukhe.

- 3054**Ujukam macchakanam vā, maṭṭham vā pana paṭṭikam;  
Khajjūripattakākāram, katvā vaṭṭati koṭṭitam.
- 3055**Paṭṭikā sūkarantanti, duvidham kāyabandhanam;  
Rajjukā dussapaṭṭādi, sabbam tassānulomikam.
- 3056**Murajam maddavīṇaṇca, deḍḍubhaṇca kalābukam;  
Rajjuyo na ca vaṭṭanti, purimā dvedasā siyumu.
- 3057**Dasā pāmaṅgasaṅṭhānā, niddiṭṭhā kāyabandhane;  
Ekā dvitīcatasso vā, vaṭṭanti na tato param.
- 3058**Ekarajjumayam vuttam, muninā kāyabandhanam;  
Taṇca pāmaṅgasaṅṭhānam, ekampi ca na vaṭṭati.
- 3059**Rajjuke ekato katvā, bahū ekāya rajjuyā;  
Nirantaraṇhi veṭṭetvā, katham vaṭṭati bandhitum.
- 3060**Dantakaṭṭhavisāṇaṭṭhi-lohaveḷunaḷabbhavā;  
Jatusaṅkhamayāsutta-phalajā vidhakā matā.
- 3061**Kāyabandhanavidhepi, vikāro na ca vaṭṭati;  
Tattha tattha pariccheda-lekhāmatam tu vaṭṭati.
- 3062**Mālākammalatākamma-nānārūpavicittitā;  
Na ca vaṭṭati bhikkhūnam, añjanī janarañjanī.
- 3063**Tādisam pana ghaṃsitvā, veṭṭetvā suttakena vā;  
Vaḷañjantassa bhikkhussa, na doso koci vijjati.
- 3064**Vaṭṭā vā caturassā vā, aṭṭhaṃsā vāpi añjanī;  
Vaṭṭatevāti niddiṭṭhā, vaṇṇamaṭṭhā na vaṭṭati.
- 3065**Tathāñjanisalākāpi, añjanithavikāya ca;  
Nānāvaṇṇehi suttehi, cittakammam na vaṭṭati.
- 3066**Ekavaṇṇena suttena, sipāṭim yena kenaci;  
Yam kiñci pana sibbetvā, vaḷañjantassa vaṭṭati.
- 3067**Maṇikam piḷakam vāpi, pipphale āraṅṅake;  
Ṭhapetum pana yam kiñci, na ca vaṭṭati bhikkhuno.
- 3068**Daṇḍakepi pariccheda-lekhāmatam tu vaṭṭati;  
Valitvā ca nakhacchedam, karontīti hi vaṭṭati.
- 3069**Uttarāraṇiyam vāpi, dhanuke pelladaṇḍake;  
Mālākammādi yam kiñci, vaṇṇamaṭṭham na vaṭṭati.
- 3070**Saṅḍāse dantakaṭṭhānam, tathā chedanavāsīyā;  
Dvīsu passesu lohena, bandhitum pana vaṭṭati.
- 3071**Tathā kattaradaṇḍepi, cittakammam na vaṭṭati;

Vaṭṭalekhāva vaṭṭanti, ekā vā dvepi heṭṭhato.

- 3072** Visāṇe nāḷiyaṃ vāpi, tathevāmaṇḍasārake;  
Telabhājanake sabbaṃ, vaṇṇamaṭṭhaṃ tu vaṭṭati.
- 3073** Pānīyassa uḷuṅkepi, doṇiyaṃ rajanassapi;  
Ghaṭe phalakaḷṭṭhepi, valayādhārakādike.
- 3074** Tathā pattapidhāne ca, tālavaṇṭe ca bījane;  
Pādapuñchaniyaṃ vāpi, sammūñjaniyameva ca.
- 3075** Mañce bhūmatthare pīṭhe, bhisibimbohanesu ca;  
Mālākammādikaṃ cittaṃ, sabbameva ca vaṭṭati.
- 3076** Nānāmaṇimayatthambha-kavāṭadvārabhittikaṃ;  
Senāsanamanuññātaṃ, kā kathā vaṇṇamaṭṭhake.
- 3077** Sovaṇṇiyaṃ dvārakavāṭabaddhaṃ;  
Suvaṇṇanānāmaṇibhittibhūmiṃ;  
Na kiñci ekampi nisedhanīyaṃ;  
Senāsaṇaṃ vaṭṭati sabbameva.
- 3078** Buddhaṃ dhammañca saṅghañca, na uddissa davaṃ kare;  
Mūgabbatādikaṃ neva, gaṇheyya titthiyabbaṃ.
- 3079** Kāyaṃ vā aṅgaḷātaṃ vā, ūruṃ vā na tu dassaye;  
Bhikkhunīnaṃ tu tā vāpi, na siñce udakādīnā.
- 3080** Vassamaññattha vuṭṭho ce, bhāgamaññattha gaṇhāti;  
Dukkaṭaṃ puna dātabbaṃ, gīvā naṭṭhepi jajjare.
- 3081** Codito so sace tehi, bhikkhūhi na dadeyyataṃ;  
Dhuranikkhepane tesam, bhaṇḍaggheneva kāraye.
- 3082** Akappiyasamādānaṃ, karoto hoti dukkaṭaṃ;  
Davā silaṃ pavijjhanto, dukkaṭā na ca muccati.
- 3083** Gihīgopakadānasmim, na doso koci gaṇhato;  
Paricchedanayo vutto, saṅghacetiyasantake.
- 3084** Yānaṃ purisasaṃyuttaṃ, hatthavaṭṭakameva vā;  
Pāṭaṅkiñca gilānassa, vaṭṭatevābhirūhituṃ.
- 3085** Na ca bhikkhuniyā saddhiṃ, sampayojeyya kiñcipi;  
Dukkaṭaṃ bhikkhuniṃ rāgā, obhāsentaṃ bhikkhuno.
- 3086** Bhikkhunīnaṃ have bhikkhu, pātimokkhaṃ na uddise;  
Āpattiṃ vā sace tāsam, paṭiggaṇheyya dukkaṭaṃ.
- 3087** Attano paribhogatthaṃ, dinnamaññassa kassaci;  
Paribhogamakavāva, dadato pana dukkaṭaṃ.

- 3088 Asappāyaṃ sace sabbam, apānetumpi vaṭṭati;  
Aggaṃ gahevā dātuṃ vā, pattādīsūpyayaṃ nayo.
- 3089 Pañcavaggūpasampadā, guṇaṅguṇaupāhanā;  
Cammattāro dhuvanānaṃ, majjhadesa na vaṭṭati.
- 3090 Sambādhasa ca sāmāntā, satthakammaṃ duvaṅgulā;  
Vāritaṃ, vatthikammampi, sambādheyeva satthunā.
- 3091 Paṇṇāni ajjukādīnaṃ, loṇaṃ vā uṇhayāguyā;  
Pakkhipitvāna pākattaṃ, cāletuṃ na ca vaṭṭati.
- 3092 Sace parisamaññaṃ, upaḷāleti dukkaṭaṃ;  
Tattha cādīnaṃ tassa, vattuṃ pana ca vaṭṭati.
- 3093 ‘Makkhanaṃ gūthamuttehi, gatena nhāyituṃ viya;  
Kataṃ nissāya dussīlaṃ, tayā viharatā’ ti ca.
- 3094 Bhattage yāgupāne ca, antogāme ca vīthiyaṃ;  
Andhakāre anāvajjo, ekāvatto ca byāvaṭo.
- 3095 Sutto khādaṇca bhujanto, vaccaṃ muttampi vā karaṃ;  
Vandanā terasannaṃ tu, ayuttatthena vāritā.
- 3096 Naggo anupasampanno, nānāsaṃvāsakopi ca;  
Yo pacchā upasampanno, ukkhitto mātugāmaṃko.
- 3097 Ekādasa abhabbā ca, garukaṭṭhā ca pañcime;  
Vandato dukkaṭaṃ vuttaṃ, bāvīsati ca puggale.
- 3098 Yo pure upasampanno, nānāsaṃvāsavuddhako;  
Dhammavādī ca sambuddho, vandanīyā tayo ime.
- 3099 Tajjanādikate ettha, caturo pana puggale;  
Vandatopi anāpatti, tehi kammaṇca kubbato.
- 3100 Adhiṭṭhānaṃ panekassa, dvinnaṃ vā tiṇṇameva vā;  
Diṭṭhāvikkammamuddiṭṭhaṃ, tato uddhaṃ nivāraṇaṃ.
- 3101 Sandiṭṭho hoti sambhatto, jīvātālapitopi ca;  
Gahitattamaṃ hoti, vissāso pañcadhā siyā.
- 3102 Sīladiṭṭhivipatti ca, ācārājīvasambhavā;  
Vipattiyo catassova, vuttā ādiccabandhunā.
- 3103 Tattha appaṭikammā ca, yā ca vuṭṭhānagāminī;  
Āpattiyo duve **silā-vipattīti** pakāsītā.
- 3104 Antaggāhikadiṭṭhi ca, yā diṭṭhi dasavattukā;  
Ayaṃ **diṭṭhivipattīti**, duvidhā diṭṭhi dīpitā.
- 3105 Desanāgāminikā yā ca, pañca thullaccayādikā;



Vuttācāravipattīti, ācārakusalena sā.

- 3106** Kuhanādippavatto hi, **micchājīvoti** dīpito;  
Ājīvapaccayāpatti, chabbidhāti pakāsītā.
- 3107** Kammunā laddhisīmāhi, nānāsaṃvāsakā tayo;  
Ukkhitto tividho kamma-nānāsaṃvāsako mato.
- 3108** Adhamavādipakkhasmiṃ, nisinnova vicintiyam;  
“Dhammavādī panete”ti, uppanne pana mānase.
- 3109** Nānāsaṃvāsako nāma, laddhiyāyam pakāsito;  
Tatrattho pana so dvinnam, kammam kopeti saṅghikam.
- 3110** Bahisīmāgato sīmā-nānāsaṃvāsako mato;  
Nānāsaṃvāsakā evam, tayo vuttā mahesinā.
- 3111** Cuto anupasampanno, nānāsaṃvāsakā tayo;  
Bhikkhūnekādasābhabbā, asaṃvāsā ime siyam.
- 3112** Asaṃvāsassa sabbassa, tathā kammārahassa ca;  
Saṅghe ummattakādīnam, paṭikkhepo na rūhati.
- 3113** Sasamvāsekasīmaṭṭha-pakatattassa bhikkhuno;  
Vacanena paṭikkhepo, rūhatānantarassapi.
- 3114** Bhikkhu āpajjatāpattim, ākārehi panacchahi;  
Vuttā samaṇakappā ca, pañca, pañca visuddhiyo.
- 3115** Nidānam puggalam vatthum, vidhim paññattiyā pana;  
Vipattāpattanāpatti, samuṭṭhānanayampi ca.
- 3116** Vajjakammakriyāsaññā, cittāṇattividhim pana;  
Tathevaṅgavidhānañca, vedanā kusalattikam.
- 3117** Sattarasavidham etam, dassetvā lakkhaṇam budho;  
Sikkhāpadesu yojeyya, tattha tattha yathāraham.
- 3118** Nidānam tattha vesālī, tathā rājagaham puram;  
Sāvattāḷavi kosambī, sakkabhaggā pakāsītā.
- 3119** Dasa vesāliyā vuttā, ekavīsam giribbaje;  
Satāni hi cha unāni, tīni sāvattihiyā siyam.
- 3120** Cha panāḷaviyam vuttā, aṭṭha kosambiyam katā;  
Aṭṭha sakkesu paññattā, tayo bhagge pakāsītā.
- 3121** Tevīsatividhā vuttā, sudinnadhaniyādayo;  
Bhikkhūnam pātimokkhasmiṃ, ādikammikapuggalā.
- 3122** Bhikkhunīnam tathā pāti-mokkhasmiṃ ādikammikā;  
Thullanandādayo satta, sabbe tiṃsa bhavanti te.

**3123** Taruṃ timūlaṃ navapattamenam;  
Dvayaṅkuraṃ sattaphalaṃ chapuppham;  
Jānāti yo dvippabhavaṃ dvisākhā;  
Jānāti paññattimasesato so.

**3124** Iti paramamimaṃ vinicchayaṃ;  
Madhurapadatthamanākulaṃ tu yo;  
Paṭhati suṇati pucchate ca so;  
Bhavatupālisamo vinicchaye.

Iti vinayavinicchaye pakiṇṇakavinicchayakathā samattā.

### **Kammaṭṭhānabhāvanāvidhānakathā**

**3125** Pāmokkhe pātimokkhasmiṃ, mukhe mokkhappavesane;  
Sabbadukkhakkhaye vutte, vuttamevitarattayaṃ.

**3126** Idaṃ catubbidhaṃ sīlaṃ, ñatvā tattha paṭiṭṭhito;  
Samādhiṃ puna bhāvetvā, paññāya parimuccati.

**3127** Dasānussatiyo vuttā, kasiṇā ca dasāsubhā;  
Catasso appamaññāyo, tathāruppā paradvayaṃ.

**3128** Iccevaṃ pana sabbampi, cattālīsavidhaṃ siyā;  
Kammaṭṭhānaṃ samuddiṭṭhaṃ, mammaṭṭhānaṃ manobhuno.

**3129** Upacārappanāto ca, jhānabhedā atikkamā;  
Vaḍḍhanāvaḍḍhanā cāpi, tathārammaṇabhūmito.

**3130** Gahaṇā paccayā bhiyyo, tathā cariyānukūlato;  
Viseso ayametesu, viññātabbo vibhāvinā.

**3131** Aṭṭhānussatiyo saññā-vavatthānañca tatthime;  
Upacāravahā, sesā, tiṃsa jhānavahā matā.

**3132** Paṭhamajjhānikā tattha, asubhā kāyagatāsati;  
Ānāpānañca kasiṇā, catukkajjhānikā ime.

**3133** Tikajjhānāni tissova, appamaññātha pacchimā;  
Cattāropi ca āruppā, catutthajjhānikā matā.

**3134** Atikkamo dvidhā vutto, aṅgārammaṇatopi ca;  
Catukkatikajjhānesu, aṅgātikkamatā matā.

**3135** Catutthā appamaññāpi, aṅgātikkamato siyā;  
Ārammaṇamatikkamma, āruppā pana jāyare.

**3136** Kasiṇāni dasevettha, vaḍḍhetabbāni yoginā;  
Sesaṃ pana ca sabbampi, na vaḍḍhetabbameva taṃ.

**3137** Nimitṭārammaṇā tattha, kasiṇā ca dasāsubhā;  
Kāye satānāpānañca, bāvīsati bhavantime.

- 3138 Sesānussatiyo aṭṭha, saññā dhātuvavatthanam;  
Viññānam nevasaññā ca, dasa dve bhāvagocarā.
- 3139 Catasso appamaññāyo, dve ca āruppamānasā;  
Ime dhammā viniddiṭṭhā, cha navattabbagocarā.
- 3140 Dasāsubhā paṭikkūla-saññā kāyagatāsati;  
Devesu na pavattanti, dvādasevāti bhūmito.
- 3141 Tāni dvādasa bhiyyo ca, ānāpānasatīpi ca;  
Sabbaso terasa vāpi, brahmaloke na jāyare.
- 3142 Ṭhapetvā caturāruppe, arūpāvacare kira;  
Aññe pana na jāyanti, sabbe jāyanti mānuse.
- 3143 Catuttham kasiṇam hitvā, kasiṇā ca dasāsubhā;  
Diṭṭheneva gahetabbā, pubbabhāge bhavanti te.
- 3144 Ānāpānañca phuṭṭhena, diṭṭhena tacapañcakam;  
Māluto diṭṭhaphuṭṭhena, sutena cettha sesakam.
- 3145 Ākāsakasiṇañcetta, ṭhapetvā kasiṇā nava;  
Paṭhamāruppacittassa, paccayā pana jāyare.
- 3146 Bhavanti hi abhiññānam, kasiṇāni dasāpi ca;  
Tissopi appamaññāyo, catutthassa tu paccayā.
- 3147 Heṭṭhimahetṭhimāruppam, parassa ca parassa ca;  
Nevasaññā nirodhassa, paccayoti pakāsītā.
- 3148 Sabbe sukhavihārassa, bhavanissaraṇassa ca;  
Tathā bhavasukhānañca, paccayāti ca dīpitā.
- 3149 Asubhā dasa viññeyyā, tathā kāyagatāsati;  
Anukūlā ime rāga-caritassa visesato.
- 3150 Catasso appamaññāyo, savaṇṇakasiṇā tathā;  
Anukūlā ime dosa-caritassa pakāsītā.
- 3151 Vitakkacaritassāpi, mohappakatinopi ca;  
Ānāpānasatekāva, sappāyāti vibhāvītā.
- 3152 Saññā ceva vavatthānam, maraṇūpasame sati;  
Paññāpakatino ete, anukūlāti dīpitā.
- 3153 Ādianussaticchakkaṃ, saddhācaritavaṇṇitam;  
Āruppā kasiṇā sesā, dasa sabbānurūpakā.
- 3154 Evaṃ pabhedato ñatvā, kammaṭṭhānāni paṇḍito;  
Cariyāyanukūlam tu, tesu yaṃ attano pana.
- 3155 Tam gahetvāna medhāvī, daḷham kalyāṇamittako;

Ucchedaṃ palibodhānaṃ, katvā paṭhamameva ca.

- 3156** Anurūpe vasantena, vihāre dosavajjite;  
Bhāvetvā paṭhamādīni, jhānāni pana sabbaso.
- 3157** Tato vuṭṭhāya sappañño, jhānamhā paṭhamādito;  
Nāmarūpavavatthānaṃ, katvā kaṅkhaṃ vitūriya.
- 3158** Upaklese amaggoti, dasobhāsādayo pana;  
Maggo vipassanāññaṃ, itī jānāti paṇḍito.
- 3159** Tiṇṇaṃ tesāṃ vavatthāne, kate ettāvataṃ pana;  
Tiṇṇaṃ pana ca saccānaṃ, vavatthānaṃ kataṃ siyā.
- 3160** Udayabbayabhaṅgā ca, bhayādīnavanibbidā;  
Muñcitukamyatāññaṃ, paṭisaṅkhānupassanā.
- 3161** Saṅkhārupekkhāññaṃ, navamaṃ saccānulomikaṃ;  
Ayaṃ ‘paṭipadāñña-dassana’ nti pakāsītā.
- 3162** Tato gotrabhucittassa, samanantameva ca;  
Santimārammaṇaṃ katvā, jāyate ñāṇadassanaṃ.
- 3163** ‘Ñāṇadassanasuddhī’ ti, idaṃ ñāṇaṃ pakāsitaṃ;  
Paccavekkhaṇapariyantaṃ, phalaṃ tassānujāyate.
- 3164** Teneva ca upāyena, bhāvento so punappunaṃ;  
Pāpuṇāti yathā bhikkhu, sesamaggaphalāni ca.
- 3165** Iccevamaccantamavecca dhammaṃ;  
Viddhaṃsayitvākusalaṃ asesāṃ;  
Visosayitvāna tayo bhava so;  
Upeti santiṃ nirupādisesaṃ.
- 3166** Viññāsakkamato vāpi, pubbāparavasena vā;  
Yadi akkharabandhe vā, ayuttaṃ viya dissati.
- 3167** Taṃ tathā na gahetabbaṃ, gahetabbamadosato;  
Mayā upaparikkhitvā, katattā pana sabbaso.
- 3168** Setṭhassa coḷaraṭṭhassa, nābhibhūte nirākule;  
Sabbassa pana lokassa, gāme sampiṇḍite viya.
- 3169** Kadalīsālatālucchu-nāḷikeravanākule;  
Kamaluppalasañchanna-salilāsayasobhite.
- 3170** Kāverijalasampāta-paribhūtamahītale;  
Iddhe sabbaṅgasampanne, maṅgale bhūtamaṅgale.
- 3171** Pavarākārapākāra-parikhāparivārite;  
Vihāre veṇhudāsassa, dassanīye manorame.

- 3172 Tīrantaruhavātira-tarurājavirājite;  
Nānādi jagañārāme, nānārāmamanorame.
- 3173 Cārupaṅkajasamkiṇṇa-taḷākasamalāṅkate;  
Surasodakasampunṇa-varakūpopasobhite.
- 3174 Vicitravipulaccugga-varamaṇḍapamaṇḍite;  
Āvāsehi canekehi, accantamupasobhite.
- 3175 Uppatena ca thūpena, bhetvāva dharaṇītaḷaṃ;  
Jitvāvāvahasantena, kelāsasikharaṃ kharaṃ.
- 3176 Śaradambudasaṅkāse, dassanīye samussite;  
Pasādajanane ramme, pāsāde vasatā mayā.
- 3177 Uttassa buddhasīhena, vinayassa vinicchayo;  
Buddhasīhaṃ samuddissa, mama saddhivihārikaṃ.
- 3178 Katoyaṃ pana bhikkhūnaṃ, hitatthāya samāsato;  
Vinayassāvabodhatthaṃ, sukhenevācirena ca.
- 3179 Accutacutavikkante, kalambakulanandane;  
Mahiṃ samanūsāsanthe, āradhō ca samāpito.
- 3180 Yathā siddhimayaṃ patto, antarāyaṃ vinā tathā;  
Sabbe sījhanu saṅkappā, sattānaṃ dhammasaṃyutā.
- 3181 Yāva tiṭṭhati lokasmiṃ, mandāro cārukandaro;  
Tāva tiṭṭhatu buddhassa, sāsanaṃ kalisāsanaṃ.
- 3182 Kāle sammā pavassantu, vassaṃ vassavalāhakā;  
Pālayantu mahīpālā, dhammato sakalaṃ mahiṃ.
- 3183 Imaṃ sārabhūtaṃ hitaṃ atthayuttaṃ;  
Karontena pattaṃ mayā yaṃ tu puññaṃ;  
Ayaṃ tena loko munindappayātaṃ;  
Sīvaṃ vītasokaṃ puraṃ pāpuṇātu.

Iti vinayavinicchaye kammaṭṭhānabhāvanāvidhānakathā

Samattā.

Iti tambapaṇṇiyena paramaveyyākaraṇena tipīṭakanaya vidhikusalena  
paramakavijānahadaya padumavanavikāsanakarena kavivaravasabhena  
paramaratikaravaramadhuravacanuggāreṇa uragapureṇa **buddhadattena** racitoyaṃ vinayavinicchayo.

Vinayavinicchayo samatto.

Namo tassa bhagavato arahato sammāsambuddhassa

## Uttaravinicchayo

### Ganthārambhakathā

1. Sabbasattuttamaṃ dhīraṃ, vanditvā sirasā jinaṃ;  
Dhammañcādhammaavidhamsaṃ, gaṇamaṅgaṇanāsaṃ.
2. Yo mayā racito sāro, vinayassa vinicchayo;  
Tassa dāni karissāmi, sabbānuttaramuttaraṃ.
3. Bhaṇato paṭhato payuñjato;  
Suṇato cintayato panuttaraṃ;  
Paramaṃ abuddha buddhivaḍḍhanaṃ;  
Vadato me niratā nibodhatha.

### Mahāvibhaṅgasāṅghakathā

4. Methunaṃ paṭisevanto, kati āpattiyo phuse;  
Methunaṃ paṭisevanto, tisso āpattiyo phuse.
5. Bhave pārājikaṃ khetto, yebhuyyakkhāyite pana;  
Thullaccayaṃ mukhe vaṭṭa-kate vuttaṃ tu dukkaṭaṃ.
6. Adinnaṃ ādiyanto yo;  
Kati āpattiyo phuse;  
Adinnaṃ ādiyanto so;  
Tisso āpattiyo phuse.
7. Pañcamāsagghane vāpi, adhike vā parājayo;  
Māse vā dukkaṭaṃ ūne, majjhe thullaccayaṃ tato.
8. Manussajātiṃ mārento;  
Kati āpattiyo phuse;  
Manussajātiṃ mārento;  
Tisso āpattiyo phuse.
9. Manussamuddissopātaṃ, khaṇane dukkaṭaṃ siyā;  
Dukkhe thullaccayaṃ jāte, mate pārājikaṃ siyā.
10. Asantaṃ uttariṃ dhammaṃ, vadamattūpanāyikaṃ;  
Kati āpajjatāpattī? Tisso āpattiyo phuse.
11. Asantaṃ uttariṃ dhammaṃ, bhaṇantassa parājayo;  
Thullaccayaṃ pariyāye, ñāte, no ce tu dukkaṭaṃ.

### Pārājikakathā.

12. Bhaṇa sukkaṃ vimocento;  
Kati āpattiyo phuse;  
Suṇa sukkaṃ vimocento;  
Tisso āpattiyo phuse.
13. Garukaṃ yadi ceteti, upakkamati muccati;

Dvaṅge thullaccayaṃ vuttaṃ, payoge dukkaṭaṃ siyā.

14. Ito paṭṭhāya muñcivā, pañhāpucchanamattakaṃ;  
Vissajjanavaseneva, hoti atthavinicchayo.
15. Itthiyā kāyasamsagge, tisso āpattiyo phuse;  
Āmasantassa kāyena, kāyaṃ tu garukaṃ siyā.
16. Kāyena kāyabaddhaṃ tu, phusaṃ thullaccayaṃ phuse;  
Paṭibaddhena kāyena, paṭibaddhe tu dukkaṭaṃ.
17. Itthiṃ duṭṭhullavācāhi, tisso obhāsato siyuṃ;  
Vaṇṇāvaṇṇaṃ vadaṃ dvinnaṃ, maggānaṃ garukaṃ phuse.
18. Vaṇṇādibhañṇe ādissa, ubbhajāṇumadhakkhakaṃ;  
Hoti thullaccayaṃ, kāya-paṭibaddhe tu dukkaṭaṃ.
19. Attakāmacariyāya, vadato vaṇṇamitthiyā;  
Santike garukaṃ hoti, sace jānāti sā pana.
20. Santike paṇḍakassāpi, tassa thullaccayaṃ siyā;  
Tiracchānagatassāpi, santike dukkaṭaṃ mataṃ.
21. Paṭiggaṇhanavīmaṃsā, paccāharaṇakattike;  
Sañcarittaṃ samāpanne, garukaṃ niddise budho.
22. Tassa dvaṅgasamāyoge, hoti thullaccayaṃ tathā;  
Aṅge sati panekasmiṃ, hoti āpatti dukkaṭaṃ.
23. Saṃyācīkāya ca kuṭiṃ;  
Vihāraṅca mahallakaṃ;  
Kārāpeti sace bhikkhu;  
Tisso āpattiyo phuse.
24. Payoge dukkaṭaṃ vuttaṃ, ekapiṇḍe anāgate;  
Hoti thullaccayaṃ, tasmīṃ, piṇḍe garukamāgate.
25. Pārājikena dhammena, bhikkhuṃ amūlakenidha;  
Anuddhamseti yo tassa, tisso āpattiyo siyuṃ.
26. Okāsaṃ na ca kāretvā, hutvā cāvanacetano;  
Sace codeti saṅghādi-sesena saha dukkaṭaṃ.
27. Okāsaṃ pana kāretvā, hutvā akkosacetano;  
Codeti omasavāde, pācittiṃ paridīpaye.
28. Anantarasamānova, navame aññabhāgiye;  
Sabbo āpattibhedo hi, natthi kāci visesatā.
29. Saṅghassa bhedako bhikkhu, yāvatatiyakaṃ pana;  
Samanubhāsanāyeva, gāhaṃ na paṭinissajaṃ.

30. Ñattiyā dukkaṭaṃ, dvīhi, kammavācāhi thullataṃ;  
Kammavācāya osāne, āpatti garukaṃ siyā.
31. Bhedānuvattake ceva, dubbace kuladūsake;  
Saṅghabhedakatulyova, hoti āpattinicchayo.

Saṅghādisesakathā.

32. Atikkamanto atirekacīvaraṃ;  
Dasāhamāpajjati ekameva;  
Nissaggipācittiyamekarattiṃ;  
Ticīvarenāpi vinā vasanto.
33. Māsaṃ atikkamanto hi, gahetvā kālacīvaraṃ;  
Ekaṃ āpajjatāpattiṃ, nissaggiyamudīritaṃ.
34. Aññātikāya yaṃ kiñci;  
Purāṇacīvaraṃ pana;  
Dhovāpeti sace tassa;  
Honti āpattiyo duve.
35. Dhovāpeti payogasmim, dukkaṭaṃ samudāhaṭaṃ;  
Nissaggiyāva pācitti, hoti dhovāpite pana.
36. Aññātikāya hatthamhā, cīvaraṃ paṭigaṇhato;  
Gahaṇe dukkaṭaṃ vuttaṃ, pācitti gahite siyā.
37. Aññātaṃ gahapatiṃ, gahapatānimeva vā;  
Cīvaraṃ viññāpento dve, bhikkhu āpattiyo phuse.
38. Viññāpeti payogasmim, dukkaṭaṃ parikittitaṃ;  
Viññāpite ca nissaggi, pācitti pariyāputā.
39. Bhikkhu cīvaramaññātiṃ, viññāpento taduttariṃ;  
Payoge dukkaṭaṃ, viññā-pite nissaggiyaṃ phuse.
40. Aññātaṃ kañci upāsakaṃ vā;  
Upāsikaṃ vā upasaṅkamtivā;  
Pubbeva hutvā pana appavārito;  
Vatthe vikappaṃ paṭipajjamāno.
41. Duve āpajjatāpattī, payoge dukkaṭaṃ siyā;  
Vikappaṃ pana āpanne, nissaggiyamudīritaṃ.
42. Aññātiṃ upasaṅkamma, pubbeyvappavārito;  
Vikappaṃ cīvare bhikkhu, āpajjanto duve phuse.
43. Tathātirekatikkhattuṃ, codanāya ca bhikkhu ce;  
Gantvātirekachakkhattuṃ, ṭhānenapi ca cīvaraṃ.
44. Nipphādeti sace tassa, honti āpattiyo duve;  
Payoge dukkaṭaṃ, tassa, lābhe nissaggiyaṃ siyā.



## Kathinavaggo paṭhamo.

45. Dosā kosiyavaggassa, dvedveādīsu pañcasu;  
Payoge dukkaṭaṃ vuttaṃ, lābhe nissaggiyaṃ siyā.
46. Gahetvelakalomāni, tiyojanamatikkamaṃ;  
Dukkaṭaṃ paṭhame pāde, nissaggiṃ dutiye phuse.
47. Bhikkhu bhikkhuniyaññāya, dhovāpeteḷalomakaṃ;  
Payoge dukkaṭaṃ, tassa, dhote nissaggiyaṃ siyā.
48. Rūpiyaṃ paṭigaṇhanto, dve panāpattiyo phuse;  
Payoge dukkaṭaṃ vuttaṃ, nissaggi gahite siyā.
49. Nānākāraṃ samāpajjaṃ, saṃvohārañca rūpiye;  
Samāpanne ca nissaggiṃ, payoge dukkaṭaṃ phuse.
50. Nānappakāraṃ bhikkhu, āpajje kayavikkayaṃ;  
Payoge dukkaṭaṃ, tasmim, kate nissaggiyaṃ phuse.

## Kosiyavaggo dutiyo.

51. Pattaṃ atikkamentassa, dasāhamatirekakaṃ;  
Tassa nissaggiyāpatti, hoti ekāva bhikkhuno.
52. Apañcabandhane patte, vijjamānepi bhikkhuno;  
Aññaṃ pana navam pattaṃ, cetāpeti sace pana.
53. Dve panāpattiyo bhikkhu, āpajjati, na saṃsayo;  
Payoge dukkaṭaṃ, tassa, lābhe nissaggiyaṃ phuse.
54. Paṭiggahetvā bhesajjaṃ, sattāhaṃ yo atikkame;  
Ekaṃ nissaggiyāpattiṃ, āpajjati hi so pana.
55. Akāle pariyesanto, vassasāṭīkacīvaraṃ;  
Payoge dukkaṭaṃ, tassa, lābhe nissaggiyaṃ phuse.
56. Bhikkhuno cīvaraṃ datvā, acchindanto duve phuse;  
Payoge dukkaṭaṃ vuttaṃ, haṭe nissaggiyaṃ siyā.
57. Viññāpetvā sayam suttam, tantavāyehi cīvaraṃ;  
Vāyāpeti sace bhikkhu, dve panāpattiyo phuse.
58. Yo panaññātakasseva, tantavāye samecca ce;  
Vikappaṃ cīvare bhikkhu, āpajjaṃ appavārito.
59. Dve panāpattiyo so hi, āpajjati, na saṃsayo;  
Payoge dukkaṭaṃ, tassa, lābhe nissaggiyaṃ siyā.
60. Paṭiggahetvā acceka-saññitaṃ pana cīvaraṃ;  
Kālaṃ atikkamento taṃ, ekaṃ nissaggiyaṃ phuse.

61. Tiṇṇamaññataraṃ vatthaṃ, nidahitvā gharedhikaṃ;  
Chārattato vinā tena, vasaṃ nissaggiyaṃ phuse.
62. Jānaṃ pariṇataṃ lābhaṃ, saṅghikaṃ attano pana;  
Pariṇāmeti ce bhikkhu, dve paṇāpattiyo phuse.
63. Payoge dukkaṭaṃ hoti, nissaggi pariṇāmite;  
Sabbattha appanāvāra-parihāni katā mayā.

Pattavaggo tatiyo.

Tiṃsanissaggiyakathā.

64. Vadantassa musāvādaṃ, pañca āpattiyo siyuṃ;  
Manussuttaridhamme tu, abhūtasmiṃ parājayo.
65. Codanāya garuṃ bhikkhuṃ, amūlantimavatthunā;  
Pariyāyavacane ñāte, thullaccayamudīritaṃ.
66. No ce paṭivijānāti, dukkaṭaṃ samudāhaṭaṃ;  
Sampajānamusāvāde, pācitti paridīpitā.
67. Āpattiyo duve vuttā, bhikkhussomasato pana;  
Pācitti upasampannaṃ, dukkaṭaṃ itaraṃ siyā.
68. Pesuññaharaṇe dvepi, honti, pācittiyaṃ pana;  
Upasampannapesuññe, sese āpatti dukkaṭaṃ.
69. Padasonupasampannaṃ, dhammaṃ vāceti ce duve;  
Payoge dukkaṭaṃ, pāde, pāde pācittiyaṃ siyā.
70. Tirattānupasampanna-sahaseyyāya uttariṃ;  
Payoge dukkaṭaṃ vuttaṃ, panne pācittiyaṃ siyā.
71. Kappeti mātugāmena, sahaseyyaṃ sace pana;  
Dve so āpajjatāpattī, rattiyaṃ dukkaṭādayo.
72. Uddhaṃ chappañcavācāhi, dhammaṃ deseti itthiyā;  
Payoge dukkaṭaṃ, pāde, pāde pācittiyaṃ siyā.
73. Bhūtaṃ anupasampanne, manussuttaridhammakāṃ;  
Āroceti sace tassa, honti dve dukkaṭādayo.
74. Vadaṃ anupasampanne, duṭṭhullāpattimaññato;  
Payoge dukkaṭaṃ tassa, pācittārocite siyā.
75. Pathaviṃ khaṇato tassa, payoge dukkaṭaṃ mataṃ;  
Pahāre ca pahāre ca, pācitti pariyāputā.

Musāvādavaggo paṭhamo.

76. Bhūtagāmaṃ tu pātentō, dve panāpattiyo phuse;  
Payoge dukkaṭaṃ, tassa, pāte pācitti dīpitā.
77. Aññaññaṃ vadantassa, dve siyuṃ aññaṃvādaḥ;  
Aropite dukkaṭaṃ tu, hoti pācitti ropite.
78. Ujjhāpento paraṃ bhikkhuṃ, dve panāpattiyo phuse;  
Payoge dukkaṭaṃ, ujjhā-pite pācittiyaṃ siyā.
79. Ajjhokāse tu mañcādiṃ, santharivāna saṅghikaṃ;  
Pakkamanto anāpucchā, āpattiṃ duvidhaṃ phuse.
80. Leḍḍupāte atikkante, pādena paṭhamena tu;  
Dukkaṭaṃ, dutiyenāpi, pācitti paridīpaye.
81. Vihāre saṅghike seyyaṃ, santharivā anuddharaṃ;  
Anāpucchā pakkamanto, duvidhāpattiyo phuse.
82. Parikkhepe atikkante, pādena paṭhamena tu;  
Dukkaṭaṃ pana uddiṭṭhaṃ, pācitti dutiyena tu.
83. Vihāre saṅghike jānaṃ, pubbūpagatabhikkhukaṃ;  
Seyyaṃ kappayato honti, payoge dukkaṭādayo.
84. Saṅghikā kupito bhikkhuṃ, nikkadḍhati vihārato;  
Payoge dukkaṭaṃ vuttaṃ, sesaṃ nikkadḍhite siyā.
85. Vihāre saṅghike bhikkhu, vehāsakuṭiyūpari;  
Āhaccapādaḥ sīdaṃ, phuse dve dukkaṭādayo.
86. Adhiṭṭhitvā dvattipariyāye, uttarimpi adhiṭṭhato;  
Payoge dukkaṭaṃ hoti, pācitti panadhiṭṭhite.
87. Jānaṃ sappānakaṃ toyaṃ, tiṇaṃ vā siñcato pana;  
Payoge dukkaṭaṃ hoti, sitte pācittiyaṃ siyā.

Bhūtagāmaṃvavaggo dutiyo.

88. Phuse bhikkhuniyo bhikkhu, ovaḍanto asaṃmato;  
Payoge dukkaṭaṃ, tassa, pācittovadite siyā.
89. Dutie tatiye ceva, catutthepe ca sabbaso;  
Paṭhamena samānāva, āpattīnaṃ vibhāgatā.
90. Cīvaraṃ bhikkhu aññaṭi-kāya dento duve phuse;  
Payoge dukkaṭaṃ vuttaṃ, dinne pācittiyaṃ siyā.
91. Aññaṭikabhikkhuniyā, bhikkhu sabbeyya cīvaraṃ;  
Payoge dukkaṭaṃ tassa, pācitti pana sabbite.
92. Addhānaññaṭra samayā, bhikkhu bhikkhuniyā saha;  
Saṃvidhāya tu gacchanto, phuse dve dukkaṭādayo.

93. Nāvekaṃ abhirūhanto, bhikkhu bhikkhuniyā saha;  
Saṃvidhāya phuse dvepi, payoge dukkaṭādayo.
94. Jānaṃ bhikkhuniyā piṇḍa-pātaṃ tu paripācitaṃ;  
Bhuñjanto duvidhāpatti-māpajjati, na saṃsayo.
95. “Bhuñjissāmī”ti ce bhattaṃ, paṭiggaṇhāti dukkaṭaṃ;  
Ajjhohārapayogesu, pācitti paridīpitā.
96. Bhikkhu bhikkhuniyā saddhiṃ, nisajjaṃ tu raho pana;  
Kappento hi phuse dvepi, payoge dukkaṭādayo.

Ovādavaggo tatiyo.

97. Taduttariṃ āvasatha-piṇḍaṃ tu paribhuñjato;  
Anantarassa vaggassa, navamena samo nayo.
98. Dutiye tatiye cāpi, viseso natthi kocipi;  
Anantarasamānāva, āpattīnaṃ vibhāgatā.
99. Dvattipatte gahetvāna, gaṇhato hi taduttariṃ;  
Payoge dukkaṭaṃ vuttaṃ, pācitti gahite siyā.
100. Pañcame paṭhameneva, samo āpattinicchayo;  
Chaṭṭhe anatirittena, bhuttāviṃ tu pavāritaṃ.
101. Abhihaṭṭhuṃ pavārento, dve panāpattiyo phuse;  
Vacanena ca tasseva, “bhuñjissāmī”ti gaṇhati.
102. Gahaṇe dukkaṭaṃ tassa, piṭake samudāhaṭaṃ;  
Bhojanassa panosāne, pācitti pariyāputā.
103. Sattame aṭṭhame ceva, navame dasamepi ca;  
Paṭhamena samānāva, āpattīnaṃ vibhāgatā.

Bhojanavaggo catuttho.

104. Acelakādino dento, sahatthā bhojanādikaṃ;  
Payoge dukkaṭaṃ patto, dinne pācittiyaṃ phuse.
105. Dāpetvā vā adāpetvā, uyyojento duve phuse;  
Payoge dukkaṭaṃ, tasmīṃ, pācittuyyojite siyā.
106. Nisajjaṃ bhikkhu kappento, kule pana sabhojane;  
Āpattiyo phuse dvepi, payoge dukkaṭādayo.
107. Catutthe pañcame vāpi, viseso natthi kocipi;  
Tatiyena samānāva, āpattigaṇanā siyā.
108. Santaṃ bhikkhuṃ anāpucchā, sabhatto ca nimantito;  
Kulesu pana cārittaṃ, āpajjanto duve phuse.

109. Paṭhamena ca pādena, ummārātikkame pana;  
Dukkaṭaṃ piṭake vuttaṃ, pācitti dutiyena tu.
110. Taduttariṃ tu bhesajjaṃ, viññāpento duve phuse;  
Payoge dukkaṭaṃ, viññā-pite pācittiyaṃ siyā.
111. Uyyuttaṃ dassanattāya, gacchanto dve phuse balaṃ;  
Gacchato dukkaṭaṃ vuttaṃ, hoti pācitti passato.
112. Atirekatirattaṃ tu, senāya vasato duve;  
Payoge dukkaṭaṃ vuttaṃ, pācitti vasite siyā.
113. Uyyodhikaṃ tu gacchanto, dve panāpattiyo phuse;  
Gacchanto dukkaṭaṃ vuttaṃ, hoti pācitti passato.

Acelakavaggo pañcama.

114. Suramaṃ vā pana mereyyaṃ, pivanto dve phuse muni;  
Gaṇhato dukkaṭaṃ pātumaṃ, pīte pācittiyaṃ siyā.
115. Bhikkhaṅgulipatodena, hāsento dve phuse have;  
Payoge dukkaṭaṃ tassa, pācitti hasite siyā.
116. Kīlanto udake bhikkhu, dve panāpattiyo phuse;  
Dukkaṭaṃ gopphakā heṭṭhā, pācittuparigopphake.
117. Yo panādariyaṃ bhikkhu, karonto dve phuse have;  
Payoge dukkaṭaṃ vuttaṃ, kate pācittiyaṃ siyā.
118. Bhiṃsāpento have bhikkhu, dve panāpattiyo phuse;  
Payoge dukkaṭaṃ, bhiṃsā-pite pācittiyaṃ siyā.
119. Jotiṃ samādahitvāna, visibbento duve phuse;  
Payoge dukkaṭaṃ vuttaṃ, pācittiyaṃ visīvite.
120. Oraso addhamāsassa, nhāyanto dve phuse have;  
Payoge dukkaṭaṃ, nhāna-ssosāne itaraṃ siyā.
121. Dubbaṇṇakaraṇānaṃ tu, tiṇṇamekamanādiya;  
Cīvaraṃ paribhuñjanto, dve phuse dukkaṭādayo.
122. Cīvaraṃ bhikkhuādīnaṃ, vikappetvā anuddharaṃ;  
Dve phuse paribhuñjanto, payoge dukkaṭādayo.
123. Bhikkhussāpanidhento dve, phuse pattādikaṃ pana;  
Payoge dukkaṭaṃ, tasmim, sesāpanihite siyā.

Surāpānavaggo chaṭṭho.

124. Sañcicca jīvitā pāṇaṃ, voropento tapodhano;  
Āpattiyo catassova, āpajjati, na saṃsayo.

125. Anodissakamopātaṃ, khaṇato hoti dukkaṭaṃ;  
Manusso marati tasmim, patitvā ce parājayo.
126. Yakkho vāpi tiracchāna-gato manussaviggaho;  
Patitvā maratī peto, tassa thullaccayaṃ siyā.
127. Tiracchānagate tasmim, nipatitvā mate pana;  
Tassa pācittiyāpatti, paññattā paṭubuddhinā.
128. Jānaṃ sappāṇakaṃ toyāṃ, paribhuñjaṃ duve phuse;  
Payoge dukkaṭaṃ tassa, bhutte pācittiyāṃ siyā.
129. Nihatādhikaraṇaṃ jānaṃ, ukkoṭento duve phuse;  
Payoge dukkaṭaṃ vuttaṃ, pācittukkoṭite siyā.
130. Jānaṃ bhikkhussa duṭṭhullaṃ, chādentō pana vajjakaṃ;  
Ekamāpajjatāpattim, pācittimiti dīpitaṃ.
131. Ūnavāsativassaṃ tu, karonto upasampadaṃ;  
Payoge dukkaṭaṃ patto, sesā sampādite siyā.
132. Jānaṃ tu theyyasatthēna, saṃvidhāya saheva ca;  
Tatheva mātugāmena, maggaṃ tu paṭipajjato.
133. Dve panāpattiyo honti, payoge dukkaṭaṃ mataṃ;  
Paṭipanne panuddiṭṭhaṃ, pācittiyamanantaraṃ.
134. Accajaṃ pāpikaṃ diṭṭhim, ñattiyā dukkaṭaṃ phuse;  
Kammavācāya osāne, hoti pācitti bhikkhuno.
135. Tathākaṭānuddhammena, saṃbhuñjanto duve phuse;  
Payoge dukkaṭaṃ tassa, bhutte pācittiyāṃ siyā.
136. Nāsitaṃ samaṇuddesaṃpalāpento duve phuse;  
Payoge dukkaṭaṃ vuttaṃ, pācitti upalāpite.

Sappāṇakavaggo sattamo.

137. Vuccamānassa bhikkhussa, bhikkhūhi sahadhammikaṃ;  
“Na sakkhissāmi” iccevaṃ, bhaṇato dukkaṭādayo.
138. Vinayaṃ tu vivaṇṇento, dve panāpattiyo phuse;  
Payoge dukkaṭaṃ tassa, pācittēva vivaṇṇite.
139. Mohento dve phuse, mohe, dukkaṭaṃ tu aropite;  
Ropite pana mohasmim, pācittiyamudīritaṃ.
140. Pahāraṃ kupito dento, bhikkhussa dve phuse have;  
Payoge dukkaṭaṃ vuttaṃ, pācitti pahāṭe siyā.
141. Bhikkhussa kupito bhikkhu, uggiraṃ talasattikaṃ;  
Dve phuse dukkaṭaṃ yoge, pācittuggirite siyā.

142. Bhikkhu saṅghādisesena, amūleneva codayaṃ;  
Dve phuse dukkaṭaṃ yoge, pācittuddhaṃsite siyā.
143. Bhikkhu sañicca kukkucçaṃ, janayanto hi bhikkhuno;  
Dve phuse dukkaṭaṃ yoge, pācittuppāḍite siyā.
144. Tiṭṭhantupassutiṃ bhikkhu, dve panāpattiyo phuse;  
Gacchato dukkaṭaṃ sotuṃ, pācitti suṇato siyā.
145. Dhammikānaṃ tu kammānaṃ, chandaṃ datvā tato puna;  
Khīyanadhammāpajjaṃ, dve phuse dukkaṭādayo.
146. Saṅghe vinicchaye niṭṭhaṃ, agate chandamattano;  
Adatvā gacchato tassa, dve panāpattiyo siyuṃ.
147. Hatthapāsaṃ tu saṅghassa, jahato hoti dukkaṭaṃ;  
Jahite hatthapāsaṃ, hoti pācitti bhikkhuno.
148. Samaggena ca saṅghena, datvāna saha cīvaraṃ;  
Khīyanto dve phuse pacchā, payoge dukkaṭādayo.
149. Lābhaṃ pariṇataṃ jānaṃ, saṅghikaṃ puggalassa hi;  
Dve phuse pariṇāmento, payoge dukkaṭādayo.

Sahadhammikavaggo aṭṭhāmo.

150. Pubbe avidito hutvā, rañño antepuraṃ pana;  
Pavisantassa bhikkhuno, dve panāpattiyo siyuṃ.
151. Paṭhamena ca pādena, ummārātikkame pana;  
Dukkaṭaṃ pana uddiṭṭhaṃ, pācitti dutiyena tu.
152. Ratanāṃ pana gaṇhanto, dve panāpattiyo phuse;  
Payoge dukkaṭaṃ tassa, pācitti gahite siyā.
153. Santaṃ bhikkhuṃ anāpucchā, vikāle gāmakāṃ pana;  
Samaṇo paviṣaṃ dose, āpajjati duve pana.
154. Paṭhamena ca pādena, parikkhepaṃ atikkame;  
Dukkaṭaṃ tassa niddiṭṭhaṃ, pācitti dutiyena tu.
155. Aṭṭhidantavisāṇābhi-nibbattaṃ sūciyā gharaṃ;  
Kārāpento phuse dvepi, payoge dukkaṭādayo.
156. Pamāṇātītamañcādiṃ, kārāpento duve phuse;  
Payoge dukkaṭaṃ vuttaṃ, sesā kārāpīte siyā.
157. Tūlonaddhaṃ tu mañcādiṃ, kārāpento duve phuse;  
Payoge dukkaṭaṃ, tasmīṃ, sesā kārāpīte siyā.
158. Sattame aṭṭhame ceva, navame dasamepi ca;  
Anantarasamoyeva, āpattīnaṃ vinicchayo.

Ratanavaggo navamo.

Pācittiyakathā.

159. Catūsu duvidhāpatti, pāṭidesaniyesupi;  
Avisesena niddiṭṭhā, buddhenādiccabandhunā.
160. ‘‘Bhuñjissāmī’’ti bhikkhussa, dukkaṭaṃ paṭigaṇhato;  
Ajjhohāresu sabbattha, pāṭidesaniyaṃ siyā.

Pāṭidesanīyakathā.

161. Sekhiyesu ca dhammesu, ekāvāpatti dīpitā;  
Anādaravaseneva, dukkaṭaṃ samudāhaṭaṃ.

Sekhiyakathā.

162. Paññattā methunaṃ dhammaṃ, paṭisevanapaccayā;  
Kati āpattiyo honti? Catassova bhavanti hi.
163. Methunaṃ paṭisevanto, allokāsappavesane;  
Mate akkhāyite vāpi, bhikkhu pārājikaṃ phuse.
164. Thullaccayaṃ tu yebhuyya-kkhāyite, dukkaṭaṃ tathā;  
Mukhe vaṭṭakate vuttaṃ, pācitti jatumaṭṭhake.
165. Paññattā kāyasamsaggaṃ, samāpajjanapaccayā;  
Kati āpattiyo honti? Pañca āpattiyo siyuṃ.
166. Avassutassa posassa, tathā bhikkhuniyāpi ca;  
Pārājikamadhakkhādi-gahaṇaṃ sādīyantiyā.
167. Kāyena phusato kāyaṃ, bhikkhussa garukaṃ siyā;  
Kāyena kāyabaddhaṃ tu, phusaṃ thullaccayaṃ siyā.
168. Paṭibaddhena kāyena, paṭibaddhaṃ tu dukkaṭaṃ;  
Pācittiyaṃ panuddiṭṭhaṃ, tassāngulipatodake.
169. Sesesu sekhiyantesu, āpattīnaṃ vinicchayo;  
Heṭṭhā vuttanayeneva, vedītabbo vibhāvinā.

Mahāvibhaṅgasāṅgaho niṭṭhito.

## **Bhikkhunīvibhaṅgo**

170. Bhikkhūnaṃ pāṭavatthāya, vinayassa vinicchaye;  
Bhikkhunīnaṃ vibhaṅgopī, kiñcimattaṃ bhaṇāmahaṃ.
171. Avassutassa posassa, bhikkhunīpi avassutā;  
Nandantī kāyasamsaggaṃ, kati āpattiyo phuse;



172. Tisso āpattiyo ubbha-jāṇussādhakkhakassa ca;  
Hoti pārājikam tassā, gahaṇam sādiantiyā.
173. Ubbhakkham adhojāṇu-gahaṇam sādiantiyā;  
Thullaccayam siyā, kāya-ṭṭibaddhe tu dukkaṭam.
174. Chādentī bhikkhunī vajjam, tisso āpattiyo phuse;  
Jānam pārājikam dhammam, chādentī sā parājikā.
175. Thullaccayam vematikā, ṭṭicchādeti ce pana;  
Athācāravipattim ce, ṭṭicchādeti dukkaṭam.
176. Nissajantī na tam laddhim, ukkhittassānuvattikā;  
Samanubhāsanāyeva, tisso āpattiyo phuse.
177. Ñattiyā dukkaṭam, dvīhi, kammavācāhi thullatā;  
Kammavācāya osāne, pārājikamudīritam.
178. Pūrentī aṭṭhamam vatthum, tisso āpattiyo phuse;  
Purisenidhāgacchāti, vuttāgacchati dukkaṭam.
179. Thullaccayam tu posassa, hatthapāsappavesane;  
Pūrentī aṭṭhamam vatthum, samaṇī sā parājītā.

Pārājikakathā.

180. Ussayavādikā aṭṭam, karontī tividham phuse;  
Ekassārocane tassā, hoti āpatti dukkaṭam.
181. Dutiyārocane tassā, thullaccayamudīritam;  
Aṭṭassa pariyosāne, hoti saṅghādisatā.
182. Corivuṭṭhāpikā vāpi, ñattiyā dukkaṭam phuse;  
Dvīhi thullaccayam kamma-vācosāne garum siyā.
183. Ekā gāmantaram gacche, gamane dukkaṭam siyā;  
Parikkhepe atikkante, pādena ṭṭhamena tu.
184. Hoti thullaccayāpatti, tassā samaṇiyā pana;  
Dutiyena atikkante, garuke pana tiṭṭhati.
185. Catutthe dutiye vutta-sadisova vinicchayo;  
Āpattīnam pabhede tu, kāci natthi visesatā.
186. Avassutā sayam hutvā, tādisasseva hatthato;  
Gahetvā pana bhuñjantī, bhojanādīsu kiñcipi.
187. Phuse āpattiyo tisso, bhojanādīsu kiñcipi;  
ṭṭiggaṇhantiyā tassā, hoti thullaccayam pana.
188. Ajjhohāresu sabbesu, hoti saṅghādisatā;  
Udakaṃ dantaponam vā, ṭṭiggaṇhātī dukkaṭam.

189. “Sahatthena gahetvā tvaṃ, khāda vā bhuñja vā”tipi;  
Uyyojentī panevaṃ tu, tisso āpattiyo phuse.
190. Dukkaṭaṃ vacane tassā, “bhuñjissāmi”ti gaṇhati;  
Ajjhohāresu sabbesu, tassā thullaccayaṃ siyā.
191. Bhojanassa panosāne, hoti saṅghādisesatā;  
Uyyojeti ca yā tassā, imā tissoti dīpaye.
192. Sattame aṭṭhame cāpi, navame dasamepi ca;  
Corivuṭṭhāpaneneva, samānova vinicchayo.

Saṅghādisesakathā.

193. Pattasannicayaṃ yiha, karontī bhikkhunī pana;  
Ekaṃ nissaggiyaṃyeva, phuse pācittiyaṃ tu sā.
194. Akālacīvaraṃ kāla-cīvaraṃ bhājāpentiyā;  
Payoge dukkaṭaṃ vuttaṃ, lābhe nissaggiyaṃ siyā.
195. Cīvaraṃ parivattetvā, acchindati sace pana;  
Payoge dukkaṭaṃ, chinne, tassā nissaggiyaṃ siyā.
196. Viññāpetvāva aññaṃ ce, viññāpeti tato paraṃ;  
Payoge dukkaṭaṃ, viññā-pite nissaggiyaṃ siyā.
197. Cetāpetvā hi aññaṃ ce, cetāpeti tato paraṃ;  
Payoge dukkaṭaṃ, cetā-pite nissaggiyaṃ siyā.
198. Evameva ca sesesu, chaṭṭhādīsu ca sattu;  
Anantarasamānova, āpattīnaṃ vinicchayo.

Nissaggiyakathā.

199. Lasuṇaṃ khādanti dve ce, dukkaṭaṃ gahaṇe siyā;  
Ajjhohārapayogesū, pācitti pariyāputā.
200. Saṃharāpentiyā lomāṃ, sambādhe dveva honti hi;  
Payoge dukkaṭaṃ vuttaṃ, hoti pācitti saṃhate.
201. Karontī talaghātaṃ tu, dve panāpattiyo phuse;  
Payoge dukkaṭaṃ hoti, kate pācittiyaṃ siyā.
202. Jatunā maṭṭhakaṃ kiñci, sādiyanti duve phuse;  
Payoge dukkaṭādinne, tassā pācittiyaṃ siyā.
203. Pañcamaṃ tu catutthena, samānamiti dīpaye;  
Āpattīnaṃ vibhāgasmim, viseso natthi kocipi.
204. Bhikkhussa bhuñjamānassa, pānīyenuapatiṭṭhati;  
Hatthapāse tu pācitti, hitvā tiṭṭhati dukkaṭaṃ.

205. Viññāpetvāmakam dhaññaṃ, “bhuñjissāmī”ti gaṇhati;  
Dukkaṭaṃ hoti pācitti, ajjhohāresu dīpaye.
206. Uccārādiṃ tirokuṭṭe, chaḍḍentī dve phuse have;  
Payoge dukkaṭaṃ vuttaṃ, pācitti chaḍḍite siyā.
207. Uccārādicatukkaṃ tu, chaḍḍeti harite sace;  
Payoge dukkaṭaṃ tassā, pācitti chaḍḍite siyā.
208. Naccādiṃ dassanattāya, sace gacchati dukkaṭaṃ;  
Passantiyāpi pācitti, tatheva ca suṇantiyā.

Lasuṇavaggo paṭhamo.

209. Paṭhame dutiye ceva, tatiye ca catutthake;  
Tulyo lasuṇavaggassa, chaṭṭhenidha vinicchayo.
210. Kulāni upasaṅkamma, nisīditvā panāsane;  
Sāmike tu anāpucchā, pakkamantī duve phuse.
211. Paṭhamena ca pādena, anovassamatikkame;  
Dukkaṭaṃ hoti, pācitti, dutiyātikkame siyā.
212. Sāmike tu anāpucchā, āsane ce nisīdati;  
Payoge dukkaṭaṃ hoti, pācitti ca nisīdite.
213. Chaṭṭhena sattamaṃ sabbaṃ, samānaṃ aṭṭhame pana;  
Payoge dukkaṭaṃ, ujjhā-pite pācittiyam siyā.
214. Attānaṃ cābhisappentī, dve phuse nirayādinā;  
Payoge dukkaṭaṃ vuttaṃ, pācitti abhisappite.
215. Vadhitvā pana attānaṃ, rodantī tu duve phuse;  
Vadhāti rodati pācitti, karotekaṃ tu dukkaṭaṃ.

Rattandhakāravaggo dutiyo.

216. Naggā nhāyati dve ceva, payoge dukkaṭaṃ siyā;  
Nhānassa pariyosāne, tassā pācittiyam siyā.
217. Kārāpeti pamāṇāti-kkantaṃ udakasāṭikaṃ;  
Payoge dukkaṭaṃ, kārā-pite pācittiyam siyā.
218. Cīvaraṃ tu visibbetvā, visibbāpetva vā pana;  
Neva sibbantiyā vutta-mekaṃ pācittiyam pana.
219. Pañcāhikaṃ tu saṅghāṭi-cāraṃ pana atikkame;  
Ekāvassā panāpatti, pācitti paridīpitā.
220. Sace saṅkamanīyaṃ tu, dhāreti pana cīvaraṃ;  
Payoge dukkaṭaṃ vuttaṃ, pācitti pana dhārite.

221. Gaṇacīvaralābhassa, antarāyaṃ karoti ce;  
Payoge dukkaṭaṃ hoti, kate pācittiyaṃ siyā.
222. Vibhaṅgaṃ paṭibāhantī, cīvarānaṃ tu dhammikaṃ;  
Payoge dukkaṭaṃ vuttaṃ, pācitti paṭibāhite.
223. Agārikādīno deti, sace samaṇacīvaram;  
Payoge dukkaṭaṃ, dinne, pācitti pariyāputā.
224. Cīvare dubbalāsāya, kālaṃ ce samatikkame;  
Payoge dukkaṭaṃ vuttaṃ, pācitti samatikkame.
225. Dhammikaṃ kathinuddhāraṃ, paṭibāhantiyā duve;  
Payoge dukkaṭaṃ hoti, pācitti paṭibāhite.

Nhānavaggo tatiyo.

226. Duve bhikkhuniyo eka-mañcasmiṃ ce tuvaṭṭeyyūṃ;  
Payoge dukkaṭaṃ tāsāṃ, nipanne itaraṃ siyā.
227. Dutiyaṃ paṭhameneva, sadisaṃ tatiye pana;  
Payoge dukkaṭaṃ hoti, kate pācittiyaṃ siyā.
228. Nupaṭṭhāpentiyā vāpi, dukkhitāṃ sahaṅginiṃ;  
Ekāyeva panāpatti, pācitti paridīpitā.
229. Sace upassayaṃ datvā, nikkadḍhati ca bhikkhuniṃ;  
Payoge dukkaṭaṃ tassā, hoti pācitti kaḍḍhite.
230. Chaṭṭhe pana ca saṃsaṭṭhā, ñattiyā dukkaṭaṃ phuse;  
Kammavācāya osāne, pācitti paridīpitā.
231. Antoraṭṭhe tu sāsāṅke, cārikaṃ tu carantiyā;  
Payoge dukkaṭaṃ vuttaṃ, paṭipannāya sesakaṃ.
232. Aṭṭhamaṃ navamañceva, sattamena samaṃ mataṃ;  
Dasame pana ekāva, pācitti paridīpitā.

Tuvaṭṭavaggo catuttho.

233. Rājāgārādikaṃ sabbāṃ, dassanattāya gacchati;  
Payoge dukkaṭaṃ tassā, pācitti yadi passati.
234. Āsandiṃ vāpi pallaṅkaṃ, paribhuñjantiyā duve;  
Payoge dukkaṭaṃ vuttaṃ, bhutte pācittiyaṃ siyā.
235. Suttaṃ kantantiyā dveva, payoge dukkaṭaṃ mataṃ;  
Ujjavujjavane tassā, pācitti samudāhare.
236. Veyyāvaccāṃ gihīnaṃ tu, dveva honti karantiyā;  
Payoge dukkaṭaṃ vuttaṃ, kate pācittiyaṃ siyā.

237. Pañcame pana ekāva, pācitti paridīpitā;  
Payoge dukkaṭaṃ chaṭṭhe, dinne pācittiyaṃ siyā.
238. Sattamaṃ dutiyeneva, samāpattipabhedato;  
Aṭṭhamaṃ dutiye vagge, pañcamena samaṃ mataṃ.
239. Tiracchānagataṃ vijjaṃ, dveva honti paṭhantiyā;  
Payoge dukkaṭaṃ hoti, pācitti hi pade pade.
240. Dasamaṃ navameneva, samānaṃ sabbathā pana;  
“Pariyāpuṇāti, vāceti”, padamattaṃ visesakaṃ.

Cittāgāravaggo pañcama.

241. Sabhikkhukaṃ tamārāmaṃ, jānantī pana bhikkhunī;  
Pavisantī anāpucchā, dve panāpattiyo phuse.
242. Paṭhamaena ca pādena, parikkhepassatikkame;  
Dukkaṭaṃ piṭake vuttaṃ, pācitti dutiyena tu.
243. Akkosati ca yā bhikkhuṃ, bhikkhunī paribhāsati;  
Payoge dukkaṭaṃ tassā, pācittakkosite siyā.
244. Yā hi caṇḍikabhāvena, gaṇaṃ tu paribhāsati;  
Payoge dukkaṭaṃ tassā, paribhaṭṭhe panetaraṃ.
245. Nimantitā pavāritā, khādanaṃ bhojanampi vā;  
Bhuñjantī bhikkhunī sā hi, dve panāpattiyo phuse.
246. “Bhuñjissāmī”ti yaṃ kiñci, paṭiggaṇhāti dukkaṭaṃ;  
Ajjhohārapayogesū, pācitti paridīpaye.
247. Kulaṃ tu maccharāyantī, dve panāpattiyo phuse;  
Payoge dukkaṭaṃ vuttaṃ, sesā maccharite siyā.
248. Abhikkhuke panāvāse, bhava vassaṃ vasantiyā;  
Dukkaṭaṃ pubbakiccesu, pācitti aruṇuggame.
249. Bhikkhunī ubhatośaṅge, vassaṃvuṭṭhā tu tīhipi;  
Ṭhānehi appavārentī, ekaṃ pācittiyaṃ phuse.
250. Ovādatthāya vā bhikkhuṃ, saṃvāsattāya vā tathā;  
Na gacchati sace tassā, ekaṃ pācittiyaṃ siyā.
251. Ovādampi na yācantī, na gacchantī uposathaṃ;  
Ekaṃ pācittiyāpatti-māpajjati, na saṃsayo.
252. Apucchitvāva saṅghaṃ vā, bhedāpeti pasākhajaṃ;  
Payoge dukkaṭaṃ, bhinne, pācitti pariyāputā.

Ārāmavaggo chaṭṭho.

253. Gabbhiniṃ vuṭṭhapentī hi, dve paṇāpattiyo phuse;  
Payoge dukkaṭaṃ, vuṭṭhā-pite pācittiyaṃ siyā.
254. Dutiyaṃ tatiyañceva, catutthaṃ pañcamampi ca;  
Chaṭṭhañca sattamañceva, paṭhamena samaṃ mataṃ.
255. Bhikkhunī vuṭṭhapetvāna, bhikkhuniṃ sahaḷviniṃ;  
Dvevassaṃ nānuggaṇhantī, ekaṃ pācittiyaṃ phuse.
256. Navamaṃ dasamañceva, aṭṭhamena samaṃ mataṃ;  
Dvīsu āpattibhedasmiṃ, nānattaṃ natthi kiñcipi.

Gabbhinīvaggo sattamo.

257. Kumārībhūtavaggassa, ādito pana pañcapi;  
Samānā gabbhinīvagge, paṭhameneva sabbaso.
258. “Alaṃ vuṭṭhāpitenā”’ti, vuccamānā hi khīyati;  
Payoge dukkaṭaṃ, pacchā, hoti pācitti khīyite.
259. Sattame aṭṭhame ceva, ekaṃ pācittiyaṃ mataṃ;  
Ādināva samānāni, navamādīni pañcapi.

Kumārībhūtavaggo aṭṭhamo.

260. Āpattiyo phuse dvepi, dhārentī chattupāhanaṃ;  
Payoge dukkaṭaṃ vuttaṃ, hoti pācitti dhārite.
261. Yānena pana yāyantī, dve kirāpattiyo phuse;  
Payoge dukkaṭaṃ hoti, pācitti yadi yāyite.
262. Dhārentiyā tu saṅghāṇiṃ, payoge dukkaṭaṃ siyā;  
Dhārite pana pācitti, catutthepe ayaṃ nayo.
263. Nhāyantī gandhavaṇṇena, payoge dukkaṭaṃ phuse;  
Nhānassa pariyosāne, tassā pācittiyaṃ siyā.
264. Chaṭṭhampi pañcameneva, samānaṃ sabbathā pana;  
Sattame aṭṭhame ceva, navame dasamepi ca.
265. Payoge dukkaṭaṃ vuttaṃ, pācittummaddite siyā;  
Āpattīnaṃ vibhāgasmiṃ, natthi kāci visesatā.
266. Anāpucchā tu bhikkhussa, purato yā nisīdati;  
Payoge dukkaṭaṃ tassā, pācitti tu nisīdite.
267. Anokāsakataṃ bhikkhuṃ, pañhaṃ pucchantiyā pana;  
Payoge dukkaṭaṃ hoti, vuttā pācitti pucchite.
268. Saṃkaccikaṃ vinā gāmaṃ, padasā pavisantiyā;  
Paṭhameneva ārāma-vaggassa sadisaṃ vade.

## Chattupāhanavaggo navamo.

## Pācittiyakathā.

269. Aṭṭhasu duvidhāpatti, pāṭidesaniyesupi;  
Viññāpetvā sace sappiṃ, “bhuñjissāmi”ti gaṇhati.
270. Tato bhikkhuniyā tassā, hoti āpatti dukkaṭaṃ;  
Ajjhohāresu sabbesu, pāṭidesaniyaṃ siyā.

## Pāṭidesanīyakathā.

271. Imaṃ viditvā paramaṃ panuttaraṃ;  
Niruttaraṃ atthavasena bhikkhu;  
Sukhena paññattamahāsamuddaṃ;  
Duruttaraṃ uttarateva dhīro.
272. Yasmā tasmā asmiṃ yogaṃ;  
Usmāyutto yutto kātum;  
Satto satto kaṅkhaçchede;  
Satthe satthe niccaṃ niccaṃ.

## Bhikkhunīvibhaṅgo niṭṭhito.

## Catuvipattikathā

273. Kati āpattiyo sīla-vipattipaccayā pana;  
Catassova siyuṃ sīla-vipattipaccayā pana.
274. Jānaṃ pārājikaṃ dhammaṃ, sace chādeti bhikkhunī;  
Cutā, thullaccayaṃ hoti, sace vematikā siyā.
275. Pācitti bhikkhu saṅghādi-sesaṃ chādeti ce pana;  
Attano pana duṭṭhullaṃ, chādento dukkaṭaṃ phuse.
276. Āpattiyo katācāra-vipattipaccayā pana;  
Ekāyeva siyācāra-vipattipaccayā pana.
277. Paṭicchādeti ācāra-vipattiṃ pana bhikkhu ce;  
Ekamevassa bhikkhussa, hoti āpatti dukkaṭaṃ.
278. Kati āpattiyo diṭṭhi-vipattipaccayā pana?  
Dve panāpattiyo diṭṭhi-vipattipaccayā siyuṃ.
279. Accajaṃ pāpikaṃ diṭṭhiṃ, ñattiyā dukkaṭaṃ phuse;  
Kammavācāya osāne, pācitti pariyāputā.
280. Āpattiyo katājīva-vipattipaccayā pana?  
Chālevāpajjatājīva-vipattipaccayā pana.
281. Ājīvahetu pāpiccho, asantaṃ pana attani;

Manussuttaridhammaṃ tu, vadaṃ pārājikaṃ phuse.

282. Sañcarittaṃ samāpanno, hoti saṅghādisesatā;  
Pariyāyavacane ñāte, tassa thullaccayaṃ siyā.

283. Paṇītabhojanaṃ vatvā, pācitti paribhuñjato;  
Bhikkhunī tu sace hoti, pāṭidesaniyaṃ siyā.

284. Ājīvahetu sūpaṃ vā, odanaṃ vā panattano;  
Atthāya viññāpetvāna, dukkaṭaṃ paribhuñjato.

Catuvipattikathā.

### Adhikaraṇapaccayakathā

285. Vivādādhikaraṇamhā, kati āpattiyo siyuṃ?  
Vivādādhikaraṇamhā, dve panāpattiyo siyuṃ.

286. Pācitti upasampannaṃ, hoti omasato pana;  
Bhikkhussānupasampannaṃ, omasantassa dukkaṭaṃ.

287. Anuvādādhikaraṇa-paccayāpattiyo kati?  
Anuvādādhikaraṇa-paccayā tividhā siyuṃ.

288. Anuddhamseti ce bhikkhuṃ, amūlantimavatthunā;  
Saṅghādisesamāpatti-māpajjati, na saṃsayo.

289. Tathā saṅghādisesena, anuddhamseti ce pana;  
Pācitti, dukkaṭaṃ vuttaṃ, tathācāravipattiyā.

290. Āpattipaccayā vuttā, kati āpattiyo pana?  
Āpattipaccayā vuttā, catassova mahesinā.

291. Jānaṃ pārājikaṃ dhammaṃ, sace chādeti bhikkhunī;  
Cutā, thullaccayaṃ hoti, sace vematikā siyā.

292. Pācitti bhikkhu saṅghādi-sesaṃ chādeti ce pana;  
Tathācāravipattiṃ tu, sace chādeti dukkaṭaṃ.

293. Āpattiyo hi kiccādhī-karaṇapaccayā kati?  
Pañceva honti kiccādhī-karaṇapaccayā pana.

294. Samanubhāsanāyeva, ñattiyā dukkaṭaṃ phuse;  
Samaṇī accajantīva, ukkhittassānuvattikā.

295. Thullaccayaṃ dvayaṃ dvīhi, kammavācāhi sā phuse;  
Kammavācāya osāne, tassā pārājikaṃ siyā.

296. Samanubhāsanāyeva, bhedakassānuvattikā;  
Na pariccajati taṃ laddhiṃ, hoti saṅghādisesatā.



297. Samanubhāsanāyeva, pāpikāya ca diṭṭhiyā;  
Yāvatiyakam tassā, pācittacajatopi ca.

Adhikaraṇapaccayakathā.

### Khandhakupucchākathā

298. Khandhakesupi āpatti-pabhedam āgataṃ pana;  
Pāṭavathāya bhikkhūnaṃ, pavakkhāmi nibodhatha.
299. Khandhake paṭhame tāva, kati āpattiyo siyuṃ?  
Khandhake paṭhame tāva, dve panāpattiyo siyuṃ.
300. Ūnavāsativassaṃ tu, karoto upasampadam;  
Hoti pācittiyam tassa, sesesu pana dukkaṭam.
301. Kati āpattiyo honti;  
Khandhake tu uposathe?  
Tisso āpattiyo honti;  
Khandhake tu uposathe.
302. ‘‘Nassantete vinassantu’’, iti bhedapurakkhakā;  
Uposathassa karaṇe, thullaccayamudīritam.
303. Ukkhittakena saddhiṃ tu, karontassa uposatham;  
Hoti pācittiyam tassa, sesesu pana dukkaṭam.
304. Kati āpattiyo vuttā, vada vassūpanāyike?  
Ekāva dukkaṭāpatti, vuttā vassūpanāyike.
305. Kati āpattiyo vuttā, khandhake tu pavāraṇe?  
Tisso āpattiyo vuttā, uposathasamā matā.
306. Kati āpattiyo vuttā, camme? Tissova dīpitā;  
Mārentānaṃ tu pācitti, gahetvā vacchariṃ pana.
307. Aṅgajātam chupantassa, rattena pana cetasā;  
Tassa thullaccayam vuttam, sesesu pana dukkaṭam.
308. Kati āpattiyo vuttā, bhesajjakkhandhake pana?  
Tisso āpattiyo vuttā, bhesajjakkhandhake pana.
309. Samantā dvaṅgule tattha, thullaccayamudīritam;  
Bhojjayāgūsu pācitti, sesesu pana dukkaṭam.
310. Kathine natthi āpatti, paññattam kevalam pana;  
Kati cīvarasamyutte, vuttā āpattiyo pana?
311. Tisso cīvarasamyutte, vuttā āpattiyo pana;  
Kusavākamaye cīre, thullaccayamudīritam.
312. Sanissaggāva pācitti, atireke tu cīvare;

Sesesu dukkaṭaṃ vuttaṃ, buddhenādiccabandhunā.

313. Campeyyake ca kosambe, kammaṣmiṃ pārivāsike;  
Tathā samuccaye ekā, dukkaṭāpatti dīpitā.
314. Kati āpattiyo vuttā, samathakkhandhake pana?  
Dveyevāpattiyo vuttā, samathakkhandhake pana.
315. Chandassa dāyako bhikkhu, pācitti yadi khīyati;  
Sesesu pana sabbattha, dukkaṭaṃ samudāhaṭaṃ.
316. Kati khuddakavatthusmiṃ, vuttā āpattiyo pana?  
Tisso khuddakavatthusmiṃ, vuttā āpattiyo pana.
317. Attano aṅgajātaṃ tu, chindaṃ thullaccayaṃ phuse;  
Romanthe hoti pācitti, sese āpatti dukkaṭaṃ.
318. Tathā senāsanasmim tu, tisso āpattiyo siyuṃ;  
Vissajjane ca garuno, thullaccayamudīritaṃ.
319. Nikkaḍḍhane ca pācitti, saṅghikamhā vihārato;  
Sesesu pana sabbattha, dukkaṭaṃ samudāhaṭaṃ.
320. Kati āpattiyo saṅgha-bhede vuttā mahesinā?  
Dve panāpattiyo saṅgha-bhede vuttā mahesinā.
321. Bhedānuvattakānaṃ tu, thullaccayamudīritaṃ;  
Gaṇabhoge tu bhikkhūnaṃ, pācitti paridīpitā.
322. Khandhake vattasaṃyutte, kati āpattiyo matā?  
Khandhake vattasaṃyutte, dukkaṭāpattiyeva sā.
323. Ṭhapane pātimokkhasa, tathā ekāva dīpitā;  
Bhikkhunikkhandhake cāpi, kati āpattiyo matā?
324. Bhikkhunikkhandhake cāpi, dve panāpattiyo matā;  
Apavāraṇāya pācitti, sesesu pana dukkaṭaṃ.

Khandhakupucchākathā niṭṭhitā.

### Samuṭṭhānasīsakathā

325. Vibhaṅgesu pana dvīsu, paññattāni mahesinā;  
Yāni pārājikādīni, uddisanti uposathe.
326. Tesam dāni pavakkhāmi, samuṭṭhānamito paraṃ;  
Pāṭavattāya bhikkhūnaṃ, taṃ suṇātha samāhitā.
327. Kāyo ca vācāpi ca kāyavācā;  
Tāneva cittena yutāni tīṇi;  
Ekaṅgikaṃ dvaṅgitivaṅgikanti;  
Chadhā samuṭṭhānavidhiṃ vadanti.

328. Tesu ekena vā dvīhi, tīhi vātha catūhi vā;  
Chahi vāpattiyo nānā-samuṭṭhānehi jāyare.
329. Tattha pañcasamuṭṭhānā, kā cāpatti na vijjati;  
Hoti ekasamuṭṭhānā, pacchimeheva tīhipi.
330. Tattheva dvisamuṭṭhānā, kāyato kāyacittato;  
Vācato vācacittamhā, tatiyacchaṭṭhatopi ca.
331. Catutthacchaṭṭhato ceva, pañcamacchaṭṭhatopi ca;  
Jāyate pañcadhāvesā, samuṭṭhāti na aññato.
332. Tisamuṭṭhānikā nāma, paṭhamehi ca tīhipi;  
Pacchimehi ca tīheva, samuṭṭhāti na aññato.
333. Paṭhamā tatiyā ceva, catutthacchaṭṭhatopi ca;  
Dutiya tatiyā ceva, pañcamacchaṭṭhatopi ca.
334. Dvidhā catusamuṭṭhānā, jāyate na panaññato;  
Ekadhā chasamuṭṭhānā, samuṭṭhāti chaheva hi.

Āha ca –

335. “Tidhā ekasamuṭṭhānā, pañcadhā dvisamuṭṭhitā;  
Dvidhā ticaturo ṭhānā, ekadhā chasamuṭṭhitā”.
336. Terasa ca nāmāni, samuṭṭhānavisesato;  
Labhantāpattiyo sabbā, tāni vakkhāmito paraṃ.
337. Paṭhamantimavatthuñca, dutiyaṃ sañcarittakaṃ;  
Samanubhāsanañceva, kathineḷakalomakaṃ.
338. Padasodhammaddhānaṃ, theyyasatthañca desanā;  
Bhūtārocanañceva, corivuṭṭhāpanampi ca.
339. Ananuññātakañcāti, sīsānetāni terasa;  
Terasete samuṭṭhāna-nayā viññūhi cintitā.
340. Tattha yā tu catutthena, samuṭṭhānena jāyate;  
**Ādipārājikuṭṭhānā**, ayanti paridīpitā.
341. Sacittakehi tīheva, samuṭṭhānehi yā pana;  
Jāyate sā panuddiṭṭhā, **adinnādānapubbakā**.
342. Samuṭṭhānehi yāpatti, jātucchahipi jāyate;  
**Sañcarittasamuṭṭhānā**, nāmāti paridīpitā.
343. Chaṭṭheneva samuṭṭhāti, samuṭṭhānena yā pana;  
Samuṭṭhānavasenāyaṃ, vuttā **samanubhāsanā**.
344. Tatiyacchaṭṭhatoyeva, samuṭṭhāti hi yā pana;  
Samuṭṭhānavasenāyaṃ, **kathinupapadā** matā.

345. Jāyate yā panāpatti, kāyato kāyacittato;  
Ayameḷakalomādi-samuṭṭhānāti dīpitā.
346. Jāyate yā panāpatti, vācato vācacittato;  
Ayaṃ tu **padasodhamma-samuṭṭhānāti** vuccati.
347. Kāyato kāyavācamhā, catutthacchaṭṭhatopi ca;  
Jāyate sā panaddhāna-samuṭṭhānāti sūcitā.
348. Catutthacchaṭṭhatoyeva, samuṭṭhāti hi yā pana;  
**Theyyasatthasamuṭṭhānā**, ayanti paridīpitā.
349. Pañcameneva yā cettha, samuṭṭhānena jāyate;  
Samuṭṭhānavasenāyaṃ, **dhammadesanasaññitā**.
350. Acittakehi tīheva, samuṭṭhānehi yā siyā;  
Samuṭṭhānavasenāyaṃ, **bhūtārocanapubbakā**.
351. Pañcamacchaṭṭhatoyeva, yā samuṭṭhānato siyā;  
Ayaṃ tu paṭhitā **cori-vuṭṭhāpanasamuṭṭhitā**.
352. Dutiyā tatiyamhā ca, pañcamacchaṭṭhatopi yā;  
Jāyate **ananuññāta-samuṭṭhānā** ayaṃ siyā.
353. Paṭthamaṃ dutiyaṃ tattha, catutthaṃ navamampi ca;  
Dasamaṃ dvādasamañcāti, samuṭṭhānaṃ sacittakaṃ.
354. Ekekasmim samuṭṭhāne, sadisā idha dissare;  
Sukkañca kāyasaṃsaggo, paṭhamāniyatopi ca.
355. Pubbupaparipāko ca, raho bhikkhuniyā saha;  
Sabhojane, raho dve ca, aṅgulī, uḍake hasaṃ.
356. Pahāre, uggire ceva, tepaññāsā ca sekhiyā;  
Adhakkhakubbhajāṇuñca, gāmantaramavassutā.
357. Talamatṭhudasuddhi ca, vassaṃvuṭṭhā tatheva ca;  
Ovādāya na gacchantī, nānubandhe pavattiniṃ.
358. Pañcasattati niddiṭṭhā, kāyacittasamuṭṭhitā;  
Ime ekasamuṭṭhānā, methunena samā matā.

Paṭhamapārājikasamuṭṭhānaṃ.

359. Viggahaṃ, uttariñceva, duṭṭhullaṃ, attakāmatā;  
Duṭṭhadosaṃ duve ceva, dutiyāniyatopi ca.
360. Acchindanañca pariñāmo, musā, omasapesuṇā;  
Duṭṭhullārocanañceva, pathavīkhaṇanampi ca.
361. Bhūtagāmaññāvādo ca, ujjhāpanakameva ca;  
Nikkaḍḍho, siñcanañceva, tathā āmisahetu ca.

362. Bhuttāviṃ, ehanādarīṃ, bhimsāpanakameva ca;  
Apanidheyya, sañcicca, pāṇaṃ, sappāṇakampi ca.
363. Ukkoṭanaṃ =00 tathā ūno, saṃvāso, nāsanena ca;  
Sahadhammikaṃ, vilekhāya, mohanāmūlakena ca.
364. Kukkuccaṃ, khīyanaṃ datvā, pariṇāmeyya puggale;  
Kiṃ te, akālaṃ, acchinde, duggahā, nirayena vā.
365. Gaṇassa ca vibhaṅgañca, dubbalāsā tatheva ca;  
Dhammikaṃ kathinuddhāraṃ, sañciccāphāsumeva ca.
366. Sayamaṃ upassayaṃ datvā, akkoseyya ca caṇḍikā;  
Kulamaccharinī assa, gabbhinīṃ vuṭṭhapeyya ca.
367. Pāyantīṃ, dve ca vassāni, saṅghenāsammataṃ pi ca;  
Tisso gihigatā vuttā, tissoyeva kumārikā.
368. Ūnadvādasavassā dve, tathālaṃ tāva teti ca;  
Sokāvassā tathā pāri-vāsikacchandadānato.
369. Anuvassaṃ duve cāti, sikkhā ekūnasattati;  
Adinnādānatulyattā, tisamuṭṭhānikā katā.

Dutiyapārājikasamuṭṭhānaṃ.

370. Sañcarikuṭṭimahaḷlakamaṃ, dhovāpanaṅga paṭiggaho;  
Cīvarassa ca viññatti, gahaṅgañca taduttariṃ.
371. Upakkhaṭadvayañceva, tathā dūtena cīvaram;  
Kosiyamaṃ, suddhakāḷānaṃ, dvebhāgādānameva ca.
372. Chabbassāni, purāṇassa, lomadhovāpanampi ca;  
Rūpiyassa paṭiggāho, ubho nānappakārakā.
373. Ūnabandhanapatto ca, vassasāṭikasuttakamaṃ;  
Vikappāpajjanaṃ, yāva, dvāra, dānaṅga sibbanamaṃ.
374. Pūvehi, paccayo jotīṃ, ratanaṃ, sūci, mañcakamaṃ;  
Tūlaṃ, nisīdanaṃ, kaṇḍu, vassikā, sugatassa ca.
375. Aññaviññattisikkhā ca, aññacetāpanampi ca;  
Saṅghikena duve vuttā, dve mahājanikena ca.
376. Tathā =01 puggalikenekamaṃ, garupāvuraṇamaṃ lahuṃ;  
Dve vighāsodasāṭī ca, tathā samaṇacīvaram.
377. Iti ekūnapaṇṇāsa, dhammā dukkhantadassinā;  
Chasamuṭṭhānikā ete, sañcarittasamā katā.

Sañcarittasamuṭṭhānaṃ.

378. Saṅghabhedo ca bhedānu-vattadubbacadūsakā;  
Duṭṭhullacchādanam, diṭṭhi, chanda, ujjagghikā duve.
379. Appasaddā duve vuttā, tathā na byāhareti ca;  
Chamā, nicāsane, ṭhānam, pacchato, uppathena ca.
380. Vajjacchādānuvattā ca, gahaṇam, osāreyya ca;  
Paccakkhāmīti sikkhā ca, tathā kismiñcideva ca.
381. Saṃsaṭṭhā dve, vadhitvā ca, visibbetvā ca dukkhitam;  
Punadeva ca saṃsaṭṭhā, neva vūpasameyya ca.
382. Jānam sabhikkhukārāmaṃ, tatheva na pavāraye;  
Tathā anvaddhamāsaṇca, sahajīviniyo duve.
383. Sace me cīvaram ayye, anubandhissasīti ca;  
Sattatiṃsa ime dhammā, sambuddhena pakāsītā.
384. Sabbe ete samuṭṭhānā, kāyavācādito siyumu;  
Samāsamasameneva, katā samanubhāsānā.

Samanubhāsanāsamuṭṭhānam.

385. Kathināni ca tīṇādi, patto, bhesajjameva ca;  
Accekampi ca sāsaṅkam, pakkamantadvayampi ca.
386. Tathā upassayam gantvā, bhojanaṇca paramparaṃ;  
Anatirittam sabhatto, vikappetvā tatheva ca.
387. Rañño, vikāle, vosāsā-raññakussayavādikā;  
Pattasannicayaṇceva, pure, pacchā, vikālake.
388. Pañcāhikam =02, saṅkamanim, tathā āvasathadvayam;  
Pasākhe, āsane cāti, ekūnatimsime pana.
389. Dvisamuṭṭhānikā dhammā, niddiṭṭhā kāyavācato;  
Kāyavācādito ceva, sabbe kathinasambhavā.

Kathinasamuṭṭhānam.

390. Dve seyyāhaccapādo ca, piṇḍaṇca gaṇabhojanam;  
Vikāle, sannidhiṇceva, dantaponamacelakam.
391. Uyyuttaṇca vasuyyodhim, surā, orena nhāyanam;  
Dubbaṇṇakaraṇaṇceva, pāṭidesaniyadvayam.
392. Lasuṇam, upatiṭṭheyya, naccadassanameva ca;  
Naggam, attharaṇam, maṇce, antoraṭṭhe, tathā bahi.
393. Antovassamagāraṇca, āsandim, suttakantanam;  
Veyyāvaccam, sahatthā ca, āvāse ca abhikkhuke.

394. Chattam, yānañca saṅghāṇim, alaṅkāraṃ, gandhavāsitaṃ;  
Bhikkhunī, sikkhamānā ca, sāmaṇerī, gihīniyā.

395. Tathā saṃkaccikā cāti, tecattālīsime pana;  
Sabbe eḷakalomena, dvisamuṭṭhānikā samā.

Eḷakalomasamuṭṭhānaṃ.

396. Aññatrāsammato ceva, tathā atthaṅgatena ca;  
Tiracchānavijjā dve vuttā, anokāsakatampi ca.

397. Sabbe cha panime dhammā, vācato vācacittato;  
Dvisamuṭṭhānikā honti, padasodhammatulyatā.

Padasodhammasamuṭṭhānaṃ.

398. Ekaṃ nāvaṃ, paṇītañca, saṃvidhānañca saṃhare;  
Dhaññaṃ, nimantitā ceva, pāṭidesaniyaṭṭhakaṃ.

399. Etā =03 catusamuṭṭhānā, sikkhā cuddasa honti hi;  
Paññattā buddhasettḥena, addhānena samā matā.

Addhānasamuṭṭhānaṃ.

400. Sutiṃ, sūpādiviññattiṃ, andhakāre tatheva ca;  
Paṭicchanne ca okāse, byūhe cāti ime chapi.

401. Sabbe tu dvisamuṭṭhānā, catutthacchaṭṭhato siyuṃ;  
Theyyasatthasamuṭṭhānā, desitādiccabandhunā.

Theyyasatthasamuṭṭhānaṃ.

402. Chatta, daṇḍakarassāpi, satthāvudhakarassapi;  
Pādukūpāhanā, yānaṃ, seyyā, pallatthikāya ca.

403. Veṭṭhitogunṭhito cāti, ekādasa nidassitā;  
Sabbe ekasamuṭṭhānā, dhammadesanasaññitā.

Dhammadesanasamuṭṭhānaṃ.

404. Bhūtārocanakañceva, corivuṭṭhāpanampi ca;  
Ananuññātamattañhi, asambhinnamidam tayam.

Samuṭṭhānasāsakathā niṭṭhitā.

### Ekuttaranayakathā

405. Kati āpattiyo honti, samuṭṭhānena ādinā?  
Pañca āpattiyo honti, kuṭiṃ saṃyācīkāya tu.

406. Karoto pana tissova, payoge dukkaṭādayo;

Vikāle pana pācitti, tathā aññātihathato.

407. Gahetvā bhuñjato vuttaṃ, pāṭidesaniyampi ca;  
Pañcimāpattiyo honti, samuṭṭhānena ādinā.
408. Kati =04 āpattiyo honti, dutiyena tuvaṃ bhaṇa?  
Āpattiyo catassova, hontīti paridīpaye.
409. “Kuṭiṃ mama karoṭhā”ti, samādisati bhikkhu ce;  
Karonti ce kuṭiṃ tassa, vipannaṃ sabbathā pana.
410. Tisso purimaniddiṭṭhā, payoge dukkaṭādayo;  
Padasodhammāmūlena, catassova bhavantimā.
411. Tatiyena kati jāyanti, samuṭṭhānena me bhaṇa?  
Tatiyena tuvaṃ brūmi, pañcadhāpattiyo siyuṃ.
412. Bhikkhu saṃvidahitvāna;  
Karoti ca kuṭiṃ sace;  
Tisso āpattiyo honti;  
Payoge dukkaṭādayo.
413. Pañītabhojanaṃ vatvā, hoti pācitti bhuñjato;  
Bhikkhuniṃ na nivāretvā, pāṭidesaniyaṃ siyā.
414. Siyuṃ kati catutthena, samuṭṭhānena me bhaṇa?  
Chaḷevāpattiyo honti, methunaṃ yadi sevati.
415. Hoti pārājikaṃ tassa, kuṭiṃ saṃyācikāya tu;  
Karoto pana tissova, payoge dukkaṭādayo.
416. Vikāle pana pācitti, tathā aññātihathato;  
Gahetvā bhuñjato vuttaṃ, pāṭidesaniyampi ca.
417. Kati āpattiyo honti, pañcamena? Cha honti hi;  
Manussuttaridhammaṃ tu, vadaṃ pārājikaṃ phuse.
418. “Kuṭiṃ mama karoṭhā”ti;  
Samādisati bhikkhu ce;  
Karonti ce kuṭiṃ tisso;  
Honti tā dukkaṭādayo.
419. Vāceti padaso dhammaṃ, hoti pācitti bhikkhuno;  
Davakamyatā vadantassa, tassa dubbhāsitaṃ siyā.
420. Samuṭṭhānena =05 chaṭṭhena, kati āpattiyo siyuṃ?  
Cha ca saṃvidahitvāna, bhaṇḍaṃ harati ce cuto.
421. “Kuṭiṃ mama karoṭhā”ti;  
Samādisati bhikkhu ce;  
Karonti ce kuṭiṃ tisso;  
Honti tā dukkaṭādayo.



422. Paṇṭabhojanam vatvā, hoti pācitti bhuñjato;  
Bhikkhuniṃ na nivāretvā, pāṭidesaniyaṃ siyā.

423. Idha yo vimatūparamaṃ paramaṃ;  
Imamuttaramuttarati;  
Vinayaṃ sunayaṃ sunayena yuto;  
Sa ca duttaramuttaramuttarati.

### Āpattisamuṭṭhānakathā.

424. Ito paraṃ pavakkhāmi, paramekuttaraṃ nayaṃ;  
Avikkhittena cittena, taṃ suṇātha samāhitā.

425. Ke āpattikarā dhammā, anāpattikarāpi ke?  
Kā panāpattiyo nāma, lahukā garukāpi kā?

426. Sāvasesā ca kāpatti, kā nāmānavasesakā?  
Duṭṭhullā nāma kāpatti, aduṭṭhullāpi nāma kā?

427. Niyatā nāma kāpatti, kā panāniyatāpi ca?  
Desanāgāminī kā ca, kā cādesanagāminī?

428. Samuṭṭhānāni āpatti-karā dhammāti dīpitā;  
Anāpattikarā dhammā, samathā satta dassitā.

429. Pārājikādayo satta-vidhā āpattiyo siyuṃ;  
Lahukā tattha pañceva, honti thullaccayādayo.

430. Pārājikaṃ ṭhapetvāna, sāvasesāvasesakā;  
Ekā pārājikāpatti, matā anavasesakā.

431. “Duṭṭhullā”ti =06 ca niddiṭṭhā, duvidhāpattiādito;  
Sesā pañcavidhāpatti, “aduṭṭhullā”ti dīpitā.

432. Pañcānantariyaṃyuttā, niyatāniyatetarā;  
Desanāgāminī pañca, dve panādesagāmikā.

### Ekakakathā.

433. Abhabbāpattiko ko ca, bhabbāpattikapuggalo?  
Upasampadakammaṃ tu, satthunā kassa vāritaṃ?

434. Āpattimāpajjituṃ dveva loke;  
Buddhā ca paccekabuddhā abhabbā;  
Āpattimāpajjituṃ dveva loke;  
Bhikkhū ca bhabbā atha bhikkhunī ca.

435. Addhavihīno aṅgavihīno;  
Vatthuvipanno dukkaṭakārī;  
No paripuṇṇo yācati yo no;  
Tassupasampadā paṭisiddhā.

436. Atthāpatti have laddha-samāpattissa bhikkhuno;  
Atthāpatti hi no laddha-samāpattissa dīpitā.
437. Bhūtassārocanam laddha-samāpattissa niddise;  
Abhūtārocanāpatti, asamāpattilābhino.
438. Atthi saddhammasaṃyuttā, asaddhammayutāpi ca;  
Saparikkhārasaṃyuttā, parasantakasaṃyutā.
439. Padasodhammamūlādī, saddhammapaṭisaṃyutā;  
Duṭṭhullavācasāṃyuttā, asaddhammayutā siyā.
440. Atirekadasāham tu, ṭhapane cīvarādino;  
Anissajjivā bhoge ca, saparikkhārasaṃyutā.
441. Saṅghassa mañcapīṭhādī, ajjhokāsatharepi ca;  
Anāpucchāva gamane, parasantakasaṃyutā.
442. Kathañhi =07 bhaṇato saccaṃ, garukaṃ hoti bhikkhuno?  
Kathaṃ musā bhaṇantassa, lahukāpatti jāyate?
443. “Sikharāṇī” ti saccaṃ tu, bhaṇato garukaṃ siyā;  
Sampajānamusāvāde, pācitti lahukā bhava.
444. Kathaṃ musā bhaṇantassa, garukaṃ hoti bhikkhuno?  
Kathaṃca bhaṇato saccaṃ, āpatti lahukā siyā?
445. Abhūtārocane tassa, garukāpatti dīpitā;  
Bhūtassārocane saccaṃ, vadato lahukā siyā.
446. Kathaṃ bhūmigato dosaṃ, na vehāsagato phuse?  
Kathaṃ vehāsago dosaṃ, na ca bhūmigato phuse?
447. Saṅghakammaṃ vikopetuṃ, hatthapāsaṃ jahaṃ phuse;  
Kesamattampi ākāse, tiṭṭhato natthi vajjatā.
448. Āhaccapādakaṃ mañcaṃ, vehāsakuṭiyūpari;  
Pīṭhaṃ vābhiniśīdanto, āpajjati na bhūmito.
449. Pavisanto kathaṃ bhikkhu, āpajjati, na nikkhamaṃ?  
Pavisanto kathaṃ bhikkhu, pavisanto na ceva taṃ?
450. Sachattupāhano vatta-mapūretvāna kevalaṃ;  
Pavisanto panāpattiṃ, āpajjati, na nikkhamaṃ.
451. Gamiko gamikavattāni, apūretvāna nikkhamaṃ;  
Nikkhamantova āpattiṃ, phuseyya, pavisamaṃ na ca.
452. Ādiyanto panāpattiṃ, āpajjati kathaṃ vada?  
Tathevānādiyantopi, āpajjati kathaṃ vada?
453. Bhikkhunī atigambhīraṃ, yā kācudakasuddhikaṃ;

Ādiyantī panāpattim, āpajjati, na saṃsayo.

454. Anādiyitvā dubbaṇṇa-karaṇaṃ pana cīvaraṃ;  
Yevaṃ anādiyantova, āpajjati hi nāma so.
455. Samādiyanto āpattim, āpajjati kathaṃ pana?  
Tathāsamādiyantopi, āpajjati kathaṃ pana?
456. Yo =08 hi mūgabbatādīni, vatānidha samādiyaṃ;  
Samādiyanto āpattim, āpajjati hi nāma so.
457. Yo hi kammakato bhikkhu, vuttaṃ vattaṃ panattano;  
Tañcāsamādiyantova, āpajjati hi nāma so.
458. Karontova panāpattim, kathamāpajjate naro?  
Na karonto kathaṃ nāma, samaṇo dosavā siyā?
459. Bhaṇḍāgārikakammañca, vejjakammañca cīvaraṃ;  
Aññātikāya sibbanto, karaṃ āpajjate naro.
460. Upajjhāyassa vattāni, vattāni itarassa vā;  
Akaronto panāpattim, āpajjati hi nāma so.
461. Dento āpajjatāpattim, na dentopi kathaṃ bhaṇa?  
Aññātikāya yaṃ kiñci, bhikkhu bhikkhuniyā pana.
462. Cīvaraṃ dadamāno hi, dento āpajjate pana;  
Tathantevāsikādīnaṃ, adento cīvarādikaṃ.
463. Attasannissitā atthi, tatheva paranissitā;  
Mudulambādino attā, sesā hi paranissitā.
464. Kathañca paṭigaṇhanto, āpajjati hi vajjataṃ?  
Kathamappaṭigaṇhanto, āpajjati hi vajjataṃ?
465. Cīvaraṃ paṭigaṇhanto, bhikkhu aññātihatthato;  
Ovādañca na gaṇhanto, āpajjati hi vajjataṃ.
466. Kathañca paribhogena, āpajjati tapodhano?  
Kathaṃ na paribhogena, āpajjati tapodhano?
467. Yo hi nissaggiyaṃ vatthum, accajitvā nisevati;  
Ayaṃ tu paribhogena, āpajjati, na saṃsayo.
468. Atikkamentī saṅghāṭi-cāraṃ pañcāhikaṃ pana;  
Ayaṃ tu paribhogena, āpajjati hi bhikkhunī.
469. Divāpajjati no rattim, rattimeva ca no divā;  
Dvāraṃ asaṃvaritvāna, sento āpajjate divā.
470. Sagāraseyyakaṃ =09 rattim, āpajjati hi no divā;  
Aruṇugge panāpatti, kathaṃ na aruṇuggame?

471. Ekachāratasattāha-dasāhādiatikkame;  
Phusanto vuttamāpattiṃ, āpajjataruṇuggame.
472. Pavāretvāna bhuñjanto, phuse na aruṇuggame;  
Chindantassa siyāpatti, kathamacchindato siyā?
473. Chindanto bhūtagāmañca, aṅgajātañca attano;  
Pārājikañca pācittiṃ, phuse thullaccayampi ca.
474. Na chindanto nakhe kese, āpajjati hi nāma so;  
Chādentopajjātāpattiṃ, nacchādentō katham̐ pana?
475. Chādentō pana āpattiṃ, chādentopajjate naro;  
Āpajjati panacchinno, nacchādentō tiṇādinā.
476. Āpajjati hi dhārento, na dhārento katham̐ pana?  
Dhārento kusacīrādiṃ, dhārentopajjate pana.
477. Dinnam̐ nissatṭhapattam̐ tam̐, adhārentova dosavā;  
Sacittakadukam̐ saññā-vimokkhakadukam̐ bhavē.

Dukakathā.

478. Atthāpatti hi tiṭṭhante, nāthe, no parinibbute;  
Nibbute na tu tiṭṭhante, atthāpattubhayatthapi.
479. Ruhiruppādanāpatti, ṭhite, no parinibbute;  
Theramāvusavādena, vadato parinibbute.
480. Āpattiyo imā dvepi, ṭhapetvā sugate pana;  
Avasesā dharantepi, bhavanti parinibbute.
481. Kāleyeva siyāpatti, vikāle na siyā katham̐?  
Vikāle tu siyāpatti, na kāle, ubhayatthapi?
482. Bhuñjatonatirittam̐ tu, kālasmim̐, no vikālake;  
Vikālabhojanāpatti, vikāle, tu na kālake.
483. Avasesam̐ =10 panāpattiṃ, āpajjati hi sabbadā;  
Sabbam̐ kāle vikāle ca, natthi tattha ca saṃsayo.
484. Rattimeva panāpattiṃ, āpajjati ca no divā;  
Divāpajjati no rattim̐, āpajjatubhayatthapi.
485. Sahaseyyā siyā rattim̐, dvārāsam̐varamūlakā;  
Divā, sesā panāpatti, siyā rattim̐ divāpi ca.
486. Dasavasso tu no ūna-dasavasso siyā katham̐?  
Hotūnadasavasso, no, dasavassūbhayatthapi?
487. Upatṭhāpeti ce bālo, parisam̐ dasavassiko;  
Āpattiṃ pana abyatto, āpajjati, na saṃsayo.

488. Tathūnadasavasso ca, ‘‘paṇḍitoha’’nti gaṇhati;  
Parisam, dasavasso no, sesamāpajjate ubho.
489. Kāle āpajjatāpattim, na juṇhe juṇhake katham;  
Āpajjati, na kālasmim, āpajjatūbhayatthapi?
490. Vassam anupagacchanto, kāle, no juṇhake pana;  
Āpajjatāpavārento, juṇhe, na pana kālake.
491. Avasesam tu paññatta-māpattimavipattinā;  
Kāle ceva ca juṇhe ca, āpajjati, na saṃsayo.
492. Vassūpagamaṇam kāle, no juṇhe, tu pavāraṇā;  
Juṇhe kappati, no kāle, sesam panubhayatthapi.
493. Atthāpatti tu hemante, na hotītarutudvaye;  
Gimheyeva na sesesu, vasse no itaradvaye.
494. Dine pālipadakkhāte, kattike puṇṇamāsiyā;  
Ṭhapitam tu vikappetvā, vassasāṭṭhikacīvaram.
495. Āpajjati ca hemante, nivāseti ca tam sace;  
Puṇṇamādivasasmīhi, kattikassa tu pacchime.
496. Tam apaccuddharitvāva, hemanteyeve, netare;  
Āpajjatīti niddiṭṭham, **kurundaṭṭhakathāya** tu.
497. ‘‘Atirekamāso =11 seso’’ti;  
Pariyesanto ca gimhike;  
Gimhe āpajjatāpattim;  
Na tvevitarutudvaye.
498. Vijjamāne sace naggo, vassasāṭṭhikacīvare;  
Ovassāpeti yo kāyam, vasse āpajjatīdha so.
499. Āpajjati hi saṅghova, na gaṇo na ca puggalo;  
Gaṇova na ca sesā hi, puggalova na cāpare.
500. Adhiṭṭhānaṇ karonto vā, pārissuddhiuposatham;  
Saṅgho vāpajjatāpattim, na gaṇo na ca puggalo.
501. Suttuddesamadhiṭṭhānaṇ, karonto vā uposatham;  
Gaṇo vāpajjatāpattim, na saṅgho na ca puggalo.
502. Suttuddesaṇ karonto vā, eko pana uposatham;  
Puggalopajjatāpattim, na ca saṅgho gaṇo na ca.
503. Āpajjati gilānova, nāgilāno katham pana;  
Āpajjatāgilānova, no gilāno ubhopi ca?
504. Bhesajjena panaññena, atthe sati ca yo pana;  
Viññāpeti tadaññaṇ so, āpajjati akallako.

505. Na bhesajjena atthepi, bhesajjaṃ viññāpeti ce;  
Āpajjatāgilānova, sesaṃ pana ubhopi ca.
506. Atthāpatti hi antova, na bahiddhā, tathā bahi;  
Āpajjati, na cevanto, atthāpattubhayatthapi.
507. Anupakhajja seyyaṃ tu, kappento pana kevalaṃ;  
Āpajjati panāpattiṃ, antoyeva ca, no bahi.
508. Ajjhokāse tu mañcādiṃ, santharivāna pakkamaṃ;  
Bahiyeva ca, no anto, sesaṃ panubhayatthapi.
509. Antosīmāyevāpattiṃ, bahisīmāya neva ca;  
Bahisīmāya, no anto-sīmāya, ubhayatthapi.
510. Sachattupāhano =12 bhikkhu, pavisanto tapodhano;  
Upacārasīmokkante, anto āpajjate pana.
511. Gamiko dārubhaṇḍādiṃ, paṭisāmanavattakaṃ;  
Apūretvāna gacchanto, upacārassatikkame.
512. Āpajjati panāpattiṃ, bahisīmāyayeva so;  
Sesamāpajjate anto-bahisīmāya sabbaso.

Tikakathā.

513. Sakavācāya āpanno, paravācāya sujjhati;  
Paravācāya āpanno, sakavācāya sujjhati.
514. Sakavācāya āpanno, sakavācāya sujjhati;  
Paravācāya āpanno, paravācāya sujjhati.
515. Vacīdvārikamāpattiṃ, āpanno sakavācato;  
Tiṇavatthāraṃ gantvā, paravācāya sujjhati.
516. Tathā appaṭinissagge, pāpikāya hi dīṭṭhiyā;  
Parassa kammavācāya, āpajjitvāna vajjataṃ.
517. Desento bhikkhuno mūle, sakavācāya sujjhati;  
Vacīdvārikamāpattiṃ, āpanno bhikkhusantike.
518. Desetvā taṃ visujjhanto, sakavācāya sujjhati;  
Saṅghādisesamāpattiṃ, yāvataṭṭhakaṃ pana.
519. Parassa kammavācāya, āpajjitvā tathā puna;  
Parassa parivāsādi-kammavācāya sujjhati.
520. Kāyenāpajjatāpattiṃ, vācāya ca visujjhati;  
Vācāyāpajjatāpattiṃ, kāyena ca visujjhati.
521. Kāyenāpajjatāpattiṃ, kāyeneva visujjhati;  
Vācāyāpajjatāpattiṃ, vācāyeva visujjhati.

522. Kāyadvārikamāpattiṃ, kāyenāpajjate, puna;  
Desento taṃ panāpattiṃ, vācāyeva visujjhati.
523. Vacīdvārikamāpattiṃ =13, āpajjitvāna vācato;  
Tiṇavatthāraḥantaṃ gantvā, kāyeneva visujjhati.
524. Kāyadvārikamāpattiṃ, āpajjitvāna kāyato;  
Tiṇavatthāraḥantaṃ gantvā, kāyeneva visujjhati.
525. Vacīdvārikamāpattiṃ, āpajjitvā tapodhano;  
Tameva pana desento, vācāyeva visujjhati.
526. Sutto āpajjatāpattiṃ, paṭibuddho visujjhati;  
Āpanno paṭibuddhova, sutto sujjhati so kathaṃ?
527. Sutto āpajjatāpattiṃ, suttoyeva visujjhati;  
Paṭibuddhova āpanno, paṭibuddho visujjhati?
528. Sagāraseyyakādiṃ tu, sutto āpajjate naro;  
Desento pana taṃ ñatvā, paṭibuddho visujjhati.
529. Āpajjitvāna jagganto, tiṇavatthāraḥantaṃ pana;  
Samathe tu sayantova, sutto vuṭṭhāti nāma so.
530. Sagāraseyyakādiṃ tu, sutto āpajjate naro;  
Sayanto tiṇavatthāre, suttoyeva visujjhati.
531. Āpajjitvā panāpattiṃ, jagganto pana kevalaṃ;  
Desento pana taṃ pacchā, paṭibuddho visujjhati.
532. Āpajjitvā acittova, sacittova visujjhati;  
Āpajjitvā sacittova, acittova visujjhati.
533. Āpajjitvā acittova, acittova visujjhati;  
Āpajjitvā sacittova, sacittova visujjhati.
534. Acitto, cittakāpattiṃ, āpajjitvā tapodhano;  
Pacchā taṃ pana desento, sacittova visujjhati.
535. Tathā sacittakāpattiṃ, āpajjitvā sacittako;  
Sayanto tiṇavatthāre, acittova visujjhati.
536. Evamevaṃ amissetvā, pacchimaṃ tu padadvayaṃ;  
Ettha vuttānusāreṇa, veditabbaṃ vibhāvinā.
537. Āpajjati =14 ca kammaṇa, akammaṇa visujjhati;  
Āpajjati akammaṇa, kammeneva visujjhati.
538. Kammenāpajjatāpattiṃ, kammeneva visujjhati;  
Āpajjati akammaṇa, akammaṇa visujjhati.
539. Accajaṃ pāpikaṃ diṭṭhiṃ, āpajjitvāna kammato;

- Desento pana taṃ pacchā, akammena visujjhati.
540. Visaṭṭhiādikāpattiṃ, āpajjivā akammato;  
Parisujjhati kammaena, parivāsādinā pana.
541. Samanubhāsaṇaṃ bhikkhu, āpajjati ca kammato;  
Parivāsādinā pacchā, kammeneva visujjhati.
542. Avasesaṃ panāpattiṃ, āpajjati akammato;  
Desento pana taṃ pacchā, akammeneva sujijjhati.
543. Sammukhāpattimāpanno, visujjhati asammukhā;  
Asammukhāpi āpanno, sammukhāva visujjhati.
544. Sammukhāpattimāpanno, sammukhāva visujjhati;  
Asammukhāva āpanno, visujjhati asammukhā.
545. Accajaṃ pāpakaṃ diṭṭhiṃ, āpanno saṅghasammukhe;  
Vuṭṭhānakāle saṅghena, kiñci kammaṃ na vijjati.
546. Visaṭṭhiādikāpattiṃ, āpajjivā asammukhā;  
Saṅghasammukhatoyeva, visujjhati na caññathā.
547. Samanubhāsaṇaṃ saṅgha-sammukhāpajjate, puna;  
Saṅghassa sammukhāyeva, visujjhati, na caññathā.
548. Musāvādādikaṃ sesaṃ, āpajjati asammukhā;  
Taṃ pacchā pana desento, visujjhati asammukhā.
549. Ajānantova āpanno, jānantova visujjhati;  
Jānanto pana āpanno, ajānantova visujjhati.
550. Ajānantova āpanno, ajānantova visujjhati;  
Jānanto pana āpanno, jānantova visujjhati.
551. Acittakacatukkena =15, sadisaṃ sabbathā idaṃ;  
Ajānantacatukkanti, veditabbaṃ vibhāvinā.
552. Āgantukova āpattiṃ, āpajjati, na cetaro;  
Āvāsikova āpattiṃ, āpajjati, na cetaro.
553. Āgantuko tathāvāsi-kopi āpajjare ubho;  
Atthāpatti ca sesaṃ tu, ubho nāpajjare pana.
554. Sachattupāhano ceva, sasīsaṃ pārutopi ca;  
Vihāraṃ pavisanto ca, vicarantopi tattha ca.
555. Āgantukova āpattiṃ, āpajjati, na cetaro;  
Āvāsavattamāvāsī, akarontova dosavā.
556. Na cevāgantuko, sesa-māpajjanti ubhopi ca;  
Asādhāraṇamāpattiṃ, nāpajjanti ubhopi ca.



557. Vatthunānattatā atthi, natthi āpattinānatā;  
Atthi āpattinānattam, natthi vatthussa nānatā.
558. Vatthunānattatā ceva, atthi āpattinānatā;  
Nevatthi vatthunānattam, no ca āpattinānatā.
559. Pārājīkacatukkassa, vatthunānattatā matā;  
Āpattinānatā natthi, sesāpattīsvayaṃ nayo.
560. Samaṇo samaṇī kāya-saṃsaggaṃ tu karonti ce;  
Saṅghādiseso bhikkhussa, bhikkhuniyā parājayo.
561. Evaṃ āpattinānattam, natthi vatthussa nānatā;  
Kāyassa pana saṃsaggo, ubhinnaṃ vatthu hoti hi.
562. Tatheva lasuṇassāpi, khādane bhikkhunī pana;  
Āpajjati hi pācittim, bhikkhuno hoti dukkaṭam.
563. Pārājīkānaṃ pana ce catunnaṃ;  
Saṅghādisesehi ca terasehi;  
Hoteva vatthussa ca nānabhāvo;  
Āpattiyā ceva hi nānabhāvo.
564. Pārājīkāni =16 cattāri, āpajjantānamekato;  
Bhikkhunīsamaṇānaṃ tu, ubhinnaṃ pana sabbaso.
565. Vatthussa natthi nānattam, natthi āpattinānatā;  
Visuṃ panāpajjantesu, ayameva vinicchayo.
566. Atthi vatthusabhāgattam, natthāpattisabhāgatā;  
Atthāpattisabhāgatā, natthi vatthusabhāgatā.
567. Atthi vatthusabhāgattam, atthāpattisabhāgatā;  
Natthi vatthusabhāgattam, natthāpattisabhāgatā.
568. Bhikkhūnaṃ bhikkhunīnaṃca, kāyasamsaggake sati;  
Atthi vatthusabhāgattam, natthāpattisabhāgatā.
569. Ādīto pana bhikkhussa, catūsvantimavatthusu;  
Siyāpattisabhāgattam, na ca vatthusabhāgatā.
570. Bhikkhūnaṃ bhikkhunīnaṃca, catūsvanti mavatthusu;  
Atthi vatthusabhāgattam, atthāpattisabhāgatā.
571. Sādhāraṇāsu sabbāsu, āpattīsvapyayaṃ nayo;  
Asādhāraṇāsu nevatthi, vatthāpattisabhāgatā.
572. Atthāpatti upajjhāye, neva saddhivihārike;  
Atthi saddhivihārasmiṃ, upajjhāye na vijjati.
573. Atthāpatti upajjhāye, tathā saddhivihārike;  
Nevāpatti upajjhāye, neva saddhivihārike.

574. Upajjhāyena kattabba-vattassākaṇe pana;  
Upajjhāyo phuse vajjaṃ, na ca saddhivihāriko.
575. Upajjhāyassa kattabba-vattassākaṇe pana;  
Natthāpatti upajjhāye, atthi saddhivihārike.
576. Sesam panidha āpattim, āpajjanti ubhopi ca;  
Asādhāraṇamāpattim, nāpajjanti ubhopi ca.
577. Ādiyanto garuṃ dosaṃ, payojento lahuṃ phuse;  
Ādiyanto lahuṃ dosaṃ, payojento garuṃ phuse.
578. Ādiyanto =17 payojento, garukeyeva tiṭṭhati;  
Ādiyanto payojento, lahukeyeva tiṭṭhati.
579. Pādaṃ vāpi tato uddhaṃ, ādiyanto garuṃ phuse;  
“Gaṇhā”ti ūnakaṃ pādaṃ, āṇāpento lahuṃ phuse.
580. Eteneva upāyena, sesakampi padattayaṃ;  
Atthasambhavatoyeva, vedītabbaṃ vibhāvinā.
581. Kāleyeva panāpatti, no vikāle kathaṃ siyā?  
Vikāleyeva āpatti, na ca kāle kathaṃ siyā?
582. Atthāpatti hi kāle ca, vikāle ca pakāsītā?  
Neva kāle vikāle ca, atthāpatti pakāsītā?
583. Pavāretvāna bhuñjanto, kāle anatirittakaṃ;  
Kāle āpajjatāpattim, na vikāleti dīpaye.
584. Vikālabhojanāpattim, vikāle na ca kālake;  
Sesaṃ kāle vikāle ca, āpajjati, na saṃsayo.
585. Asādhāraṇamāpattim, bhikkhunīnaṃ vasā pana;  
Nevāpajjati kālepi, no vikālepi sabbadā.
586. Kiṃ paṭiggahitaṃ kāle, no vikāle tu kappati?  
Vikāle kiñca no kāle, gahitaṃ pana kappati?
587. Kāle ceva vikāle ca, kiṃ nāma vada kappati?  
Neva kāle ca kiṃ nāma, no vikāle ca kappati?
588. Āmisam tu purebhattaṃ, paṭiggahitakaṃ pana;  
Kāleyeva tu bhikkhūnaṃ, no vikāle tu kappati.
589. Pānakaṃ tu vikālasmiṃ, paṭiggahitakaṃ pana;  
Vikāleyeva kāle ca, aparajju na kappati.
590. Sattāhakālīkañceva, catutthaṃ yāvajīvikaṃ;  
Kāle ceva vikāle ca, kappatīti viniddise.
591. Attano attano kāla-matītaṃ kālikattayaṃ;

- Mamsaṃ akappiyañceva, tathā uggahitampi ca.
592. Kuladūsanakammādiṃ =18, katvā uppannabhojanaṃ;  
Kāle ceva vikāle ca, na ca kappati bhikkhuno.
593. Paccantimesu desesu, āpajjati na majjhime;  
Majjhime pana desasmim, na ca paccantimesu hi.
594. Paccantimesu desesu, āpajjati ca majjhime;  
Paccantimesu desesu, nāpajjati na majjhime.
595. Sīmaṃ samudde bandhanto, bhikkhu paccantimesu hi;  
Āpajjati panāpattiṃ, na cāpajjati majjhime.
596. Gaṇena pañcavaggena, karonto upasampadaṃ;  
Cammattaraṇaṃ dhuvanhānaṃ, sagaṇaṅguṇupāhanaṃ.
597. Dhārento majjhime vajjaṃ, phuse paccantimesu no;  
Avasesaṃ panāpattiṃ, āpajjatūbhayatthapi.
598. Asādhāraṇāpattiṃ, bhikkhunīnaṃ vasā pana;  
Paccantimesu vā bhikkhu, nāpajjati na majjhime.
599. Paccantimesu desesu, kappate na ca majjhime;  
Kappate, majjhime dese, no ca paccantimesu hi.
600. Paccantimesu desesu, kappate, majjhimepi kiṃ?  
Paccantimesu cevāpi, kiṃ na kappati majjhime?
601. Paccantimesu desesu, vuttaṃ vatthu catubbidhaṃ;  
Niddise kappatī ceva, na ca kappati majjhime.
602. “Idaṃ catubbidhaṃ vatthu, desasmim pana majjhime;  
Na kappatī”ti vuttañhi, “majjhimeyeva kappati”.
603. Paccantimesu desesu, evaṃ vuttaṃ na kappati;  
Pañcaloṇādikaṃ sesaṃ, ubhayatthapi kappati.
604. Akappiyanti yaṃ nāma, paṭikkhittaṃ mahesinā;  
Ubhayatthapi taṃ sabbaṃ, na ca kappati bhikkhuno.
605. Anto āpajjatāpattiṃ, āpajjati ca, no bahi;  
Bahi āpajjatāpattiṃ, na ca anto kudācanaṃ.
606. Āpajjati =19 pananto ca, bahi cevubhayatthapi;  
Neva anto ca āpattiṃ, āpajjati ca, no bahi.
607. Anupakhajjaseyyādiṃ, antoyeva ca, no bahi;  
Saṅghikaṃ pana mañcādiṃ, ajjhokāse tu kiñcapi.
608. Nikkhipitvāna gacchanto, no anto, bahiyeva ca;  
Sesamāpajjatāpattiṃ, anto ceva tathā bahi.

609. Asādhāraṇamāpattiṃ, bhikkhunīnaṃ vasā pana;  
Nevāpajjati antopi, na bahiddhāpi sabbathā.
610. Gāme āpajjatāpattiṃ, no araññe kathaṃ vada?  
Āpajjati araññasmim, na ca gāme kathaṃ vada?
611. Āpajjati ca gāmepe, araññepe kathaṃ vada?  
Nevāpajjati gāmepe, no araññe kathaṃ vada?
612. Antaragharasamyuttā, sekkhapaññattiyo pana;  
Āpajjati hi taṃ bhikkhu, gāmasmim, no araññake.
613. Agaṇā aruṇaṃ nāma, uṭṭhāpentī ca bhikkhunī;  
Āpajjati panāpattiṃ, araññe, no ca gāmake.
614. Musāvādādīmāpattiṃ, āpajjatūbhayatthapi;  
Asādhāraṇamāpattiṃ, āpajjati na katthaci.
615. Āpajjati gilānova, nāgilāno kudācanaṃ;  
Agilānova āpattiṃ, phuse, no ca gilānako.
616. Agilāno gilāno ca, āpajjanti ubhopi ca;  
Nāpajjanti gilāno ca, agilāno ubhopi ca.
617. Bhesajjena panaññena, atthe sati ca yo pana;  
Viññāpeti tadaññaṃ so, āpajjati akallako.
618. Na bhesajjena atthepi, bhesajjaṃ viññāpeti ce;  
Āpajjatāgilānova, āpattiṃ lolamānaso.
619. Musāvādādikaṃ sesaṃ, āpajjanti ubhopi ca;  
Asādhāraṇamāpattiṃ, nāpajjanti ubhopi ca.

Catukkakathā.

620. Pañca =20 āpattiyo honti, musāvādassa kāraṇā;  
Pārājikaṃ gaṇaṃhulla-ccayaṃ pācitti dukkaṭaṃ.
621. Ānisaṃsā panuddiṭṭhā, pañceva kathinatthare;  
Anāmantāsamādāna-caraṇaṃ gaṇabhojanaṃ.
622. Yo tattha cīvaruppādo, so ca nesaṃ bhavissati;  
Cīvaraṃ yāvadatthañca, gahetumpi ca vaṭṭati.
623. Telaṃ pañcavidhaṃ vuttaṃ, nippapañcena satthunā;  
Vasā madhukaeraṇḍa-tilasāsapasambhavaṃ.
624. Acchamacchavasā ceva, susukā sūkarassa ca;  
Gadrabhassa vasā ceti, vasā pañcavidhā matā.
625. Mūlakhandhaggabījāni, phaḷubījañca paṇḍito;  
Pañcamāṃ bījabījanti, pañca bījāni dīpaye.

626. Phalaṃ samaṇakappehi, paribhuñjeyya pañcahi;  
Aggisatthanakhakkantaṃ, abhijubbaṭṭabījakaṃ.
627. Paṇṇuṇṇatiṇacoḷānaṃ, vākassa ca vasenidha;  
Bhisiyo bhāsita pañca, muninā mohanāsina.
628. Pavāraṇāpi pañceva, odanādīhi pañcahi;  
Paṭiggāhāpi pañceva, kāyādigahaṇena ca.
629. Pañcānisamsā vinayaññukasmim;  
Mahesinā kāruṇikena vuttā;  
Surakkhitaṃ hoti sakañca sīlaṃ;  
Kukkuccamaññassa nirākaroti.
630. Visārado bhāsati saṅghamajjhe;  
Sukhena niggaṇhati veribhikkhū;  
Dhammassa ceva ṭhitiyā pavatto;  
Tasmādaraṃ tattha kareyya dhīro.

Pañcakakathā.

631. Chavacchedanakā =21 vuttā, chaḷabhiññena tādina;  
Mañcapīṭhamatikkanta-pamāṇaṇca nisīdanaṃ.
632. Tathā kaṇḍupaṭicchādī, vassasāṭikacīvaraṃ;  
Cīvaraṃ sugatassāpi, cīvarena pamāṇakaṃ.
633. Chahākārehi āpattiṃ, āpajjati na aññathā;  
Alajjitāya aññāṇa-kukkuccehi tattheva ca.
634. Viparitāya saññāya, kappiyepi akappiye;  
Satisammosato ceva, āpajjati, na saṃsayo.
635. Chahi aṅgehi yuttana;  
Upasampādanā pana;  
Kātabbā, nissayo ceva;  
Dātabbo, sāmaṇerako.
636. Bhikkhunāpaṭṭhapetabbo, satataṃ dhammacakkhunā;  
Āpattiṃ pana jānāti, anāpattiṃ garuṃ lahuṃ.
637. Pātīmokkhāni vitthārā, ubhayāni panassa hi;  
Svāgatāni bhavanteva, suvibhattāni atthato.
638. Anubyañjanaso ceva, suttaso suvicchitā;  
Dasavassopi vā hotitirekadasavassiko.

Chakkakathā.

639. Satta sāmīciyo vuttā, satteva samathāpi ca;  
Paññattāpattiyo satta, sattabojjhaṅgadassinā.

## Sattakakathā.

640. Kulāni idha dūseti, ākārehi panaṭṭhahi;  
Pupphena ca phalenāpi, cuṇṇenapi ca dūsako.
641. Mattikādantakaṭṭhehi, veḷuyā vejjikāyapi;  
Jaṅghapesanikenāpi, ājīvasseva kāraṇā.
642. Aṭṭhevānatirittāpi, atirittāpi aṭṭha ca;  
Akappiyakataṃ cevāgahituccāritampi ca.
643. Kataṃ ahatthapāsepi, na ca bhuttāvinā kataṃ;  
Pavāritena yañceva, kataṃ bhuttāvināpi ca.
644. Āsanā vuṭṭhitenāpi, atirittakatampi ca;  
Avuttamalametanti, na gilānātirittakaṃ.
645. Ime aṭṭheva niddiṭṭhā, ñeyyā anatirittakā;  
Atirittā panetesam, paṭikkhepena dīpitā.
646. Sahapubbapayogesu, dukkaṭaṃ ñātañattisu;  
Durūpacinṇe āmāse, dukkaṭaṃ paṭisāvane.
647. Aṭṭhamaṃ pana niddiṭṭhaṃ, tathā vinayadukkaṭaṃ;  
Iti aṭṭhavidhaṃ hoti, sabbameva ca dukkaṭaṃ.
648. Ehibhikkhūpasampadā, saraṇagamanena ca;  
Pañhābyākaraṇovādā, garudhammapaṭiggaho.
649. Tathā ñatticatutthena, kammenevaṭṭhavācikā;  
Dūtena bhikkhunīnantī, aṭṭheva upasampadā.
650. Asaddhammā panaṭṭheva, niddiṭṭhā suddhadiṭṭhinā;  
Aṭṭhevuposathaṅgāni, veditabbāni viññunā.
651. Sakkāro ca asakkāro;  
Lābhālābho yasāyaso;  
Pāpicchā pāpamittattaṃ;  
Asaddhammā panaṭṭhime.
652. Pāṇaṃ na hane, na cādinnaṃ mādiye;  
Musā na bhāse, na ca majjapo siyā;  
Abrahmacariyā virameyya methunā;  
Rattiṃ na bhuñjeyya vikālabhojanaṃ.
653. Mālaṃ na dhāre, na ca gandhamācare;  
Mañce chamāyaṃva sayetha santhate;  
Etañhi aṭṭhaṅgikamāhuposathaṃ;  
Buddhena dukkhantaṅgā pakāsitaṃ.
654. Aṭṭheva pana pānāni, niddiṭṭhāni mahesinā;  
Bhikkhu aṭṭhaṅgasamṃyutto, bhikkhunovādamarahati.

## Aṭṭhakakathā.

655. Bhojanāni paṇīṭāni, nava vuttāni satthunā;  
Dukkaṭaṃ pana niddiṭṭhaṃ, nava maṃsāni khādato.
656. Pātimokkhassa uddesā, naveva paridīpitā;  
Uposathā navevettha, saṅgho navahi bhijjati.

## Navakakathā.

657. Dasa akkosavatthūni, dasa sikkhāpadāni ca;  
Akappiyāni maṃsāni, dasa sukkāni ve dasa.
658. Jāti nāmañca gottañca, kammaṃ sippañca rogaṭā;  
Liṅgāpatti kilesā ca, akkosena daseva hi.
659. Dasa ādīnavā rañño, antepurappavesane;  
Dasākārehi saṅghādi-seso channoti dīpito.
660. Dasa kammaṭṭhā puññā, apuññāpi tathā dasa;  
Daseva dānavatthūni, daseva ratanāni ca.
661. Annaṃ pānañca vatthañca, mālā gandhavilepanaṃ;  
Yānañca seyyāvasathaṃ, padīpeyyantime dasa.
662. Avandiyā munindena, dīpitā dasa puggalā;  
Daseva paṃsukūlāni, dasa cīvaradhāraṇā.
663. Sosānikaṃ pāpaṇikaṃ, tathā undūrakhāyitaṃ;  
Gokhāyitagginā daḍḍhaṃ, ajikūpacikakhāyitaṃ.
664. Thūpacīvarikañceva, tatheva abhisekiyaṃ;  
Gatapacchāgatañceti, dasadhā paṃsukūlikaṃ.
665. Sabbanīlādayo vuttā, dasa cīvaradhāraṇā;  
Cīvarāni navevettha, saddhiṃ saṃkaccikāya ca.

## Dasakakathā.

666. Ekādasa panābhabbā, puggalā paṇḍakādayo;  
Hontevānupasampannā, upasampādītāpi ca.
667. Pattā akappiyā vuttā, ekādasa bhavanti hi;  
Dārujena ca pattena, daseva ratanubbhavā.
668. Ekādasa tathā honti, pādukāpi akappiyā;  
Ekādaseva sīmāyo, asīmāti pakāsītā.
669. Atikhuddātimahantā, khaṇḍacchāyānimittakā;  
Animittā, bahiṭṭhena, sammatā, nadiyaṃ tathā.

670. Jātassare, samudde vā, sambhinnajjhotthaṭāpi ca;  
Sīmāyapi asīmāyo, ekādasa imā siyuṃ.
671. Ekādaseva pathavī, kappiyā ca akappiyā;  
Gaṇṭhikā kappiyā vuttā, ekādasa ca vīdhakā.
672. Ekādasavidhaṃ vuttaṃ, adhiṭṭhātabbacīvaram;  
Ticīvaram tathā kaṇḍu-paṭicchādī, nisīdanam.
673. Paccattharaṇam, vassika-sāṭhikā, mukhapuñchanam;  
Dakasāṭi, parikkhāra-coḷam, saṃkaccikāpi ca.
674. Yāvataiyakā sabbe, ekādasa pakāsītā;  
Ariṭṭho, caṇḍakālī ca, ukkhittassānuvattikā.
675. Aṭṭha saṅghādisesesu, ubhinnaṃ tu vasā pana;  
Ekādasa ime yāva-tatīyāti pakāsītā.
676. Nissayassa dasekāva, paṭippassaddhiyo pana;  
Chadhācariyato vuttā, upajjhāyā tu pañcadhā.

Ekādasakakathā.

677. Terasēva dhutaṅgāni, paramāni ca cuddasa;  
Soḷaseva tu ‘‘jāna’’nti, paññattāni mahesinā.
678. Sauttaram vinayavinicchayaṃ tu yo;  
Anuttaram sakalamapīdha jānati;  
Mahattare vinayanaye anuttare;  
Niruttaro bhavati hi so, na saṃsayo.

Ekuttaranayo samatto.

### Sedamocanakathā

679. Ito paraṃ pavakkhāmi, bhikkhūnaṃ suṇataṃ puna;  
Sedamocanagāthāyo, paṭubhāvakarā varā.
680. Ubbhakkhakaṃ vivajjetvā, adhonābhiṃ vivajjiya;  
Paṭicca methunaṃ dhammaṃ, kathaṃ pārājiko siyā?
681. Kabandhasattakāyassa, ure hoti mukhaṃ sace;  
Mukhena methunaṃ dhammaṃ, katvā pārājiko bhava.
682. Suññe nissattake dīpe, eko bhikkhu sace vase;  
Methunapaccayā tassa, kathaṃ pārājiko siyā?
683. Lambī vā mudupiṭṭhī vā, vaccamagge mukhepi vā;  
Aṅgajātaṃ pavesento, sake pārājiko bhava.
684. Sayam nādiyate kiñci, parañca na samādape;  
Saṃvidhānañca nevatthi, kathaṃ pārājiko siyā?



685. Suñkaghāte atikkante, nādiyanto parassa tu;  
Āṇattiñca vināyeva, hoti pārājiko yati.
686. Haranto garukaṃ bhaṇḍaṃ, theyyacittena puggalo;  
Parassa tu parikkhāraṃ, na ca pārājiko kathaṃ?
687. Tiracchānagatānaṃ tu, puggalo garubhaṇḍakaṃ;  
Gaṇhanto theyyacittena, na ca pārājiko siyā.
688. Attano santakaṃ datvā, bhikkhu pārājiko kathaṃ?  
“Maratū” ti asappāya-bhojanaṃ deti ce cuto.
689. Pitari pitusaññī ca, mātusaññī ca mātari;  
Hantvānantariyaṃ kammaṃ, na phuseyya kathaṃ naro?
690. Tiracchānagatā mātā, tiracchānagato pitā;  
Tasmānantariyaṃ natthi, māritesu ubhosupi.
691. Anādiyanto garukaṃ, parañca na samādape;  
Gacchaṃ ṭhito nisinno vā, kathaṃ pārājiko bhaṇa?
692. Manussuttarīke dhamme, katvāna katikaṃ tato;  
Sambhāvanādhippāyo so, atikkamati ce cuto.
693. Saṅghādisesā cattāro, bhavyeyyaṃ ekavattukā;  
Kathaṃ? Kathehi me puṭṭho, vinaye ce visārado.
694. Sañcarittañca duṭṭhullaṃ, saṃsaggaṃ attakāmatam;  
Itthiyā paṭipajjanto, phuseyya caturo ime.
695. Saṅghādisesamāpanno, chādetvā suciraṃ pana;  
Acaritvā yathāvuttaṃ, vattaṃ so vuṭṭhito kathaṃ?
696. Sikkavissatṭhimāpanno, bhikkhubhāve ṭhito pana;  
Parivatte tu liṅgasmim, natthi saṅghādisesatā.
697. Kuddho ārādhako hoti;  
Kuddho hoti ca nindito;  
Atha ko nāma so dhammo;  
Yena kuddho pasamsito?
698. Vaṇṇasmim bhaññamāne yo, titthiyānaṃ tu kujjhati;  
Ārādhako, sambuddhassa, yadi kujjhati nindito.
699. Atthaṅgate tu sūriye, bhojanaṃ bhikkhu bhujjati;  
Na khittacittonummatto, nirāpatti kathaṃ bhava?
700. Yo ca romanthayitvāna, rattiṃ ghasati bhojanaṃ;  
Natthi tassa panāpatti, vikālabhojanena hi.
701. Atthaṅgate ca sūriye, gahetvā bhikkhu bhojanaṃ;  
Sace bhujjeyya āpatti, anāpatti kathaṃ bhava?

702. Vikāluttarakuruṃ gantvā, tattha laddhāna bhojanam;  
Āgantvā idha kālena, natthi āpatti bhuñjato.
703. Gāme vā yadi vāraññe, yaṃ paresaṃ mamāyitaṃ;  
Na harantova taṃ theyyā, kathaṃ pārājiko siyā?
704. Theyyasaṃvāsako nāma, liṅgasamvāsathenako;  
Parabhaṇḍaṃ agaṇhanto, hoti esa parājito.
705. Nārī rūpavatī bālā, bhikkhu rattena cetasā;  
Methunaṃ tāya katvāpi, so na pārājiko kathaṃ?
706. Bhikkhu rūpavatiṃ nāriṃ, supinantaṃ passati;  
Tāya methunasamyoge, katepi na vinassati.
707. Ekissā dve siyumaṃ puttā, jātā idha panitthiyā;  
Dvinnamaṃ mātā pitā sāva, kathaṃ hoti bhaṇāhi me?
708. Ubhatobyañjanā itthī, gabbhaṃ gaṇhāti attanā;  
Gaṇhāpeti paraṃ gabbhaṃ, tasmā mātā pitā ca sā.
709. Purisena sahāgāre, raho vasati bhikkhunī;  
Parāmasati tassaṅgaṃ, anāpatti kathaṃ siyā?
710. Sahāgārikaseyyañca, sabbañca paṭijagganaṃ;  
Dāraḥassa ca mātā hi, kātuṃ labhati bhikkhunī.
711. Ko ca bhikkhūhi sikkhāsu, asādhāraṇataṃ gato;  
Na pārivāsiko brūhi, na ukkhittādikopi ca?
712. Gahetuṃ khurabhaṇḍaṃ tu, sace nhāpitapubbako;  
Na so labhati aññesaṃ, kappatīti ca niddise.
713. Katheti kusalaṃ dhammaṃ, paramaṃ atthasaṃhitam;  
Katamo puggalo brūhi, na mato na ca jīvati?
714. Katheti kusalaṃ dhammaṃ, paramaṃ atthasaṃhitam;  
Hoti nimmitabuddho so, na mato na ca jīvati.
715. Saṃyācikaṃ karontassa, kuṭiṃ desitavatthukaṃ;  
Pamaṇikamanārambhaṃ, āpatti sapaṇikkamaṃ.
716. Naro karoti ce kuṭiṃ, sa sabbamattikāmayam;  
Na muccateva vajjato, jinena vuttato tato.
717. Saṃyācikāya bhikkhussa, anāpatti kathaṃ siyā;  
Sabbalakkhaṇahīnaṃ tu, karontassa kuṭiṃ pana?
718. Saṃyācikaṃ karontassa, tiṇacchadanakaṃ kuṭiṃ;  
Bhikkhuno jinacandena, anāpatti pakāsītā.
719. Na kāyikaṃ kañci payogamācare;

Na kiñci vācāya paraṃ bhaṇeyya;  
Phuse garuṃ antimavatthuhetukaṃ;  
Visārado ce vinaye bhaṇāhi tvaṃ?

720. Parassā pana yā vajjaṃ, paṭicchādeti bhikkhunī;  
Ayaṃ pārājikāpattiṃ, tannimittaṃ garuṃ phuse.
721. Na kāyikaṃ kiñcipi pāpamācare;  
Na kiñci vācāya careyya pāpakaṃ;  
Sunāsito yeva ca nāsito siyā;  
Kathaṃ tvaṃ brūhi mayāsi pucchito?
722. Abhabbā pana ye vuttā, puggalā paṇḍakādayo;  
Ekādasa munindena, nāsitā te sunāsitā.
723. Anuggiraṃ giraṃ kiñci, subhaṃ vā yadi vāsubhaṃ;  
Phuse vācasikaṃ vajjaṃ, kathaṃ me pucchito bhaṇa?
724. Santimeva panāpattiṃ, bhikkhu nāvikareyya yo;  
Sampajānamusāvāde, dukkaṭaṃ tassa vaṇṇitaṃ.
725. Ekatoupasampannā, ubho tāsāṃ tu hatthato;  
Cīvaraṃ gaṇhato honti, nānāpattiyo kathaṃ?
726. Ekatoupasampannā, bhikkhūnaṃ tu vasena yā;  
Cīvaraṃ hatthato tassā, pācitti paṭigaṇhato.
727. Ekatoupasampannā, bhikkhunīnaṃ vasena yā;  
Cīvaraṃ hatthato tassā, dukkaṭaṃ paṭigaṇhato.
728. Saṃvidhāya ca cattāro, garuṃ theniṃsu bhaṇḍakaṃ;  
Thero thullaccayaṃ tesu, patto, sesā parājayaṃ.
729. Kathaṃ? Chamāsakaṃ bhaṇḍaṃ, tattha sāhatthikā tayo;  
Haṭṭā therena māsā tu, tayo āṇattiyāpi ca.
730. Tīhi sāhatthikokeko;  
Pañca āṇattiyā haṭṭā;  
Tasmā thullaccayaṃ thero;  
Patto, sesā parājayaṃ.
731. Bahiddhā gehato bhikkhu, itthī gabbhantaraṃ gatā;  
Chiddaṃ gehassa no atthi, methunapaccayā cuto.
732. Antodussakuṭiṭṭhena, mātugāmena methunaṃ;  
Santhatādivaseneva, katvā hoti parājito.
733. Sappiādiṃ tu bhesajjaṃ, gahetvā sāmameva taṃ;  
Avītivatte sattāhe, kathaṃ āpatti sevato?
734. Parivattalingassa, bhikkhuno itarāya vā;  
Avītivatte sattāhe, hoti āpatti sevato.

735. Nissaggiyena pācitti, suddhapācittiyampi ca;  
Ekatova kathaṃ bhikkhu, āpajjeyya bhaṇāhi me?
736. Saṅghe pariṇataṃ lābhaṃ, attano ca parassa ca;  
Ekato pariṇāmento, payogena dvayaṃ phuse.
737. Bhikkhū samāgamma samaggasaññā;  
Sabbe kareyyuṃ pana saṅghakammaṃ;  
Bhikkhuṭṭhito dvādasayojanasmim;  
Kathaṃ kataṃ kuppati vaggahetu?
738. Atthi sace pana bhikkhu nisinno;  
Dvādasayojanike nagare tu;  
Tattha kataṃ pana kammamakammaṃ;  
Natthi vihāragatā yadi sīmā.
739. Saṅghāṭi pārutā kāye, nivatthontaravāsako;  
Nissaggiyāni sabbāni, kathaṃ honti kathehi me?
740. Kaṇṇaṃ gahetvā tattheva, kaddamaṃ yadi dhovati;  
Bhikkhunī kāyaṅgāneva, tāni nissaggiyāni hi.
741. Purisaṃ apitaraṃ hantvā, itthiṃ hantvā amātaraṃ;  
Ānantariyakaṃ kammaṃ, āpajjati kathaṃ naro?
742. Parivatte tu liṅgasmim, pitaraṃ itthitaṃ gataṃ;  
Mātaraṃ purisattaṃ tu, gataṃ hantvā garuṃ phuse.
743. Mātaraṃ pana māretvā, māretvā pitarampi ca;  
Ānantariyakaṃ kammaṃ, nāpajjeyya kathaṃ naro?
744. Tiracchānagatā mātā, tiracchānagato pitā;  
Mātaraṃ pitaraṃ hantvā, nānantariyakaṃ phuse.
745. Codetvā sammukhībhūtaṃ, saṅgho kammaṃ kareyya ce;  
Kathaṃ kammaṃ akammaṃ taṃ, saṅgho sāpattiko siyā?
746. Vuttaṃ tu paṇḍakādīnaṃ, sandhāya upasampadaṃ;  
Anāpattissa kammaṃ tu, sandhāyāti **kurundiyam**.
747. Kappabindukataṃ rattaṃ, cīvaraṃ tu adhiṭṭhitaṃ;  
Kathamassa siyāpatti, sevamānassa dukkaṭaṃ?
748. Sakaṃ anissajitvāna, yo nissaggiyacīvaraṃ;  
Paribhuñjati tassāya-māpatti paridīpitā.
749. Pañca pācittiyāneva, nānavatthukatāni hi;  
Apubbaṃ acarimaṃ eka-kkhaṇe āpajjate kathaṃ?
750. Bhesajjāni hi pañceva, gahetvā bhājane visuṃ;  
Ṭhapitesu ca sattāhā-tikkame honti pañcapi.

751. Na rattacitto na ca theyyacitto;  
Na cāpi cittaṃ marañāya tassa;  
Dentassa pārājikamāha satthā;  
Thullaccayaṃ taṃ paṭigaṇhatopi.
752. Salākaṃ saṅghabhedāya, padentassa parājayo;  
Hoti thullaccayaṃ tassa, salākaṃ paṭigaṇhato.
753. Ekattha nikkhipitvāna, cīvaraṃ addhajojane;  
Aruṇaṃ utthāpentassa, anāpatti kathaṃ siyā?
754. Suppatiṭṭhitanirodha-sadise rukkhamūlake;  
Anāpatti hi so rukkho, hoti ekakulassa ce.
755. Kathaṃ āpattiyo nānā-;  
Vatthukāyo hi kāyikā;  
Apubbaṃ acarimaṃ eka-;  
Kkhaṇe sambahulā phuse?
756. Nānithīnaṃ tu kese vā, tāsaṃ aṅgulyopi vā;  
Ekato gahaṇe tassa, honti sambahulā pana.
757. Kathaṃ vācasikā nānā-vatthukāyo na kāyikā;  
Apubbaṃ acarimaṃ eka-kkhaṇe āpattiyo phuse?
758. Duṭṭhullaṃ yo vadati ca vācaṃ;  
“Sabbā tumhe sikharaṇiyo”ti;  
Vuttā dosā vinayanasatthe;  
Tassithīnaṃ gaṇanavasena.
759. Itthiyā purisenāpi, paṇḍakena nimittake;  
Methunaṃ na ca sevanto, methunappaccayā cuto?
760. Methune pubbabhāgaṃ tu, kāyasamsaggataṃ gatā;  
Methunappaccayā chejjaṃ, āpannā aṭṭhavatthukaṃ.
761. Mātaraṃ cīvaraṃ yāce, saṅghe pariṇataṃ na ca;  
Kenassa hoti āpatti, anāpatti ca ñātake?
762. Vassasāṭikalābhatthaṃ, samaye piṭṭhisaññite;  
Siyāpatti satuppādaṃ, karoto mātarampi ca.
763. Saṅghādisesamāpattiṃ, pācittiṃ dukkaṭaṃ kathaṃ;  
Pāṭidesaniyaṃ thulla-ccayaṃ ekakkhaṇe phuse?
764. Avassutāvassutahatthato hi;  
Piṇḍaṃ gahetvā lasuṇaṃ paṇītaṃ;  
Manussamaṃsaṅca akappamaññaṃ;  
Sabbekato khādati, honti tassā.
765. Eko upajjhāyakapuggaleko;  
Ācariyako dvepi ca puṇṇavassā;

- Ekāva tesam̐ pana kammavācā;  
Ekassa kammaṃ tu na rūhate kiṃ?
766. Kesaggamattampi mahiddhikesu;  
Ākāsago hoti sace paneko;  
Katampi taṃ rūhati neva kammaṃ;  
Ākāsagasseva, na bhūmigassa.
767. Saṅghenapi hi ākāse, ṭhitena pana iddhiyā;  
Bhūmigassa na kātabbaṃ, karoti yadi kuppati.
768. Na ca kappakataṃ vatthaṃ, na ca rattaṃ akappiyaṃ;  
Nivatthassa panāpatti, anāpatti kathaṃ siyā?
769. Acchinnacīvarassettha, bhikkhussa pana kiñcīpi;  
Na cassākappiyaṃ nāma, cīvaraṃ pana vijjati.
770. Na kutopi ca gaṇhati kiñci have;  
Na tu deti ca kiñcīpi bhojanato;  
Garukaṃ pana vajjamupeti kathaṃ;  
Vada me vinaye kusalosi yadi?
771. Ādāya yaṃ kiñci avassutamhā;  
Uyyojitā bhuñjati bhojanañce;  
Uyyojitā yā pana yāya tassā;  
Saṅghādisesaṃ kathayanti dhīrā.
772. Kassaci kiñci na deti sahatthā;  
Neva ca gaṇhati kiñci kutoci;  
Vajjamupeti lahuṃ, na garuṃ tu;  
Brūhi kathaṃ yadi bujjhasi sādhu?
773. Dantaponodakānaṃ tu, gahaṇe pana bhikkhunī;  
Uyyojentī lahuṃ vajjaṃ, āpajjati nisevite.
774. Āpajjati panāpattiṃ, garukaṃ sāvasesakaṃ;  
Chādeti, na phuse vajjaṃ, kathaṃ jānāsi me vada?
775. Saṅghādisesamāpattiṃ, āpajjitvā anādaro;  
Chādentopi tamāpattiṃ, nāññaṃ ukkhittako phuse.
776. Sappāṇappāṇajaṃ neva, jaṅgamaṃ na vihaṅgamaṃ;  
Dvijam̐ kantamakantañca, sace jānāsi me vada?
777. Sappāṇappāṇajo vutto;  
Cittajo utujopi ca;  
Dvīheva pana jātattā;  
Mato saddo dvijoti hi.
778. Vinaye anayūparame parame;  
Sujanassa sukhānayane nayane;  
Paṭu hoti padhānarato na rato;

Idha yo pana sāramate ramate.

Sedamocanagāthāyo samattā.

### Sādhāraṇāsādhāraṇakathā

779. Sabbasikkhāpadānāhaṃ, nidānaṃ gaṇanampi ca;  
Bhikkhūhi bhikkhunīnañca, bhikkhūnaṃ bhikkhunīhi ca.
780. Asādhāraṇapaññattaṃ, tathā sādhāraṇampi ca;  
Pavakkhāmi samāsenā, taṃ suṇātha samāhitā.
781. Nidānaṃ nāma vesālī, tathā rājagahaṃ puraṃ;  
Sāvattahāḷavi kosambī, sakkabhaggā pakāsītā.
782. Kati vesāliyā vuttā, kati rājagahe katā?  
Kati sāvatthipaññattā, kati āḷaviyaṃ katā?
783. Kati kosambipaññattā, kati sakkesu bhāsītā?  
Kati bhaggesu paññattā, taṃ me akkhāhi pucchito?
784. Dasa vesāliyā vuttā, ekavīsa giribbaje;  
Chaūnāni satāneva, tīṇi sāvattthiyaṃ katā.
785. Cha panāḷaviyaṃ vuttā, aṭṭha kosambiyaṃ katā;  
Aṭṭha sakkesu paññattā, tayo bhaggesu dīpitā.
786. Methunaṃ viggaho ceva, catutthantimavattthukaṃ;  
Atirekacīvaraṃ suddha-kāḷakeḷakalomakaṃ.
787. Bhūtaṃ paramparañceva, mukhadvāramacelako;  
Bhikkhunīsu ca akkoso, dasa vesāliyaṃ katā.
788. Dutiyantimavattthuñca, dve anuddhaṃsanāni ca;  
Saṅghabhedā duve ceva, cīvarassa paṭiggaho.
789. Rūpiyaṃ suttaviññatti, tathā ujjhāpanampi ca;  
Paripācitapiṇḍo ca, tatheva gaṇabhojanaṃ.
790. Vikālabhojanañceva, cārittaṃ nhānameva ca;  
Ūnavīsativassañca, datvā saṅghena cīvaraṃ.
791. Vosāsantī ca naccam vā, gītam vā cārikadvayaṃ;  
Chandadānenime rāja-gahasmiṃ ekavīsati.
792. Kuṭi kosiyaseyyañca, pathavībhūtagāmaṃ;  
Sappāṇakañca siñcanti, ete chāḷaviyaṃ katā.
793. Mahallakavīhāro ca, dovacassaṃ tatheva ca;  
Aññenaññaṃ tathā dvāra-kosā majjhañca pañcamam.

794. Anādariyaṃ sahadhammo, payopānañca sekhiye;  
Kosambiyaṃ tu paññattā, aṭṭhime suddhadiṭṭhinā.
795. Dhovaneḷakalomāni, patto ca dutiyo pana;  
Ovādopi ca bhesajjaṃ, sūci āraññakesu ca.
796. Udakasuddhikañceva, ovādāgamanampi ca;  
Pure kapilavatthusmiṃ, paññattā pana aṭṭhime.
797. Jotiṃ samādahitvāna, sāmisenā sasiṭṭhakaṃ;  
Ime bhaggesu paññattā, tayo ādiccabandhunā.
798. Pārājikāni cattāri, garukā soḷasā, duve;  
Aniyatā, catuttiṃsa, honti nissaggiyāni hi.
799. Chappaṇṇāsasatañceva, khuddakāni bhavanti hi;  
Daseva pana gārayhā, dvesattati ca sekhiyā.
800. Chaūnāni ca tīṇeva, satāni samacetasā;  
Ime vuttāvasesā hi, sabbe sāvatthiyaṃ katā.
801. Pārājikāni cattāri, satta saṅghādisesakā;  
Nissaggiyāni aṭṭheva, dvattiṃseva ca khuddakā.
802. Dve gārayhā, tayo sekhā, chappaññāseva sabbaso;  
Bhavanti chasu paññattā, nāgaresu ca piṇḍitā.
803. Sabbāneva panetāni, nāgaresu ca sattasu;  
Aḍḍhuḍḍhāni satāneva, paññattāni bhavanti hi.
804. Sikkhāpadāni bhikkhūnaṃ, vīsañca dve satāni ca;  
Bhikkhunīnaṃ tu cattāri, tathā tīṇi satāni ca.
805. Pārājikāni cattāri, garukā pana terasa;  
Aniyatā duve vuttā, tiṃsa nissaggiyāni ca.
806. Khuddakā navuti dve ca, cattāro pāṭidesanā;  
Nippapañcena niddiṭṭhā, pañcasattati sekhiyā.
807. Dve satāni ca vīsañca, vasā bhikkhūnameva ca;  
Sikkhāpadāni uddesamāgacchanti uposathe.
808. Pārājikāni aṭṭheva, garukā dasa satta ca;  
Nissaggiyāni tiṃseva, chasaṭṭhi ca satampi ca.
809. Khuddakānaṭṭha gārayhā, pañcasattati sekhiyā;  
Sabbāni pana cattāri, tathā tīṇi satāni ca.
810. Bhavanti pana etāni, bhikkhunīnaṃ vasā pana;  
Sikkhāpadāni uddesamāgacchanti uposathe.
811. Chacattālīsa honteva, bhikkhūnaṃ bhikkhunīhi tu;



Asādhāraṇabhāvaṃ tu, gamitāni mahesinā.

- 812.** Cha ca saṅghādisesā ca, tathā aniyatā duve;  
Dvādaseva ca nissaggā, dvāvīsati ca khuddakā.
- 813.** Cattāropi ca gārayhā, chacattālīsa hontime;  
Bhikkhūnaṃyeva paññattā, gotamena yasassinā.
- 814.** Visatṭhi kāyasamsaggo, duṭṭhullaṃ attakāmatā;  
Kuṭi ceva vihāro ca, chaḷete garukā siyuṃ.
- 815.** Nissaggiyādivaggasmim, dhovanañca paṭiggaho;  
Eḷakalomavaggepi, ādito pana satta ca.
- 816.** Tatiyepi ca vaggasmim, patto ca paṭhamo tathā;  
Vassasāṭīkamārañña-miti dvādasa dīpitā.
- 817.** Pācittiyāni vuttāni, sabbāni gaṇanāvasā;  
Bhikkhūnaṃ bhikkhunīnañca, aṭṭhāsītisatam, tato.
- 818.** Sabbo bhikkhunivaggopi, saparamparabhojano;  
Tathā anatiritto ca, abhihaṭṭhuṃ pavāraṇā.
- 819.** Paṇītabhojanaviññatti, tathevācelakopi ca;  
Nimantito sabhatto ca, duṭṭhullacchādanampi ca.
- 820.** Ūnavīsativassaṃ tu, mātugāmena saddhipi;  
Antepurappaveso ca, vassasāṭi nisīdanaṃ.
- 821.** Khuddakāni panetāni, dvāvīsati bhavanti hi;  
Cattāro pana gārayhā, bhikkhūnaṃ pātimokkhake.
- 822.** Ekato pana paññattā, chacattālīsa hontime;  
Bhikkhunīhi tu bhikkhūnaṃ, asādhāraṇataṃ gatā.
- 823.** Bhikkhūhi bhikkhunīnañca, sataṃ tiṃsa bhavanti hi;  
Asādhāraṇabhāvaṃ tu, gamitāni mahesinā.
- 824.** Pārājīkāni cattāri, dasa saṅghādisesakā;  
Dvādaseva ca nissaggā, khuddakā navuticcha ca.
- 825.** Aṭṭheva pana gārayhā, sataṃ tiṃsa bhavantime;  
Bhikkhunīnañca bhikkhūhi, asādhāraṇataṃ gatā.
- 826.** Bhikkhunīnaṃ tu saṅghādi-sesehi cha panādito;  
Yāvatiyakā ceva, cattāroti ime dasa.
- 827.** Akālacīvarañceva, tathā acchinnacīvaraṃ;  
Sattaññadatthikādīni, patto ceva garuṃ lahuṃ.
- 828.** Dvādaseva panetāni, bhikkhunīnaṃ vasenidha;  
Nissaggiyāni sathārā, paññattāni panekato.

829. Asādhāraṇapaññattā, khuddakā navuticcha ca;  
Gārayhā ca panaṭṭhāti, sabbeva gaṇanāvasā.
830. Bhikkhunīnaṃ tu bhikkhūhi, asādhāraṇataṃ gatā;  
Ekatoyeva paññattā, sataṃ tiṃsa bhavanti hi.
831. Asādhāraṇubhinnaṃpi, sataṃ sattati caccha ca;  
Pārājikāni cattāri, garukā ca dasaccha ca.
832. Aniyatā duve ceva, nissaggā catuvīsati;  
Sataṃ aṭṭhārasevettha, khuddakā paridīpitā.
833. Dvādaseva ca gārayhā, sataṃ sattati caccha ca;  
Asādhāraṇubhinnaṃpi, imeti paridīpitā.
834. Sādhāraṇā ubhinnaṃpi, paññattā pana satthunā;  
Sataṃ sattati cattāri, bhavantīti pakāsītā.
835. Pārājikāni cattāri, satta saṅghādisesakā;  
Aṭṭhārasa ca nissaggā, samasattati khuddakā.
836. Pañcasattati paññattā, sekhiyāpi ca sabbaso;  
Sataṃ sattati cattāri, ubhinnaṃ samasikkhatā.

Sādhāraṇāsādhāraṇakathā.

### Lakkhaṇakathā

837. Ito paraṃ pavakkhāmi, lakkhaṇaṃ pana sabbagaṃ;  
Savane sādaraṃ katvā, vadato me nibodhatha.
838. Nīdānaṃ puggalo vatthu, paññattavidhimeva ca;  
Vipattāpattanāpatti, āṇattāṅgakiriyāpi ca.
839. Saññācittasamuṭṭhānaṃ, vajjakammaṃpabhedakaṃ;  
Tikadvayanti sabbattha, yojetabbamidaṃ pana.
840. Pubbe vuttanayaṃ yañca, yañca uttānamevidha;  
Taṃ sabbamaṃ pana vajjetvā, karissāmatthajotanaṃ.
841. **Puggalo** nāma yaṃ yaṃ tu, bhikkhumārabbha bhikkhuniṃ;  
Sikkhāpadaṃ tu paññattaṃ, ayaṃ vuccati puggalo.
842. Tevīsatividhā te ca, sudinnadhaniyādayo;  
Bhikkhūnaṃ pātimokkhasmiṃ, ādikammikapuggalā.
843. Bhikkhunīnaṃ tathā pāti-mokkhasmiṃ ādikammikā;  
Thullanandādayo satta, sabbe tiṃsa bhavanti hi.
844. **Vatthūti** puggalasseva, tassa tassa ca sabbaso;  
Vatthuno tassa tasseva, ajjhācāro pavuccati.

845. Kevalā pana **paññatti**, mūlabhūtā tatheva sā;  
Anvanuppannasabbattha-padesapadapubbikā.
846. Sādhāraṇā ca paññatti, tathāsādhāraṇāpi ca;  
Ekatoubhatopubbā, evaṃ navavidhā siyā.
847. Tattha “yo methunaṃ dhammaṃ, paṭiseveyya bhikkhu”’ti;  
“Adinnaṃ ādiyeyyā”’ti, paññatticcevamādikā.
848. Hoti “antamaso bhikkhu, tiracchānagatāyapi”’;  
Iccevamādikā sabbā, **anupaññatti** dīpitā.
849. Tathānuppannapaññatti, anuppanne tu vajjake;  
Aṭṭhannaṃ garudhammaṃ, vasenevāgatā hi sā.
850. Cammattharaṇakañceva, sakuṇṇaṅguṇupāhanaṃ;  
Tatheva ca dhuvanāhānaṃ, pañcavaggūpasampadā.
851. Esā **padesapaññatti**, nāmāti hi catubbidhā;  
Vuttā majjhimadesasmiṃ-yeva hoti, na aññato.
852. Ito sesā hi **sabbattha-paññattī** pakāsītā;  
Atthato ekamevettha, sādharmaṇadukādikaṃ.
853. **Sāñattikā** panāpatti, hoti **nāñattikā**pi ca;  
**Āñattī** ca nāmesā, ñeyyā āṇāpanā pana.
854. Āpattīnaṃ tu sabbāsaṃ, sabbasikkhāpadesupi;  
Sabbo panaṅgabhedo hi, viññātabbo vibhāvinā.
855. Kāyēnapi ca vācāya, yā karontassa jāyate;  
Ayaṃ **kriyasamuṭṭhānā**, nāma pārājikā viya.
856. Kāyavācāhi kattabbaṃ, akarontassa hoti yā;  
Sā **cākriyasamuṭṭhānā**, paṭhame kathine viya.
857. Karontassākarontassa, bhikkhuno hoti yā pana;  
Sā **kriyākriyato** hoti, cīvaraggahaṇe viya.
858. Siyā pana karontassa, akarontassa yā siyā;  
Sā **kriyākriyato** hoti, rūpiyuggahaṇe viya.
859. Tathā siyā karontassa;  
Yā karoto akubbato;  
Siyā kiriyato ceva;  
Sā **kriyākriyatopī** ca.
860. Sabbā cāpattiyo saññā-;  
Vasena duvidhā siyuṃ;  
Saññāvimokkhā nosaññā-;  
Vimokkhāti pakāsītā.

861. Vītikkamanasaññāya, abhāvena yato pana;  
Vimuccati ayam **saññā-vimokkhā**ti pakāsītā.
862. Itarā pana **nosaññā-vimokkhā**ti pakāsītā;  
Puna sabbāva cittassa, vasena duvidhā siyuṃ.
863. Sacittakā acittāti, sucittena pakāsītā;  
Sacittakasamuṭṭhāna-vasena pana yā siyā.
864. Ayam **sacittakā** nāma, āpatti paridīpitā;  
Sacittakehi vā missa-vasenāyama**sacittakā**.
865. Sabbā cāpattiyo vajja-vasena duvidhā rutā;  
Suvijjenānavajjena, lokapaṇṇattivajjato.
866. Yassā sacittake pakkhe, cittaṃ akusalaṃ siyā;  
**Lokavajjā**ti nāmāyaṃ, sesā **paṇṇattivajjakā**.
867. Sabbā cāpattiyo kamma-vasena tividhā siyuṃ;  
**Kāyakammaṃ vacīkammaṃ**, tathā tadubhayampi ca.
868. **Tikadvayanti** nāmetaṃ, kusalāditikadvayaṃ;  
Kusalākusalacitto vā, tathābyākatamānaso.
869. Hutvā āpajjatāpattiṃ, āpajjanto na aññathā;  
Sukhavedanāsamaṅgī vā, tathā dukkhādisaṃyuto.
870. Idaṃ tu lakkhaṇaṃ vuttaṃ, sabbasikkhāpadesupi;  
Yojetvā pana dasseyya, vinayasmaṃ visārado.
871. Taruṃ timūlaṃ navapattamenam;  
Catussikhaṃ sattaphalaṃ chapupphaṃ;  
Jānāti yo dvippabhavaṃ dvisākhāṃ;  
Jānāti paññattimasesato so.
872. Imamuttaraṃ gatamanuttaratam;  
Pariyāpuṇāti paripucchati yo;  
Upayātanuttaratamuttarato;  
Sa ca kāyavācavinaye vinaye.

Lakkhaṇakathā.

873. Soḷasaparivārassa, parivārassa sabbaso;  
Ito paraṃ pavakkhāmi, sabbasaṅkalanam nayam.
874. Kati āpattiyo vuttā;  
Kāyikā, vācasikā kati?  
Chādentassa katāpattī;  
Kati saṃsaggapaccayā?
875. Kāyikā chabbidhāpatti, tathā vācasikāpi ca;  
Chādentassa ca tissova, pañca saṃsaggapaccayā.

876. Kati āpattimūlāni, paññattāni mahesinā?  
Kati āpattiyo vuttā, duṭṭhullacchādane pana?
877. Dve panāpattimūlāni, kāyo vācā bhavanti hi;  
Pārājikā ca pācitti, duṭṭhullacchādane siyuṃ.
878. Kati gāmantare vuttā, nadīpāre tathā kati?  
Kati thullaccayaṃ maṃse, kati maṃsesu dukkaṭaṃ?
879. Gāmantare catassova, nadīpārepi tattakā;  
Thullaccayaṃ manussānaṃ, maṃse, navasu dukkaṭaṃ.
880. Bhikkhu bhikkhuniyā saddhiṃ, saṃvidhāti ca dukkaṭaṃ;  
Pācittaññassa gāmassa, upacārokkame siyā.
881. Thullaccayaṃ parikkhitte, gāmasmiṃ paṭhame pade;  
Garukaṃ dutiye tassā, gāmantaraṃ vajantiyā.
882. Tathā bhikkhuniyā saddhiṃ, saṃvidhāne tu dukkaṭaṃ;  
Abhirūhati nāvaṃ ce, hoti pācitti bhikkhuno.
883. Nadiyuttaraṇe kāle, pāde thullaccayaṃ phuse;  
Paṭhame, dutiye tassā, hoti bhikkhuniyā garuṃ.
884. Kati vācasikā rattim, kati vācasikā divā?  
Duve vācasikā rattim, duve vācasikā divā.
885. Rattandhakāre purisena saddhiṃ;  
Ṭhitā adīpe pana hatthapāse;  
Pācitti tassā yadi sallapeyya;  
Vadeyya ce dukkaṭameva dūre.
886. Channe divā yā purisena saddhiṃ;  
Ṭhitā vadeyyassa ca hatthapāse;  
Pācitti, hitvā pana hatthapāsaṃ;  
Vadeyya ce dukkaṭameva tassā.
887. Kati vā dadamānassa, kati vā paṭigaṇhato?  
Dadamānassa tissova, catassova paṭiggahe.
888. Manussassa visaṃ deti, sace marati tena so;  
Hoti pārājikaṃ, yakkhe, pete thullaccayaṃ mataṃ.
889. Tiracchānagate tena, mate pācittiyaṃ siyā;  
Tathā pācitti aññāti-kāya ce deti cīvaraṃ.
890. Hatthagāhe tathā veṇi-gāhe saṅghādisatā;  
Mukhena aṅgajātassa, gahaṇe tu parājayo.
891. Aññātikāya hatthamhā, cīvarassa paṭiggahe;  
Sanissaggā ca pācitti, hotīti pariyāputā.

892. Avassutassa hatthamhā, sayam vāpi avassutā;  
Hoti thullaccayaṃ tassā, bhojanaṃ paṭigaṇhato.
893. Kati ñatticatutthena, vuttā sammutiyo idha?  
Ekā eva panuddiṭṭhā, bhikkhunovādasammuti.
894. Kati dhaññarasā vuttā, vikāle kappiyā pana?  
Loṇasovīrakaṃ ekaṃ, vikāle kappiyaṃ mataṃ.
895. Kati pārājikā kāyā, kati saṃvāsabhūmiyo?  
Ratticchedo katīnaṃ tu, paññattā dvaṅgulā kati?
896. Pārājikāni kāyamhā, dve dve saṃvāsabhūmiyo;  
Ratticchedo duvinnam tu, paññattā dvaṅgulā duve.
897. Paṭhamantimavatthuñca, kāyasaṃsaggajampi ca;  
Pārājikāni kāyamhā, ime dve pana jāyare.
898. Samānasamvāsakabhūmi ekā;  
Tattheva nānāpadapubbikā ca;  
Dve eva saṃvāsakabhūmiyo hi;  
Mahesinā kāruṇikena vuttā.
899. Pārivāsikabhikkhussa, tathā mānattacārino;  
Ratticchedo duvinnam tu, dvayātītena dīpito.
900. Dvaṅgulapabbaparamaṃ, ādātammaṃ, tattheva ca;  
Dvaṅgulaṃ vā dumāsaṃ vā, paññattā dvaṅgulā duve.
901. Kati pāṇātipātasmim, vācā pārājikā kati?  
Kati obhāsane vuttā, sañcaritte tathā kati?
902. Tisso pāṇātipātasmim;  
Vācā pārājikā tayo;  
Obhāsane tayo vuttā;  
Sañcaritte tathā tayo.
903. Anodissakamopāte, khate marati mānuso;  
Pārājikaṃ siyā, yakkhe, pete thullaccayaṃ mate.
904. Tiracchānagate tattha, mate pācittiyam vade;  
Imā pāṇātipātasmim, tisso āpattiyo siyuṃ.
905. Manussamāraṇādinnā-dānamāṇattiyāpi ca;  
Manussuttaridhammañca, vadato vācikā tayo.
906. Maggadvayaṃ panodissa, vaṇṇādibhaṇane garuṃ;  
Thullaccayaṃ panodissa, ubbhajāṇumadhakkhakaṃ.
907. Ubbhakkhakamadhojāṇu-mādissa bhaṇato pana;  
Dukkaṭam pana niddiṭṭham, tisso obhāsana yimā.

908. Paṭiggaṇhanatādīhi, tīhi saṅghādisesatā;  
Dvīhi thullaccayaṃ vuttaṃ, ekena pana dukkaṭaṃ.
909. Chindato kati āpatti, chaḍḍitappaccayā kati?  
Chindantassa tu tissova, pañca chaḍḍitappaccayā.
910. Hoti pārājikaṃ tassa, chindantassa vanappatiṃ;  
Bhūtagāmaṃ tu pācitti, aṅgajātaṃ tu thullatā.
911. Viṣaṃ chaḍḍetyanodissa, manusso marati tena ce;  
Pārājikaṃ, mate yakkhe, pete thullaccayaṃ siyā.
912. Tiracchāne tu pācitti, viṣaṭṭhichaḍḍane garuṃ;  
Harituccārapassāva-chaḍḍane dukkaṭaṃ matam.
913. Gacchato katidhāpatti, ṭhitassa kati me vada?  
Kati honti nisinnassa, nipannassāpi kittakā?
914. Gacchantassa catassova, ṭhitassāpi ca tattakā;  
Nisinnassa catassova, nipannassāpi tattakā.
915. Bhikkhu bhikkhuniyā saddhiṃ, saṃvidhāne tu dukkaṭaṃ;  
Pācittaññassa gāmassa, upacārokkame siyā.
916. Thullaccayaṃ parikkhitte, gāmasmiṃ paṭhame pade;  
Garukaṃ dutiye hoti, gāmantaraṃ vajantiyā.
917. Paṭicchanne panokāse, bhikkhunī mittasanthavā;  
Posassa hatthapāse tu, pācitti yadi tiṭṭhati.
918. Hatthapāsaṃ jahitvāna, sace tiṭṭhati dukkaṭaṃ;  
Aruṇuggamane kāle, dutiyā hatthapāsakaṃ.
919. Hitvā tiṭṭhantiyā tassā, thullaccayamudīritaṃ;  
Hitvā tiṭṭhati ce tassā, hoti saṅghādisesatā.
920. Nisinnāya catassova, nipannāyāpi tattakā;  
Honti vuttapakārāva, viññeyyā vinayaññunā.
921. Yāvatiyake vuttā, kati āpattiyo vada?  
Yāvatiyake vuttā, tisso āpattiyo suṇa.
922. Phuse pārājikāpattiṃ, ukkhittassānuvattikā;  
Saṅghādisesatā saṅgha-bhedakassānuvattino.
923. Anissagge tu pācitti, pāpikāya ca diṭṭhiyā;  
Yāvatiyake tisso, honti āpattiyo imā.
924. Khādato kati niddiṭṭhā, bhojanappaccayā kati?  
Khādato pana tissova, pañca bhojanakāraṇā.
925. Thullaccayaṃ manussānaṃ, maṃsaṃ khādati, dukkaṭaṃ;

Sesakānaṃ tu, pācitti, lasuṇaṃ bhakkhayantiyā.

926. Avassutassa posassa, hatthato hi avassutā;  
Gahetvā bhojanaṃ kiñci, sabbāṃ maṃsaṃ akappiyaṃ.
927. Viññāpetvāna attatthaṃ, gahetvā bhojanampi ca;  
Lasuṇampi ca missetvā, ekatajjhoharantiyā.
928. Thullaccayaṇca pācitti, pāṭidesaniyampi ca;  
Dukkaṭaṃ garukañcāti, pañca āpattiyo siyuṃ.
929. Olokentassa niddiṭṭhā, kati āpattiyo vada?  
Olokentassa niddiṭṭhā, ekāpatti mahesinā.
930. Dukkaṭaṃ rattacittena, aṅgajātaṃ panitthiyā;  
Olokentassa vā vuttaṃ, mukhaṃ bhikkhaṃ dadantiyā.
931. Kati ukkhittakā vuttā, sammāvattanakā kati?  
Tayo ukkhittakā vuttā, tecattālīsa vattanā.
932. Adassanappaṭīkamme, āpannāpattiyā duve;  
Eko appaṭinissagge, pāpikāya ca diṭṭhiyā.
933. Kati nāsitaṃ vuttā, katīnaṃ ekavācikaṃ?  
Tayo nāsitaṃ vuttā, tiṇṇannaṃ ekavācikaṃ.
934. Mettiyā dūsako ceva, kaṇṭakoti tayo ime;  
Liṅgasamvāsadaṇḍehi, nāsitaṃ hi yathākkamaṃ.
935. Ekupajjhāyakeneva, ekenācariyena ca;  
Dve tayo anusāvetuṃ, vaṭṭatīti ca niddise.
936. Ñattiyā kappanā ceva, tathā vipakatampi ca;  
Atītakaraṇaṅceti, tayo kammaṃ saṅgahā.
937. Ñattiyā kappanā nāma, “dadeyya” ccevamādikaṃ;  
“Deti saṅgho, karotī”ti, ādi **vippakataṃ** siyā.
938. “Dinnaṃ, kataṃ” paniccādi, **atītakaraṇaṃ** siyā;  
Saṅgayhanti hi sabbāni, kammānetehi tīhipi.
939. Saṅghe salākagāhena, kammenapi ca kevalaṃ;  
Kāraṇehi pana dvīhi, saṅgho bhijjati, naññathā.
940. Saṅghabhedakabhikkhussa, tassa pārājikaṃ siyā;  
Anuvattakabhikkhūnaṃ, thullaccayamudīritaṃ.
941. Payuttāyuttavācāya, kati āpattiyo phuse?  
Payuttāyuttavācāya, cha panāpattiyo phuse.
942. Ājīvāhetu pāpiccho, icchāpakatamānaso;  
Asantaṃ uttariṃ dhammaṃ, ullapanto parājito.



943. Sañcarittam samāpanne, tathā saṅghādisesatā;  
Yo te vasati ārāme, vadam thullaccayaṃ phuse.
944. Viññāpetvā paṇītam tu, bhojanaṃ bhikkhu bhuñjati;  
Pācitti bhikkhuniyā ce, paṭidesaniyaṃ siyā.
945. Viññāpetvāna sūpaṃ vā, odanaṃ vā anāmayo;  
Bhikkhu bhuñjati ce tassa, hoti āpatti dukkaṭam.
946. Dasasatāni rattīnaṃ, chādetvāpattiyo pana;  
Dasa rattiyo vasitvāna, mucceyya pārivāsiko.
947. Pārājikāni aṭṭheva, tevīsa garukā pana;  
Dveyevāniyatā vuttā, buddhenādiccabandhunā.
948. Nissaggiyāni vuttāni, dve cattālīsa honti hi;  
Honti pācittiyā sabbā, aṭṭhāsītisatam pana.
949. Pāṭidesaniyā vuttā, dvādaseva mahesinā;  
Vuttā pana susikkhena, pañcasattati sekhiyā.
950. Paññattāni supaññena, gotamena yasassinā;  
Bhavanti pana sabbāni, aḍḍhuḍḍhāni satāni hi.
951. Yo panetesu vattabbo;  
Sārabhūto vinicchayo;  
So mayā sakalo vutto;  
Samāseneva sabbathā.
952. Mayā suṭṭhu vicāretvā, pāḷiaṭṭhakathānayaṃ;  
Katattā ādaraṃ katvā, uggahetabbamevidaṃ.
953. Atthe akkharabandhe vā, viññāsassa kamepi vā;  
Kaṅkhā tasmā na kātabbā, kātabbā bahumānatā.
954. Sauttaram yo jānāti;  
Vinayassa vinicchayaṃ;  
Nissayaṃ so vimuñcitvā;  
Yathākāmaṅgamo siyā.
955. Nissayaṃ dātukāmena, savibhaṅgaṃ samātikam;  
Suṭṭhu vācuggataṃ katvā, ñatvā dātabbamevidaṃ.
956. Imaṃ paṭhati cinteti, suṇāti paripucchati;  
Vāceti ca paraṃ niccaṃ, atthaṃ upaparikkhati.
957. Yo tassa pana bhikkhussa, atthā vinayanissitā;  
Upaṭṭhahanti sabbeva, hatthe āmalakaṃ viya.
958. Imaṃ paramamuttaram uttaram;  
Naro hamatasāgaram sāgaram;  
Abuddhijanasāradaṃ sāradaṃ;

Siyā vinayapārago pārago.

959. Ato hi niccaṃ imamuttamaṃ tamaṃ;  
Vidhūya sikkhe guṇasaṃhitamaṃ hitamaṃ;  
Naro hi sakkaccavapūrato rato;  
Sukhassa sabbaṅgaṇakammadaṃ padaṃ.
960. Vinaye paṭubhāvakare parame;  
Piṭake paṭutaṃ abhipatthayātā;  
Vidhinā paṭunā paṭunā yatinā;  
Pariyāpuṇitabbamidaṃ satataṃ.

### Nigamanakathā

961. Racito **buddhadattena**, suddhacittena dhīmatā;  
Suciraṭṭhitikāmena, sāsanassa mahesino.
962. Antarenantarāyaṃ tu, yathā siddhimupāgato;  
Atthato ganthato ceva, uttaroyamanuttaro.
963. Tathā sijjhantu saṅkappā, sattānaṃ dhammasaṃyutā;  
Rājā pātu mahiṃ sammā, kāle devo pavassatu.
964. Yāva tiṭṭhati selindo, yāva cando virocati;  
Tāva tiṭṭhatu saddhammo, gotamassa mahesino.
965. Khantisoraccasōlya-buddhisaddhādayādayo;  
Patiṭṭhitā guṇā yasmim, ratanānīva sāgare.
966. Vinayācārayuttana, tena sakkacca sādaraṃ;  
Yācito **saṅghapālena**, therena thiracetasā.
967. Suciraṭṭhitikāmena, vinayassa mahesino;  
Bhikkhūnaṃ pāṭavatthāya, vinayassa vinicchaye.
968. Akāsiṃ paramaṃ etaṃ, **uttaraṃ** nāma nāmato;  
Savane sādaraṃ katvā, sikkhitabbo tato ayaṃ.
969. Paññāsādhikasāṅkhyāni, navagāthāsātāni hi;  
Gaṇanā uttarassāyaṃ, chandasānuṭṭhubhena tu.
970. Gāthā catusahassāni, satañca ūnavīsati;  
Pamāṇato imā vuttā, vinayassa vinicchayeti.

Iti tambapaṇṇiyena paramaveyyākaraṇena tipīṭakanayavidhikusalena  
paramakavijanahadayapadumavanavikasanakarena kavivaravasabhena  
paramaratikaravaramadhuravacanuggārena uragapurena **buddhadattena** racito uttaravinicchayo  
samattoti.

Uttaravinicchayo niṭṭhito.